




Early European Books, Copyright © 2011 ProQuest LLC.  
Images reproduced by courtesy of the Biblioteca Nazionale Centrale di  
Firenze.  
CFMAGL. 1.6.226







Early European Books, Copyright © 2011 ProQuest LLC.  
Images reproduced by courtesy of the Biblioteca Nazionale Centrale di  
Firenze.  
CFMAGL. 1.6.226





Early European Books, Copyright © 2011 ProQuest LLC.  
Images reproduced by courtesy of the Biblioteca Nazionale Centrale di  
Firenze.  
CFMAGL. 1.6.226



Early European Books, Copyright © 2011 ProQuest LLC.  
Images reproduced by courtesy of the Biblioteca Nazionale Centrale di  
Firenze.  
CFMAGL. 1.6.226



1.6.226













4.6.336  
I  
GLORIA  
ACADEMIÆ  
ALTDORFINÆ

*sive*

ORATIONVM FASCICVLVS  
Vniversitatis Noricæ Ortum, Progref-  
sum & cuncta Memorabilia, omniumq; Professorum,  
qui in qvatuor, uti vocant, Facultatibus, à primis eam ornâ-  
runt incunabulis, Vitas, Mortes ac Scripta,  
fideliter exhibens;

*concinnatus operâ*

MAGNI DANIELIS OMEISI,

Philos. M. & in eadem Acad. Ethices  
ac Eloquentiæ Prof. P.

*Accesserunt*

JOH. PAULI FELWINGERI  
LAUDATIO POSTHVMA,

*nec non*

Illustrantia superiores Orationes  
ADDITAMENTA,

*variæ*

INSCRIPTIONES,

ac Personarum Rerumq; præcipuarum *Index*.

ALTDORFI,

Typis & sumtibus HENRICI MEYERI, Acad. Typographi,

Anno *M DC LXXXIII*.









GENEROSIS, MAGNIFICIS, MAXIME STRENVIS  
PRVDENTISSIMISQVE

VIRIS

DN. GABRIELI NÜTZELIO

ab & in Sinderspühl,

Inclytæ REIP. NORIMB. Triumviro, Eccles. Ephoro  
ac Proto-Scholarchæ &c.

DN. WILHELMO IM HOF,  
DN. JOH. PAVLO PAVM-  
GARTNERO

ab Holenstein & Lohnerstadt, in Grünsperg,

DN. CAROLO WELSERO

à Neunhof,

Ejusdem Florentissimæ REIP. SENATORIBVS  
& SCHOLARCHIS

*de VNIVERSITATE ALTDORFINA summè*  
*per omnia meritis;*

nec non

MAGNIFICO, NOBILISSIMO, EXCELLENTISSIMOQVE

VIRO

DN. MAGNO FETZERO, Seniori,

DIVERSORVM S. R. I. STATVVM, ac præcipuè Lau-  
datisimæ REIP. NORIMB. Consiliario Intimo & Primo,

*Academiaq. Altdorfina* Procancellario de eadem longè  
pariter meritissimo;

DOMINIS AC PATRONIS  
*obsequio & observantia maximopere colendis,*

MAGNVS DANIEL OMEIS

Vitam ac Felicitatem.!





Voties Urbem meam patriam, illustrem NORIMBERGAM, intueor, & oculos per ejusdem decora & ornamenta circumfero, incertum habeo, quid primum in ea, quid secundum, quid postremum mirari debeam ac venerari. Jam enim quando externam ejus faciem adspecto, succurrunt memoriæ verba *Aeneæ Sylvii*, Cardinalis Senensis (qui Pontifex postea *Pius II* dictus) ad Martinum Majorem *ICtum* scripta: *Dic, rogamus, quanam facies hujus Urbis, qui splendor, quæ amœnitas, quæ delicia, quæ majestas, qui nitor platearum, quæ domorum munditiæ? Quid S. Sebaldi templo magnificentius, quid splendidius Divi Laurentii delubro? Quid arce regia vel superbius, vel munitius? Quid fossa, quid mœnibus illustrius? Quot ibi civium ades invenias Regibus dignas? Cuferent profectò tam egregiè Scotorum Reges, quàm mediocres Norimbergæ cives, habitare. Quodsi ad formam illius internam & Statum respicio, iterum mecum cogito ejusdem*



dem verba Sylvii: *Quæ forma regiminis? quid  
in illa, quod ad civitatem omni ex parte perfe-  
ctam pertineat, desiderare quispiam poterit?*  
Quanta Inclyti SENATVS prudentia, legum  
reverentia, civium frequentia, negotiationum  
varietas, rerumq; omnium multitudo, &, quod  
caput rei est, concinnus ordo? Vt prorsus in  
*Vrbis ac Reip.* hujus magnitudine constituenda  
Natura & Labor, Virtus ac Fortuna videantur  
contendisse. Quæ cuncta quidem quancquam  
eximia planè sunt & admiranda, famamqve  
REIP. Florentissimæ domi forisq; differunt; in-  
ter maxima tamen & peculiaria ejus ornamen-  
ta illud meritò est numerandum, quòd Illustris  
SENATVS NORIMB. statim post Ecclesiam  
superiore seculo salutariter reformatam, te-  
tram pariter, quæ rem omnem literariam mi-  
serè antea fœdaverat, barbariem è finibus suis  
propulsaverit, ejecerit, revocatas contrà ab exi-  
lio in Urbem Musas benignissimo exceperit ho-  
spitio, ac præter *Scholas*, quas triviales vocant,  
non tantùm celebre oppidò *Gymnasium* mira  
aperuerit solertia, magno illo *Melanchthone*  
præcone, qui in Sermone Inaugurali factum

\* 3

hoc



hoc dignissimum esse censuit, cuius memoriam  
posteritas omnis gratissimo retineat pectore;  
verum secutis postea temporibus, in ditione  
sua, heic *Altdorffii*, sumtibus multò maximis  
nulliq; silenda seculo magnificentia, annuente  
cumprimis Supremo NUMINE, Divisq; IM-  
PERATORIBVS successum exoptatissimum  
largientibus, nobilem exstrui *Academiam* cu-  
raverit, evocatis per amplissima præmia Viris  
Celebratissimis exornaverit, eamq; per longos  
difficillimorum etiam temporum decursus in-  
tegram adhuc florentemq; conservaverit. No-  
vit quippe SENATVS Sapientissimus, quòd  
publicè privatimq;, si quidquam aliud, maximè  
expediat, optima artium ingenuarum studia,  
non abjici, non contemni, sed diligenter coli,  
ipsisqve apta Musis domicilia parari debere ac  
consecrari. Quodsi secus fiat, gravissimæ sanè  
calamitates turbulentissimæq; tempestates in  
qvavis etiam bene aliàs constituta Rep. solent  
exoriri. Pulsa enim vera eruditione, extermi-  
nata sapientia, fugatis artibus ac studiis, in locum  
succedent ignorantia turpis, insulsæ ac monstro-  
sæ opiniones, detestanda improbitas; emarcescet  
juven-



14

§§§§      §§§§

juventus, langvescent viri, computrescent senes, rebellabunt cives, despicietur Senatus, proculcabuntur sacerdotes, ludibrio exponetur iustitia, omnisq; societas nil nisi Cyclopica erit barbaries atrumq; funus. Pleni sunt omnes libri, plenæ exemplorum historiæ, quibus ita statuisse antiquissimis jam temporibus viros sapientes constat, potentissimas opulentissimasq; Vrbes, scholis, professoribus, bibliothecis, aliisq; bonarum artium instrumentis, carere minimè posse. Quid Alexandriam, Athenas, Capuam, Antiochiam, Massiliam, Syracusas, Tarentum, Vetulonium, Neapolin, commemorabo; quæ non tam civium multitudine, mercimoniis, opibus, potentia, inclaruerunt, quàm artibus iis, quibus ætas juvenilis ad humanitatem solet informari. Quid illa gentium terrarumq; domina Roma, annon *ex Vtroq;* Imperatrix facta, *Arte & Marte*? Annon exercitus simul ordinavit, ac dicendi præscripsit leges, simul Dictatorem castris præfecit, ac Oratores pro rostris declamantes audivit? Ut malè profectò rationes subducere mihi videantur, qui Musis cum Marte non convenire autumant, Scholasq; & Aca-



❧ ❧

& Academias à civitatibus arceri cupiunt. Quod ille apud Plautum inquit, *In bono amico atq; hospite quæstus est quod insumitur*; id ego de Scholis illustribus, iis præsertim quas *Academias* nuncupamus, confidenter dixerim. Est enim Lyceum tale publicum, disciplinarum omnium officina, in qua præclara excuduntur ingenia, ad evehenda scientiarum augmenta & consequendam famæ æternitatem: est instructissimum armamentarium, ex quo omne telorum genus, ad debellanda ignorantiae monstra, ac munienda sepiendaq; firmitus bonarum artium pomœria aptorum, depromitur: est famigerabile liberalium disciplinarum emporium, in quo ultrò citroq; commeantes cives & advenæ studiis & laboribus negotiantur immortalitatem: est fertilissimum Ecclesiæ ac Reip. plantarium, ubi in herbis est spes omnis civitatis, & ex quo tot nobiles furculi ad palmam & decus efflorescunt: est alter in terris paradisus ac hortus Eden, è quo Ganges Theologiæ, Nilus Jurisprudentiæ, Tigris Medicinæ, Euphrates Philosophiæ, sive Doctrinarum, Virtutum, Morum, Honorumq; fontes orbem universum foecun-



foecundant, atqve, ut Lucretiano verbo utar,  
diluviant: est quoddam Apollinis templum  
atq; oraculum, unde responsa ac sortes petit  
Senatus populusqve eruditorum: est palæstra  
nobilis, è cuius umbratili exercitatione in cœ-  
lum ac solem producuntur quotidie tot fortes  
in sago ac toga athletæ: est fatalis equus, mi-  
litibus strenuis semper foetus, non excidio Tro-  
jæ, sed mortalium saluti divina Palladis arte æ-  
dificatus, ex quo diversi diversorum ordinum  
homines, omni tempore, frequente prodeunt  
numero, & alii quidem in aulas, alii in curias,  
quidam in templa, nonnulli in scholas, profili-  
unt, non locis tantum ac regionibus patriis, ve-  
rùm perpetuis humani generis ætatibus tem-  
poribusq; profuturi. O ergò felicem Remp.  
quæ tanto gaudet thesauro, tanto ærario, pro-  
movendæ DEI gloriæ, Ecclesiæ saluti, civitatiq;  
universæ, quàm maximè utili ac fructuoso!  
O incomparabilem Sapientissimi SENATUS  
NORIMB. in cives suos, horumq; natos, & qui  
nascentur ab illis, liberalitatem benignitatem-  
que, quâ maximorum Regum Principumq; ve-  
stigiis insistens, *Academiam* hanc nostram *Alt-*

\* \*

*dorfi-*





❧ ❧ ❧ ❧ ❧ ❧ ❧ ❧

*dorfinam* tam magnificè condidit, conditam omnibus modis amplificavit, amplificatam clemente præsidio ac subsidio suo tueri, conservare ac propagare contendit. Quanta hinc lux dignitatis ac splendoris laudatissimo SENATVI, apud exteros etiam, longè lateq; exorta? quantus laudum ac gratiarum cumulus? quanta gloria? quæ vigebit memoriâ seculorum omnium, quam posteritas alet, quam ipsa æternitas intuebitur.

De *Universitate* hac *patria* quæcunq; hoc in *Orationum fasciculo*, ejusq; *Additamentis*, collecta sunt Memorabilia, VOBIS, VIRI GENEROSI AC MAGNIFICI inscribere, honoriq; vestro sempiterno consecrare ausus sum, quòd ea, præ cæteris aliis, VOBIS non uno debebantur nomine. Vos enim providâ circumspectissimaq; Inclyti SENATVS NORIMB. curâ designati estis his temporibus Academiae hujus Curatores, Patroni ac Numina tutelaria; quorum sub patrocinio Musæ nostræ Altdorfinæ sacris indulgent otiiis, atq; halcyoneos agunt dies; quorum lumine splendent hodieq;, & ad remotos mundi terminos suæ projectant radios famæ;  
qvo-





VI

quorum tam præclara atqve immortalia hoc in  
Athenæum sunt merita, ut æqvissimum duxe-  
rim, hanc quantulamcunqve laboris mei ope-  
ram *Magnis Vestris* dedicare *Nominibus*, eaq;  
in omnium, quotqvot Libellum huncce legent,  
conspectu locare, ac perennaturæ postero-  
rum memoriæ, hac veluti tabula in Famæ de-  
lubro suspensa, commendare. Qvicqvīd in di-  
vina hac Pieridum sede, sapientiæ domicilio, se-  
curissimo literarum sacrario, & magnarum ani-  
marum prytaneo, partim Antecessorum vestro-  
rum, partim vestris auspiciis, labore autem ac  
industria Professorum, feliciter excogitatum  
præstitumq;, & à me hīc annotatum est, id o-  
mne non potest non cedere vestræ cumprimis  
laudi atq; existimationi. Sicut flumina ex vasta  
Oceani amplitudine profluentia, ad eandem il-  
lam, veluti matrem suam, citato ac perenni re-  
deunt cursu; ita qvi ex uberrimis Vestræ Ma-  
jorumqve vestrorum Prudentiæ Benignitatisq;  
fontibus hoc in Lyceum Altdorfinum emanâ-  
runt rivi, ad VOS vicissim cum novo Gloriæ  
vestræ augmento revertuntur. Accipite ergo,  
VIRI Summi, Patroni Maximi, benignis vultu-  
bus

\* \* 2



❧ ❧

bus hanc qualemq; pietatis meæ, ac pro tot  
tantisq; benefactis grati animi, tesseram; Nobi-  
lissimisq; *Nominibus Vestris* inscripta legi per-  
mittite, quæ ab omni posteritate non sine pul-  
cherrimo sapientiæ ac magnificentiæ vestræ e-  
logio perpetuò legentur. Favete *Gloria* huic  
*Academiae Altdorfinae*, & in ea simul *Vestræ*!  
Custodite, quem DEVS curæ fideiq; vestræ com-  
misit, pretiosissimum hunc illustri scholæ the-  
saurum deinceps quoque, in divinæ gloriæ aug-  
mentum, atq; ingens Reip. emolumentum;  
thesaurum, quem nec ærugo edit, nec rodit ti-  
nea, nec rimantur fures, nec Vulcani Neptuni-  
ve ira absumit. Est hic *Vobis* signatorius in di-  
gito annulus, esto, optamus, nota memorialis  
manibus vestris impressa, atq; ut cordi affectuiq;  
proxima sit, jaceat inter ubera vestra tam pre-  
tiosa tam dilecta merces. Nolite, quæso, com-  
mittere, ut cuiquam vel ad suspicandum olim,  
vel nunc metuendum, causa præbeatur, quasi  
vestro sub regimine Academiae flori ac vigori  
quidquam decesserit aut decessurum sit. Ac  
licet superbus Asiæ regnator & trux Hannibal  
ad Pannoniarum portas nunc sedeat, stupen-  
doq;



❧ ❧

doq; belli apparatu Europam perterrefaciat; licet ab occidente pariter nubes atra atqve horrenda ignei spiritus tortis vibratisq; discursibus videatur exsurgere; licet Reges Principesq; terrarum mutuo motu aut metu invicem suspensi hæreant; VOS tamen, PATRONI Optimi, concedite, ut in umbra Academica, veluti alta in pace, pacis studia nos porrò meditemur, nec apertò Jani templò Musarum atria claudantur. Et verò qvòd singulari atqve inaudita virtute RESP. NORIMB. sæviante etiam Bellonâ Minervam respiciat, Professoribus æqvè ac Militibus liberalia eroget stipendia, lauruq; duplici Apollini Martiq; sacra superbiat, id jam ab illustri Scaligero, Patre, deprædicatum est; qvi memorabile suum, qvòd de Vrbe Nuremberga fudit, carmen, his obsignat versibus:

*Quis putet horrifico sociatas Marte Camæ-  
nas?*

*Sacra tamen duplex tempora laurus obit.  
Martis habe, & Phæbi felicia tempora lau-  
te:*

*sanctaq; sit valido fœdere juncta fides.*

*\*\* 3*

*Omni-*





☞☞☞ ☞☞☞  
*Omnibus ex istis ne tu ne dempseris unum.  
Addere quoniam potius omnia magna, tuum  
est!*

Sic nos docentes juxta ac discentes quotidiē ar-  
dentissima vota precesque pro Amplissimi SE-  
NATVS NORIMB. perpetua felicitate, ac Ve-  
stra speciatim incolumitate, salute, vita, nun-  
cupabimus, atque indefesso operabimur studio,  
ut, cū nihil in rebus humanis sit opere aut  
manu factum, quod non aliquando conficiat  
& consumat vetustas, Vestrae tamen laudes &  
gloria florescant magis ac magis, incrementisq;  
perennibus ad seros nepotes & longē ventura  
secula transmittantur, non desiturae, donec  
cum orbe haec desierit esse Academia. Va-  
lete DOMINI AC PATRONI; DEVS  
Vos Patriae, Vniuersitati, ac mihi, diu seruet so-  
spitetq;! Scrib. Altdorf I Nor. ipsis Non. Maji,  
A. O. R. cio idc LXXXIII.

AD





## AD LECTOREM.


**A**Nte ipsos jam annos septem recitata est meo sub modera-  
mine Oratio hoc in Fasciculo prima, de Memorabili-  
bus Academiae Altdorfinae; eaq., iubentibus mox  
declamatoris mei Patronis, prelo typico subiecta. Non  
improbârunt hoc institutum nostrum Auditores Lectoresq. bene  
multi, vel ideo, quia Altdorfina nostra paucos adhuc naeta erat  
laudatores; aut si quis de ejusdem cogitârit praconio, parum ta-  
men aut nihil hujus prodierat in lucem. Ac tunc quidem propo-  
situm mihi non erat, alma hujus meorum quoq. studiorum nutri-  
cula laudes, siue hoc siue alio scribendi modo persequi pluribus; et si  
qua in prima illa Oratione de celeberrimis Lycei hujus Professô-  
ribus dicenda fuissent prolixius, breviter tantum ac strictim erant  
commemorata. Tempore autem procedente commilitones qui-  
dam, praeclari Juvenes, quos merito suo in sequentibus laudavi  
Programmatibus, opera mecum putaverunt pretium fieri posse,  
si de Altdorfinis quatuor, uti vocamus, Facultatum Professo-  
ribus singillatim conscriberentur Orationes, & quae de ipsorum  
hanc in Universitatem meritis ac scriptis colligi possint, prae dica-  
rentur pro Senatus Populiq. Academici concione. Exorsa igitur  
nobis hac est tela non male omnino, tandemq. DEI virtute per-  
texta. Et postquam partim de scripto partim memoriter, pu-  
blico in acroaterio, haec quoq. recitata fuerant Orationes, stimu-  
labant me, eas ut publicarem, Auditorum complures, ac nonnulli  
etiam ex Ampliss. Dnn. Collegis meis, quibus uti debitum sem-  
per honorem lubens defero, ita hac sanè in re obsequium detre-  
ctare, nefas merito ducebam. Accessit & aliorum desiderium,  
qui, cum primae Dissertationis exemplaria, et si non pauca, celer-  
rimè distracta fuerint, novam ejus expetierunt editionem. Red-  
didi igitur primam illam Orationem incudi, & pauca quaedam,  
poscente id praesentis temporis statu, addidi atq. immutavi; mox  
& reliquas curâ secundâ percurri: in quibus si fortasse rigidior  
quispiam Aristarchus nonnulla ad exactam scribendi normam  
haud



haud adeò limata deprehenderit, is sciat, maluisse me auctoribus  
sua, ut primum pro aetate captu atq; indole nata sunt, relinquere,  
quàm multa adsuere aliena. Faciant potius jacturam ornatus,  
quàm laboris sui, Eximii Juvenes; dum ipsis ac mihi sola hæc  
suffecerit ambitio, nos bonorum civium Academicorum, piorumq;  
erga tot Beatos Manes veneratorum, officio, ex fide saltem, si  
minus ex decoro, perfunctos esse. Interea tamen, dum typis al-  
tera jam vice excusa fuerat Oratio prima, secundaq; ac tertia  
à typographo lentè satis, reliquarum verò nimis festinanter, pa-  
rabatur impressio, succurrerunt occurreruntq; mihi non pauca ad  
argumentum hoc magis illustrandum apprimè pertinentia; quæ  
ad calcem libelli, operâ licet verè extemporali, adjicere utiq; duxi  
conveniens. Quemadmodum enim, qui vindemiam faciunt,  
si post primam uvarum collectionem fortè in racemos quosdam  
haud pœnitendos inciderint, eos quoq; in torcular injiciunt, sicq;  
non modò fidem solvunt dominis debitam, sed & rem illis præ-  
stant non ingratam: haud secus ea, quæ Orationibus istis super-  
addidi, & grata tibi, Lector, fore spero, & utilia. Adhæc cum  
monumenta quædam sepulcralia Orationibus jam excusis in-  
serta, minus accuratè ab aliis (quibus Oratores mei habebant fi-  
dem) descripta animadverterem, haud pigritus ipse sum oppi-  
danum visere templum, obire acroateria, perreptare sepulcre-  
tum, Inscriptionesq; instituto nostro inservientes diligenter colli-  
gere, ac bona fide, Lector Benevole, tecum communicare. Qua-  
re nec tu pigraberis, ipsi Orationum lectioni sedulò conferre sub-  
junctum hoc, factâ jam messe, spicilegium. Atq; sic satis, opinor,  
probari tibi facti nostri rationem. Dixeris forsan: Majorem ta-  
men à me inivisses gratiam, si Res Altdorfinas aliâ scriben-  
di ratione recensuisses, cum primis Historicâ, atq; icones simul  
Dnn. Professorum si non omnes, eas saltem, quarum copia haberi  
potuisset, exhibuisses! Ad quæ breviter hoc tibi in aurem: Quod  
sole verno haud potuit, maturescet fortassis autumnò.  
Interim his frui, mihiq; si mereor, fave!

ORA-





# ORATIO I

De

## MEMORABILIBVS ACADEMIÆ

ALTDORFINÆ.

### PROGRAMMA.



*Ratoriae exercitationi dictus est dies Saturni crastinus, cuius horâ pomeridianâ primâ, loco consuetô, suas in dicendo vires experietur è iuventute erudita Eximius ac Præstantissimus DN. JOHANNES MAVRICIVS LAVBINGERVS, Schwandio-Marchicus, solertissimus Philosophiæ pariter & Theologiæ Studiosus. Is argumentum Orationis aliunde non quæret longius; nec propositum ipsi est cum Phavorino Therpsitem aut quartanam laudare, calvitium cum Synesio, muscam & parasiticam cum Luciano. Materiam hic ipse locus suggerit. Altdorfii de Academia Altdorfina dicturus est. Neg. verò, ut splendorem arcessat orationi, dicere multa necesse habebit de origine scholarum academiarumq., aut de earundem perpetua successione ad hæc usq. tempora, ne actum agere, & post Homerum Iliada scribere videatur; nec literarum scholarumq. utilitates multis persequatur, cum ad encomia illa πολυδρόμη non incommode Virgilianum illud despecti possit:*

--- --- Quis non Eurythea durum,  
Aut illaudati nescit Busiridis aras?

A

Cui



Cui non dictus Hylas puer, & Latonia Delos,  
Hippodameq; humeroq; Pelops insignis eburno?  
*Verum ACADEMIÆ ALTDORFINÆ MEMORABILIA* recensebit, non per vulgata illa vel protrita, sed digna, de quibus nulla secuturi temporis ætas conticescat. Multa proferant commemorabilia eruditi de antiq. vssima Ebræorum Hebron, vetustissima Phœnicum Debira, nobilissima Ægyptiorum Memphitica, pulcherrima doctrinæ officina Alexandria, illo *ἡ δὲ πόλις* Athenis, & primo in Italia bonarum artium seminario Vetulonio; consecrent literarum perennitates res memoratu dignissimas de celebrioribus aliis Europæ, & in primis Germaniæ, scholis; plurima q. v. ad memoriam insignia habet hæc nostra Altdorfina, propter quæ nonnullis illarum palmam præripere, bene multis certè dubiam reddere sustineat. Quid tu verò ad hæc? Nihil esse domi, dicis, nihil hac in Vniuersitate, quod visu, quod cognitu, quod scitu dignum & memorabile? Ita quidem videri possit nonnullis, in quos Plinii illa quædrant: Ad quæ noscenda iter ingredi, transmittere mare solemus, ea, sub oculis posita, negligimus: seu, quia ita naturâ comparatum, ut proximorum incuriosi, longinqua sectemur; seu, quod omnium rerum cupido langvescit, cum facilis est occasio, seu quod differimus, tanquam sæpe visuri, quod datur videre, quoties velis cernere. Hac ipsa igitur de re in Oratorio campo tecum contendet cū vis nunc atq; hospes noster antè laudatus, mellitisq; verborum globulis & clarissimis ostendet rationibus, nos fortunatos nimium, nostra si bona noverimus agricolæ. *Maße* virtute hac, doctissime LAVBINGERE! Campus magnus & apertus, fateor, tibi datur, in quo latissime possit tua excurrere Oratio. Vos autem, Magnifice DN. RECTOR, Perillatris & Generosissime DN. BARO, Excellentissimi, Clarissimiq; DNN. PROFESSORES, Tuq;  
Nobi-



Nobilissima Studiosorum Corona, hanc Oratoris nostri  
industriam suffragiis vestris ut ornetis, presentiq; dignemini  
auscultatione, per tot Academiae hujus sacra precamur atq;  
contendimus. Est haec ipsa illa Altdorfina, cujus omnes mem-  
bra sumus, quaeq; nos cunctos uno sinu complectitur. In ejus  
unius gloriam vergere volumus, quicquid de ipsa audietis.  
Audietis verò primum de tenellis nascentis Gymnasii incuna-  
bulis, primisq; rudimentis. Neq; enim statim à fonte altum  
oritur flumen; non ipsò lucis ortu splendet meridies, nec in cu-  
nis infans disertus est. Post haec parvulis ejusdem primordiis  
majorem subinde cumulum majusq; decus accessisse, mirabun-  
di spectabitis, totq; & tanta de Norico hoc Lyceo percipietis  
**MEMORABILIA**, quae omnis cogitabit memoria, omnis  
loquetur posteritas. Quod reliquum est, perennem sapien-  
tiae fontem **DEVM** publicà voce nobiscum invocabitis, ut  
Universitatis hujus Altdorfinae fata, tempora ac fortunas  
benignè in perpetuum moderetur tueaturq;, & ex alto in po-  
sterum quoq; benedicat Magnificis, maximè Strenuis ac  
**Nobilissimis REIPUBLICAE NORIMBERGENSIS**  
**PROCERIBVS**, munificentissimis Athenæi hujus Nutri-  
toribus, qui sumtibus longè maximis, atq; immortalem ipsis  
gloriam certò paritur à magnificentiâ Academiam, si ve ut  
habet proverbium, domum hanc ædificari coeptam, im-  
politam hactenus non reliquerunt. Benedicat illis

**DEVS, DEVS Israël; & Omnis populus dicat**  
**AMEN!**

**MAGNVS DANIEL OMEIS. P. P.**

A 2

ORA-





# ORATIO.

(Titt.)

L. 15. §. 26.  
ff. de Inju-  
riis.

Catellia-  
nus Corra  
p. 472. &  
seq.

**T**alatio est, verumq; ac vetus optimi civilium juri-  
um magistri verbum illud: *Ea, quæ notabiliter sunt, nisi  
specialiter notentur, videntur quasi neglecta.* Audivistis  
sapiens dictum cum Julio Paulo coryphæi ita nuncupati  
Vlpiani, ipsius Imp. Justiniani encomie eloquentissimi, nobilissimi,  
Cotta sapientissimi, parentis imò ipsius, cujus etiam consiliarius fuerat &  
memoral. scrinii magister. Hujus egregiæ sententiæ memores quin ob-  
servantissimos dum esse oportet, quotquot res gestas legere,  
agrisq; & pagis, & collegiis, & Rebuspublicis & universis deniq;  
regionibus singularem existimationem conciliare student, anti-  
qvitates, & exempla, & præstantiora monumenta commemo-  
rando, historiarum auctores; ecqvis temerè vitio & culpæ da-  
bit, si quis in apricum proferre, atq; ab interitu asferere conten-  
dat maximè memorabilia Academiæ, quæ sunt paradisi ter-  
restres, seminaria ecclesiæ, plantaria Reipublicæ, valla & muri  
societatis humanæ, pietatis, honestatis, tranquillitatisq; thea-  
tra, oculus provinciæ, Spiritus S. officina, Musarum sedes, διδασκα-  
λεῖα λογικῶν καὶ θεωρητικῶν παιδευτήρια: unde tanquam ex liqui-  
da & limpidissima scaturigine populi salus & felicitas promanat.  
Et verò, ut multa paucis complectar, Academiæ sunt salutes &  
perennes fontes, ex quibus vera DEI notitia, omnes honestæ ar-  
tes, cætera vitæ bona, ornamentaq; præcipua in templa, scho-  
las, curias, singulasq; familias exundant.

His virtutum officinis disciplinarumq; emporiis cum ac-  
cenfenda quoque sit alma hæc Altdorfina nostra, de ejus *Memo-  
rabilibus* dicam, pace vestrà, Auditores omnium ordinum hono-  
ratissimi, argumento neq; trito multum, neq; in vulgus cognito,  
neq; in iucundo. Quod meum propositum felicem ut consequatur  
exitum; vosq; adeò de gravissima hac materia pro genii &  
ingenii modulo in hoc amplissimo confessu disferenti faciles &  
benevolas præbere aures ne dedignemini, eâ, quâ par est, animi  
submissione oro atq; contendo.

Et



Et quidem in ipsis carceribus pauca præfari ut liceat de auspiciis Palæocomes nostræ, quemadmodum maximi fluvii exiguis oppidò gaudent fontibus, affluentibus tamen rivis, alluvieque passim ebullientium undarum in majus excrescunt, augenturq; & in unum confluunt: ita etiam se res habet cum academia hac Altdorfina ejusq; primordiis & incrementis. Nimirum post liberatam ab idololatria Pontificia anno 1524. Norimbergensium ecclesiam, Illustris ejusdem Reipublicæ Senatus pro edumato suo adversus liberales artes favore, an. 1526. in cœnobio inprimis Egidiano semina futurorum in universam rem literariam incrementorum jecit, scholamq; præter reliquas urbis dedicavit insigniorem, quam ab Atheniensibus mutuata voce Gymnasium nuncupamus, laudati jam Senatus id temporis principibus CASPARO NÜTZELIO & HIERONYMO EBNERO. Quæ quidem exoptata bonarum mentium sedes cum post annum ejusdem superioris seculi sexagesimum & seqq. à nativo suo splendore, vitio temporum & nescio quo fato, descisceret, Patres Patriæ diu multumq; consiliis agitatis de translatione illius five in cœnobium, cui nomen *Vallis Angelica*, five Hersbruccum, five Altdorfum, relictâ ad divum Egidii scholâ, quam vocant, triviali, tandem Altdorfum selegerunt, ibidemq; die Dominico, prid. Calend. Octobris 1571. adstantibus, manusq; ipsis admoventibus Senatoribus splendidissimis DNN. HIERONYMO PAVMG AERTNERO & CHRISTOPHRO FÜRERO, qui, teste Ern. Sonero, Architecturæ omnes articulos calluit, totum opus à solo excitatum est, lapide in radice ædificii baseos vice suffundato, cui nummus argenteus pro veteri consuetudine fuit insertus, hac quidem cum inscriptione ab una parte:

D. O. M. S.

ANNO A NATO CHRISTO M. D. LXXI. ROM. IMP. DIVO MAXIMILIANO II. RESPUBLICA NORIBERGENSIS, PATRIBVS PATRIÆ ET SEPTEMVIRIS EIVSDEM ANDREA IM HOF, SEBALDO HALLER, JODOCO TETZEL, BALTHASARO DERRER, GABRIELE NÜTZEL, GEORGIO VOLCKAMER, ET THOMA LÖFFELHOLTZ, TVM

A 3

OP-



OPPIDI PRÆFECTO BALTHASARO PAVM-  
GAERTNER, DOMVM HANC PRO GYMNASIO  
IVVENTVTI IN STVDIIS PIETATIS ET LITERA-  
RVM INSTITVENDÆ, A PRIMIS FVNDAMENTIS  
EXSTRVI CVRAVIT. IN CVIVS MEMORIAM  
GEORGIVS VOLCKAMER ET HIERONYMVS  
PAVMGAERTNER, OB DEMANDATAM ECCLE-  
SIARVM ET SCHOLARVM PROCVRATIONEM,  
HOC NVMISMA F. F.

Ab altera parte, circum insignia duplicata Reip. Norimb., supra  
qvæ biceps Aquila, signum Rom. Imperii, hæc est inscriptio:  
FVNDAMENTVM SALVTIS NOSTRÆ CHRISTVS.

Instituto isti non invitâ Minervâ cœpto ubi extrema manus ac-  
cessit, tandem sollennis subsecuta est introductio anno 1575. die  
29. Junii, ut videre est ex *Ἱστορίῃ*, quam collegii porticus no-  
bis etiamnum exhibet, patulâ abunde satis quibusvis ad nos in-  
gressis, & quam proinde ut recitemus hic operæ non est. Et ve-  
rò recens erectum Lyceum hoc per triennium, & quod excurrit,  
solâ Gymnasii nuncupatione circumferebatur, quando demum  
an. 78. die 26. Nov. augustâ munificentia atqve auctoritate in-  
victissimi gloriosissimæ memoriæ Imp. Rudolphi II. Academicæ  
dignitatis cepit primordia, concessâ videlicet Philosophiæ bac-  
calaureos & magistros publicè in ea renunciandi facultate: qvæ  
privilegia sollenniter promulgata fuere anno 1580. die Jacobo  
sacrâ: & is ipse nimirum academiæ hujus fuit natalis. Ita Gy-  
mnasii nomen quatuor scholæ oppidanæ classes subibant adin-  
star seminarii deinceps academiæ, quæ tanquam arbores duæ  
unius radices major minorq; floruerunt annos bene multos, do-  
nec arbore academicâ in tantumvastis dispansâ ramis, Gymnasii  
verò arbore vel furculo potius ad interitum vergente, Proceres  
Reipubl. Norimberg. alteram dicti modò Gymnasii translatio-  
nem, Altdorfio puta Norimbergam, in priorem cœnobii Egidi-  
ani locum complecterentur animo atq; cogitatione; qvæ bonis  
avibus processit an. 1633. Inter hæc verò Augustissimus Imp. Fer-  
din. II. die 3. Oct. 1622. Senatui Norico nova indulfit privilegia,  
in iisq; pristina non solum clementissimè constabili vit & auctori-  
tate



tatē roboravit, sed etiam ad Juridicam & Medicam facultates prolatavit, facta simul creandi poetas laureatos potestate. Publicata sunt privilegia hæc spectabili in panegyri festo Petro-Paulino die 29. Junii 1623. Isque alter academix hujus existit natalis.

Post hæc rudi quasi penicillo adumbrata incunabula Vni-versitatis nostræ & summa primordia, dum nucleum in præsentī anquirimus, & qvalicunqve acie mentis ruminare intendimus admirabilia, & præ aliis maximè commemoranda ejusdem decora monumentaque, primo tanquam intuitu offerunt se illustres statux, etiam nunc toto splendentium orbe, nec adeò sanè fumosarum imaginum. Genitores, existimate, me dicere dulcis hujus nutricula, & qvæcquid trophæorum debetur inde, quod commodi evenit in universum orbem. Sunt illi (audite ac veneramini Splendidissima ut Nomina ita rei literariæ in ævum commemoranda Columina) BEHAIMII, DERRERI, EBNERI, FÜRERI, GEVDERI, GRVNDHERRI, HALLERI, HARSDÖRFFERI, IM HOFII, KOLERI, KRESSII, LÖFFELHOLZII, NÜTZELII, PAVMGAERTNERI, PFINZINGII, POEMERI, SCHLVSSELFELDERI, STROMERI, TETZELII, VOLCKAMERI, WELSERI, aliiq; plures, Patricii veterrima Nobilitate multis retrò seculis clarentes, quam ut in Statu universæ Reip. Noricæ, ita eandem apprimè eximiam reddidere singulari prudentiâ, magnificentiâ & liberalitate in alenda conservandaq; hac Academia, & providâ non minùs. curâ in designandis semper SCHOLARCHIS QVATVOR ac Procancellario, Viro cordato & circumspectissimo; quales fuerunt & sunt Camerarii, Remi, Oelbafii, Richter, Fetzeri, JCTi, Polyhistores ac Oratores Excellentissimi.

Agite verò AA. repetamus altiùs primordia, invictissimas contemplando aquilas, sub quarum alis succum quasi concepit & sanguinem nostra hæc schola. Et primùm spectate mihi quæso RVDOLPHVM, nomine quidem secundum, gloriâ si non primum, postremum saltim nulli Imperatorum: atque in eadem linea collocandum II. FERDINANDVM, augustæ domus Austriacæ stupendos heroas, quorum ille prima philosophicæ facul-



cultati summorum honorum longè lateq; deferendorum, hic verò eodem, quo ipsum hoc sollenniter accidit, natus anno, amplissimis collegiis Jctorum ac Medicorum paria sponte quasi clementissimo indultu concessit privilegia.

Vt verò propius in rem accedamus, quæ fortè aliis Germaniæ, imò Europæ academiis fuerit communis, de cœli salubritate, lociq; & confinium multijuga amœnitate, verbum ut ne faciamus ullum; progredimini mecum quæso in ipsum quasi sacrum divæ nostræ Minervæ, regiumq; & aptissimo ornatu exstructum Collegium, quod vocant, nostrum intuemini, non jam ab ambitu aut areæ amplitudine metiendum, etsi nec illa suo profectò destituitur splendore, verum si rectè dispiciamus, ita æstimandum, ut in eo mediocrem, sed elegantissimam tamen in diversas distributam familias, plurimisq; & structuris, & variarum conditionum receptaculis fulgentem contemplemur civitatem. Patent hic primùm acroateria quatuor, nitida, munda, supellectile, quæ opus est, instructissima, quæquaversum patula, deliciasq; in animis frequentantium sponte excitantia; mirandum anatomes theatrum, & sceletorum horrendis figuris, & spectatorum sedibus antiqui quasi amphitheatri nova referens simulacra. Sacratæ ad publicos usus bibliothecæ quotannis accrescens museum, nobilissimi Senatus beneficio facili annonâ fruentis congregationis academicæ cœnaculum, ipsi juxta Oeconomo cum omni familia commodam præbens habitationem; & quod rarius est (nec enim libet verbulo attingere vel publici academici ministri, vel alia ad diversos usus hic parata domicilia) singulare, planeq; magnificum lyceum, duodecim omnium facultatum commilitonibus sustentandis, vestiendis, alendis, exercendis, informandis, præside inspectore, viro semper doctissimo, incredibili pietate institutum. Creditis, omnia me jam in nostra hac statione fuisse emensum; quin verò restant plura ferè, quàm dixi. Quinque omnino Professores etiam cum familiis amplissimis lares intra Collegii muros facilè figere, & ad hæc singulos academicis civibus quibusdam diversa locare musea quis non pæne admiretur? Amplius imò, quod dixero, fuerit, quæ se sol oriens meridiem versus flectit, duo speciosa benè contignati atq; arcuati ex parte operis habemus ambulacra, superius



rius alterum, alterum inferius, incumbens utrumque publicis  
theologicorum ac philosophicorum studiorum theatris, quorum  
magnificis exstructa suntibus utrumque nostræ Minervæ sacra  
facientibus septem nitida, nec sine multis singularibus commo-  
ditatibus, præbet receptacula; prospectus utrinque jucundissim;  
hac in aream Collegii, illac in finitima montana, propinqua præ-  
dia, adjacentes agros, hortos, silvas: ut si acrius contempleris  
tam rari ædificii ambitum, compendium multifariam digesti bo-  
ni ordinis, & optimè compositæ Reipublicæ per imperantium  
& parentium diversas series concinnante spectasse sponte pro-  
fitearis harmoniam. Neque silentio prætereundum, quod, qui  
nunc est Triumvir REIP. NORIMB. & Primarius Vniuersitatis  
Curator, Vir maximè Insignis, titulisque par omnibus, GABRIEL  
NÜTZELIVS, Nützelianum Museum in ambulacro isto Collegii  
inferiore mundū nitidumque, summa, qua Musas earumque cultores  
prosequitur, humanitate, paucos ante annos, ad publicos DNN.  
Professorum conventus, aliosque congressus sollenniores, desti-  
naverit. Quod ipsum loquitur Monumentum ære perennius eo-  
dem in conclavi, tanquam in Memoriz fano, erectum:

GABRIELI. NÜTZELIO

PATRIÆ. PATRI

SEPTEMVIRO. ATQ. NVNC. PROTOSCHOLARCHÆ

PIO. SAPIENTI. FELICI

QVOD. IS. APPLAVDENTE. AC. ADPROBANTE  
NOBILISSIMO. AC. STRENNISSIMO

DNN. SCHOLARCHAVM

ORDINE

NÜTZELIANVM. HOC. MVSEVM

PRIVATVM. ANTIDHAC. IAM. PVBLICVM. FECERIT

ET. INVSITATA. POSTERISQ; PRÆDICANDA. BENE-  
FICENTIA

ADMINISTRANDÆ. IVSTITIÆ. COGNOSCENDIS  
CAVSSIS

PVBLICIS. ACADEMICI. SENATVS. SINGVLARVMQ;  
FACVLTATVM

B

CON-



CONGRESSIBVS. DICAVERIT  
AD. PERENNEM. GRATÆ. MEMORIÆ  
TESTIFICATIONEM  
MONVMENTVM. HOC. LIBENS. MERITO  
RECTORE. VNIVERSITATIS. CENTESIMO  
IOHANNES. SAVBERTO  
S. THEOL. D. ET. PROF. PRIMARIO  
SENATVS. ACADEM. P.  
MENSE. MAIO  
CIC 13 C LXXVII.

Proficiscamur nunc, agite, ulterius, & extra urbis pomoeria, non academiae tamen, ad pomarium & herbarium, & florifera tempe, non temerè comparandi aliis, admirandi profectò, & innumerorum germinum uberrimâ segete efflorescentis quasi totius naturæ compendii, nostri Vniversitatis horti. Quem non is in stuporem rapiat ingressum non vere, non æstate, sed continui prope anni mensibus, & arbutis, & fruticibus, & floribus, & æstivis hibernisq; pariter plantarum suaviter educendarum conservandarumq; mansionibus, & denique ex toto quasi orbe rarâ & incredibili curâ conquisitis, atq; intra vastum septi illius ambitum passim copiâ jucundissimâ superbientibus omnis generis plantaginibus. Linguas centum, ora; centum fas hec sit me poscere: ineptus fuerim, si verbum addidero. Ipsum pro me loquatur patens cuiq; quasi regium hoc viridarium, atq; verissimum, ut fari sic liceat, academiæ Germaniæ miraculum; quin & loquantur pro me Manes inprimis exquisitissimi Botanici & Floræ nostræ cultoris, Ludovici Jungermanni: loquatur pariter cæteroquin etiam Celeberrimus laudati viri successor adeò dignus, ut parem usu & experientiâ videatur habere neminem, Mauricius Hoffmannus, de quo præstat tacere, quàm pauca dicere.

Nolo quippe quempiam præsentium ac etiam nunc superstitem nostræ scholæ Doctorum laudare in os, ne memorare quidem ævo huic decantata nomina, maximè ordo cum nos deducat ad veneranda eorum stupentes quasi subsistere subsellia; quanquam gloriosè emeritorum & ad supernas sedes jamtùm evektorum, absque adulationis suspitione, mentionem injicere pos-



possimus tutius, cum tamen laudibus ipsorum propalands, ne  
quid ab iis deteratur, multò impar sit modestia nostra, quod per  
ambages fieri fas esset, in præsentì nolumus celebrare universi  
pænè eruditi orbis magistros: Edonem Hildericum à Varel Fri-  
sium, Nobilem Jeverensem, Christianum Matthiam, Dietmar-  
sum, Georgium Königium, Ambergensem, Christophorum Cri-  
nesium, Schlackenwaldensem, Theodoricum Hackspanium,  
Vinariensem, & Joh. Conradum Dürrium, Noribergensem,  
Theologos: Jctos, quibus pares vix ulla Germaniæ academia-  
rum vidit, Obertum Giphanium, Buranum Geldriæ, Hugonem  
Donellum, Cabilionensem Hedio-Burgundum, Scipionem Gen-  
tilem, Castellensem S. Genesii Agri Piceni seu Marcæ Anconi-  
tanæ, Petrum Wesenbecium, Antverpianum, Conradum Rit-  
tershusium, Brunovicensem, Wilhelmum Ludwellum, Elbinga  
Borussum: etiam Medicos, Nicolaum Taurellum, Mompelgar-  
densensem, Philippum Scherbium, Cella-Helvetum, Ernestum So-  
nerum, Norimbergensem, Casparum Hoffmannum, Gothano-  
Thürigetam, Ludovicum Jungermannum, Lipsiensem: & por-  
rò deniq; Philosophos, bonarumq; literarum magistros, Valen-  
tinum Erythræum, Lindaviensem, Michaëlem Piccartum, Nori-  
cum, Johannem Prætorium, Joachimico-vallensem, Michaëlem  
Virdungum, Kittingensem, Daniele Schweaterum, Norim-  
bergensem, Philippum Caroli, Neoburgicum, levem quidem  
transfugam, insalutatis qui & hospitibus, & collegis, & pa-  
tronis ad Pontificios miser concessit, seroq; cum Phrygibus for-  
tassis sapiens, perfidiæ, ut ajunt, vitâ duriter ductâ miseriori ejus  
exitu pœnas dedit; Christoph. Adamum Rupertum, Werthei-  
mensensem Francum: quorum omnium in omnem literariam Rem-  
publicam merita, diversisq; inclarescendi generibus parta en-  
comia, etiam hodie, veluti jam pridem, volitant doctorum per  
ora virum; quorum etiam elucubratissima, quin prope innume-  
ra dixerim, scripta suo in pretio, hoc est, summo æstimatissimoq;  
manebunt, nec interibunt nisi cum nominibus auctorum, con-  
summatione inquam hujus Vniversi.

Nec diffiteri tamen fas h. l. fuerit, suum quasi peculiare in-  
felix fatum expertam fuisse, in amplissimo Philosophorum or-  
dine, inclutis cæteroquin doctoribus exsplendescentem sacræ

B 2

Ebrææ



Ebrææ lingvæ Professorum seriē, nequissimorum ex Judæis inter Christianos proselytorum trigā, unius jam publici muneris facultatem indepti, duorum verò ipsi edecumatā Procerum gratiā destinatorum. Primus Julius Conradus Otto in sacro baptismatis actu nuncupatus est, quod seculi hujus tertio quidem anno suscepit, & ut vitæ aucuparetur subsidium, simul publicum docendi munus, idq; obiit etiam qvadantenus, quod scimus: nam supposititiis, quæ protrusit, scholiis, sub epigraphe Gali Rasia, tam parum Christianæ Ecclesiæ utilitatis, quam sibi nominis, utut tota quasi ex indole gens ista gloriabunda aliās est, conciliavit. Et verò, ne temere prolatum per se esset istud cæteroq; in verporum proselytorum teneris auriculis intolerabile verbum atq;

*In Colloq. cap. XIII. fol. 185.* consilium sancti ac incomparabilis Theandri Lutheri: Judæum, si quicquam deinceps bene sperandum de ipso, post collatum sacrum lavacrum tutissimè de ponte esse deiciendum ac submergendum; cum vix per qvadiennium stipendia apud nos meruisset, pessimè sibi conscius, patronis insalutatis, turpiter aufugit.

Posteriorum, quos dixi, alter Josephi Bar Zadok nomen in circumcissione nactus, genere Posenensis, professus postea lubrico animo fidem Christianam, ac seculi currentis undecimo anno Dominicā Qvasimodogeniti in æde nostra Parochiali sacro tinctus flumine, amplissimo, ut ipse publicè fatetur, maectus salario ab Illustribus Patriæ Proceribus, in ipsa urbe Norimberga futuri, cui mancipandus erat, muneris prælegendo edidit specimina & quasi præludia. Sed eccum nondum octennium decursum fuerat, quod homo nauci pridem tacitè muginabatur, id clam omnibus, quos scire intererat, dedit effectum, facto ad Pontificios transitu, adeptus Herbipoli fictitium Confirmationis, quam vocant, sacramentum. Quod omne quancquam ultra trimum egregiè, si Diis placet, dissimulasset, & personatus nostri gregis aslecla non homines modò, verum etiam ipsum, qui falli nequit, callidè fefellisset, cum res celari amplius neqviret, atq;ve is rerum gestarum rationem, quod fas erat, reddere jussus esset, *exivit de nobis, quoniam non fuerat de nobis*, ut verba Apostoli meritò huc transferamus; Viennamq; concessit, institutā ibi apud Cæsarem O.M. adversus optimè meritos patronos atrociter intentatā, ridiculā tamen, & quæ locum facili non inveniebat,

*I. Joh. II. 19.*



niebat, actione, perfidia plusquam Judaicā, scriptoq; mox eum in finem virulento libello, quem insignivit, Scalā verā Jerusalem, neque hanc fortē ingressus, neque istam intuitus.

Alter verō propius hæret civium populariumq; memoriā. Christianum de Pomis denominari se petiit ab iis, qui in sacro mysterio pro ipso spondere; homo innumeris pæne beneficiis à nostro cœtu cumulatissimus, versipellis autem & ex mendaciis ac fraudibus conflatus totus, qui, multiplici ære alieno subdola specie contracto, postquam suis fucis & sutelis plurimis sublevisset os, & glaucoma ob oculos objecisset, effuso cursu clanculum se hinc subduxit, nescio ubinam gentium nunc latitans, famosus iste, saltem apud nos, nequitiae artifex & magister.

Meretur fortassis utriq; istorum adjici tertius, Elchanon antea dictus, professione autem apud nos factā Paulus Pragensis, conversus & salvificæ fidei initiatus pariter Norimbergæ superioris seculi sexto quinquagesimo anno, ut ipse disertè prodit in libello: *Gründliche und klare Beweisung*; sed post annos duodecim Chellim in Poloniā per execrandum Christianorum mysteriorum ludibrium rebaptizatus; quod immemor impietatis fatetur in libello, cui titulus: *Mysterium novum*. Quamquam fortē id à nemine hætenus, præfiscine dixerim, adversum fuerit ita, ut publicis traditum sit chartis: Annon verō hæc perfidia plusquam Punica? Nihil veri, nihil sancti in isto nebulone fuit unquam, nullus Dei metus, nullum jusjurandum, nulla religio. Accipite verō, quem impius ac impurus sanctæ fidei nostræ hostis nactus fuerit finem. Constanti quippe narratur famā, eum Pragæ in publicarum sordium colluvie desidentem sceleratam efflāsse animam, & semianimem, cum judæi sabbato ex sua Synagoga domum reverterentur, transeuntes interrogasse: quænam hodie parascha pro concione esset recitata? cum regeffissent: eam, quam vocant, *אם בראי* præcedentem voculam, ut erat vulgò in Cabbala magnus Pan, per eam speciem, quam Notarikon appellant, animā in primoribus labiis jam sedente, ita exposuisse:

אמונת מנחמים איה משיחם  
אני משיחם אלהינו מת

B 3

h. e.



*h. e. Gentes quærunť ex nobis: Vbi est Messias vester? at nos respon-*  
*demus: DEVS noster est mortuus. Quamquam excusare hominem*  
*& dicterium elevare ausus sit celebris ille apud nos profelytus*  
*Ern. Christ. Zarfosli, Christianum exinde eodem cabbalístico*  
*artificio ex voce sequenti בחקתי eliciens sensum, qvod coram ex*  
*ipso intelleximus, hoc videlicet modo:*

ב עברנו חי קם ת מר יסיה

*Qvafi dixerit: mortuus est, nempe propter nos: vivit, surrexit,*  
*in perpetuum erit. Argutius fortassis qvàm verius.*

Ignoscite qvæso, Auditores honoratissimi: qvò enim dela-  
 bor? imò qvò proripuit me istud hominum cacoëthes? Igitur  
 ut in viam me recipiam, ex amplissima Patrum conscriptorum  
 academiæ hujus societate, qvod vel ipsum verbo fuerit attin-  
 gendum, etsi vos id ante probè tenere reor, qvidam ad insignes  
 gravesq; functiones ab Illustribus Magnatibus Statibusq; aliò  
 fuère evocati, qvos nec ipsorum, nec scholæ hujus latè percre-  
 bescens & diffusa fama latere poterat. Alii alibi nomen & sti-  
 pendia meriti, magnis propositis præmiis, qvod scil. per strenuis  
 Nutritoribus nostris solenne est, huc fuère adsciti, qvibus sigil-  
 latim commemorandis si vel ipsorum laudes meo obscurare præ-  
 conio, vel vos ultra, qvam par est, detinere velim, mortalium  
 sim infulissimus. Qvæ causa vicissim est, qvod nec in præsen-  
 tem ausim producere scenam pænè innumeros, qvi in nostro Ly-  
 ceo ad doctorum pedes & pulpita cùm divinæ pariter huma-  
 nãq; sapientiæ præclara jecissent fundamenta, ad gubernacula  
 rerum postea constituti, emolumento ad omnem ætatem peren-  
 naturo, in ordine effulserunt Ecclesiastico non minus atqve Ci-  
 vili. Et verò tum ex hoc eqvo Trojano, tum ex solius Norim-  
 bergæ popularibus, qvod profectò rarum & fortassis sine exem-  
 plo, omnes prope celebriores nostræ præsertim Ecclesiæ acade-  
 miæ acceperunt, qvi profitendo publicè cathedras ornârunt suas,  
 & ornant partim in hodiernum diem: qvos proinde, ne au-  
 ram captare videar, jam propriis virtutibus emergentes, par-  
 timq; pridem literatorum præconiis evectos recensere super-  
 sedeo. Parvam eqvidem manum exterorum nonnulli nostram  
 credunt societatem, qvibus tamen, si insolentiùs obstrepere ve-  
 lint



Mnt nobis, jure liceat illud antiqui Sapientis reponere: *Vester chorus major est, noster autem melius concinit!* Et quid? Seculum vix elapsū est, atque in indice (matriculam vulgò nuncupant) civium, qui nomina nostro dederunt ordini, legere licet tredecim millia, & inter hos celsissimā oriundos prosapia Principes tres, Comites novem, Barones sexaginta: quibus cū publica res nostra valde arrisisset, dum ipsi eam singulari prosequerentur clementiā & gratiā, debito vicissim officio & cultu eorum octo Magistratus sceptrā communibus suffragiis fuere collata. Ad quam præfecturam, ipsorum, si non fallimur, allecti fuissent plures, nī fonticæ ipsos abstinuissent causæ, partimq; sapienti consilio maluissent discere parere, quā imperare, antequam domi imperare inciperent.

Cæterū de regia studiorum viā, quā commilitones apud nos ducantur, verbum amplius facere non attinet. Non per cuniculos res nostræ geruntur, in propatulo exstant omnia, superstitem pariter & mortuorum testimonia implent domos, curias, theatra, urbes, regiones, præstō sunt hinc enata literaria monumenta in officinis ac bibliothecis totius pæne Europæ. Quot præter ista paginas impleverunt, quarum pleræq; nunquam subivere prelum, hebdomadariæ in omnibus studiis Disputationes, Circulares solenni voce appellant, quæ incredibili civium emolumento, citra qualescunq; tamen eorum impensas, exemploq; nostræ scholæ peculiari, nexu quasi insolubili, juxta cum exercitationibus oratoriis mensuris, instituuntur. Inter hæc ut venerabili Theologorum collegio major conciliaretur auctoritas, atque discipulorum hic præcipue loci faciendi profectus fervor incenderetur, sapientissimo Magnifici Senatus indultu inde ab anno tertio octogesimo superioris seculi inolevit, quod inaugurationes Candidatorum, qui ad Ecclesiasticas functiones admoventur, tum in ditione amplissimæ Reipublicæ, tum, si fors hæcenus tulisset, uti sæpe tulit, a patronis aliunde commendati, hoc solo loco peractæ fuerint & ratæ factæ adeo uberrima in vinea Domini messe, ut, exacto vix seculo, septem & quadraginta supra quingentos, catholico & apostolico ritu sacrosancto muneri jam legantur initiati.

Quamquam verò animus in præsentī nobis non est, eorum,  
quæ



quæ per rectam annorum seriem probè secusve gesta hic sunt, contexere annales, priusquam vela contrahamus, non possumus non esse memores hoc loco turbarum, quas incredibili prope damno dedit scholæ huic obreptitia Photinianorum impietas, parumq; aberat, nî DEI providentia & sollicita Patrum cura in tempore prospexisset, malumq; suffocasset in herba, scriptis pestilentissimis clam palamq; sparsis in medio foro licitoris manu concrematis, quin maculam famæ nostræ inuississet indelebilem. Nam quæ filix nullo mitescere quibat aratro, ea runcanda erat penitus & ex radicibus extirpanda, conquisitis severioribus mediis, ad quæ ægrè aliàs se adduci patitur Clementia Norica. Elapsum erat par studiosorum hæretico veneno infectorum, appulitq; Wittebergam: id cum Reipublicæ variis acceptis teneretur beneficiis, ut in viam reduceretur, reducendum erat in patriam, & vi quidem haut usitatâ. Dicinon potest, quàm id malè habuerit vesanæ catervæ tunc temporis hyperaspisten, famosum satis Valentinum Smalcium, colluviei Racoviensis ministrum. Qui denique cum deceptos resipuisse advertisset, fre-  
*refut.* O-mens quasi & frendens impuro ore ista eructabat verba: *Senat.* *I. V.* tus Norimb., cujus prudentia hætenus alias Respublicas superare visa  
*& I. P.* est, eò prolapsus est nuper etiam amari & præposterizeli, ut in paucos quosdam studiosos, quibus DEVS id, quod nostræ Ecclesiæ hætenus profitentur, alto suo consilio revelârat, tam graviter animadverterit, ut nova papalis tyrannis eos invasisse meritò dici possit. Homines enim liberos, catenis ligatos, ex academiis satis remotis Norimbergam deduci curavit, & ibi in carceribus squalidissimis per non paucos menses conclusos, minis etiam carnificina propositis, tandem eò adegit, ut veritatem abnegarent & publicè etiam retractarent. O DEVS, ubi nam gentium sumus? Hæcine fieri decet inter eos, qui verum Christi Evangelium præ aliis sibi revelatum gloriantur? En, in medio illorum, qui Antichristum deseruerunt, Antichristus regnat! Quis tandem hujus tyrannidis finis futurus est? Hæc ille. Sed DEVS meliora! Neque enim displicuisse ipsi justum ac sanctissimum hunc Senatus zelum, & quicquid porro pro intemerata sacrae fidei veritate, Ecclesiæq; purioris incrementis exantlavit curæ ac laboris, ut reliqua, quæ Smalcio oggeri fortassis possent, omittamus, innu-meris beneficiis, quibus hanc academiam ex eo usque tempore abun-



abunde cumulavit, luculentissimè probavit. Ac turbæ illæ quidem sedatæ sunt nostro hoc seculo, circa lustri quarti initium. Superioris autem seculi anno secundo & nonagesimo, mense Octobri, *Franciscus Puccius*, Italus ille Florentinus, qui se suis in scriptis vocat *Filidinum Dei & Christi servum*, huc venit Altdorfium, animoque decrevit secum, aliquot heic loci menses commorari, ut amicitiam (quod quidem coram Magnifico id temporis Rectore Joh. Prætorio profitebatur) contrahere & conversari posset cum Dominis Professoribus; fortasse tamen ut errores suos clam studiosam inter juventutem disseminandi aucuparetur occasionem. Verum serio à Magistratu monitus est, præsertim cum & solito Academiæ jurejurando obstringi nollet, maturaret discessionem; quam eodem adhuc fecit mense. Adeo semper tum Illustri Senatui Norico tum Academico curæ fuit custodienda Religionis sinceritas.

Atque ut ex præscripto, & ne vestrâ abutamur benevolentia, finem faciamus dicendi, id ipsum tremendum, sanctissimumq; & optimum maximumq; Numen, cui pietas nostra & Musa cordi est, suppliciter venerantes, suâ celeberrimæ scholæ huic, ejusq; Patronis, Gubernatoribus ac Civibus, his præsertim difficillimis temporibus, perenni adsit gratiâ, ut ne desit unquam felicitatis aut ornamentorû quicquam, quod altiùs provehere ejusdem incrementa & famam prorogare, imò pridem propalatam suo asserere tenori, & posteritati, si quæ futura est, commendare queat. DEVS misereatur nostri & benedicat nobis:

C

lu-



lucere faciat vultum suum nobiscum, Selah.  
 Ad sciendum in terra viam suam, in omnibus  
 gentibus salutem suam. Confiteantur Tibi po-  
 puli DEVS, confiteantur Tibi populi omnes ipsi:  
 Terra nostra det porrò germen suum, benedi-  
 cat nobis DEVS, DEVS noster, benedicat  
 nobis DEVS, & metuant eum omnes  
 fines terræ!



ORA-





## ORATIO II

De

### THEOLOGIS ALTDORFINIS.

#### PROGRAMMA.

**Q**uemadmodum piè ac sapienter sapientissimus Si-  
racides Ecclesiam sui temporis ad decantandas lau-  
des Viris Illustribus benèq; meritis debitas inflam-  
mat: Laudemus Viros gloriosos, & Parentes  
nostros in generatione sua. Multam gloriam fecit Do-  
minus in iis magnificentiâ suâ à seculo. Semen eorum  
& gloria eorum non derelinquetur. Corpora ipso-  
rum in pace sepulta sunt, & nomen eorum vivit in generati-  
onem & generationem. Sapientiam ipso-  
rum narrent populi, & laudem eorum nunciet Ecclesia. *Cap. XLIV.*  
*Ita pium pariter ac sapiens nobis inculcat monitum Auctor*  
*Epistolæ ad Ebræos*: Memores estote τῶν ἡγουμένων, Du-  
ctorum & Doctorum vestrorum, qui locuti sunt vobis ser-  
monem Dei, quorum imitamini fidem, considerantes,  
qui fuerit exitus conversationis ipso-  
rum. *Cap. XIII. 7.*  
Et profectò æquum est & justum, si gratâ memoriâ, statu-  
is, orationibus, carminibus ac similibus laudum generibus, pro-  
sequimur viros aliarum artium & linguarum peritos, ut im-  
primis sempiternæ commendemus gloriæ Viros de Ecclesia  
Christi optimè meritos, qui magistrum non tam habuerunt  
Tullium vel Aristotelem, quàm Spiritum Sanctum, qui & Deo  
in Ecclesia & Ecclesiæ in literis studuerunt, qui doctrina erudie-  
runt, exemplo converterunt, precibus defenderunt; quo-  
rum scientia tantò præstitit aliis, quantò æterna munda-  
nis



nis, immortalia caducis, diuina humanis antecellunt. Proinde eximiam meretur laudem laudabile institutum Præstantissimi & Doctissimi DN. JOHANNIS GEORGII MAIERI, ex Marchionatu Offenbauensis, perindustrii Philosophiæ pariter ac Theologiæ Cultoris; qui pomeridianâ crastini primâ, loco ritumque Academico verba facturus est de THEOLOGIS ALTDORFINIS, siue iis, qui hac in Universitate Norica jam inde ab ejus incunabulis spartam Professionis Theologiæ, quam nacti sunt, ornârunt. Atque horum sanè non fuisse paucos pietate insigni, eruditione non vulgari, singulari docendi dexteritate, excellenti vitæ sanctimonia præditos, scriptis deniq; per eruditum, quâ patet, orbem celebratissimos, libulis accipietis auribus. Fulerint olim inter eruditæ pietatis lumina, Augustinus à Possidonio, Gregorius Neocæsariensis à Gregorio Nysseno, Cyprianus, Basilus, Athanasius à Nazianzeno, celebrati; efferant in cælum laudibus Lycea alia Doctores suos Theologos, viros venerabiles, summam diuinorum oraculorum scientiam cum incomparabili morum sanctitate conjungentes; de Nostratibus certè Theologis, non meis, sed Nazianzeni verbis de magno Athanasio olim prolatis, iisq; parum hîc mutatis, confidenter pronunciare ausim, quòd illi alios adequârint, ab aliis paruo intervallo superati fuerint, nonnullos etiam antecesserint. Quibus igitur licuerit aut libuerit auscultare recitantem Ornatissimum, quem dixi, Juvenem, illi præter soliti in bonas literas favoris gratiam, documentum etiam edere poterunt pietatis in Beatos tot Beatorum Virorum Manes, quorum in Ecclesiam Scholamque nostram promerita extiterunt plurima longeque maxima. Quod ipsum de VOBIS mihi polliceor, VOSq; eo nomine, quâ debeo observantiâ, quâ possum humanitate, rogo, Magnifice DN. RECTOR, Perillustres & Generosissimi DNN. BARONES, Excellentissimi  
P A-



PATRES ACADEMICI, Generis Doctrinæque Nobilitate Florentissimi DNN. STUDIOSI ; gratia hujus  
ac benevolentia vestra nunquam futurus immemor.  
Quod bonis bene fit beneficium, gratia ea gr-  
vida est bonis.

MAGNVS DANIEL OMEIS. P.P.

ORATIO.

(Titt.)

**O** Lim apud Romanos præcipue, in Bibliothecis publi-  
cis statuas & imagines Virorum doctorum positas fu-  
isse tam notum est quam quod notissimum. Hoc in-  
stitutum A sinio Pollioni tribuunt Plinius & Isidorus ;  
quorum hic de eodem Pollione, *Primus*, inquit, *Roma Biblio-*  
*thecas publicavit græcas latinasq., additis auctorum imaginibus.*  
Honos autem hic habitus est interdum vivis adhuc, quamvis  
perrarò, mortuis verò longè frequentius. Videntes namque  
comitatur invidia, quæ post fata obmutescit ; secundum illud  
Martialis:

*Esse quid hoc dicam, vivis quod fama negatur ;*

*Et sua quod rarus tempora lector amat ?*

*Hi sunt invidia nimirum, Regule, mores,*

*præferat antiquos semper ut illa novos.*

Ita Plinius Secundus de Silio Italico in epistolis suis prædicat,  
quòd multum ubiq; librorum, multum statuarum, multum ima-  
ginum habuerit, Virgili ante omnes, cujus natalem religiosius  
quàm suum celebrabat, Neapoli maximè, ubi monumentum  
ejus adire, ut templum, solebat. Qui mos uti laude non in-  
dignus, ita æternam nominis infamiam apud omnem poste-  
ritatem promeruit Caligula, monstrum hominis, qui non modo  
clarif-



clarissimorum Virorum statuas & imagines deturbasse, & è bibliothecis eiecisse, sed & de eorum scriptis, vel maxime Homeri, Virgilii & Titi Livii, abolendis cogitasse scribitur. Nos meliora! Ac licet hodie non amplius in Bibliothecis statuae erigantur virorum eruditorum omnium, laudes tamen eorum publicis in scriptis & orationibus decantare ac prædicare licet, utpote monumentis ære perennioribus. Lapidēs enim & saxa fragilia sunt & caduca, nec minus quàm ipsi homines occidunt, desinuntque; memoriam verò & laudes eruditorum nulla unquam ex animis posterorum delere potest oblivio. Et verò mihi, cum ex hoc ipso loco aliquid dicendum esset, mentem meam ista subiit cogitatio, nullo in argumenti genere meam commodius orationem versari posse, quàm si de tot tantorumque Theologorum laudibus, qui in Inclyto hoc Lyceo annis superioribus floruerunt, plerique etiam eorum in eo decesserunt, in medium quædam afferrem. Sed quemadmodum de pictore, sculptore, fictore (ut Plinii verba usurpare liceat) nisi artifex judicare, ita nisi sapiens non potest perspicere ac prædicare sapientem. Quantum mihi tamen cernere datur, multa in viris istis celebratissimis sic eminent & elucet, ut mediocriter quoque doctos advertant & afficiant. Quod si non omnibus satisfacere suscepto negotio videbor, illi cogitent, eum quoque à reprehensione abesse, qui affectu pio testatur, nihil sibi amore & veneratione magnorum & de Ecclesia Christi meritis Virorum sanctius esse ac dulcius, etiamsi affectum suum non re ipsa & factis possit approbare. A Vobis igitur, Auditores ordinum omnium Honoratissimi! summopere contendō, ut oratiunculæ huic meæ, tanquam amœnissimæ animi peregrinationi benevolentia vestra auram commodetis, gratiaq; vestra serenitatem, favorisq; vela indulgeatis, quò felicius instituto meo perfungi, & Doctorum ac Professorum Theologia, qui hoc in Lyceo nostro claruerunt, nomina laudesque gratâ brevitate recensere possim.

Seculi



SEculi spatium jam circumactum est, ex quo Illustris Senatus Norimbergensis, auctoritate RVDOLPHI II gloriosissimæ memoriæ, Augusti, Pii, Felicis, fundamenta posuit Lycei hujus: quod sua sub auspiciis divinitus sortitum est & doctrinæ & vitæ laude oppidò conspicuos Theologiæ Professores. Horum primus erat M. JOHANNES PICCARTVS, Babebergensis, seculi superioris anno quadragesimo quinto natus, quartoq; & octogesimo, sub finem Octobris denatus. Fuit primum Norimbergæ Diaconus Sebaldinus, qua in statione filium progeniuit *Michaëlem Piccartum*, Philosophum illum excellentem, & immortale Athenæi hujus decus; postea à fundato hic Lyceo primus Pastoris ac Theologiæ Professoris munere egregiè perfunctus est. Alter erat GEORGIUS SIGELIVS, Philosophiæ Magister, natus Norimbergæ A. C. 1552, & in numerum Professorum Altdorfinorum cooptatus anno septuagesimo octavo, die secundo Maji. Posthæc Antistes Ecclesiæ confirmatus est anno octogesimo quinto, die 4 Martii, præsentibus Hieronymo Paumgartnero, Bartholomæo Pæmero, Julio Geudero, Antonio Geudero, Johanne Welfero, Viris Nobilissimis. Hoc in Antistitis munere, ac Theologiæ simul professione, viribus omnibus elaboravit, quò purioris doctrina fidei amplificaretur ac illustraretur. Inq; eam partem quam dederit operam, Historia Jesu Christi ab eo edita plus satis edocet. Cæterum anno seculi istius nonagesimo quarto sæptra gessit academica, prout Emblemata Altdorfina Panegyri decimâ octavâ id perhibent, & quadriennio post vivendi finem fecit. Tertius erat M. GEORGIUS PFALERVS, Norimbergensis, primus omnium, cui hac in Academia mitra imponebatur philosophica, in actu primo sollenni A. 1581 celebrato. Postea Theologiæ & Linguae Sacræ Professor, Ecclesiæque Diaconus designatus, è vita maturis abiit. Huc quippe se contulit anno superioris seculi octogesimo, die quinto Septembris, & quadriennio post, die trigesimo ejusdem mensis, Deo Creatori suo animam reddidit. Neq; verò longiore premendus est silentio tam gente quàm mente Nobilissimus EDO HILDERICVS à VAREL, Frisius, Nobilis Jeverensis, qui Wittebergæ Magister promotus.



tus anno seculi superioris sexto & quinquagesimo, dein Jenæ Professor Mathematicum constitutus anno sexagesimo quarto. Jena rediit Wittebergam anno septimo & sexagesimo; inde post annos quinque Magdeburgum venit, ibique egit Pædagogiar-  
 archam. Sanctæ postea Theologiæ Doctor Heidelbergæ cre-  
 atus est, eamq; publicè docuit usq; ad annum octogesimum, quo  
 Athenas hasce Noricas salutavit, annoq; sequente sacræ profes-  
 sionis initium fecit, primusque Rector annuus est declaratus.  
 Quàm insigni claruerit eruditione, non tantum ipsi sunt testi-  
 monio doctissimæ ejus ad Prophetas prælectiones, atq; Isagoge  
 Gemini Rhodii in doctrinam Sphæricam ab ipso primum græcè  
 evulgata, additâ translatione suâ latinâ, quo nomine laudatur  
 à Vossio de Scientiis Mathematicis cap. XXXIII. §. 7. sed &  
 celeberrimi nominis Theologus, Balthasar Müllerus, S. Theo-  
 logiæ Doctor & Superintendens Altenburgensis, Edonis nostri  
 in illustri Magdeburgensium schola discipulus testatur idem,  
 quando in dedicatione quadam ad totum Magdeburgensis Ar-  
 chiepiscopatus Capitulum memorabile hoc de Hilderico elogi-  
 um reliquit; *Vestro præterea Capitulo me obstrictum esse fateor, no-  
 mine Illustris Scholæ vestræ, in qua discedente Rectore Domino  
 M. Dionysio Dragendorffio, & Edone Hilderico Frisio, clarissimis  
 Viris, eruditione doctrinæ nemini cedentibus, & morum ac vitæ inte-  
 gritate præstantissimis, sesquiennium egi discipulum, ibiq; studia mea  
 excolui & fundamenta jeci.* Imò & istud indicio nobis est sin-  
 gularis acreconditæ hoc in viro eruditionis, quòd, cum A. 1585  
 Colloquium hic Altdorfii institutum fuisset Præside Doctore  
 Joachimo Regio, cœptumq; tractari negotium de Peccato Ori-  
 ginali Austriacum, in eo Hildericus noster cum *M. Henrico  
 Schmidelino*, Ecclesiasta Norimbergensi Sebaldino, in discuten-  
 dis & refellendis Flacianorum præstigiis masculè desudaverit,  
*M. Mauritio Hellingio & Georgio Sigelio* in thesi conscribenda  
 seu veræ Ecclesiæ doctrina explicanda operam studiumq; po-  
 nentibus. Cæterum Edo noster primæ ordinationi hic Altdor-  
 fii A. 1583, die secundo Februarii, Festo Purificationis Mariæ,  
 celebratæ, prævioq; examini adfuit, juxta cum *M. Mauritio Hel-  
 lingio, & M. Laurentio Dürnböfero*, primariis Antistitibus No-  
 rimbergensibus, quorum uterque ordinationis ritu Wittebergæ  
 viver-



vivente Philippo Melanchthone fuit initiatus. Cui sollenni primæ ordinationis actui etiam interfuerunt Scholarchæ Magnifici, Hieronymus Paumgartnerus, Bartholomæus Pomerus, & Antonius Geuderab Heroltzberg, Rectore academix Christophoro Johanne à Tschernembl, Barone Austriaco, Prorectore Doctore Johanne Busenreut, Jur. D. & Professore Publico. Diem Hilderici supremum indicat Epitaphium ejus hoc modo conceptum: *Si DEVS est pro me, quis meus hostis erit? Anno millesimo, quingentesimo, nonagesimo nono, duodecimo nono Maji, in Christo pie & placide obiit Reverendus & Nobilis Vir, Edo Hildericus de Varel, Frisius Orientalis, Sacro-Sanctæ Theologiæ ac Linguarum Doctor & Professor Altdorfl.* Claudio sermonem de Edone institutum sequente Adriani Bajer Epigrammate:

*Edonem Hildricum Sophies Witeberga Magistrum,  
Myrtea Doctorem Theologumq; creat.  
In multis Sophien docet Eusebieng; Lyceis  
Philosophusq; catus, Theologusq; pius.*

Post Hildericum alma nostra Palæcome habuit S. Theosophiæ Professores M. GEORGIUM VOLKARTVM, qui A. 1585 Diaconus pariter ac Professor Catecheseos designatus est, & A. 1604 Ambergam abiit, ad docendum ibi verbum Domini; M. JOH. KILIANVM SPREMBERGERVM, octo per annos Ecclesiæ Altdorfinæ Pastorem & S. Theol. Professore; M. JACOBVM JORDANVM, M. JOHANNEM DEVBELIVM; & qui ante tres hosce laudari debuisset, JACOBVM SCHOPPERVM, S. Theologiæ Doctorem ac Professore primarium, religiosiorem nescio an doctiorem. Is antea oppido honorabilibus functus est officiis, videlicet Hornbaci in Palatinatu Bispontino professione theologicâ; postea à Serenissimo Electore Palatino LVDOVICO Heidelbergam vocatus, Theologiæ iidem Professor, Doctor, & Sapientiæ Inspector declaratus est; præterea variis in religionis negotio obortis vicissitudinibus, à Serenissimo Marchione Brandenburgensi GEORGIO FRIDERICO Onoldum arcessitus, ut ab aulicis esset concionibus. Quoniam verò Doctori nostro vita & functio Academica magis arridebat, vocanti se huc Altdorfium Senatui Norico A. 1598

D paruit



paruit lubentissimè, & spartam, quam nactus est, Professoris Primarii, ornavit egregiè. Eum sanè veritatis, quæ secundum pietatem est, amatorem constantissimum, verbi divini Doctorem atque Interpretem accuratum ac perspicuum, insuper & Philologum non è multis fuisse, monumenta literarum post se relictæ satis superq; testari possunt, tot videlicet piæ ac eruditæ Disputationes theologicæ, Commentarius in Jonam, Tractatus de Arte Concionandi, Chorographia & Historia Nationis Germanicæ. Annum ejus natalem, patriam, tempus mortis, ex Epitaphio hoc Sacris ejusdem Manibus dicato colligere poteritis: *Domini Jacobi Schopperi piæ memoriæ, Sacro-Sanctæ Theologiæ Doctoris, & in Academia Altdorfina Professoris Primarii, ibidemq; id temporis Magnifici Rectoris, corpus hoc in loco sepultum est: Qui A. C. 1545, primo Novembris, Biberaci est natus, anno verò 1616, duodecimo Septembris, ætatis septuagesimo primo, Altdorfi piè in Christo denatus, spe latissimæ resurrectionis.* Hoc amplius æquum est, justum est, in hoc quoque Altdorfiorum Theologorum Sacratio ut collocetur GEORGIVS KÖNIGIVS, Vir in tantum laudandus, in quantum intelligi virtus & doctrina possunt. Prodiit is hoc in vitæ theatrum A. 1590, in urbe superioris Palatinatus principe Ambergæ. Primâ ætate scholis Ratisbonæ & Solisbaci admotus, mirum & incredibile dictum est, quàm ingenii sui felicitate cum Præceptorum industria certaverit, quàm Parentum vota & æmulos commilitonum ausus superaverit, quanto etiam concitatæ industriæ ardore huc Altdorfium missus, prælectionibus Virorum tum temporis celebratissimorum, Soneri, Piccarti, Queccii, Philosophicis; Theologicis autem Doctoris Schopperi invigilaverit. Consumto hic triennio Wittebergam abiit, daturus operam Theologis consummatissimis Huttero, Balduino, Franzio, Forstero, & linguarum orientalium calientissimo Laurentio Fabritio; de quorum adpectu, alloquiis, institutione, non minus sibi gratulabatur, quàm Alcibiades de Socrate, de Aristotele Alexander Magnus. Inde allectus famâ præclarissimorum Theologorum, Reidenii, Graueri, Majoris, cum Witteberga Jenam commutavit, ut ibi non solum ingenii culturam augeret, sed & quas tam alibi quàm isthic eru-



eruditionis opes sedulo collegerat, judiciis clarorum Virorum exponeret, pectusque muniret, ad capeffendam provinciam publicam. Quam & invitantibus fati anno seculi hujus decimo quarto hic loci impetravit facillimè, professionem intelligo theologicam & functionem ecclesiasticam. Vtramque singulari fide, labore, industria, suavissimaq; eloquentia ultra decennium cum ornasset, Prudentissimi Scholarchæ Norici summos in Theologia honores petere ipsum jusserunt; quibus & jure merito condecoratus est Marburgi, die quarto Maji, anno 1626, ac decennio post Bibliothecæ academicæ, quæ splendorem legatorum id temporis accessionibus augebatur, præfectus primus est declaratus. Exprimi verbis non potest Doctoris hujus Suada nectare & ambrosia dulcior, ac peramabile reliqua in vita temperamentum, quò hilaritatem severitate, severitatem amore, humanitate gravitatem prudenter noverat miscere. Exstant insuper & in manibus Theologorum versantur scripta ab eo solide elaborata, Vindiciæ Locorum Scripturæ Sacræ, Casus Conscientiæ, Commentarii in aliquot Sacri Codicis libros, Disputationes etiam ac Conciones quamplurimæ. Aternitati enim & omni literatorum ordini scribere, consilium Königio erat, non soli academix; cui tamèn, ut & Ecclesiæ nostræ, annos quadraginta eximio planè commodo erat & emolumento. Beatissimè tandem exspiravit anno ætatis sexagesimo quinto, seculi quarto quinquagesimo, eà à Supremo Numine auctus felicitate, ut posteritati suæ interfuerit, & Collegas viderit Generum *Theodoricum Hackspanium*, Theologorum ac Philologorum Phœnicem, & filium *Georgium Matthiam*, Virum πολυμαθές, & ob singularem eruditionem ac industriam celeberrimum, quem Deus Athenæo huic Norico diu diuq; servet! Jam verò quis CHRISTIANI MATTHIÆ laudes animiq; dotes, infra quas disertissimorum subsidit facundia, justà commemoret prædicatione? Gente is erat Dithmarsus, sub ævi superioris finem vitâ donatus. Indoles in eo ab incunabulis aptissima ad maximarum disciplinarum studia eluxit, quibus pariter & peregrinationibus variis feliciter absolutis, in celebri tandem hoc Noricorum Lyceo, dignissimum virtute & doctrinâ suâ invenit præmium, publicam nimirum Theologiæ professionem



supremis in ea facultate honoribus sociatam. Isthoc in munere cum Virum se prestitisset, per celebriorem nominis sui famam ad suprema dignitatis Episcopalis sedilia pervenit, & a Potentissimo Danorum Rege, Sacrae Theosophiae in Academia Sorana professioni, omniumque Ecclesiarum Dithmaricarum Inspectioni praefectus est. At vero cum invidiam quorundam & offensiones evitare non potuisset, relictâ patriâ, splendidissimoq; munere abdicato, in Foederatum migravit Belgium, & Ecclesiae Hagensis Pastorem ad ultimum usque vitae halitum egit. Scripta Viri exstant bene multa, nostrâ laude longè majora; è quibus notiora sunt, Theatrum ejus Historicum Theoretico-practicum, Historia Alexandri Magni, Collegium Antiphotinianum, Liber de Norma & judice Controversiarum, Systemata Theologicum, Logicum, Ethicum, Politicum, Disputationum Ethicarum Collegia tria, Theologia typica, Metaphysica, & plura. Ut silentio jam involvam Manuscripta oppido illustria, Biblia latina glossata, Theologiam naturalem, Lexicon theologicum, Philologiam sacram, Tractatum de Formulis cautè & sobriè loquendi in Theologicis, & alia, quæ noster sub manibus habuit, sed morte praeventus, usibus publicis, eheu! consecrare non potuit. Nunc verò sequuntur aliquot Professores Theologi pariter & Diaconi, magna Ecclesiae & Scholæ nostræ Lumina; quæ ob præclarum pietatis & doctrinae splendorem, singularem quoque in concionando zelum, Altdorfio nostro invidit suumq; in sinum transposuit Illustri Norimberga. Eos inter numerandus est M. GEORGIVS RITTERVS, qui anno seculi hujus decimo quinto, die quarto decimo Octobris, Symmysta & Professor Theologiae Publicus heic loci confirmatus est, post octennium verò Norimbergam vocatus ad spartam Diaconi in æde Laurentiana exornandam. Quale fatum itidem expertus est ejusdem tam in Diaconatu Altdorfino quàm Professione Catechetica successor, M. JOHANNES VNGERTVS, alias **Ungerrecht** dictus. *Ritterus* autem quantâ industriâ & dexteritate Professoris administraverit provinciam, comprobant luculenter tot egregiae Disputationes ab ipso in lucem editæ, inter quas præcipuae sunt: duodecim, in primum Catecheos Lutheranæ caput, Decalogum nempe, tredecim in Symbolum



bolam Apostolicum, novem in Orationem Dominicam, quinque de Baptismo, unaque de Pædobaptismate, quatuor de Clavium Potestate, tot quoque de Sacramento Altaris, una insuper de Purgatorio, alia de gloriosa ac miraculosa Christi Triumphatoris nostri Resurrectione, præter cæteras, quæ in præsentis nostris in manibus non versantur. De JOHANNE autem SABBERTO quid dicam? tam Altdorfi nostri quam Norimbergæ eximio planè ornamento, Theologo celebratissimo; qui unus aliquot antiquorum Patrum imaginem & indolem genuinam, os aureum nempe Chrysostomi, constantiam Athanasii, subtilitatem pietatemque Augustini, zelum igneum Ignatii, & venerandam Gregorii Nazianzeni gravitatem, expressit ad unguem. Patria ipsi contigit hæc ipsa literarum bonarum nutrix Altdorfium, ubi puer sub Pulmajero, Gellero, Mauricio, prima studiorum posuit tirocinia; sub Sonero autem, Piccarto, Queccio, Prætorio, velut irrigua planta adolevit feliciter, scientiisque altioribus strenuè incubuit; postea Turingæ, Giesæ & Jenæ tam privatim quam publicè, docentibus æquè ac discipulis eruditionem minimè vulgarem in parata trium Linguarum principum & ἐγκυκλοπαιδείᾳ artium peritia, exquisitissimis approbavit speciminibus. Et cum majore quodam Numinis afflatu ad Theologiam, artium dominam, animum appulisset, & quanto divina humanis antistant, tanto ardentius operam suam isti navasset, firmumque pedem ejus in campo jam fixisset, anno seculi hujus decimo sexto, duodecim Inclutæ Reipublicæ nostræ Alumnis Inspector datus, decimo octavo Diaconus & Theologiæ Professor factus est; inde Norimbergam petitus, ubi anno vigesimo secundo, vix dum ædis Egidianæ Minister constitutus, Marianæ Pastor designatus, vigesimo septimo ædi Laurentianæ præfectus est; trigesimo septimo denique ad Divum Sebaldi supremi Antistitis fastigium, communibus Procerum suffragiis plausuque populi conscendit, tandemque inter cœlites vivere coepit secundo Novembris, A. 1646. Vivit tamen etiamnum apud nos in FILIO Maxime Reverendo & Excellentissimo, Paternam gloriam vel adæquante vel jam supergresso. Vivit etiam vivetque semper illustribus in scriptis, quorum multitudo dignum laude Virum vetat mori. Edidit namque præter Conciones &



quamplurima alia scripta Teutonica, Antismalcium, Prodrum Philologiæ Sacræ, Epitomen Examinis Philippi, Tomum quartum & quintum Epistolarum Philippicarum, Historiam Bibliothecæ Norimbergensis, Innocentiam calculi & podagræ, Cassandrum Evangelicum, Miracula Augustanæ Confessionis, & plura alia doctissimorum librorum monumenta. *Sauberto* in professionis æque ac diaconatus munere hic successit CORNELIVS MARCI, Norimbergæ A. 1594 natus. Quanta doctrinæ vis, quantus virtutum cumulus in pio hoc mitissimoq; existiterit Theologo, non facile est mente vel assequi, nedum exquisito verborum apparatu exprimere ac declarare. Nempe enim à teneris egregiâ ingenii indole præditus in omnigenæ eruditionis disciplinam incubuit, linguisq; & Philosophiæ sacra hic loci fecit choragis Prætorio, Piccarto, Schwentero, Theologiæ verò litavit Altdorfii sub Schoppero & Königio; Wittebergæ sub Friderico Balduino, Franzio, Balthasare Meißnero, Nicolao Hunnio; Jenæ sub Majore, Gerhardo, Himmelio, tam strenuè quidem & exquisitè, ut dignum eum existimaverint Proceres Norici, cujus curæ alumnos suos heic primò committerent, post ad altiora pulpita eveherent, professionem nempe Theologicam, quam exornavit masculè, donec vocatus Norimbergam, ubi primò Pastor ad Divum Mariæ, dein Antistes Laurentianus confirmatus, gregi dominico insigni cum fructu præfuit & profuit concionibus mellifluis, scriptisq; piis & exquisitis, è quibus haud postremum occupant locum Sermones, quos habuit in epistolam Judæ, typis expressi. Mortuus est die vigesimo septimo Julii A. 1646, vel maximo Norimbergæ totius luctu; si tamen fas est aut flere, aut omninò mortem vocare, quàm tam pii ac religiosi Theologi mortalitas magis finita quàm vita est. Sed & Tu nunc paulisper è Superùm sedibus mihi revocandus es, CRINESI CHISTOPHORE, qui anno seculi superioris octogesimo quarto in oppido Bohemiæ Schlaccowalda honestissimis prognatus es parentibus, dein prospero studiorum cursu id assecutus, ut ad summam multiplicis doctrinæ laudem, & munera perquam honorabilia perveneris. Etenim postquam Jenæ & Wittebergæ literis philosophicis, linguis Orientalibus ac Theologiæ, maximâ curâ, operâ, diligentia incubui-



cubuiſti, ab Illuſtri Barone Auſtriaco à Loſenſtein, Sacrae Caeſareae Maieſtatis Conſiliario Intimo, legitime vocatus, munus Concionatoris Aulici in Arce Gſchwendt ſexennium obiſti, poſtea, ut crebrae ſunt rerum humanarum viciffitudines, alii in ſuperiore Auſtria Parochiae praefuiſti; & cum fatalis quaedam religionis mutatio illis in locis incideret, ab Ampliſſimis academiae Altdorſinae Curatoribus primum extraordinarius, mox ordinarius Theologiae Profeſſor & Eccleſiae Diaconus es designatus; quibus in muneribus aſſiduus ac fidelis divinorum arcanorum diſpenſator fuiſti, ſtudioſaeque non ſolum juventuti, qua publice qua privatim docendo, verum etiam omni Reip. literariae profuiſti plurimum ſcriptis ſelectiſſimis; quae ſunt, Gymnaſium Syriacum ſive Grammatica Syriaca, quam ſtudioſus Wittebergae, praefatione celeberrimi Senis Laurentii Fabritii commendatam, evulgavi, Lexicon Syriacum, quod ibidem, primus in Germania, edidiſti, Epiſtola Sancti Pauli ad Romanos lingua Syriaca, ex Teſtamento Syriaco Vienneniſi deſumpta, Exercitationes Ebraicae, Analyſis Novi Teſtamenti tabulis ſeptem & viginti comprehenſa, Gymnaſmata theologica quinque, Concordantiae Ebraicae, Lingua Samaritana, Gymnaſium Chaldaicum, Babel ſive Diſcurſus de Confuſione linguarum. Quin & plura memorabilia ingenii tui monumenta produxiſſes, niſi Deus Optimus Maximus finem maturius laboribus tuis impoſuiſſet, anno videlicet aetatis tuae quinto & quadrageſimo, ſeculi huius vigefimo nono. Neque vero ingrato Te hoc loco praeterire poſſum ſilentio, CHRISTOPHORE ALTHOFERE! Cui prima lucis uſura obtigit vicino in oppido Hersbruccenſi, die nono Novembris A. 1606. Quem Altdorſina noſtra, Witteberga & Jena formaverunt, erudierunt, non in ſtudiis tantum elegantioribus & Philoſophiae, ſed quam maxime Theologiae, ad quam vel tacito inſtinctu, vel divino quodam afflatu propendeabas, majorique contendeabas niſu. Tu hac in academia Eccleſiae Miniſtri & Doctoris Theologiae munus tanta doctrinae, pietatis, ſedulitatis laude per novennium obiſti, ut intra privatos ſcholae huius parietes contineri haudquaquam potuerit nominis tui celebritas, ſed longe lateque diſperſa ſalivam moverit Dresdae, Brunſwigae, Jenae, Vinariae, ad ſe trahendi te tantum Virum;



Virum ; donec Serenissimi CHRISTIANI Marchionis Brandenburgensis , gloriosæ memoriæ , tandem vicerat auctoritas , qui A. 1644 totius Marchionatus sui Superioris Ecclesiarum inspectionem & curam Tibi demandavit. Qua illustri in specula per annos sexdecim , & ad ultimum quidem vitæ spiritum , clarissimos vigilantia & prudentia radios emisisti , & quoad negotiis maximis gravissimisque Ecclesiæ & Reipublicæ es adhibitus , proposita cunctis in medio quasi palma , pæne omnes qui erant à consiliis tam politicis quàm ecclesiasticis , vicisti religione , constantia fide , & tempestiva moderatione. Quin & scripta tua venerabuntur posteris , quamdiu pietati & bonis literis suis constabit honos. Sunt verò illa , Anti-Becmannus , Abyssus desperationis pontificiæ , Speculator Anti-Calvinianus , Commentarii in epistolas ad Ephesios , ad Colossenses , ad Philippenses , Harmonia Evangelistarum emedullata , & plura. Præter hos , quos laudavi hæcenus , habuit quoq; Altdorfina nostra celebriores inter Theologos JOHANNEM WEINMANNVM , cui vivendi exordium dedit patria Swinfurtum ad Mœnum , die decimo quinto Septembris , anno seculi superioris ultimo. Is quàm optimos in juventute nactus est Doctores , & Gießæ quidem Hassorum in Physicis & Græcis , Johannem Steuberum Sanctæ Theologiæ postea Doctorem , in Logicis & Metaphysicis Christophorum Scheiblerum , in Ebraicis Christophorum Helvicum ; Jenæ verò Michaellem Wolfium , Danielem Stahlium , Wolfgangum Heiderum , atque in Theologicis Gerhardum & Himmelium ; quorum Celeberrimorum Virorum in privatis pariter ac publicis scholis tantam affecutus est eruditionem , ut in nostra deinde Altdorfina singulari non tantum favore & amore Queccii , Schwenterii , Kobii , exceptus fuerit , sed & postea ab Incluto Magistratu Norimbergenfi primò ad alumnorum inspectionem , dein officium Diaconi & publicam Theologiæ professionem , deniq; mortalitatem exuente Beato Doctore Königio , ad summam Antistitis dignitatem evectus fuerit , & sumtus ex ærario publico acceperit , quò anno seculi quinquagesimo sexto Gießæ Theologiæ Doctor publicè renunciaretur. Vtramq; muneris sui amplitudinem , ad motis aratro manibus , auxit mirificè , non piis solum concionibus , sed & prælectionibus



onibus tum privatim tum publicè vel diligentissimè habitis, quibus Locos Philippi theologicos & varios Novi Testamenti libros eruditè ac perspicuè illustravit, verum & disputationibus quamplurimis, ac eruditissimo Institutionum Theologicarum libro paucis ante beatum obitum (qui ipsi anno septuagesimo secundo seculi huius obigit) auctius tertia vice edito. Venio nunc eo, quò me & ordo & merita ducunt JOHANNIS FABRICII, Norimbergæ anno seculi decimo octavo nati, ibiq; in sinu Musarum & Gratiarum educati, curâ imprimis Johannis Gravii, Viri admirandæ in fingendis juvenum ingeniis & moribus prudentiæ; cujus monitis & præceptis probè munitus Jenam concessit, ibique Philosophos acutissimos, Schaliū, Schlevogtum, Dilherrum, Zeisoldum, Lipsiæ verò ac Wittebergæ Höpferum, Langium, Carpzovium, Röberum, Martinum, Lyserum, Theologos, summa cum attentione audivit; postea quoque cœptam tum philosophici tum theologici studii telam heic Altdorffii retexere instituit sub auspiciis Brunonis, Nössleri, Königii, Althoferi & Weinmanni. At ubi Academiam patriam cum vetere alumna Jenensi commutare statuerat, eandem hanc telam pertexere decrevit ductu Majoris, Himmeli, Glassii, Dilherri; nec non in illustri Julia Calixti & Horneji, tantâ felicitate, ut latere diu non potuerit Procerum Norimbergenfium aures animosque fama eruditionis & *ἀρετῆς* Fabricianæ. Proinde ab iis A. 1641 ad munus Diaconatus huc Altdorffium vocatus est, & biennio post professionis theologicæ provinciam nactus, Locos Theologicos eâ dexteritate & fide, eo concinno ordine, eâ styli suavitate, secundum ductum Philippi Melanchthonis, adornavit, ut Primario Ordinis sui Professori & Doctori non divitiarum esset illos manus propriæ labore suum in usum vindicare: nunc verò, multorum ex voto ac desiderio, easdem Prælectiones Academicas Filius Excellentissimus publicæ commisit luci. Post septem verò annos alia omnia animo agitans, vocatus est Norimbergam à Magnifico Reipublicæ illius Magistratu ad pascendum cœtum geminum, alterum in Mariano, alterum in Dominicanorum templo congregari solitum. Hoc in officio quantum curæ ac diligentiae adhibuerit, quantâ prædictus fuerit docendi facilitate & felicitate,

E

tate,



tate, quantā in DEVM pietate, erga omnes benignitate, mansuetudine, charitate, Norimberga omnis etiam nunc testabitur, neque debitas Viro laudes denegabunt exteri, quos vel consiliis vel præclaris sublevavit auxiliis. Et sicut Vespasianus agebat: Imperatorem stantem oportere mori; atque Ivellus, celebris in Anglia Episcopus: Episcopum debere concionantem mori; ita noster media in concione, & conspectu confertissimi fidelium cœtus ab ore suo pendentis, è statione sua, per apoplexiam, ad capeffendum æternæ beatitatis præmium, ab Imperatore summoq; evocatus est, die sexto & vigesimo Aprilis anni nuperioris septuagesimi sexti, relicto non tantum Filio Plurimum Reverendo, paternarum virtutum ex asse hærede, sed & monumentis quibusdam, paucis illis quidem, verum è quibus, tanquam ex ungue leonem, quis cognoscat: videlicet Tractatu de *Κακοζηλία* Gentilium, disputationis instar, Præside B. Dilherro, Jenæ quondam defenso; è quo scripto doctissimo, Doctissimus Vir Samuel Bochardus ingenuè professus est se non pauca didicisse; Homiliis etiam nervosè ac solidè adornatis ad Augustanam Confessionem, hisque subjunctis notis eruditissimis; libello deniq; qui inscribitur Raphael, & usui pietatis tum domi, tum inter itinera excitandæ dicatus est. At video me longius progressum esse dicendo quàm initio constitueram. Rapuit & abduxit orationis cursum secundis quasi ventis tam nobilium virorum eruditio, auctoritas, existimatio. Ne tamen vestrâ abutar benevolentia, quam liberaliter mihi concessistis, vela mea contraham, ubi modò de tribus adhuc breviter verba facere licuerit. Quos inter primus esto THEODORICVS HACKSPANIVS, qui lucem hanc aspexit Vinarie anno ævi nostri septimo. Celeberrimum hunc & ex publico bono natum Virum ab ipsis propemodum incunabulis sacræ Philologiæ studium tantoperè delectavit, ut intentâ curâ ac indefesso labore per vitam omnem Orientales tractaverit linguas, eamque sibi paraverat doctrinam, quâ paucissimos æquales, vix quenquam superiorem habere videretur. Sed & Jenæ Philosophiæ pariter ac Theologiæ septem circiter annos incubuit, inde Altdorfium se contulit, famâ ductus ejus, cujus postea vestigia in professione Linguarum Orientalium pressit, Clarissimi Schwenterij;

deni-



denique & Helmstadium profectus, Georgio imprimis Calixto & Conrado Hornejo, Theologis summis, usus est. Palæstram verò Professoriam apud nos, & primò quidem linguarum Orientalium, ingressus est anno seculi sexto trigesimo, Theologicam verò anno quinquagesimo quarto. In utraq; verè Virum se præstitit, & singulari ingenio, industria, eruditissimaque facundia in docendo æquè ac disputando facili effecit negotio, ut uno omnium ore fuerit deprædicatus. Et tantâ sane linguæ Ebraicæ, Sacræ scilicet & Rabbinicæ, Syriacæ, Chaldaicæ & Arabicæ peritia erat instructus, ut, qui nōrant illum propiùs, crederent, parem ipsi reperiri neminem. Vix docere linguas cœperat, ita secum cogitabat, vocem ad paucos dimanare, libros longè lateq; diffundi, proinde in animum induxit, ea publicis sacrare commodis, quæ suo sibi ingenio ac labore peperisset. Sed cum pleræque officinæ typis carerent Rabbinicis & Arabicis, Nobilissimi cujusdam Literatorum Patroni Norimbergensis, beati quippe Domini Jodoci Schmidmajeri sumtibus, domesticam adornavit typographiam orientalibus literis instructam, ad instar Gallorum & Belgarum quorundam, qui hoc ipso doctrinæ genere rem adauxerunt literariam. Hoc igitur subsidio pretiosissimos suos thesauros publicum in usum transtulit, quibus & Philologiæ & Theologiæ studium illustravit atque evexit ut cum maximè. Sunt verò illi: Specimen Theologiæ Talmudicæ, Fides & leges Muhammedis, Liber Nizachon Rabbi Lipmanni, Sylloge plurimarum disputationum Theologicarum & Philologicarum, Partes tres Notarum Philologico-theologicarum, Miscellaneorum Sacrorum Libri duo, Lucubrationes Frankenthalenses, Termini denique Distinctiones & Divisiones Philosophico-theologicæ à se ipso collectæ, multis postea cum accessionibus à B. Diirrio editæ. Quin & non pauca manuscripta reliquit opera interioris notæ, utpote Locos Theologicos, Theologiam Rabbinicam, Grammaticam Syriacam, Lexicon Syriacum, Peculium linguæ Rabbinicæ; hisq; plura vel conscripisset, vel evulgasset, nisi à gravissimo & periculosissimo affectu corruptus, perque totum quinquennium cum adversa conflictatus fuisset valetudine, quam placidus ex hac vita secutus est exitus anno ætatis secundo & quinquagesimo,



seculi quinquagesimo nono. Vivit tamen Hackspanius suo superstes funeri, & postquam se terris docendo & scriptis exquisitissimis satis commodavit, meritis quàm annis gravior debita se restituit æternitati. Alter esto JOHANNES CONTRADVS HEDENVVS, Sondershusæ natus die decimo septimo Augusti A. 1619. Hic per pueritiæ & adolescentiæ spatia, Jenæ cum primis & Erfurdi, institutione Virorum incomparabilium Majoris, Gerhardi, Himmelii, Zapfii, Meyfarti; dein felicissimis per Borussiam, Poloniam, Brabantiam, Hollandiam, Angliam, Galliam, Bohemiam itidem, Austriam & Vngariam, peregrinationibus, tantum sibi comparavit eruditionis & in agendis rebus dexteritatis, ut merito suo primò à Serenissima Principe Palatina Hilpoltsteinensi Concionator Aulicus, postea à Magnifico Reipublicæ Norimbergensis Senatu, & mense quidem Decembri anno seculi nostri quinquagesimo quarto, Diaconus ac Theologiæ Professor Publicus Altdorfinus, anno sequente Oratoriæ quoque Professor fuerit constitutus. Et erat reverà Orator excellens in ecclesiastica pariter & academica cathedra, ac veluti Hercules, suavissimè oris facundia, quasi catenulis quibusdam suspensam auditorum multitudinem ad se trahebat, ita quicquid pietatis cœlestis bonitas, quicquid eruditionis industria & ingenii promptitudo suggererat, vivida, gravia, jucunda fluebant omnia. Ob quam itidem melleam in sacro præsertim suggestu Ecclesiæ Lauffensii Pastor & Concionator præfatus, anno seculi quinquagesimo septimo, ibidemque post octiduum mortuus est, successorem apud nos in professione Theologica nactus, cujus sine lacrymis recordari vix sustinemus, JOHANNEM CONTRADVM DÛRRIVM, Virum abundantem doctrinâ & incredibili quadam varietate rerum & copiâ. Patriam is habuit splendidam Norimbergam, natus anno seculi quinto & vigesimo, sexto Calendas Decembris; & in juventute supra laudati Johannis Gravii aliorumque Moderatorum, exemplis præceptisque ita maturè fingi cœperat, ut nihil nisi magnum ab eo fuerit expectandum. Jamque exquisita artium ingenuarum suppellectile instructus, in amplissimum hoc præstantium Virorum seminarium se contulit, totus Philosophorum ac Philologorum excel-



excellentissimorum scitis deditus atque intentus, Jacobi nimirum Brunonis, Tydæi, Trewii, Hackspanii, Ruperti; Theologia verò navavit operam hic locorum sub auspiciis Konigii, Weimanni, Fabricii. Posthæc utraque propagavit studia in alma Salana, præfidiis Stahlî, Schlevogti, Zeisoldi, Majoris, Musæi; Athenis ad Elum, Calixti Patris, Horneji, Cellarii, Titii, Conringii, Scheurlii, Schraderi, Feldeni, at quantorum Viorum! Et cum ipse jam plena ingenii vela explicare, atque uberrimos eruditionis suæ thesauros recludere occiperet, credebatur ipsi à Perstrenuis Vniversitatis hujus Patronis primum inspectio alumnorum, dein anno sæculi quarto quinquagesimo publica Ethices, anno sequente Poëseos, anno quinquagesimo & septimo Theologiæ Professio. Has functiones omnes quâ fide, curâ, sollicitudine, quanto rei literariæ incremento, quantâ Vniversitatis nostræ gloriâ & celebritate sustinuerit, uberrima nunc dicendi copia foret atque occasio, nisi celebratissima per eruditum orbem fama, scriptis plurimis, iisque cedro dignis confirmata, officium hoc nostrum dudum antevertisset; inter quæ, præter innumeras disputationes tam philosophicas quàm theologicas, hic laudari merentur Notæ in Isagogen Piccarti, Institutiones morales, Ethicâ Paradigmatica, Theologia moralis, dissertationes de Eversione Christianismi per Hypotheses & dogmata Socinianorum, Animadversiones in Libros Normales. Quid? quod scripta plura doctissima intercepta sunt morte ejus, quam obiit ante quadriennium magno cum Vniversitatis & Reipublicæ literariæ luctu ac desiderio.

Accepistis, Auditores omnium ordinum Honoratissimi! Divinæ sapientiæ assertorum in hoc lyceo Doctorumque præclara nomina, quæ aliorum aliis in locis ad æternitatem præconia meritis suis possunt æquare, partim etiam vincere. Quorum & privata, si modo nuncu-

E 3

panda



panda ita sint, ab universo per distincta temporum spatia petita Collegio, cui semper aliquis more academico præsuit publicâ Magistratus auctoritate ac speciali sigillo insignitus Decanus, ad graves conscientiae casus aliaque sacri fori ac argumenti quæsitæ exivere, ac cum applausu excepta sunt à Magnatibus, Rebus publicis, quin & consilii indigis privatis hominibus, consilia, responsa, judicia, censuræ, decisiones. Superest, ut, cum pudor vetet, ipsique haud indubiè prohibeant, præsentium (& faxit Deus ipsos longum superstites!) Excellentissimorum Theologorum injicere mentionem, ipsosque in os, quod ajunt, laudare, hoc demum seriò adjiciam Votum, Incluto Ordini quibuscunque hactenus ornamentis polluit, quicquam eorum ne desit, & quæ defuere fortassis, *omnibus didicimus*, adjiciantur, sicq; altiùs atq; altiùs semper exsplendescat is,

&

*Crescat occulto velut arbor ævo!*

ORA-



## ORATIO III

De

## JVRECONSULTIS ALTDORFINIS.

## PROGRAMMA.

**S**I Berythum urbem Phœniciæ florentissimam celeberrimis olim Jurisperitis, Dorotheo, Anatolio, Gregorio Pontico, aliisque affluentem, Imperator Justinianus in Proœmio Digestorum pulcerrimam civitatem & Legum Nutricem merito censet appellari; si Bononia quoque mater studiorum & Legum Nutrix est appellata; quoniam (teste Azone) legalium studiorum principatum ac veluti Monarchiam semper tenuit; si Academia Patavina ob plurimos, qui in illa docuerunt, eosque Clarissimos Juris Professores, à quibusdam Corona Jurisprudentiæ, & à Jafone, totius Italiæ celeberrima Academia, atque altera veluti Areopagus Atheniensis, est nuncupata; quidni Altdorfina hæc nostra Universitas, ex eadem ratione dici poterit Legum Nutrix, Corona Jurisprudentiæ, Themidis Sacrum, Templum Justitiæ, ac celebratissima Jurisperitorum schola? In hac enim plus quam manifestum est semper floruisse Excellentissimos Juris Professores atque illustrissima Astrææ Lumina, ob quorum fulgorem ista inter reliquas Germaniæ Academiæ exsplenduit, velut inter ignes Luna minores. Scævola, Sulpitii, Papiniani, Ulpiani, Celsi, Caji, Bartoli, Baldi, Fulgosi, Azones, Jafones, vetera sunt nomina, quibus plurimum debet Regina Jurisprudentia. In hac Noricorum Altdorfina Freigii, Wesenbecii, Giphanii, Donelli, Gentiles, Rittershufii, Dinneri, Vngepaueri, Ludwelli, nostra sunt nomina, incomparabiles Jcti, qui Scholæ & Reipubl. tum

Noricæ



Noricæ tum Literariæ maximo fuerunt præsidio & ornamen-  
to. Quorum etsi Virtuti atq; Eruditioni nulla par inveniri  
possit oratio, constituit tamen Vir-Juvenis ad exemplum  
Virtutis & Doctrinæ omnemq; elegantiam natus DN. JO-  
HANNES CONRADVS PIELNHVBER, Altdorfinus, Phi-  
losophiæ & Jurium Cultor diligentissimus, affinis meus per  
mibi charus, tot tantorumq; Virorum laudes propè jam sene-  
scentes ab oblivione hominum atq; silentio, quantum in se est,  
vindicare; & orationem conscripsit de SPLENDIDIS-  
SIMIS JURISPRUDENTIÆ LUMINIBVS  
IN VNIVERSITATE ALTDORFINA, con-  
cursu & attentione omnium politioris literaturæ amantium,  
ut ego quidem censeo, non indignam; eamq; recitabit pomeri-  
diana crastini prima, loco sollemni. Si igitur tot præclarissi-  
ma præclarissimorum Jurisprudentum de Lyceo merita, si ve  
laudabilis ipsius Oratoris in sanctissimos illorum Manes pie-  
tas curæ vobis cordiq; est, Magnifice DN. RECTOR,  
Perillustri ac Generosissime DN. BARO, Excellentis-  
simi PATRES ACADEMICI, Nobilissima DNN.  
STVDIOSORVM CORONA, venite quæso & bene vo-  
lam exhibete audientiam; ita quàm possum observantissimè  
studiosissimeq; Vos oro, meamq; & oratoris gratiam pro affectu  
hoc singulari nunquam intermorituram sanctè spondeo Quod  
superest, DEVM summum omnium Scholarum, Virtutum &  
Sapientiæ officinarum, Præsidem ac Rectorem voce publica ob-  
testamur, ut Altdorfinæ hujus Vniuersitatis fata, tempora, for-  
tunas benignè in perpetuum moderetur, omnesq; in ea etiamnum  
docentes florentesq; divini & humani Juris Sacerdotes,  
aliarumq; bonarum artium Doctores clemen-  
tissimè servet ac tueatur!

MAGNVS DANIEL OMEIS. P.P.  
ORA-



# ORATIO.

(Titt.)

**D**E Jureconsultis Altdorfinis, quibus pares vix ulla Germanicarum Vniversitatum vidit aluitq; , mihi verba nunc facturo, haud inconueniens fore quis existimaverit, Exordii loco, de ipsa Academia hac celeberrima, utpote tantorum Virorum sede ac domicilio paucis præcludere, ad instar Periclis illius Atheniensis, qui in funebri oratione sua apud Thucydidem, priusquam singulorum, qui divino quasi amoris erga patrios Lares æstro perciti capita sua hosti obicere, suumq; sanguinem profundere non dubitaverunt, civium encomia enumeret, de splendidissima Athenarum urbe, tanquam communi eorum patria pauca quædam elegantissime præmittit, & formam Reipublicæ, aliaq; Civitatis Lumina & Numina majorem in modum commendat. Verum enim verò cum è celebri hoc loco non ita pridem omnia, certè potiora, quæ de Inclyta hac nostra Vniversitate memoratu, omnibusq; laudum encomiis dignissima afferri potuerunt, ab Amico quodam singulari sint recensita; ideoq; ego, hac in re Periclis vestigia premendo, post Homerum Iliada scribere actumq; agere viderer: quin potius more Areopagitarum *ἀνὰ πρῶτον*, pace vestra, Domini & Auditores, ad rem ipsam me accingam; hujusq; Orationis meæ, occasione duplicis, quem Altdorfina nostra vidit, Natalis, duplicem constituam partem, & quæ Illustriora Jurisprudentiæ Lumina, tum superiore jam seculo, tum hoc nostro, summo cum splendore in illa enituerint, producam in medium, eo quidem ordine, ut, quantum è monumentis, quæ consulere mihi licuit, erui potuit, de cujusq; nativitate, patria, præceptoribus, laudabili Professionis Juridicæ functione, scriptis insignioribus, abitu ex Academia hac, ipsaq; vita ac sepultura, grata brevitate sim peroraturus: cætera instituto nostro vel parum vel nihil servientia, iis relinquens, qui insigni curâ atque industria tradunt omnem vitæ seriem Virorum Eruditorum. Quanquam verò magnopere sit verendum, ne, si minùs fortasse ad cujusvis palatum exitura sit oratio mea, cum ego is sim, qui

F

sermo.



sermone meo obscurare quam illustrare facilius Summorum Virorum gloriam possum, singulique, de quorum laudibus dicere mihi est constitutum, singulas orationes jure quodam suo postulare videantur, non sine pudore & dedecore audire fortè cogar Plautinum illud: *Strenuiori deterior si prædicat suas laudes, de illius ore sunt sordida*. Attamen cum apud illos mihi sermonem esse satis meminerim, qui eâ pollent sapientiâ & prudentiâ, ut sibi met ipsis possint explicare, quæ Oratoris tenuitas tractationis plenitudine assequi non audet; eâ gratiâ & charitate erga defunctos, ut memoriam eorum, quos studiorum ex parte Doctores Ductoresq; habuerunt, ob singularia erga Rempublicam Literariam merita à squalido oblivionis situ vindicari sponte & ultrò cupiant; eâ deniq; humanitate ac benevolentia, ut hoc perorandi onere, quod semel suscepi, tantum non oppressum me aliqua ex parte erigere magis statuant, quam sub illa mole rerum fatigatum succumbere patiantur: ideo rem ipsam nunc tandem eò alacrius aggredior, Vosq; Auditores. Ordinum omnium Honoratissimi, eâ, quâ debeo, animi submissione oro rogoq; ut ingenii mei tenuitatem vestro favore & benevolentia, inopiam dicendi vestris studiis, rei deniq; magnitudinem vestrâ attentione ac silentiò sublevare non dedignemini.

**I**nter illos autem, qui circa tempora primi, munificentia atque auctoritate gloriosissimæ memoriæ Imperatoris RVDOLPHI II. celebrati, Natalis (erat is ipsum Jacobi Festum, nempe xxv. Jul. A. C. 1580.) in almo hoc Lyceo non ut hospites aut ἀσπυργοι vixerunt, verum Scholæ & Reip. Noricæ maximo fuerunt ornamento atque præsidio, primum jure quodam suo locum sibi vindicat JOHANNES THOMAS FREIGIVS, Philosophus ac Jctus ille celeberrimus. Hunc tantum talemque Virum benignissimè nobis indulgit principale illud in Brisgojensi provincia oppidum Friburgum. Præceptores, sub quorum ductu & moderamine tam pretiosa adolevit planta, habuit Vdalricum Zasium, Henricum Glareanum Friburgi, & in Galliis Petrum Ramum, cujus postremi virtutem & exactam eruditionem (erat enim Rami sectator strenuus) post fata hoc ornavit elogio:.

Dr.



*Invictus Rame es, nam bis duo pectora gestas,  
Socratis, Euclidis, Tullii, Aristotelis:  
Arte es Aristoteles, methodo Plato, Tullius ore,  
Ingenio Euclides; Rame quid ulterius?*

Principio Friburgi docuit, deinde Basileæ, donec, mortuo Valentino Erythræo, ab Inclyto Norimbergenſi Senatu ad Scholæ Rectoratum Anno 1575 ſuaſore Hieronymo Wolffio vocatus, & Rector Lycei huius publicè renunciatus eſt à Philippo Camerario, Jcto & Reipubl. Norimbergenſis Conſiliario, in præſentia trium Dnn. Scholarcharum, Bilibaldi Schlüſſelfelderi, Philippi Geuderi, & Hieronymi Paumgärtneri, feſtò Divo Andree ſacrò anni ſequentis ſeptuageſimi ſexti. Hoc Rectoratus pariter & Profeſſionis munus quanta ſedulitate & fidelitate geſſerit, quanta facilitate Philoſophiam enucleaverit, quanta eloquentia ac prudentia Leges intricatas explicaverit, contortos cauſarum laqueos ſolverit, controverſias dijudicaverit, & Auditores ejus verbis exprimere non potuerunt, & Philologicæ, Philoſophicæ ac Juridicæ, quæ ab ipſo luci publicæ ſunt commiſſæ lucubrati-ones, ſatis ſuperq; loquuntur: quarum inſigniores ſunt Quæſti-ones Logicæ, Ethicæ, Politicæ, Phyſicæ, Geometricæ & Ste-reometricæ, Quæſtiones Juſtinianæ, Logica Jctorum, Par-titiones Juris, Methodica Actionis Juris repetitio, ejusdemq; Zaſius, hoc eſt, Commentarius in Pandectas, olim ab Vdal-rico Zaſio diſſuſè tractatus idemq; multis Apodiſtictis auctus Functus autem eſt Rectoris & Profeſſoris munere hic loci per ſexennium, annoque ſecundo & octogefimo Baſileam abiit, ibidemque peſtis contagione, quæ tunc vitiaverat urbem, & ei liberos tres ſuſtulerat, ipſe etiam infectus, crebris ad DEVM gemitibus miſſis, intra quadraginta horas à conceptæ ſuiſ ſenſu, ad æterna beatorum gaudia, xvii. Kalend. Febr. anno ſequenti octogefimo tertio, migravit. Poſt Freigium habuit Academia noſtra Jurisperitos Clariffimos, quorum egregiam doctrinam fidemq; & induſtriam plurimi magno cum emolumento ſunt experti: D. JOHANNEM BVŒREIT, natum anno octavo & quadrageſimo ſeculi ſuperioris, præfe-ctum functioni Profeſſoriæ ipſo priore Academix Natali, tan-dem Noribergam proſectum, ibidemq; Ampliſſimo Ordini Con-ſiliariorum adſcriptum, decimo deniq; noſtri huius ſeculi ibi de-natum; D. MATTHIAM INDENIVM, qui ſcripſit de Acti-



one Hypothecaria: & PETRVM WESENBEIVM, Petri Filium, Matthæi agnatum, Antverpiæ, quinto Maji, anno quadragesimo sexto supra millesimum quingentesimum, hanc in lucem editum: qui deinde vir factus in Palæocomē nostra præclarum egit Juris Professore; inde Coburgum se contulit, ibidemq; rebus humanis exemptus est mense Septembri, Anno à Partu Virgineo millesimo sexcentesimo tertio, ætatis septimo & quinquagesimo, relictis aliquot egregiis ingenii monumentis. Et verò de tribus hisce prolixius disseruissē ac lubens, nisi orationem hanc meam ad se vocaret & absorberet penē Jctus, Philosophus & Philologus neque silendus, neque dicendus sine cura. Est is OBERTVS GIPHANIVS Buranus Geldriæ, natus anno sæculi superioris quarto & trigesimo. Hic in juventutis suæ flore Luca Fruterio, Jano Lernutio, Janoq; Douza Seniore, Lutetiæ in Galliis usus est familiarissimē; deinde Argentorati Philosophiam, & postea heic Altdorfii & Ingolstadii Jurisprudentiam summa cum laude est professus; tandem in aulam Imperatoris vocatus & Consiliarii Cæsarei ornatus titulo, obiit Pragæ anno sæculi hujus nono, septuagenario major. Scripta ejus elucubratiſſima, hodieq; suo, hoc est, æstimatissimo, sunt in pretio, nec interibunt nisi cum Auctoris nomine, nempe quo die Orcus ab Acheronte mortuos amiserit; Commentarios puto in Ethicē & Politicē Aristotelis, Collectaneā & Indicem in Lucretium, Observationes Linguae Latinæ, Commentationes in Institutiones Juris, Antinomias Juris Civilis ac Feudalis, Tractatum de Renunciationibus, Oeconomiam Juris, Notas in corpus Juris Civilis, in aliquos Digest. & Cod. titulos lectiones Altdorfinas, librosq; plures, in quibus ingentis viri effigiem melius expressam contemplari licet, quàm penicillo Apellis, aut cælo Lyſippi. Sed nec Te longiore præterire possum silentio, HVGGO DONELLE, Te, Clarissime (quo nomine à summo illo Historico Thuano ornaris) Juris Civilis interpres; in Te quid primum, quid secundum admirer, nescio. Primam hujus lucis usuram accepisti in urbe famigerabili apud Burgundiones Gallici nominis, quam vernacula lingua Chalon, Latini Cabillonum appellant, A. 1527; adeoq; Gallicanā fuisti origine, quæ, ut tibi vitæ, ita secururæ gloriæ initium fuit. Adhuc enim decantatur, & omnibus laudum præconiis ad cælum usq; extollitur admiranda illa



illa Gallorum & stupenda posteris industria, quam ad illustrandum Jus Civile, cum illud in Italia, Germanorum hominum ope, post aliquot seculorum decursus, quibus delituerat, denuò è tenebris situq; emergeret, strenuè contulerunt: unde faciliè apud Italos pulcherrima illa cognomina *Acutorum & Subtilium*, sibi merebantur, ac deinceps velut hereditaria posteris suis relinquebant. Hanc laudem, hanc famam & admirationem, hanc nominis gloriam à majoribus acceptam, incomparabili tua divinaq; ingenii sublimitate æquasti non solum, sed longè ampliorem, longè clariorem, longè illustriorem reddidisti, imò penitus superasti. Huic naturali tuo ingenio accessit & illud, quod Te se dignum discipulum Viri in Jurisprudencia tum temporis celebratissimi instruxerint, Tolosæ nimirum Johannes Corasius, Arnoldus Ferrerius; Biturigibus, Juris Civilis Clarissima illa Lumina, Equinarius Baro, Franciscus Duarenus, Hottomannus & Cujacius: at quanta nomina! Quos excellentissimos Viros, præcipuè verò ingens illud Jurisprudentiæ decus, Duarenum, eximia tua indole, inaudita eruditione & felicissima memoria ita stupere fecisti, ut non de homine amplius, sed de novo aliquo portento fuerit locutus, & indies sibi te majoribus officiis devinciendum existimaverit: siquidem brevi etiam factum, ut dignus judicareris, cui ipse utriusque Juris publicè interpretandi facultatem tribueret. Hinc nulla interposita mora singulare tuum ingenium, ardorq; mentis, tanquam flamma quædam aut fax publica è cælo in varia loca delapsa, Jurisprudentiam sic illustravit, ut si ipsa loqui possit, non certius aut copiosius, aut majore cum dignitate & fructu explicatura videatur sensus suos, quàm à te fuerit explicata. Testis est Academia Biturigensis, ubi communi omnium suffragio in amplissimum Antecessorum Collegium cooptatus, Jus Civile publico stipendio summaq; ingenii gloria, etiam adolescens, quippe qui vigesimum quartum annum nondum attigeras, profiteri cœpisti. Testis est Academia Heidelbergensis, in quam, strage Lanienæ Parisiensis territus, te recepisti; ubi aliquot annis principem Jus Civile interpretandi provinciam tenuisti, & quod proprium est sapientiæ, bona sua non in sinu clausa ac constructa habere, sed in alios etiam diffundere, omnia, quæ à tot consummatissimis Jctis hauseras, ad communem omnium studiosorum utilitatem

An. 1551.



magna cum æquitatis prudentiæq; commendatione in medium attulisti. Testis est florentissima illa, quæ tum temporis fundabatur, Academia Leidensis, ad quam ornandam & quasi exstruendam unâ cum Justo Lipsio, illo inimitabilis, & ne tentandæ aliis eloquentiæ Viro, statim fueras vocatus; quæ laudatissima Academia ingenti tua & celeberrimi hujus viri fama atque auspiciis, confluyente undiq; ex omnibus oris juventute, sic crevit & adolevit, ut prudentissimi illius Lacedæmoniorum Regis Agelilai effati veritas ipso rarissimo vestro exemplo satis superq; corroborata videretur, nimirum *non loca viris, sed viros locis honorem ac dignitatem conciliare.* Testis deniq; est ipsa nostra Altdorfina, quam honoribus & beneficiis ab Inclyto Norimbergensium Senatu in te collatis incitatus postremam tibi sedem elegisti, eamq; sic ornasti, ut brevissimo tempore celebritate nominis tui inter vetustissimas Germaniæ Academiæ recens ipsa asurgeret. Tria & vetus vox est: *Vbi Imperator, ibi & Romam esse.* Non invita Minerva aut refragante vero illam huc quoq; trahere possum, si dixerò: Vbi Tu DONELLE vixisti, eodem in loco simul Jurisprudentia celebritasq; versata est. Gratulatione igitur prosequenda mihi videtur Altdorfina nostra de Te; idq; eo magis, quòd, etsi adspirârint ex aliis longius distitis oris melioris etiam fortunæ Favonii, portaturi te in remotiores Serenissimorum Principum aulas, nostram tamen Academiam omnibus aliis exerendæ stupendæ virtutis ac eruditionis tuæ occasionibus præferre potius, quàm eam deferere, summosq; literarum Patronos Norimbergenses offendere volueris. Sed vixisti, DONELLE, & tibi in hoc ipso oppido anno superioris seculi nonagesimo primo, ætatis tuæ quarto & sexagesimo placidissimè defuncto, Scholarchæ Magnifici monumentum in omne ævum duraturum, publicè in templo nostro erigendum curaverunt. Monumentum illud æri incisum & hisce verbis conceptum etiam nunc conspicitur:

D. O. M. S.  
HUGO DONELLVS HEDVVS, NVLLI ICTORVM  
NOSTRI SECVLI SECVNDVS, IN GALLIIS INITIO,  
MOX INDE CIVILI BELLO FLAGRANTE  
SECEDERE COACTVS, EIDELBERGÆ, DEIN LVGDVNI



DVNI BATAVORVM, DENIQ; ALTORFII, MA-  
GNA CVM ADMIRATIONE OMNIVM ET CON-  
CVRSV EXTERORVM, JVRA FACVND ORE  
DOCVIT, OBQVE PIETATEM, CANDOREM, ET  
HVMANITATEM DEO ET HOMINIBVS ÆQVE  
CHARVS, SENIO TANDEM CONFECTVS, VITÆ  
ET MOLESTIARVM SATVR, PIE ET PLACIDE  
ANIMAM CREATORI REDDIDIT, ANNO REP.  
SAL. HV. M. D. XCI. MENSE MAIO. ÆTATIS  
SVÆ ANNO LXIII. CUI BENE MERITO DE  
ACADEM. ALTORFINA SCHOLARCHÆ PEREN-  
NIS MEMORIÆ ERGO H. M. P. C.

Positum autem hoc ipsum fuit, non quò magis innotesceres, qui  
celebritatem atque gloriam ubique jam diffuderas; sed ut præ-  
clarissima tua merita nunquam intermoritura tenerentur me-  
moria, & videret secutura posteritas, quantum nostra post fata  
tibi debeat Altdorfina. Vivis, vivesq; & hoc & tot aliis ingenii  
tui monumentis, inter quæ haud postrema sunt illa, quæ reliqui-  
sti de Actionibus, ac de Pignoribus & Hypothecis; ut fileam  
Commentarios illos de Jure Civili, quibus nihil Reipublicæ lite-  
rariæ, adeoq; communibus omnium utilitatibus accommoda-  
tius, nihil perfectius ab ullo homine inveniri potuit; sentiente  
ita, Tibi qui vivo vivus omni affectu erat conjunctissimus,  
SCIPIONE GENTILI, Viro, ob cujus nomen, quod omnibus  
tam Germanorum quàm exterorum hominum Academiis sa-  
crum & immortale est, adhuc cristas erigit nostra Altdorfina:  
ad quem pleno nunc etiam cursu mea contendit oratio. Tanto  
huic Viro patria exstitit Castellum Genesii Agri Piceni seu  
Marchiæ Anconitanæ, ubi anno salutis per Christum partæ  
1563 primum hausit spiritum, ex antiquissima Gentilium Rus-  
sorum prosapia oriundus. Adolescens Patrem Matthæum &  
Eratrem Albericum, magnum illud Jurisprudentiæ decus, solo  
pietatis amore, quò nullo non tempore vehementissimè flagra-  
bat, ex Italia patria in Germaniam secutus, Tubingæ Græcis li-  
teris se tradidit sub Martino Crusio, viro optimo ac eruditissi-  
mo, quem semper ut Præceptorem est veneratus. Is igitur ar-  
tibus, quibus ingenia ad altiorum studiorum cultum excitantur,  
probè



probè instructus, profectus est Lugdunum Batavorum, tanquam ad omnium bonarum artium mercatum, ubi se divina quasi designati virgula suggerebant Viri, qui per id tempus Jurisprudentiæ & Philosophiæ Antistites habebantur, modò laudatus Hugo Donellus & Justus Lipsius. Ad horum aliorumque, quibus isto tempore famam è seculo in omnem æternitatem duraturam sibi excitavit ista Vniversitas, auctoritatem ductumq; se totum applicuit, tantumq; apud eos profecit, ut paulò post, interposita Donelli commendatione, hoc in Athenæo initio Institutionum interpretandarum professionem acceperit, mox Pandectarum Professor constitutus, tandem Petro Wesenbacio, precibus Ducum Saxonix, quibus refragari nefas duxit, Vniversitati nostræ erepto, Codicis, Antecessorq; Primarius, nec non Consiliarius Noricus ab Inclyto Senatu publicè fuerit designatus: in quibus provinciis obeundis, strenueq; & gnauiter exornandis, ipsos viginti sex annos, & quod excedit, consumsit. Quo toto tempore quanta fide & industria omnes partes Juris exactissimè enucleaverit, quanta ingenii alacritate de obscuris perspicuè, de perplexis ordinatim, de dubiis accuratè differuerit, quanta deniq; vocis magnitudine, quanta orationis ubertate, actionis splendore ac dignitate omnium auditorum animos in sui amorem & benevolentiam rapuerit, quis est, qui consentanea stili gravitate possit explicare? Neque verò diserebat tantum, sed & scribebat. Cujus rei fidem faciunt æternæ laudis & artis pignora, quæ seculo deposuit ac eruditionis, imò illa ipsa rerum humanarum divinarumque Regina Justitia; inter quæ, velut inter ignes Luna minores, caput extollunt nobilissimi libri de Donatione inter Virum & Vxorem, de Conjuratationibus, de Bonis Maternis & Secundis Nuptiis, de Erroribus Testamentorum à Testatoribus ipsis commissis, de Jure Publico Populi Romani, libri duo Parergorum ad Pandectas, & inprimis tres præclarissimi illi de Jurisdictione, qui nec à summis quidem Jctis satis laudari commendariq; possunt. Cum verò virtutis & gloriæ ea sit conditio, ut angustos intra cancellos circumscribi se minimè patiatur, sed effractis unius privatæ domus claustris erumpat in publicum, & exteris quoq; omnibus contemplanda & admiranda sistatur; ita quoq;

Scipio



Scipio noster Gentilis præpetibus ingenii sui pennis primò in sublime se efferens, latissimo per gloriæ campum gyro alas sic extendit, ut fama ejus jam omnibus orbis terrarum regionibus contineri, & civitatum Græcarum more, quæ de patria Homeri ambitiosè fatis dimicabant, quasi quoddam certamen inter potentissima regna de Scipione nostro nanciscendo iniri videretur. Petebat enim illum Gallia subtilissimorum aliàs ingeniorum fertilissima, anxie desiderabat eum Academia Heidelbergensis, voluit illum Aristocratica Sedis Apostolicæ Monarchia, cujus fascesea tempestate moderabatur Clemens VIII, qui liberrimo illum potius religionis exercitio uti quàm eodem carere maluit: (magnum sanè Pontificis promissum, ut quod alii maximis donis summaq; vi obtinere non potuerunt, virtute ac Juris scientia hic obtinuit!) Vnanimi etiam consensu ab Illustrissimis Hollandiæ Ordinibus expetebatur, sed frustra ab omnibus: hic enim bene mereri & mori, hic ingenii sui vim exerere, hic viam sibi ad perpetuam nominis gloriam parare, sternere, doctissimaq; juvenum animos formandi methodo munire maluit, quàm maximis alibi laboribus ac vitæ periculis se implicare. In hac humanæ vitæ quasi fabula transactis jam suis partibus, Gentilis noster Scipio cum plausu hic Altdorfii decessit, septimo mensis Augusti, anno hujus seculi decimo sexto, ætatis verò tertio quinquagesimo. Quem post mortem quoq; tanti æstimavit Inclytus Senatus Norimbergensis, ut illum, tanquam pretiosissimum thesaurum, promiscuæ subtractum sepulturæ in hujus oppidi templo copulatum jam cum Magni Donelli Manibus in cœlis, cum ossibus etiam in terris incomparabilis viri conjungi jussit:

*Scilicet ut tumulo quoq; vicinissimus esset,  
cui magno fuerat proximus ingenio.*

Mortuum Mich. Piccartus Oratione laudavit elegantissimâ. Ordinis me jam ducit linea ad fulgidissimum illum Vniversitatis nostræ splendorem, **CONRADVM RITTERSHVSIVM**, columen Patriæ, Academiæ lumen, Reipubl. Noricæ ornamentum, ritè à natura perfectum illud summum Jurisprudentiæ omnisq; præclarioris eruditionis culmen ac fastigium, literarum denique ac literatorum omnium, quamdiu vixit, patronum. Quanta in hoc viro vis ingenii & doctrinæ, quanta eloquentiæ

*Epicaphiū  
descriptum  
vid. in Cl.  
Rönigii  
Biblioth.  
Var. &*

*Nov. p. 340.  
341.*

G

& sa.



& sapientiæ gloria, quanta rerum peritia atq; experientia, quanta denique, quod est omnibus ejus laudibus jure meritoq; anteponendum, quodq; omnibus seculis difficillimum inventu, admirabilis cum admirabili omnis generis eruditione conjuncta judicii rectitudo, vitæ mentisq; integritas ac innocentia fuerit, dicendo satis consequi haud me posse intelligo. Et quænam tanta est ingenii vis, quod tantum orationis flumen, quæ tanta dicendi facultas & copia, quæ RITTERSHVSII nostri laudibus ex æquo respondeat? Fuit enim Vir ille alter sui seculi Scævola, neq; solum Jctus, sed Poëta eximius, Philosophus acutissimus Oratorq; optimus; grandis enim erat verbis, immensus translatis, nobilis sententiis, quæ acres vibrantesq; in audientium sensus invaderent, irrumperent, penetrarent, in eisq; aculeos quasi quosdam relinquerent; adeoq; (quod de Scævola Crassus dicere solebat) erat RITTERSHVSIVS *Juris peritorum eloquentissimus, & eloquentium Juris peritissimus*. Exortum autem est ingens hoc Themidis lumen in magna illa Saxoniæ Inferioris urbe Brunsviga, seculi superioris anno sexagesimo, die vigesimo quinto Septembris: qui mensis uti ipsi natalis fuit, ita & fatalis. Post jacta prima pietatis literarum ac bonarum artium fundamenta, nactus est Præceptores Brunsvigæ, Matthiam Bergium, Rectorem ac Moderatorem Scholæ patriæ felicissimum, in hac Altdorfina deinde Ethices Professore oppidò celeberrimo: Clarissimosq; Jctos Borcholtum & Jagemannum Helmstadii: celeberrimum nostrum Giphanium in Jure & Philosophia Practica, in Metaphysicis acutissimum illum Peripateticum Philippum Scherbium, hic Altdorf: nec non Andreæ Fachineum Ingolstadii, ubi locorum etiam familiariter usus est Professoribus reliquis, atq; in primis Philippo Menzelio, & Alberto Hungero S. Theologiæ Doctore; quorum ille illum propter modestiam & eruditionis amœnitatem non leviter amavit, hic verò tanquam gravissimus ingeniorum censor scrutatorq; animorum solertissimus, hoc de ipso jactavit elogium: Revixisse in Rittershusio Gregorium Nazianzenum, utpote qui in scribendis Græcis carminibus ingenium illius festivè posset efformare. Non minus quoq; eruditionis elogium indeptus est à Consultissimo Colero, ad generosum Juvenem Stanislaum Juclenium Vitellium inter alia ita scribente: CONRADVS RITTERSHVSIVS

nescio



nescio an tibi familiaris fuerit, fuisse vellem. *Probus vir est, & præter fctum varia eruditione & linguæ Græcæ facundia virum se præstat.* Non immeritò hoc à tantis commendatur Viris, quòd celeberrimus noster RITTERSHVSIUS Legum studium, politiorum literarum & præsertim Græcæ Linguæ cognitione condire voluerit & ornare; secus ac faciunt illi canina facundia exerciti litium consarcinatores, togati vulturii, hirudines forenses, fori tintinnabula & gregarii rabulæ, quos pestes civitatis non injuriâ quis appellet. Vix in nostram Vniversitatem pedem intulerat RITTERSHVSIUS, jam Institutionum Professio illi deferebatur, cui per aliquot annos laudatissimè præfuit, usq; dum post discessum ex hac Academia *Petri Wesenbecii, Scipioni Gentili*, qui prius Pandectas explicabat, successio in locum sublimiorem concederetur, Rittershusio autem nostro Pandectarum Professio demandaretur. Posset hic gloriari mea oratio, posset se efferre, posset triumphare, posset stupenda prorsus loqui de admiranda nulloq; ætatis flexu inclinata fatigataq; Rittershusii pietate, de mira ejus ac rarissima, qua relictis veteribus viis, ad omnium scientiarum notitiam studiosis novum & facillimum iter aperire consuevit, docendi interpretandiq; methodo; & deniq; de purissimis, qui per viginti & duos annos, quibus Professionis munus sustinuit, ab eo, tanquam à limpidissimo omnis Sapientiæ & Prudentiæ fonte, in multorum studiosorum animos exundarunt, Jurisprudentiæ rivulis: nisi tanta commemoraturo, omnia in rerum pondere, nihil in verborum cultu esset reponendum. Cùm verò rerum humanarum ea sit conditio, ut nihil in iis sit perpetuum, constans nihil, præsertim in iis quæ ad sublimitatem & perfectionem suam pervernerunt: ita & nostrum Rittershusium, cùm is jam ad summum famæ & honoris culmen ascendisset, & ubiq; audiisset gemma doctorum omnium ac bonorum inæstimabilis, anno hujus seculi decimo tertio, ætatis vero tertio & quinquagesimo, supremus occupavit dies; non tamen sine relictis præclarissimis literarum monumentis. Ita namq; se in Bibliothecam omnis generis refertissimam abdidit, ut tanquam diligens agricola arbores fereret, quæ alteri seculo magno commodo atq; emolumento fore existimavit. Præter enim Commentarios in Oppianum, Salvianum, Güntherum,



Phædrum, Plinii Epistolas ad Trajanum, Malchum, Isidorum Pelusiotam, Partitiones Juris Feudalis, Consilia Altdorfina, Dodecadeltion, h.e. novum in XII Tabularum Leges Commentarium, Differentiarum Juris Civilis & Canonici libros septem, Commentarium in Institutiones, ad L. Contractus de diversis Regulis juris antiqui, Jus Justinianum five Novellarum methodicam expositionem, aliaq; insigniora incomparabilis ingenii sui pignora erudito reliquit orbi, quorum decus nulla oblitterabit oblivio, sed posteritas alet, æternitas ipsa semper intuebatur. Nec sanè nulla mihi laudum materies hic daretur de Conr. Rittershusii συγγράμμα & Collega, JACOBO TETENSIO, Jcto apud nos & Antecessore, cujus hodieq; superant Dispp. de Transactionibus, de Jurisdictione, & ad L. Precibus. Cod. de Impub. aliisq; Substit. & fortasse plures; nec non de minimè vulgari illo Jcto MATHIA HVBNERO, Anclam-Pomerano, qui per decennium hic Altdorf summa cum ingenii sui celebritate jura est professus, relictis pulcherrimis in Juris Institutiones Disputationibus, Annoq; seculi hujus decimo quarto Norimbergæ splendido Consiliarii munere fungens, inter vivos esse desiit; nisi me avocaret pars orationis meæ altera, in qua illos Jurisprudentiæ Doctores ac Professores, qui circa alterius hujus Academiæ Natalis tempora & post ea vixerunt, me in scenam producturum initio indicavi: quare ut & hisce promissis meis stare possim, id quod adhuc fecistis, benignè attenteq; breviter me dicturum porro audiat, maximopere rogo.

Annus seculi hujus erat tertius & vigesimus, quo Sacratissimus Imperator FERDINANDVS II priora Lyceo huic à RVDOLPHO II indulta privilegia non solum clementissimè constabiliendo, sed etiam ad Juridicam & Medicam Facultates Amplissimas prolatando, alterum huic Academiæ Natalem illucescere fecit. In quorum Privilegiorum sollenni promulgatione Inclytæ Facultatis Juridicæ Decanus tum temporis florebat omnis Legalis Doctrinæ Thesaurus ANDREAS DINNE-RVS. Hujus tanti viri patriam se dicit non modò, sed jactat celeberrima illa Franconiæ urbs Wirceburgum, in qua primos edidit vagitus, terrenumq; hoc exilium orsus est, ipso die Purificationis Mariæ, anno à nato mundi Redemptore 1579. Ac primum omnibus illis disciplinis, quibus juvenilis ætas instrui debet,



bet, eruditus, ac pro amore, quo ipse eam facultatem prosequeretur, juris scientiæ initiatus, in eadem Vniuersitate patria **Wilhelmum Brussium Scotum, Petrum Gulkenium, Antonium Salicetum, Belgas, & hic Altdorf I Conradum Rittershusium, Ingolstadii Andream Fachineum & Henricum Bocerum, lectissimos fidelissimosq; habuit Doctores; tandemq; perlustrata Gallia, Anglia & Italia, anno seculi currentis sexto, in numerum Consiliariorum Inclyti Senatus Norimbergensis receptus, post bimestre Institutionum Professionem hic Altdorf I obtinuit. Deinde post obitum *Γράβι* Rittershusii Pandectarum Professor electus, & triennio post, supremam Juris Professionem morte Scipionis Gentilis vacantem adeptus, omnes Antecessoris Primarii numeros implevit. Senior Oblegii Juridici fuit ab anno sexto decimo, ex quo ad plures migravit modò memoratus Scipio, usq; ad annum hujus seculi trigessimum tertium, quò ipse, dum vix per biduum decubuisset, animam Creatori suo reddidit. Sanè fuit Dinnerus & Theoreticus instructissimus & Practicus excellentissimus: in quem, si in quenquam Doctorum, elogium istud, quo Themistoclem insigniuit Thucydides, convenit: *Fuit rerum improvisarum cum brevissima deliberatione iudex præstantissimus, & futurarum ac eventus ipsarum plerumq; optimus conjector.* Hinc ea de recondita exquisitaq; ejus doctrina singulariq; prudentia omnium animos invaserat opinio, ut illius domus Civitatis Noricæ, & Academiæ, imò magni alicujus Principis oraculum haberetur, quò omnes confugerent, unde in suis rebus dubiis responsum referrent, quodq; dictum ab eo esset, non aliunde, quam ex Apollinis ore prolatum acciperent. Inter monumenta ingenii ac doctrinæ, quæ per universum literarum orbem disseminavit, effulgent Disputationes de Monetæ mutatione quoad solutionem, Conclusiones tam Contractuum quàm Contentionum obscurarum, Commentarius de justo rerum pretio definiendo, & quatenus in eo circumvenire contrahentes liceat; sapientiæ sanè ad publicos usus signa immortalia. Præter hunc Jurisperitum Clarissimum eodem fere tempore nostra vidit Altdorfina ingens illud Astrææ decus **ERASMVM VNGEPÄVERVM**, Naumburgensem, anno superioris seculi octogesimo secundo natum, Pandectarum hic per decennium & quod excurrit, Professore celeberrimum: qui deinde seculi**



nostri trigesimo quinto Jenam abiens, per quatuor & viginti annos Decretalium Professor Publicus & Prudentissimus Vinar-  
ensis Ducis Consiliarius, Scabinatusq; Assessor meritissimus ex-  
titit. Pulcerrimam ejus ingenii formam magis quam aliqua  
eloquentissimi cujusdam oratio exprimet multorum, quæ po-  
steris reliquit, monumentorum divinitas, quorum exequias  
nulla posteritas seculorum aspiciet, Tractatus inprimis de Jure  
Naturæ, Exercitia Justinianeæ, Commentarius ad Decretales  
aliaq; plura insignis eruditionis pignora, de quibus filere præstat,  
quam pauca dicere. Vidit ÆGIDIVM AGRICOLAM, re-  
ligiosissimum quoq; justitiæ Sacerdotem & Consiliarium Nori-  
cum. Natus is erat anno 1578 Neukirchii Palatinæ ditionis  
loco, Sulzbachio quarto lapide distante. Juvenis studio juris  
incumbens interpretibus usus est Jenæ Geilkirchio, Hænonio,  
Dominico Arumæo, Ortolpho Fromanno, Doctoribus longè  
celeberrimis. Initio extraordinariam, tandem etiam anno hu-  
jus seculi tertio decimo, suum ante obitum trigesimo, Publicam  
Professionem Juris Civilis, Titulorum Digestorum de Verbo-  
rum Significationibus & Regulis Juris accepit. Ingenium Viri  
perhibent fuisse sulco simillimum, è quo Juris & præcepta salu-  
berrima & æquissima responsa & consilia tutissima quotidie  
germinabant. Vidit deniq; JOHANNEM GERHARDVM  
FRAVENBURGIVM, Norimbergensem, itidem Reipubl. ejus-  
dem Consiliarium gravissimum, nec non Juris in hac Vniversita-  
te Professore insignem, qui anno superioris seculi octogesimo  
nono natus, in ipso autem flore rerum suarum, inq; vigentis  
etiamnum ætatis inflexa illa maturitate, anno ætatis primo &  
quadragesimo, seculi præsentis trigesimo eheu! denatus est.  
Erat is verò non solum præstantissimus Jctus, sed etiam Poëta  
excellens, pro quo mortuo quoq; loquitur adhuc elegantissi-  
mum illud carmen, quo descripsit historiam de Virginio filiam  
suam interficiente, ex Livii Decad. 1. Lib. 3. Atro autem car-  
bone notandus hic essem, Auditores Honoratissimi, si B. Frau-  
enburgii successorem filerem diutius, Virum & antiquitate ge-  
neris & sanctitate ac innocentia morum & admirabili doctrina,  
ac profundissima Jurisprudentiæ optimarumq; artium cogni-  
tione penè incomparabilem, WILHELMVM LVDWEL-  
LVM intelligo, patria Elbingensem, genere Nobilem Anglum,  
Jctum



Ictum summum & in hac Altdorfina Vniversitate per triginta  
 & duos annos Professore celebratissimum, Serenissimi Comitis  
 Palatini CHRISTIANI AVGVSTI, nec non Inclytæ Reipubl.  
 Norimbergensis Consiliarium gravissimum: cujus corpus, in  
 quo magnus ille animus annos septuaginta fere & quatuor tan-  
 quam hospes in angusto domicilio ac lare commoratus est, ante  
 hos annos viginti incredibili cum Musarum luctu terræ est tradi-  
 tum. Verum utinam Ludwellum nostrum effracto Libitinæ ju-  
 re redivivum hic sistere liceret! peroratum esset, Auditores,  
 cum ipsa hujus Viri præsentia in plenissima luce virtutes, stu-  
 pendamq; qua floruit, eruditionem retereret, quam meum vel  
 leviter adumbrare non valet ingenium. Neq; jam occupatus  
 ero in extollenda ejus laudandaq; juvenili vita, quam ardentissi-  
 mo semper literarum amore flagrans in Illustri Academia Za-  
 mosciana sub Adriano Romano, Canonico Herbipolensi, Regio-  
 montana & nostra Altdorfina laudatissimè transmisit; hoc tan-  
 tum deprædicare liceat, quantum huic viro Altdorfium debeat,  
 quantum nostra Vniversitas, quantum Respubl. Norica, quan-  
 tum deniq; ipsa Jurisprudentia, imò totus eruditus orbis. Vi-  
 disti, ô Academia nostra, quantos ille labores, quanta onera &  
 negotia pro augenda & per immensam hujus mundi machinam  
 disseminanda nominis tui gloria suscepit; quam sincero amo-  
 re te foverit, dum etsi à non paucis Imperii potentissimis Prin-  
 cipibus, Illustriissimis Ordinibus, ac Liberis Civitatibus, ut aulis vel  
 tribunalibus suis sese adscriberet, certatim fuerit expetitus, ta-  
 men ut tuum, o florentissima Palæosome, constaret decus, in tui  
 solum amorem & commodum, quamvis pinguibus sanè illectus  
 conditionibus, subtrahi se non est passus; sed per duos ac triginta  
 annos te Musasq; tuas tam publica quam privata industria sic  
 ornavit, ut paucos reperire liceat Ictos, sive fruantur supremis  
 dignitatibus titulis in Serenissimorum Electorum dicasteriis, Cel-  
 sistimorum Principum aulis, Illustrium Dynastarum florentissi-  
 marumq; provinciarum Consistoriis, sive in Juridicis Acade-  
 miarum cathedris sint constituti, qui tibi ob solum LVDWEL-  
 LVM multum vel jam non debeant, vel imposterum sint debi-  
 turi: siquidem nemo inter Jurisprudentiæ amatores numerari  
 se posse autumabat, qui in tuis non vixisset gremiis, & ingen-  
 tem hunc Germaniæ thesaurum LVDWELLVM Præcepto-

rem



rem five loquentem five mutum non habuerit. Vidisti & tu Inclyta Respubl. Norimbergensis, quanta cum totius Noricæ gentis gloria & immortalī celebritate, in arduis apud diversos Imperii Status pertractandis negotiis comitiisq; , animum tibi suum prudentissimum & secundis temporibus dubiisq; rectum approbatum reddiderit, ille Themistocles, ille Pericles, ille Crassus, ille Scævola. Vidisti tandem & tu, vastissime literarum orbis, quantum tibi consultum esse voluerit iste seculi nostri Papinianus, cum scientiam aucuparetur non ad solam nominis oblectationem, non ut sibi suisq; caneret Musis, non ad vanam ostentationem, ut scire tantummodo videretur, quemadmodum nummis & calculis utimur, verum ut eam in usum tuum publicè impertiretur: tibi enim se exercebat, tibi laborabat, tibi vivebat, tui gratiā sēpissimè fugam solis ingenii perspicacis lumine supplebat, somno tempora vigiliarum prorogatione decerpebat, & in laboriosum tuæ utilitatis defixus studium solidas diebus noctes maritabat. Loquantur pro me ipsa viri monumenta, hoc est, mentis suæ ac ingenii pupilli, quos eruditæ posteritati committere voluit, inter quos tantum caput efferunt,

*quantum lenta solent inter viburna cupressi,*

decem & octo Exercitationes ad quatuor Institutionum (quæ appositè ab ipso *Catechismus Juris* appellabantur) libros, in hos Commentarius, Synopsis Juris Feudalis, Tractatus de ultimis voluntatibus, Novus Commentarius cum annotationibus & remissionibus in Wesenbecium, sub Johannis Richardi Malcomefii nomine editus, aliaq; præclara opera, quæ illibata judiciis & cogitationibus splendidissimi hujus Auditorii reverentiùs permittenda esse censeo, quàm ingenii mei culpâ deterenda. Hoc tantum addere placet, quod LVDWELLVS lectissimis hisce scriptis monumentum sibi erexerit

- - - ære perennius  
Regaliq; situ Pyramidam altius:  
quod non imber edax, aut Aquilo impotens  
possit diruere, aut innumerabilis  
annorum series & fuga temporum.

Sed cum tanti hujus Viri laudibus digna satis oratio reperiri non queat, proinde ad illustria alia Themidis Altdorfinæ ornamenta, viros pariter haud incelebres, qui Collegæ LVDWELLI laborumq;



laborumq; socii erant, nostræq; Vniuersitati tantum, quantum  
 cœlo formosissimus ille mundi oculus Sol, innumerisq; comita-  
 ta sideribus Luna, addidere decus, paucis quoq; me convertam.  
 Fuit ex his alter JOHANNES KOBIVS Hilperhusanus Fran-  
 cus, Reipubl. Norimbergensi à Consiliis, ad iustitiam, humani-  
 tatem, concordiam inq; docendo assiduitatem Anno 1590 na-  
 tus, quiq; in Altdorfina nostra Senior, multisq; professionibus,  
 tam Juridicis quàm Philosophicis, per quadraginta annorum spa-  
 tium summa cum laude exercitatus, in cœlestem tandem læti-  
 tiam, excitatus piè cantando, ut plenus æternæ vitæ conviva,  
 anno hujus seculi primo & sexagesimo decessit. Alter NICO-  
 LAVS RITTERSHVSIVS Altdorfinus, CONRADI quem  
 supra laudauimus, Filius, in Academia patria Juris Professor per  
 sex & triginta annos oppidò celebris, Regibus, Principibus,  
 Dynastis, Nobilibus, aliisq; Magnis ac Literatis Viris ex longin-  
 quis itineribus & consummatissimæ cognitionis, præsertim Hi-  
 storicæ & Genealogicæ, quam Tabulæ ejus cedro dignæ plus sa-  
 tis testantur, fama notus, ante annos tredecim septuagenario  
 major magnæ matri concreditus. Quibus accensendus omninò  
 est ille Justitiæ & Legum acer custos rigidusq; satelles ERNES-  
 TVS CREGELIVS, qui novem abhinc annis magno cum  
 Musarum mœrore ac desiderio tumulatus est. Erat hic Vlza-  
 Lüneburgensis, & discipulus γνῶσις Snobellii, magni apud  
 Rostochienses Jcti, atq; nostri super æthera noti Ludwelli, quo-  
 rum præcipuè alloquiis, consiliis & informatione recreabatur  
 medullitus. Hinc cùm breue intra tempus vastissimum illum  
 Juris Oceanum transmeâset, apud Strenuissimum Senatum  
 Norimbergensem, Ludwello illum commendante, à quo non  
 nisi filii nomine censebatur, & paterno affectu ad ultimum vitæ  
 terminum amabatur, extra ordinem Juris Professor Publicus  
 designatus, & mox exferente se admirabili ingenii felicitate, in  
 numerum Professorum Ordinariorum & Consiliariorum Reip.  
 Norimbergensis cooptatus est. Has provincias egregiè exor-  
 nare studuit, atq; per annos viginti, quibus præfuit illis,  
 nihil inausum intentatumq; reliquit, quò minus studiis suis  
 tam privatis quàm publicis, tam Academicis quàm forensibus,  
 Ordinem Juridicum jam antè celeberrimum reddere posset ce-  
 lebriorem. Et sanè longè major futurus erat noster Cregelius, si  
 H diu-



diuturniorem lucis usuram fata ipsi concessissent; nihilominus tamen quicquid ex eodem amavimus, quicquid mirati sumus, manet, mansurumque est in animis hominum, in æternitate temporum, fama rerum. Etsi verò amplior nunc & patentior dicendi perorandique campus sese mihi offerat, in quo latius evagari & excurrere posset Oratio mea, temporis tamen ratio monet, ut vela contraham, maximeque caveam, ne eos offendam, qui incredibili humanitate, admirabili favore, attentissimis animis auribusque balbutientem me audire adhuc perseverarunt. Dixi igitur de splendidissimis Jurisprudentiæ luminibus, quæ nostram hanc Universitatem per annos centum, ac plus eò, clarissime illustrarunt, quæque jam ut Doctores Justitiæ in cælo splendidissimo, augustissimo illo beatitatis templo, fulgent uti stellæ in omnes æternitates. Ecquid reliquum est, quàm ut nunc quoque dicam de VOBIS, qui in summorum, quos pro ingenii mei deprædicavi modulo, Juris Consultorum, uti in locum, ita in virtutes successistis, & vel alibi, vel hic loci, etiam nunc (utinam diu) vivitis superstites, & masculè dignitatem Altdorfinæ, splendorem Jurisprudentiæ, vinculum fidei & virtutis antiquæ, defenditis, conservatis, augetis? Verùm ignoscite Viri Excellentissimi, ignoscite, si hac in parte Oratoris officio non fungar, & ne adulationis crimine vobis me suspectum reddam, de quotidianis vestris erga Inclytam hanc nostram Universitatem meritis, de quibus nulla unquam laus conticescet, quæ nulla filebit posteritas, totus fileam. Placet enim mihi Caji Pescennii Nigri responsum, qui in Syria ab exercitu appellatus Imperator, cuidam Panegyricum sibi de laudibus & rebus suis gestis recitanti, *Scribe, dixit, Martii laudes, aut Annibalis, aut alterius cuiuspiam Ducis egregii, sed vitæ functi, quem nos imitemur. Ego verò placere vivus, mortuus etiam laudari volo!* Scilicet non facile quis esse potest viventis alicujus laudator, ne magis videatur adulator; imò qui non tam arrisor quàm arrofor ferè habeatur: quò fit, inquit magnificus ille & ingens ut animi sic verborum Tullius, ut post mortem multò & incorruptius & rectius de aliorum virtute plerumque judicetur, cum & sine amore & sine cupiditate, & rursus sine odio & invidia judicatur. Tutius igitur & religiosius fortè fuerit, si honore silentii suppressim, quod voce & stilo resignare non ausim, ad exemplum ingeniosissimi il-


lius



inspectoris, qui velo contextit, quod penicillo exprimi posse  
desperabat. Eant igitur illæ bonarum artium inventrices  
Athenæ: eat vetus illa Italia, plena quondam bonarum artium  
& literarum, quæ propter Doctorum multitudinem, magnæ  
Græciæ nomine cohonestata florebat: eant si non omnes certè  
pleræq; orbis Christiani Academiæ, & sciant, nostram illis Alt-  
dorsinam ob tot tantorumq; Jurisprudentum, quos enumera-  
vimus, celebritatem, palmam si non præripere, saltem facere  
dubiam atq; ancipitem. Appellatur Academia Alexandrina  
à Basilio universæ doctrinæ officina pulcerrima, Ægyptus à Ma-  
crobio artium bonarum mater, Berythus Phœniciæ ab Impera-  
tore Justiniano Legum Nutrix: manet manebitq; nostra Alt-  
dorsina Legum Nutrix, Justitiæ delubrum ac celebratissima  
Jurisperitorum schola, tot tantisq; fortissimis Jurisprudentiæ  
fulcris atq; columnis semper innixa, ut illam nec ignis edax, nec  
ipsa potis sit invidiosa diruere vetustas. Tu verò Deus Opti-  
me Maxime, qui uti omnium bonorum fons, ita & Academia-  
rum fundator es atq; conditor, fac, floreat Tibi, vireant Aca-  
demiæ huic, quæ nisi per has stabit columnas, lapsu ruet fatali,  
vigeant sibi, bonis omnibus, deniq; & mihi tenerisq; meis Mu-  
sis, nostri hac in Vniversitate Juri, aliarumq; bonarum artium  
Doctores Exeellentissimi, felicissimè, diutissimè! Floreat  
Norimberga! Floreat filia ejus Altdorsina,  
Jurisperitorum Schola!







ORATIO IV  
De  
MEDICIS ALTDORFINIS.  
PROGRAMMA.

**H**abet etiam Medicina nobilissima, quemadmodum artes scientiæque aliæ, oſores ſuos ac irriſores, qui exiſtimant, illam ciuitati neque utilem eſſe neque neceſſariam. Quis ignorat, ajunt, Romam ultra annos ſexcentos ſine Medicis floruiſſe, atque in horum contentum Æſculapii templum extra urbem fuiſſe poſitum? Quis ignorat ſervos & mancipia tantum tractaſſe medicinam? Vnde Plinius Medicos eſſe terræ filios inquit, ex egeſtatis carceribus & fullonia natos, in communem hominum necem conjurantes. Quis ignorat omnem à Deo expectandam medelam, & conſtitutum cuique vitæ terminum, qui ſuperari non poſſit; quid ergo Medicis opus? His & pluribus partim ſcommatibus, partim argumentis ficulneis, impugnant ſcioli quidam ſacraſſimam Artis Medicæ dignitatem, digni ſane qui Hippocratis alligentur vinculis, & in Æſculapii templum deportentur molliter, ibique partem hellebori capiant multo maximam. Equidem annis ſexcentis Medicina caruiſſe Quirites, non inſicior; idem tamen de Theologia fere ac Philoſophiâ dicendum: barbari enim fuerunt. Æſculapii templum habuerunt in deliciis; ideo hortenſes inter voluptates collocarunt. Eſt à Deo omnis medela, inquit Siracides cap. 38; ſed addit: Honora Medicum propter neceſſitatem, etenim eum creavit Altiffimus. Altiffimus creavit de terra medicinam, & vir prudens non abhorrebit illam. v. l. 4. Inſuper certus vitæ terminus tametſi cuique ſit



fit constitutus, quem transgredi nemo potest; interim tamen ea non sunt refugienda, quæ nobis sunt adiumento, ut præfixum terminum assequamur; alioquin quid obstat, quò minus in medio vitæ cursu possimus corruere, & quodam quasi naufragio perire, antequam ipsum portum nobis conspiciere liceat? Manet igitur ab his & aliis id genus scopulis inconcussa Artis Asclepiadeæ sublimitas.

Vtq; viret laurus semper, nec fronde caduca  
carpitur; æternum sic habet illa decus.

Enim verò mancipia quædam olim Medicinam Romæ exercuisse dicuntur, sed veterinariam, equis tantum & asinis salutiferam. Veram illam & hominibus salutarem, cuius utilitatem nobilitatemq; Deorum in ventioni consecrauit Antiquitas, coluere ipsi, præter sapientissimum Salomonem, Sabor & Ginges Medorum, Saliel Arabum, Alexander M. Macedonum, Mithridates Ponti, Hermes Ægyptiorum, Gentius Illyriorum, Juba Mauritanie, Dionysius Siciliæ, Telephus Mysiæ, Sisyphus Corinthiorum, Josina Scotorum, aliorumq; Reges alii. Ex Imperatoribus etiam Hadrianum, Marcum Antoninum, Constantinum Pogonatum, non tantò deteriores fuisse constat, quantò fuerunt Artis Medicæ peritiores. Horum maximorum Imperatorum successores, ac Magistratus alii, singulari deinde sancti verunt prudentia, ut saluberrima medendi scientia in scholis illustrioribus & Academiis doceretur publicè, quò sexcentis, quæ ab indoctis Medicis in Remp. redundant, incommodis eatur obviam, atq; ut ibi docta excellentium ac peritorum Medicinæ Professorum manu formarentur novi Æsculapii, Pæones, Machaones, Podalirii, Hippocrates, Galeni, Averroes, Avicennæ, morborum depulsores vindicesq; sanitatis. Cesarum illorum Magistratuumq; laudatissimorum vestigiis institit etiam huc usq; Sapientissimus REIP. NORIMB. Senatus, dum jam inde ab Universitatis

H 3

hujus



*hujus Altdorfinæ incunabulis, ad exornandum Gratosum  
MEDICORVM ORDINEM, magnis evocavit aluitq;  
sumtibus Viros profectò magnos ac iatres Φιλοσόφες, adeoq;  
Divini Hippocratis judicio, ισοθέες: quorum vitas lau-  
desq;, crastini prima, Oratione leporibus Veneribusq; di-  
cendi plenissima decantabit pius tantorum Manium & stre-  
nuus Artis Machaoniæ Cultor, hujusq; olim insigne futurum  
decus, DN. CONRADVS RVDOLPHVS HERTZ, Erfurtensis,  
ob morum & ingenii elegantiam eruditionemq; eximiam, bonis  
omnibus commendatissimus. Quamobrem Magnificum  
DN. RECTOREM, Perillustres & Generosissimos  
DNN. BARONES, Excellentissimos PATRES ACA-  
DEMICOS, Nobilissimosq; & Eruditissimos DNN. STV-  
DIOSOS, obser-vanter etiam atq; etiam oro, ut si per gra-  
viores licuerit occupationes, eandem gratiam ac bene-volen-  
tiam, quam nobis præstiterunt sæpius, nunc quoq; splendida  
ac honorifica præsentia sua testari velint. Erit hoc laboris  
nostri amplissimum præmium, & nobile nobilibus in-  
geniis ad plura ejusmodi conamina  
incitamentum.*

MAGNVS DANIEL OMEIS. P.P.

## ORATIO.

(Titt.)

**I**Nter cæteras HISTORIÆ partes, quarum equidem plures  
numerantur, non infimum profectò locum meretur ista,  
quæ *Prosopographie* nomine venire solet, cultores suos &  
mirifica oblectans voluptate, & fructibus cumulans pretio-  
sissimis, non minus ac lux veritatis, *Historia Universalis*. Si  
enim



enim hæc generaliter id præstare lectoribus potest, ut sine labore ullo passim divagari, omnes simul locos intueri, omnibus bellis sine periculo adesse, infinitum temporis spatium contrahere, infinitas res gestas simul cognoscere, quæ ab Assyriis, quæ à Persis, quæ à Græcis, quæ à Romanis factæ sunt, bello nunc terrestri, nunc marino, nunc concionis mediæ interesse consiliis possint; illa certè ratione non minus jucundâ efficere potest, ut cum Themistocle in mari, cum Leonide in terra pugnare, cum Agesilao trajicere, cum Xenophonte incolumes redire, amare cum Panthea, venari cum Cyro, regnare cum Cyaxari queant. Si Historia in universum *exsequitur sententias insignes per honestum, aut notabili dedecore, ne virtutes fileantur, utq; pravis dictis factisq; ex posteritate & infamia metus sit*; quod præcipuum *Annalium officium* pronunciat prudentiæ ingeniiq; acumine celeberrimus Tacitus: Historia Prosopographica adhuc specialius, per exempla hominum singulorum specialia, virtutes bonorum & improborum vitia, vitæ humanæ varias mutationes & rerum in ea conversiones, malorum facinorum pœnas & bonorum præmia ob oculos sistit; cum exempla validiora sint quàm leges, magisq; mortalium animos moveant, quàm præcepta ac monita saluberrima. Ad Historiam hanc Prosopographicam imprimis spectant *Vitæ* virorum genere, dignitate & doctrina illustrium, in quibus fidelissimè consignandis non tantum vetustissimos occupatos reperimus Philosophos, sed neq; nostro sæculo venusta defunt ingenia, quæ in hoc tam conducibili labore operam suam collocant atq; industriam, tum ut mortales aliorum eventis doceantur & bene agere discant, tum ut memoria Clarorum Virorum apud posteros incorrupta sit, & suum cuiq; decus posteritas rependat. Is enim verus honos, ea optimi cuiusq; pietas, eximiorum summæ doctrinæ ac judicii Virorum memoriam sic venerari, ut omnia facta dictaq; eorum secum revolvat, famamq; ad figuram animi complectatur: vultus hominum imbecilles ac mortales sunt, forma mentis æterna, quam tenere & exprimere suis possit moribus. Sanè quicquid ex claris virtute ac doctrina Viris amamus, quicquid miramur, manet, manfurumq; est in animis hominum, in æternitate temporum, fama rerum. Equidè multos veterum velut inglorios & ignobiles oblivio obruet; doctrinæ autem nobilitate celebres viri posteritati

nar-



narrati & traditi, superstites erunt. Quæ cum ita sese habeant, operam nos neq; ingratam, neq; prorsus inutilem collocaturos speravimus, si de Vitis *Medicorum*, qui in celeberrima hac Vniuersitate ab ejus incunabulis ad hæc usq; tempora nobilissimam Artem Medicam summo cum applausu docuerunt, in medium quædam afferamus, hac quidem ratione, ut omnia memoratu digna, quæ ad manus nostras de Eorum ortu, rebus gestis atq; obitu pervenere, grata brevitæ atq; fide integra exponamus; minutissima enim quæq; consignandi & in arto & inglorius labor est. Etsi autem facillè intelligamus, quàm gravem quamq; arduam in nos susceperimus provinciam, cui digno exornandæ modo nos impares lubentissimè profiteamur; tamen & conamini hujus æquitas, ipsa etiam pietas, qua Vniuersitati huic celebratissimæ, Almæ studiorum nostrorū Nutrici, in primis obstringimur, Vestraq; cum primis, *Auditores Optimi*, benevolentia bene nos sperare, atq; in instituto progredi alacriter jubet atq; impellit. VOS igitur ut silentio nobis saveatis, nostramq; in dicendo imperitiam humanitatis atq; attentionis vestræ aurâ benevolè provehatis, etiam atq; etiam oramus, finite exoremus.

Artem Medicam, quæ tot tantisq; gentem mortalium afficit beneficiis, inter cæteras facillè principem obtinere locum, atq; palmam pluribus aliis præripere, omnes & singuli, quibus vel semuncia sanæ mentis relicta est, fatebuntur. Ista enim, ceu Philosophia secunda, corpus non tantum curat, sed ipsi etiam animo auxiliatrices affert manus, sanam in corpus sanum inducit mentem, & quod omnium rerum pretiosissimum est, sanitatem puta ac vitam, hominibus & conservat integram, & amissam illam restituit, vitæ nostræ necisq; Imperatrix Medicina. Quapropter primis statim Emporii hujus literarii initiis prudentissimo constitutum est consilio, ut præter alias bonas artes, quas conservare ex usu Reipublicæ omnino est, etiam hujus tam divinæ tamq; necessariæ Artis præcepta publicè traderentur. Primus, cui Professio Medica concredita est, fuit NICOLAVS TAVRELLVS, Med. D. Vir & celebritatis & auctoritatis multæ, tum doctrinæ & experientiæ Medicæ decus eximium: missus iste est in hanc lucem, Dei benignitate, anno Epoches Christi. exeunte supra millesimum, quingentesimum, septimo & quadagesimo, die vicesimo sexto mensis Novembris, in urbe  
Mont-



Montbeliardensi in confiniis Alsatiæ & Ducatus Burgundici sita, aëre situq; peramœna, ædificiorum magnificentia & multitudine splendida & celeberrima. Bonas literas cum pietatis fundamentis à primis statim annis in schola patria hausit, inibique latinas græcasq; literas imbibit, ita ut cum ingenio felici cultura accederet assidua & diligens, teneris statim annis ostenderit, quid matura ætas fructuum allatura foret. Post degustatas scholasticas disciplinas, Tubingensem Academiam sedem atq; studiorum alumnam sibi elegit, eoq; ad audientes celeberrimos Professores abiit; ubi Philosophiæ & Artis medendi studio inprimis deditus, tantum in subtilissimis disciplinis ac Arte illa communi hominum societati oppidò necessaria profecit, ut auctoritate publica ad summum honoris & dignitatis scholasticæ fastigium in Professione Praxiq; Medica evectus, & adhibitis debitis sollennitatibus Medicinæ Doctor renunciatus sit. Cum ergo diligentia & eruditio ejus passim innotescerent, à Nobilissimo Illustris Reipublicæ Noricæ Senatu honesto stipendio est invitatus, ut in sua, quam Altdorfii RVDOLPHI II Augusti indultu aperuerat, Academia publicè doceret. Quam provinciam summa cura ita ornavit, ut non solum per viginti annos, & quod excurrit, juventutem studiosam erudiret, sed & diversos eosq; doctissimos libros in Philosophia Prima, Physica & Medicina, suo nomine dignos in lucem emitteret. Quas tamen curas atq; labores omni laude dignissimos morbo quodam vehementissimo afflicto omittere coactus est; corripuit enim eum morborum velut caput & compendium, contagiosa pestilentia lues, qua per aliquod tempus lecto affixus detinebatur: & quamvis *Sonerus*, Collega ejus carissimus, nullis laboribus, nullis curis, nullis vigiliis parceret, medicamenta etiam ipse pararet & exhiberet, tandem tamen à Deo immortalis, vitæ mortisq; Arbitro Optimo Maximo, ex his miseriis atq; ærumnis ereptus, diem suum obiit Medicus & Philosophus insignis Anno 1606, die 28 Sept. Non tamen totus extinctus est, sed in scriptis suis pereruditus quotidie in memoria doctorum reviviscit, quorum non pauca posteritati elucubravit. Versantur adhuc in Eruditorum manibus Methodus Prædictionis Medicæ, h.e. recta brevisq; ratio coram



ægrotis præterita, præsentia & futura prædicendi : Annotationes elegantes in Opera Arnoldi Villanovani : Philosophiæ Triumphus : Alpes Cæſæ, h.e. Andr. Cæſalpini Itali monstroſa & ſuperba dogmata diſcuſſa & excuſſa : De Infiniti continui ſeſſione Tractatus : Diſcuſſiones Phyſicæ de Mundo contra Piccolomineum : Diſcuſſionum Phyſicarum & Metaphyſicarum de Cœlo adverſus Piccolomineum libri II: & Emblemata Phyſico-Ethica vario carmine conſcripta &c. Secundum in docenda Medicina locum tenuit PHILIPPVS SCHERBIVS Epſcopo-Cellenſis Helvetius, Phil. ac Med. D. Vir in Philoſophia & Medicina magnus, imò omni laude & admiratione major; qui ob ſtupendam, qua pollebat, eruditionem ita omnium merebatur calculum, ut Anno ſalutis 1686, menſe Septembri, ad Univerſitatem hanc accedens, non Medicinæ tantum, ſed & Logices & Metaphyſices Profeſſioni, jubente id Magnifico Dnn. Scholarcharum Collegio, fuerit adhibitus. Quibus Profeſſionibus per plures annos tanta diligentia, fide & dexteritate præfuit, ut non ſolum vivâ voce Auditores ſuos præſentes, ſed & litera ſcripta abſentes Lectores, gloria non intermoritura inſtitueret. Habemus Diſputationes & Theſes tum Philoſophicas tum Medicas diverſi generis, quas ejus felici debemus induſtriæ : Diſputationes ejus Philoſophicæ exſtant in Philoſophia Altdorſina, quæ curâ & ſtudio B. Dn. Felwingeri luci expoſitæ ſunt publicæ, Norimbergæ A. 1644: quibus ſpicilegii inſtar ſubjuncta eſt elegantiffima Ejus Oratio de Idoneo Judiciæ earum controverſiarum, quæ in Artibus naſci ſolent, ex ſententia Galeni. Proſtant etiam Theſes Scherbianæ, quæ Ambergæ Anno 1603 à Jo. Schönfeldio excuſæ ſunt: Theſes ejus Philoſophicæ in unum corpus redactæ emendatiùs editæ ſunt Helmſtadii Anno 1659, in forma quam quartam vocant: Theſes Medicas Scherbianas Anno 1614 edidit Caſparus Hoffmanus, dignus tanto Præceptore diſcipulus, qui Scherbium noſtrum per ſcripta ſua, data occaſione, nullis non laudum encomiis ſemper afficit, & ad cœlos uſq; extollit: Thomæ Eraſti Commentarium in omnes Aphoriſmos Hippocratis Scherbi manu propria conſcriptum, & 22 Jun. 1576 abſolutum, ſuis MSSis annumerat Excell. Dn. D. Mauritius Hoffmannus. Proſperrimo inprimis ſucceſſu



cessu Medicinæ conjunxit Studium Politicum, (cujus rei inter alios etiam auctor & fvafor existit magnus *Conringius* in sua Introductione ad Medicinam) in quo tantos fecit progressus, ut Ejus præclaram rerum Politicarum notitiam adhuc hodie doctis omnibus probent Discursus illius Politici in *Aristotelis* de Politica libros; quibus non modò universa Civilis prudentia, sed arcana quoq; Imperii ac Regnorum, & res præsentis Reipublicæ status, accommodatè pertractantur: typis exscripti sunt publicis Francofurti Anno 1610, f. 8. Hoc scriptum lucernam & oleum redolere optimus quisq; qui emunctæ naris est, facillè percipit. Verùm cum vana sint omnia, & quicquid usquam dulce & jucundum est, imò quicquid omnino est in rebus mortalium, & mortales omnes ipsi, non velut somnus, sed velut umbræ somnium, transeant atq; evanescant, *Scherbius* noster, viribus corporis morbi vehementia attritis, piè exspirans vitam hanc cum morte commutavit die 11 Jul. Anni 1605. Præclaras hujus Viri virtutes & tot laudum copiam, ne ingenii nostri inopia, raram & planè excellentem eruditionem nostra dicentis infantia & mentis caligine ne obscuremus, tacito easdem cultu, ac sacro veluti silentio existimamus venerandas, pictorem imitati sagacem illum, qui velo solebat, quod penicillo exprimere non poterat, obumbrare. Successorem in Medica Professione habuit *Scherbius ERNESTVM SONERVVM*, Phil. ac Med. D. quem ille è multis unum vivus dignum existimabat, qui succederet sibi. Patriam *Sonerus* nactus est Urbem splendidissimam, mercaturis & Viris Claris toto orbe celeberrimam, *Noribergam*; Patrem verò *Marcum Sonerum*, Civem ac Virum Præstantissimum, qui ob virtutes suas egregias à gloriosissimæ memoriæ Cæsare *MAXIMILIANO II* omnibus, quibus Nobiles nati gaudere solent, privilegiis donatus est. Ab hoc suo parente assiduus obtinuit precibus, ut primis literarum fundamentis laudabiliter jactis, *Altdorfium*, velut ad bonarum artium mercatum, mitteretur, ubi disciplinarum illud virtutisq; iter ingressus, honoris ac eruditionis arcem se conscensurum sperabat. Neq; hac spe delusus est: anno enim ætatis quinto & decimo huc à parente ablegatus, tanto ardore atq; felicitate in literarum curriculo perrexit, ut omnes postea suos æquales longo post se reliquerit intervallo.



Qui laudatissimi ejus in studiis progressus cum Amplissimis hujus Academiae Patronis innotuissent, nulla mora interposita in alumnorum numerum receptus est; in quo ubi per quadriennium ita se gesserat, ut in morum & literarum incrementis superiorem habuerit neminem, hujus eximiae suae industriae eximium quoque tulit praemium, & aureo, uti vocant, stipendio ab Amplissimo SENATU Norimbergensi donatus est. Qua munifica liberalitate ad ulteriorem excitatus diligentiam, eo in studio Philosophico, manuducente in primis incomparabili *Scherbio*, tandem progressus est, ut aetatis suae anno 23 summum in illo honoris gradum maxima cum laude consecutus, & publice ab Eloquentissimo Viro *Georgio Glaciano* Magistri titulo condecoratus fuerit. Quibus honoribus auctus, ut aliis etiam comparato eruditionis suae thesauro prodesset, singulis hebdomadis singulas Disputationes Physicas, in quibus ipse Praefidis vice functus est, privatim habuit. Nec minores in Studio Medico habuit profectus; similia enim hac in arte postea tentavit & feliciter perfecit. Cum autem intelligeret, non parum augmenti prudentiae ac experientiae ex peregrinationibus accedere, nonnullaque etiam ex aliarum gentium scholis peti debere, celeberrimas Europae Academias, ubicunque de Medica Arte publici mercatus exercebantur, adire constituit. Quod ipsius saluberrimum propositum nullo Fortuna destituit modo: insignis enim ejus eruditio morumque gravitas duos Nobilissimos Adolefcentes, patricia Noricorum familia prognatos, ipsi conciliavit, qui eum, de consilio Parentum, studiis suis praefecerunt, atque itineris Belgici, Britannici & Gallici comitem adsciverunt: quibuscum primum Hamburgum, inde maritimo itinere Amstelodamum, tandem in nobilem illam Batavorum Academiam Lugdunensem pervenit, ubi in luce Clarissimorum Virorum diu latere non potuit, sed Principibus in re literaria Viris, Josepho Scaligero, Jano Doula, Philippo Marixio, inter Medicos Jo. Heurnio, Carolo item Clusio, Paulo Merula, Historico magno, innotescens, eorum favorem atque amorem abunde expertus est. Relicta Hollandia in Britanniam venit, ubi Oxoniensem Academiam, & metropolin Angliae Londinum, per aliquod tempus frequentavit. Ex Britannia retro in Galliam trajecit, ubi perlustratis urbibus Rothomago, Lutetia



tia Parisiorum, Aureliano & Avarico Biturigum, (cujus Academia aliquandiu civis fuit) item Lugdunensi ad confluentes Rhodani & Araris emporio, visis quoq; & relictis à tergo Avenione, Massilia, aliisque nobilioribus Galliae locis, tandem Italiam, Europae Paradisum, adiit; ubi primo statim Genua, post Mediolanum, tandem Patavium, illud toto orbe nobilissimum Lyceum, eum excepit; in quo tamen diu non morabatur, quod reliqua Italiae miracula observare animo constitutum habebat. Igitur Ferrariam primum, deinde Bononiam profectus est: hinc altissima Apennini juga superavit, Florentiam & Senas accessit, donec Romam, orbis caput, ingressus est: ulterius Neapolin petiit, cumq; ibi omnia scriptis Auctorum celebrata oculis usurpasset, Patavium reversus est, ut incepta ibi studia Medica ad finem perduceret; quod obtento de reditu in patriam & praemio laborum capiendo cogitabat. Quare ex Italia Basileam Rauracorum veniens, Doctoris in Medicina insignia atq; titulum summa cum laude adeptus, paulloq; post Noribergam ad patrios Lares delatus est, annos octo & viginti natus; ibi cum magno omnium consensu in Collegium Medicum, quod Excellentissimis semper Medicis floruit, receptus, per aliquod temporis intervallum Praxin Medicam exercuit, magnamq; inde laudem apud plurimos consecutus est. Cum deinde vacanti hac in Universitate Professioni Medicae aptissimus haberetur, eidem anno supra millesimum sexcentesimo quinto, comprobante Generoso DNN. SCHOLARCHARVM Ordine, praefectus est. Hanc spartam quam egregie ornaverit, inter alia Disputationes ejus, quarum pars magna in Philosophia Altdorfina occurrit, itemq; Commentarius in Metaphysicam Aristotelis, abunde testantur. Caeterum Praelectiones Ejusdem Pathologicas ab anno 1607 usq; ad annum 1611 habitas, typis publicis nondum exscriptas, item Modum Ejus discendi Medicinam, & faciendi locos communes, anno 1609 Auditoribus suis traditum & propria manu scriptum, nec non Commentarium ejus in Libb. VIII. Phys. Aristotelis Anno 1607 manu itidem sua exaratum, videre nobis licuit in instructissima Celeberr. Dn. D. *Mauritii Hoffmanni* Bibliotheca. Verum cum illud nobis omnibus compertum cognitumq; sit, quaecumq; vitae usum sortita sunt corpora, morte dele-



ri, adeoq; hominibus etiam omnibus nullo ingenii ac doctrinæ, nullo generis aut dignitatis, nullo ætatis ac fortunarum discrimine, spiritum aliquando reddendum esse; ita *Sonerus* etiam eo tempore, quo plurimi ejus ope & prudentia indigebant, apostematis genere, quod anthracem vocant, oppressus, vitam per annos novem & triginta laudabiliter actam clausit die 29 mensis Septembris, Anni M DC XII. Mortuo parentavit *Georgius Richterus*. Ordinis ratione jubente oratio nostra se nunc convertit ad nobile illud Academiæ hujus fulcrum, excellens illud atq; amabile decus Musarum atq; Phœbi, CASPAREM HOFFMANNVM, M. D. & P. P. undiquaq; celebratissimum, ac in Facultate sua quondam Seniore meritissimum; cujus justæ memoriæ ad posteros propagandæ quomodocunq; etiam litare merita ejus postulant amplissima. Hic nos jam Tullianum aliquod eloquentiæ flumen nobis inesse optaremus, ut convenienti dicendi genere laudibus ejus explicandis sufficientes esse queamus: verum cum optare hoc fas sit, consequi autem non liceat, unica hæc impotentiam nostram solatur consolatio, quod apud Vos, Auditores Honoratissimi, nos dicere animadvertimus, quæ eorum, quæ præclare hac in Academia Hoffmannus vel docuit vel commentatus est & scripsit, maximam partem non testes modò atq; auditores, sed etiam admiratores semper fuistis. Qua consolatione erecti, quæ de vita, studiis, meritis atq; obitu dicenda sunt, qua poterimus brevitate pertexemus, eandem quâ hactenus præstitistis à Vobis attentionem expectantes. Mortalitatæ hoc curriculum intravit Gothæ, quæ civitas est Thuringiæ, nitore ædificiorum ac fortuna sua varia nobilis, nec non aula Serenissimi Principis FRIDERICI, Ducis Saxonix &c hodie splendidissima superbiens, Anno Christi M D LXXII, mensis Novemb. die 8, Patre Viro integerrimo Jo. Hoffmanno, ejus civitatis incola; quò tamen primo statim ætatis anno privatus est, DEO interim pupillorum patre vices parentis ipso sustinente. Orbem patre, avus maternus Jo. Leuffer pro filio educatum, & disciplina domestica ad honesta omnia institutum, à pueritia scholæ patriæ admovit, ubi in annum usque decimum nonum commoratus succrescentes ingenii sui dotes, & excelsos indolis conatus, Præceptoribus suis aliisq; in virtutum scien-



scientiarumq; palæstra decus quærentibus, affatim monstravit. Hinc in Academiam Lipsiensem, consilio scholæ Gothanæ Rectoris M. Jo. Helderi, promptissimæ Svadæ Viri & artificiosissimi ingeniorum Epicharmi, cum ejusdem commendatitiis ad Virum clarissimum, Matthæum Dresserum, sese contulit, fortuna tamen, uti videbatur, iter hoc non secundante : erat adolescenti optimo res sæpe angustior, & præter adversam valetudinem ex constitutione loci naturæ ipsius minus conveniente, haud rarò cum pecunia victui necessaria conflictabatur. Post semestrem ergo ægrè ibi peractum domum rediit, ubi per totam hiemem Anni M D XCI tam adversam iterum expertus est valetudinem, ut etiam hydropis ingruentis non parva esset suspicio; valetudine tamen à Deo restituta, Argentinam adiit, qua in Universitate, pædagogis privatis victum quærens, vitam potius toleravit quàm sustentavit: ita plerumq; bonarum mentium soror & contubernalis Paupertas esse solet ! Sed illa quantumvis vulgò permolesta & inamabilis Hoffmanni nostri fortunam, ad quam deinde evehctus est, plurimum apud bonos commendavit, tantum abest, ut dedecori ei ac probro fuerit. Alio etiam eum beneficio eadem sibi obstrinxerat, digno sanè commemorari, ut manifestum inde evadat, cum illa sæpenumero multò tranquillius ac felicius, quàm cum maximis opibus habitari posse: dum enim alii voluptates sectabantur, alii otio diffuebant, alii alia agebant, Hoffmanno nostro rerum inopia calcar addidit, ut studiis eò tenaciùs inhærendo egregios optimorum Scriptorum libros nocturna diurna; manu verfaret; vero enim verius est, quod felicissimi Poëta ingenii breviter quidem, sed ingeniosè ac nervosè admodum, cecinit:

*Labor omnia vincit*

*improbis, & duris urgens in rebus egestas.*

Biennio ibi exacto jussu Promotorum Noribergam venit, ubi divina dirigente providentia Fautorem nactus est singularem, Virum Præstantissimum atq; Literatissimum, Dominum Matthiam Schilherrum, Inclytæ Reipublicæ Noribergensis Proto-Notarium, qui ejus virtutum atq; doctrinæ apud Viros Reipublicæ primarios præco effecit, ut mense Augusto Anni M D XCV eum stipendio & discipulis privatis hanc in Universitatem mittere-



teretur, ubi per septennium literis operam suam navans, ingenium magis magisque exseruit, iudicii; ac doctrinae maturescens signa palam exhibuit. Florem ætatis non otio, inertia; ac luxuriæ dedit, sed in hac bonæ mentis palæstra egregiis operabatur artibus: infinita erant, quæ cognoscere animus ejus atque indagare studebat; quicquid vastissimo sinu rerum mater Natura complectitur, ingenium & solertia ejus exquirebat; & bonus aliquando ac utilis civis quo pacto evaderet, qui societati velificaretur humanæ, nunquam non ei ob oculos versabatur. Docentes audiebat celeberrimos illius temporis Professores, Nicolaum Taurellum & Philippum Scherbium, Medicinæ Doctores, quorum fama & celebritas nominis jam dudum æternitatem consecutæ sunt: neque vivos tantum Præceptores audire, sed & mortuos consulere necessarium putabat. Oraculum olim Viro sapienti, qui vivere optimè posset, consulenti, respondisse legimus, si mortuos colore referret; quæ voce invitari se ad diligentissimam librorum à præclaris hominibus orbi relictorum lectionem intelligebat, moremque oraculo gerens, non ipse tantum iis, quorum libros assidue versabat, concolor factus optimè vixit, sed ad optimè vivendum aliis etiam dux & auctor fuit. Hac vitæ consuetudine quid mirum, si cum suorum Præceptorum omniumque bonorum favore stipendium etiam Medicinæ Studiosis destinatum, cum quo in Italiam proficisceretur, impetravit? Quæ peregrinatio ipsi tantò extitit felicior, quanto eam ingressus est prudentior. Patavi, ubi mercatus bonarum artium, in primis vero Artis Poëtiæ, haberi semper statutum fuit, eminentissimos Medicos docentes omni studio audivit, coluitque; fideliter Hieronymum Fabrici ab Aquapendente, Herculem Saxoniam de Marimbettis, Thomam Minadom, Julium Casserium Placentinum, Franciscum Mantellum dictum Campanam; quibus ducibus etiam Praxi Medicæ manum admovit. Lustratis dein & reliquis Italiæ partibus rerum conspiciendarum monumentis claris, cognitionem plantarum eximiam ut & linguæ Italicae perfectiorem sibi comparavit. Biennio itinere suo magno cum fructu exacto, in Germaniam Anno MDCV reversus est, & Basileæ præmia laboribus tantis digna exspectans, ista pro sua eruditione aliisque inge-



ingenii morumq; dotibus ea cum laude impetravit, ut primo loco inter IV Candidatos Doctor Medicinæ sollemniter renunciaretur. Quibus honoribus auctus Noribergam rediit, ut Reipublicæ, à qua beneficium & stipendium acceperat, gratus operam suam offerret ei;q; inserviret: cumque autumnò ejusdem anni urbem hanc nobilissimam & populosissimam tristissimum morbi genus pestis magnâ exauriret sævitiâ, & in hac ipsa etiam Academia contagiosa illa lues serperet, ut passim mista senum ac juvenum densarentur funera, à Nobilissimis & Prudentissimis Inclytæ Reipublicæ Norimbergenfis PROCERIBVS, nominatim tum *Scholaribus*, tum *Provincialibus*, Medicus peste infectorum hoc in oppido est constitutus, argumento divinæ directionis, protectionis, & promotionis luculentissimo. Officio enim illo difficili sollicitudinisq; & periculi plenissimo cum esset ita perfunctus, ut ejus promptitudinem & dexteritatem experirentur plurimi, omnes verò boni celebrarent, Professores qui tunc aderant, non modò singulari eum favore complectebantur, sed & condignum judicabant, qui Nobilissimis & Amplissimis Vniversitatis Curatoribus commendatus, in locum *Taurelli* piè defuncti, Medicæ Facultatis Professor constitueretur. Cui officio quanta diligentia, quanta dexteritate, quanto cum fructu per integros octo & quadraginta annos præfuerit, non est ut tenui nostra oratione exprimi posse quisquam existimet, cum laudes ejus summas universus orbis Europæus pleno deprædicet ore. Neq; enim insignis eruditionis ejus gloria intra patrios sese continuit cancellos, sed ad exterar quoq; penetravit nationes, fama, qua nihil velocius, per urbes & regiones plurimas doctrinæ tam excellæ nuncium strenuè diffundente: testantur id epistolæ magno numero undique ad eum perscriptæ, quæ Harveji, Patini, Bauhini, Servii, Severini, Veslingii, Bucretii, Rolfincii, Conringii, Reinesii, Schlegelii plurimorumq; aliorum erudita omnia & illustria Angliæ, Galliæ, Italiæ & Germaniæ Medicorum præ se ferunt nomina. Multæ ejus lucubrationes, cedro & immortalitate dignissimæ, typis exscriptæ, Virisq; Eruditis notissimæ sunt, nimirum Tractatus Physiologici complures, de Vsu lienis, de Vsu cerebri, de Ichoribus. Opus de Medicamentis Officinalibus Parisiis prodit anno 1646.

K

Ne-



Neque sine laude prætereunda sunt Carmina ejus, & Praxis Medica Curiosa, h. e. Galeni Methodi medendi libb. xiv, nova eaque omnium accuratissima cum versione, & perpetuis plus vice simplici desideratis commentariis & castigationibus prudentissimis, ab Hoffmanno nostro illustrati, qui ante triennium prodierunt Francofurti, curante Sebastiano Scheffero, Med. D. Inprimis autem laudari hic omnino meretur Opus illud imensum laboris planè Herculei, quò maxima cura & diligentia, ex collatione variorum è diversis locis petitorum Manuscriptorum exemplarium, & optimorum commentariorum, Galenum à mendis purgatum, restitutum, nitidum nobis dedit; quod adhuc ineditum in museo Machaonis Norici, Excell. Dn. D. *Joh. Georg. Volckameri*, servatur, lucemq; publicam avidè expectat. Plurima alia Hoffmanni nostri Manuscripta elegantissima hodie Bibliothecæ suæ annumerat Excell. Dn. D. *Jac. Pancratius Bruno*, & ipse de Rep. Medica insigniter meritus. Hisce immensis laboribus attritus, extremâq; , cujus onus Ætâ gravius creditur, senectute confectus Hoffmannus, postquam sibi ipsi mausoleum præstantissimum & perenne, præclaris meritis, virtute ac doctrina sua, in animis superstitum & posterorum omnium parâset, spiritum suum Creatori optimo reddens mortalitatis terminos adimplevit Anno Christi M DC XLVIII. Mortuum laudavit modò laudatus *Bruno*. Celebranda nunc venit memoria GEORGII NOESSLERI, Phil. ac Med. D. earumq; in Vniversitate hac XXXII annorum P. P. Serenissimi Principis Palatini & Reipubl. Norimb. Archiatri, Facultatis suæ quondam Senioris meritissimi. Vitalem hunc aërem is haurire cœpit Berolini, decima die mensis Maji, anno superioris seculi nonagesimo primo. Patre usus est omni virtutum & doctrinæ gloria Celebratissimo, maximeq; Reverendo, Dn. *Martino Næßlero*, Serenissimorum quondam Principum JOH. GEORGI & JOH. FRIDERICI, Electorum Brandenburgensium, gloriosissimæ memoriæ, Concionatore Aulico Eloquentissimo, Consiliario Ecclesiastico Prudentissimo, nec non Capituli Colonienfis Decano Gravissimo. Susceptorem habuit ipsum JOH. GEORGIVM, Electorem Potentissimum. Pueritiæ annos atq; adolescentiæ quàm præclare



clare impenderit, ætas firmior ostendit, quæ tantis non eluxisset virtutibus, si prima illa rudimenta in otio luxuq; deposita fuissent. Nempe in tenera ista ætatula usq; ad annum quartum & decimum educatus est in schola patria, ubi probè haultis capitibus pietatis & fundamentis Religionis Christianæ, eò usq; in studiis, quæ humaniora vocant, progressus est, ut sæpiuscule habitis oratiunculis & Domini Parentis & Præceptorum expectationi satisfecerit. Hinc Hallam Saxonum missus est, ut in schola istius loci, quam dexteritas Rectoris M. Jo. Æschardi, egregii ingeniorum artificis, valde celebrem reddiderat, bonis literis imbueretur: qui laudatus Rector tanto eum amore est prosecutus, ut plurimis illum præcipuæ dignitatis hominibus commendaverit; è quibus Nœßlerus noster ad seram ætatem præ aliis laudare solebat Dn. Casparem Goldsteinium, Consiliarium Magdeburgensem, Dn. Matthæum Köppenium, ibidem causarum patronum, & Dn. Kilianum Stiefferum Capcellarium, quem semper instar Parentis veneratus, ejusq; postea, data quavis occasione, paternum affectum & fidem expertus est. Bienio laudabiliter Hallæ consumto, quòd truculentissimum pestilentiaæ malum ibi gliscere cœperat, domum repetere coactus est; ubi tamen non diu substitit, sed postquam Dn. Parenti vitæ hæctenus actæ studiorumq; rationem reddidisset, ab eodem Francofurtum ad Oderam, omni semper laudatarum artium gloria florentem Academiam, ablegatus est. Clarebat tum ibidem Vir celeberrimus, Henningus Arnisæus, sub cujus præsidio profectuum suorum & excellentis ingenii præclarum specimen edidit, dissertatione de Imperfectè Mixtis, quam cum applausu totius auditorii defendit. Vix ibi tertium attigerat annum, cum necessitatis ultima lex Patrem ipsi adimeret; cujus quidem jacturam mœstissimo, æquo tamen, tulit animo, seq; & studia sua eò ardentius Divino Numini commendavit, cujus etiam immensa gratia optatum ad finem perduxit. Anno 1610 Wittebergam se contulit studio audiendi incomparabiles Viros D. Sennertum Medicum, & Jac. Martini Philosophum, cujus posterioris mensa per sesquiannum usus cum adversa valetudine decertare cœpit; salubriorem ergò locum quærens, Francofurtum remeavit, ibiq; valetudini operam dedit, quò etiam ma-



ter ipſius, ut contagii periculum, quod Coloniz ad Sprevam ſæviebat, effugeret, ſe receperat. Commodè incidebat in notitiam Illuſtris Dn. Adami Gans, L.B. in Putliz, qui Legatus Principis ſui ad Conventum Electoralem Norimbergæ celebrandum, Noſtrum itineris comitem habere voluit: qui & hoc in comitatu Norimbergam profeſtus eſt, inde hocce ad Lyceum excurrit, ut in amicitiam Clariffimorum eo tempore Profeſſorum, Gentilis, Dinneri, Soneri, Hoffmanni, Prætorii, Queccii, Piccarti, Virduſgi, ſeſe penetraret. Finito Collegiali hoc Electorum Conventu, obitu matris, utroq; parente fuit orbatus, quo inſolente Fortunæ impetu concuſſus adeò in ſtudiis ſuis non remiſit, ut potiùs ad ea majore cum induſtria continuanda Academiam Juliam elegerit, præſertim cùm Arnifæum, à quo prima Medicæ artis cognitione tinctus erat, eò vocatum fuiſſe intelligeret. Eminebant ibi tunc temporis Jo. Caſelius & Cornelius Martini, quorum diligenti inſtitutione tam clara edidit ſpecimina, ut promeriti honores ſponte ipſi à Dnn. Profeſſoribus deferrentur; à quibus tamen capeſſendis & ætas adhuc immaturior, & flagrans peregrinas luſtrandi oras ardor eum retrahebant. Quare ſuperato graviffimo, quo Helmeſtadl vehementer affligebatur, morbo, iter in Italiam terrarum pulcerrimam ſuſcepit; cujus incola per integrum triennium permanſit, atq; interea incredibili curioſitate celeberrimas perluftravit urbes, Venetias, Vicentiam, Veronam, Ferraram, Mantuam, Bononiam, hinc Florentiam, verè-bellam ipſiſmet Italis dictam, illum nimirum Hetruriæ oculum ac diadema majeſtate rerum ſatis conſpicuum: Florentiâ Senas, Hetruriæ urbem pariter comtam ac celebrem, divertit, ac poſtremò Romam, cujus urbis urbium omnium quondam Reginæ ac Imperatricis miracula & venerandas antiquitates haud defatigata perquiſivit induſtria; maximam tamen temporis partem ſtudiis, quorum ſerio flagrabat amore, Paduæ tribuit, inprimis etiã Italicæ & Hiſpanicæ linguarum cognitionem exactiſſimam ſibi acquiſivit. Quæ quidem res illum Nationi Germanicæ & Artiſtarum, uti vocant, Vniverſitati eum in modum commendavit, ut in Conſiliarium dictæ modò Nationis electus, & pluribus ab eadem vicibus ad Illuſtriſſimum Venetorum Senatũ, diverſis in negotiis, miſſus fuerit,



rit; prout egregia testimonia à laudata Natione ipsi concessa prolixè id demonstrant, in quibus ideo præcipuè multis extollitur laudibus, quòd controversum illud negotium de admittendis ad honores Doctores etiam illis, quibus religio esset jurare in Bullam Pontificis, industria atque dexteritate singulari ad finem optatum A. 1616 perduxerit: quibus omnibus feliciter peractis, in præmium exantlatorum laborum splendido Doctoris Medici titulo in eadem illustri Paduana condecoratus est A. C. 1617. Clarebant tempore illo Paduæ Thomas Minadous, Hieronymus Fabricius ab Aquapendente, Prosper Alpinus, Julius Casserius Placentinus, Adrianus Spigelius, Rodericus Fonseca, Benedictus Sylvaticus, Jo. Prævotius, Cæsar Cremoninus; quos omnes ita sibi devinxit, ut non solum commercium literarum cum eo instituerint, sed frequentissimè etiam tam publicè quàm privatim erga Studiosos Nationis nostræ honorificam ejus fecerint mentionem. Jacobus Philippus Thomasinus, Episcopus Aemoniensis, in Elogiis Virorum Illustrium scribit, modò laudatum Prævotium cum Nœslero, Bauhino, Arnifæo, Sennerto, ast quanta hæc nomina! sinceram coluisse amicitiam. Redimus in viam, cætera, ut cœpimus, benevolentia & attentionis vestrae porro nobis adspirante Fayonio, oratione explicaturi. Nœslerus cum circa Pascha Anni 1617, ex Italia redux Noribergam accessisset, nundinas Lipsienses instantes exspectare decernebat; ut igitur hoc etiam temporis bene collocaret, Altdorfium veniens convictu & conversatione Casp. Hoffmanni usus est. Vacabat eà tempestate, mortuo paullo antè Sonero, Professio Medica & Philosophica, quam nulli alii majore cum Academia fructu obtingere posse, quàm Nœslero nostro, ob insignem ejus eruditionem, Hoffmannus censebat; quam suam sententiam quoque cum Queccio & Piccarto, Philosophis, communicavit. Nœslerus interim nativo recipitur solo, & mox Serenissimo ELECTORI commendatus, ab Eodem dextrâ clementissimè exceptus, & torque aureo donatus fuit. Post hæc patriæ iterum vale dicens, Hallam Saxonum indeque Magdeburgum concessit, ubi conditio non contemnenda apud Cathedrales Magdeburgenses ei offerebatur; sed acceptis à D. Remo & Hoffmanno, quibus id à Magistratu Norico in mandatis datum erat, literis vocatoriis



toriis, agnitq; Divina vocatione hoc vitæ genus elegit, atq; Anno 1618 utramq; Professionem, & Medicam & Physicam, Numine favente aggressus est; quo in munere ita stetit, ut omnes labores Academicos cum quadam voluptate & animi alacritate subiret, atq; studioforum auditorum comoda, quâ poterat intentione, maximè promoveret. Neq; hi sufficiebant honores, sed indies cumulabantur. Nobilissimus enim Senatus Noricus in Collegium suum, quod hodiernum ibidem floret, Medicum eum recepit: eodemq; ferè tempore JO. FRIDERICVS Princeps Palatinus Serenissimus eum Archiatrum suum constituit. Salus & dignitas Academiæ hujus summæ ipsi curæ cordiq; semper fuit; estq; hoc in primis memoratu dignum, quòd tempore primi ejus Rectoratûs, anno 1623, Privilegia Doctoralia Vniversitati huic fuerint concessa. Insignem ejus tum eruditionem tum industriam satis superque probant quamplurimæ ipsius Disputationes Medicæ ac Philosophicæ, aliaq; merita hanc in Vniversitatem & Rempubicam literariam longè maxima. Antequam ad alia nostra progrediatur oratio, non ab re erit finistræ casum fortunæ memorare, quò Nœslerus pæne oppressus fuisset. Vita humana haud absurdè cum opere musico confertur, ubi notæ, quas vocant, plures atræ quàm albæ, adversa puto plura quàm secunda, apparent: conspicuum ibidem est, dum ascenditur descenditurq; gradus sæpenumero aliquos transiliri, tantum non mollem ubiq; sed durum etiam atq; asperum esse, nec in superioribus semper lineis vocem subsistere, sed ad imas sæpius sese demittere oportere; ita cum rebus humanis comparatum esse, ex narratione sequente sole meridiano clariùs elucescet, quam paucis, & quæ ad illam maximè pertinent, exposituri sumus. Anno 1632, quo universa Germania atrocissima feralis belli tempestate percellebatur, Nœslerus in via publica Noribergâ Altdorfium tendens, ab Illyricis Cæsareani exercitus equitibus, unâ cum aliis, captus, primumq; Neagoram abductus fuit; ubi barbari ante diverforium, dispositis ordine aliquot truncatis capitibus, novum captivis horrorem ac metum incusserunt, ejusdem fortè experiundæ immanitatis. Inde ductus Ambergam versus, non semel currentes barbaros pone se nudis acinacibus sibi minitantes audivit

capí-



capitis vel uno ictu amputationem, ac minis hisce maximoq; ani-  
mi angore per duos integros dies excarnificatus est, quibus præ-  
terlapsis, ex periculo hoc præsentissimo, ubi vix quatuor aut se-  
ptem digitis à morte remotus erat, singulari Dei munere & be-  
neficio ereptus est. Ambergâ Bathianus equitum, quos dixi,  
tribunus eum per suos misit ad Electorem, cui etiam amputata  
illa capita offerri cupiebat, nisi foetor intolerabilis prohibuisset.  
Serenissimus Elector ut Næßlerum vidit, Comiti Altringio  
commendavit, qui eum humanissimè tractans bono animo esse  
iussit & securum de lytro, quod ingens & insolens barbarus ille  
Bathianus exegerat; ex quo tempore in liberalissima captivita-  
te sine omni custodia & obligatione fuit, nisi quod in castris  
Cæsareanis & Bavaricis medicinam facere debuit. Quæ qui-  
dem adeo ipsi non damno fuit, ut potius prosperitatem inde  
senferit quam maximam: cum enim utroq; in exercitu suâ  
industriâ & experienciâ varios plurimorum Ducum, Tribuno-  
rum, aliorumq; militum morbos profligasset, plurima inde  
quoq; magnaq; munera à militum ductoribus est consecutus, & à  
Duce Wallensteinio torque aureo ingentis pretii donatus fuit;  
in quem, uti erat Poëta terfissimus, ita lusit:

*Captivitatis præmium & decus mea,  
Fridlandio quod debeo, at quanto Duci;  
Fortunâ abusus esset ille nî suâ!  
Abusa fortuna an fuit Fridlandio?*

Post memorabilem illam pugnam Lützensen idem Dux affi-  
nem suum, Comitem ab Harrach, & alios Nobiles ægrotos ei  
commendavit; paucis verò interjectis horis exercitu Saxonico  
approperante, cum imperasset, ocyus Zwickaviam moverent,  
ibi in trepidatione rerum suarum satagentes, captiviq; sui im-  
memores, Næßlerum post se Lipsiæ reliquerunt; qui quam-  
primum potuit Torgaviam se recepit, expectans occasionem  
cum mercatoribus Norimbergenfibus, finitis nundinis Lipsi-  
ensibus, ad suos revertendi. Ac feliciter etiam rediit, cum ex  
quinquemesfri hac captivitate ultra quingentos florenos au-  
reos secum attulisset. Sed jam de morte ipsius paucis, quæ adhuc  
dicenda videbuntur, pertexemus. Plerunq; nuncios suos ac ve-  
luti feciales mors præmittit, morbos puta multiplices, ne clan-  
culum



culum illam semper atq; ex insidiis pugnare, aut per cuniculos irrumperere, jure queri possimus. Ita Næßlerus noster ex doloribus podagricis, qui morbus ipsi hereditarius fuit, sæpe decubuit, quibus malum hypochondriacum cum calculo, insuper etiam vertigo seu Scotomia, cum animi deliquiis, sese associârunt; ex quibus tamen morbis aliquoties iterum convaluit. Cum verò tandem, diarrhæa bis impetus suos moliente, viribus dejectus esset, atq; podagra simul eum affligeret, lassitudo tanta, cui *ἀνωπεξία* se comitem præbuit, corpus ejus totum occupavit, ut omni vitalitate amissa, vitæ hujus & miseriarum satur, è fluxa rerum mortalium conditione evocatus fuerit die 9 mensis Julii, Anni M DC L. Mortuum laudavit Nicolaus Rittershusius. Epitaphium ejus tale heic loci invenimus: *Georgius Næßlerus, Berolino-Marchicus, cum Charitatibus suis hic situs est. Natus die 10 Maji, Anni 1591, denatus Altdorfii die 9 Julii, Anni 1650. Vitæ sanctimoniam, eruditionis copiam, insignia merita, quibus Artem Medicam & Philosophicam per annos triginta & unum summè sibi devinxit Vir Optimus, in fama templo, quàm in hoc cippo, legi maluit.* Convertit se nunc oratio nostra ad LVDOVICVM JUNGERMANNVM, M.D. & P.P. Virum rei Botanicæ Consultissimum, ac per Europam omnem Celeberrimum. Bono publico is hanc in lucem editus est Lipsiæ, in urbe omnis elegantiae sede, ac propter Musarum sacra ac commerciorum frequentiam celebratissima, Anno Æræ Christianæ M D LXXII. Patrem habuit Virum Nobilissimum, Consultissimum atq; Excellentissimum, Dn. Cæsarem Jungermannum, J. V. D. P. P. Procancellarium, & Seniore Facultatis Juridicæ in Vniversitate Lipsiensi. Postquam in ætate prima primis literarum fundamentis imbutus esset, atque ulterius humanitatis rivulos delibasset, primò linguarum usu principum Græcæ, Latinæ, nec minùs Poëseos ac Philosophiæ hausit opes, hinc ad Artem Medicam, ejusq; partes, præcipuè Botanicam, ope privatorum, quos ipsius studiis Dominus Parens præfecerat, Præceptorum, animum appulit; quorum ductu tanta animi alacritate ac sedulitatis intentione profecit, ut omnium vota præcurreret. His fundamentis Lipsiæ probè jactis, in Academiam Jenensem, post in nostram Altdorfinam

con-



concessit, ubi cum biennium transegisset, (intra quod Catalogum Plantarum circa Altdorfium, & in vicinis quibusdam locis sponte nascentium conscripsit, quem postea A. 1615 Casp. Hoffmannus typis exscribi curavit) Giesam fausto pede adiit; in qua Vniversitate cum laudē maximam ex insigni plantarum noticia sibi comparasset, (pro qua excolenda & studiosorum profectibus hac in parte adjuvandis, hortum instruxerat) disputando etiam & declamando elegantioris eruditionis documenta dedisset clarissima, summos ibi in Arte Medica honores publico testimonio promeruit retulitq;: post hæc in Professorum Medicorum numerum allectus est, cui professioni per triennium tanta cum laude præfuit, ut fama de peritia ejus Botanica in Angliam usq; percrebuerit, atq; eò in locum Celeberrimi Botanici, Matthiæ Lobelii, stipendio non contemnendo invitatus fuerit; cui tamen vocationi, quòd juventuti patriæ operam studiaq; sua consecraverat, aures vacivas non præbuit, sed Germaniæ potius prætulit condiciones. Ad descriptionem Horti Eichstetensis tota in Germania famigerabilis, haud vulgarem contulit operam. Accessit ad Vniversitatem hanc altera vice A. C. 1625, ut professionem Medicam Botanicam in se fusciperet; cui quanta fide, studio & industria præfuerit, illustre testimonium præbere potest Hortus noster Medicus per Europam notissimus, qui non vernaculis solùm, verùm etiam exoticis quamplurimis iisq; rarissimis ex utroq; orbe allatis plantis, lætè floret, oculosq; & animos ingredientium mirificè recreat exhilaratq;. Certè ita cordi ipsi hæ fuerunt operæ, ut morbus, quo affligebatur, novissimus, doloresq; quos sustinuit acerbissimos, hoc uno fere nomine molesti ipsi fuerint, quòd metuebat, hortum non ita fore cultum & adornatum, uti optabat, dum manum admoveere ipse non poterat. Sed nimirum quod ipse facturus erat feminibus plantularum suarum, id fata in ipso meditabantur, ut semina in fragili ejus corpore jamdudum jacta, in fructus tandem lethiferos erumperent. Podagricis nempe doloribus à multis jam annis exercebatur; cui tandem malo accessit apostema criticum post febrim malignam, cum erysipelate, cujus fluxus consueti subito subsistentes, gangrænam scorbuticam in extremitate pedum produxerunt. Adfuit etiam senectus, quæ, ut Comicus ait, ipsa

L

mor-



morbus est, & quidem talis, cujus intuitu periculum erat, ne violento sectionis & aliis, quæ interdum adolescentia admittit, remediis, natura effocta, nec amplius obsequens morbi-violentiæ, prorsus succumberet: factum itaq; leuioribus, quod fieri poterat, donec magis magisq; fatiscientibus naturæ viribus, ipso meridie, die 7 mensis Junii, Anni M DC LIII, extinctus est Senex meritorum pariter ac annorum numero maximè venerabilis. Quàm præclarè etiam post obitum de Vniuersitate hac fuerit meritis, signum dedit clarissimum voluntas ejus postrema, quâ Bibliothecam suam commodò inservire publico ac Bibliothecæ Vniuersitatis inferi voluit. Vitæ genus solitarium sibi delegit, quod ad id idoneis optimum, certè commodissimum & à molestiis ac solitudinibus bene multis remotum est, cælibatum scilicet, ab uxorio levamento ita abhorrens, ut tunc demum uxorem se ducturum fore affirmaret, si quis plantulam aliquam, cujus notitia non foret imbutus, ipsi monstraverit; quem tamen errorem se errare non posse, longa exercitatio ipsum reddiderat certiore. Extollentibus aliis solatium, quod ex matrimonio caperent, ille contrà *lectulo celibe nihil jucundius esse* confidenter pronunciabat. Priusquam ad reliqua pertexenda nos conferamus, memoratū omnino dignum erit, quantum ornamenti & splendoris Academiæ nostræ eadem circa tempora accesserit. Anno quippe seculi hujus quinquagesimo, post redditam Germaniæ pacem, urgente Excellentissimo Viro *Mauricio Hoffmanno*, Amplissimi SENATVS Norimb. munificentia, in loco Collegii nostri maximè idoneo Theatrum Anatomicum apertum est, in quo Anatome tam commodè coli potest, quàm Romæ olim in magno illo Pacis templo, teste & præcone Galeno: hanc nempe divinam artem, in Medicinæ nobilissimæ decus & ornamentum, non in obscuro & deformi visu loco aliquo, aut fumidæ culinæ persimili, sed amplo satis & ornato, exerceri expediebat. Anno seculi tertio & sexagesimo Hortus Medicus, qui infinita oculorum, narium, aurium etiam, offert delinimenta, tertia parte auctus est, ac tam eleganter tamq; concinnè posita omnia atq; distincta sunt, ut delectationem summam ingredientibus afferat, videre lætissima soli herbascentis velut aulæ, comisq; viridantibus, ut Columella loqui-



quitur, cæsariatam terram, variasq; æstivas pariter ac hibernas plantarum mansiones. Prolixum fuerit commemoratione persequi singula, quæ voluptate incredibili animum perfundunt. Argum se esse aliquis, quem centum luminibus cinctum caput habuisse festivissimi Poëtæ fabulantur, vel cum illo inter amorum Venerumq; triumviros facile principe, Catullo, totum se nasum fieri jure meritoq; optet, adeo se ubiq; multa, quibus sensus omnes mirum in modum afficiuntur, offerunt. Pomonæ ac Floræ certamen haud absurdè dixeris; in quo operosius describendo non erimus nimis nunc seduli, cum festinandum nobis esse ad cetera intelligamus: modò id singularis honoris ergo adjecerimus, gesta esse ista omnia curâ indefessâ & inimitabili studio Excell. *Dn. Mauricii Hoffmanni*, Viri ac Medici omni laude nostra majoris. Sed fini orationis nostræ imminentes, breviter ea, quæ de vita & morte **CHRISTOPHORI NICOLAI**, Med. D. & P. P. longè meritissimi accepimus, trademus. Accepit is vitæ hujus usuram Norimbergæ A. 1618, à patre viro integerrimo, *Michaele Nicolai*, ad *D. Mariæ* ædituo; qui ingenium in filio advertens liberale, studiisq; optimarum artium capeffendis aptissimum, doctissimorum Præceptorum, *Dn. Sebastiani Curtii* ac *Dn. Hofmanni*, præcipuè verò Viri Plurimum Reverendi ac Præclarissimi *Dn. M. Joh. Leonhardi Frischii*, informationi, curæq; eum commisit; quorum ductu, artibus iis, quibus ætas illa ad humanitatem informari solet, ritè imbutus est. Quo quidem tempore multa, neq; illa vulgaria, spectatæ indolis edidit specimina. Ætate jam grandior factus, anno salutis 1637, à Patronis, inter quos non postremus fuit ejus avunculus, Vir Amplissimus, *Dn. Wolfgangus Frank*, rerum Ecclesiasticarum atq; Tutelarium Secretarius, Promotor studiorum suorum si non unicus, ita certè in officiis hisce occupatus, ac si esset unicus, ad graviores disciplinas & inprimis Artem Medicam discendam, huc Altdorfium ablegatus, & in Illustris SENATVS Norimb. Alumneum, fecundissimum multorum magnorum virorum seminarium, promotus est,Inspectore tunc temporis Clarissimo *Felwingero*. Heic igitur loci doctissimos in omni scientiarum genere Viros publicè docentes cupidissimè audivit, quibusdam etiam ex præcipuis privatim & familiariter usus, assi-



dua illa eruditorum hominum consuetudine effecit, ut insigni optimarum rerum peritia sibi comparata, Disputationem de Methodo docendi & discendi Medicinam, Præsidente *Cass. Hoffmanno*, publicè habuerit. Anno 1641 Altdorfio digressus, ad ingenii cultum augendum, & exterarum regionum visendarum cupidine flagrans, in Italiam contendit, inque Univerſitate Patavina substitit, ubi Virorum longè Clarissimorum, Benedicti Sylvatici, Joh. Dominici Salæ, Jo. Veslingi, Petri de Marpettis, Jo. Georgi Virſingii, & Francisci Bonardi, institutione usus est in annum usq; sæculi quartum & quadragesimum. Inde in patriam redux, eodem anno de sententia Patronorum, Disputatione Publica de Transmutationibus Morborum, Præsidente *Georgio Næßlero*, habita, ad ambiendos summos in Facultate Medica honores animum induxit; ubi non modò ad examina & alia hujus ordinis & honoris Candidatorum documenta, sed ad ipsos honores, ad quos illa spectabant, facillè admissus, & laurea corona in Brabeuterio Academico dudum debita, more majorum faustis bonorū ominibus ei decreta, & capiti ipsius tot virtutum ac doctrinæ radiis corusco imposita est. Sequenti anno in Collegium Medicum Norimbergensè adscitus, & Nosocomii Medicus constitutus est; quo in officio quantis cum molestiis & vitæ non raro discrimine in visitandis ægris, deliris etiam & furiosis, qui, magno numero & sumtu, peculiari in loco sustentantur & curantur, versatus sit, multis adhuc cognitum est atq; perspectum. Postea verò Anno 1654, ab Academia hujus Curatoribus in Professoris dignitatem evectus fuit. Judicabant enim Viri Prudentissimi, è tam docti hominis præsentia non minimum splendoris Academiae accessurum. Nec opinione sua frustrati sunt; munere enim suo, quousq; in vivis esse licuit, egregiè defungi, & quâ publicè quâ privatim multis prodesse, nunquam destitit. Quemadmodum autem quovis tempore, etiam cum blandiri nobis omnia nostrisq; servire votis ac desiderijs videntur, atq; adeo in medio etiam lætitiæ ac gaudiorum cursu insidias vitalitati nostræ parari, unusquisq; nisi talpæ sit cœcior, videt atq; intelligit; (is enim mortis, eorum quæ nata sunt omnium juratissimi hostis, furor atq; immanitas est, ut *æquo pede*, sicuti Poëta non ignobilis cecinit, *pauperum tabernas Regumq; turres pulset,*



set, neq; ætatis ullam, neq; dignitatis ac fortunæ rationem habeat:) ita beatissimus noster Professor cum hostis hujus, mortem puto, insultus quamplurimos aliquoties fortiter sustinisset, iis tandem impar succumbere, palmamq; cedere coactus fuit. Affligebatur sæpius doloribus podagricis exquisitissimis, qui non tantum potentiam omnem remediorum eludebant, sed novissimè etiam nobilioribus & interioribus corporis partibus, imò toti corpori interitum moliebantur: intro enim recedens morbi furor ventriculi appetitum dejecit, ut neq; cibis neq; medicamentis recipiendis esset idoneus, febrim ulteriùs & inflationes excitavit, frequentibus deliquiis vires corporis vehementer afflixit tandemq; prostravit, ut tot adeo tantisq; difficultatibus impar, naturæ debitum persolverit die 21 mens. Febr. Anni M DC LXII, Vir, absit invidia dictis, vita innocentissimus, ingenio florentissimus & proposito sanctissimus. Tantis luminibus, *Auditores Honoratissimi*, Academia nostra splenduit semper, splendetq; etià nunc, eoq; vividiores spargit radios, ex quo nobilior ista Medicinæ portio, mystica illa Philosophorum bene medendi scientia, illa corpora naturalia mista solvendi, soluta coagulandi, hocq; ipso purum ab impuro per ignem medium separandi, & occultum in corporibus mistis manifestandi, ad medicamenta jucundiora, tutiora & efficaciora concinnanda, ars, *Chymiam* dico, in ea publicè doceri cœpit; cujus professionem primùm heic in se suscepit, ejusq; mysteria Artis Filiis summa dexteritate atque industria hodie pandit Excell. *Dn. D. Jo. Mauricius Hoffmannus*, Mauricii Fil. Præceptor noster ad tumbam maximè colendus. Plurima adhuc eaq; honorificentissima commemorari à nobis & possent & deberent, nisi satis jam proluxa hæc fuisset oratio; itaq; sermonis nostri, qui longè meritis tantorum virorum est inferior, filum hîc abrumpimus: & quamvis brevissimè simplicissimeq; eorum vitam ac mores descripserimus, illud tamen confidimus nos consecutos esse, ut gratissimam nominum tantorum memoriam in animis omnium relinquamus.

Interea ad æternum illum bonorum omnium  
fontem ac scaturiginem DEVM, mitissimum no-  
strum



strum ac clementissimum Patrem, ore & pectore toto conversi, gratias Ei pro infinitis beneficiis, quibus Vniversitatem hanc beare hucusq; voluit, persolvimus, & ut quamplurimis in posterum quoq; eam cumulet, votis, sicuti fas est, ardentissimis supplicamus. Faxit Divina Supremi Numinis Benignitas, ut optatissimus pacis aureæ splendor, nulla nobis tempestatum caligine, nullis temporum injuriis eripiat. Ita pulso ubiq; & eliminato Marte, optata Musis servetur quies, hujusq; beneficiô salutaris veræ fidei propagetur doctrina, Themidis sacra prudenter pandantur, arcana Æsculapii feliciter recludantur, & Sophiæ mysteria dextrè exponantur, totaq; Vniversitas majora indies sumat incrementa, magisq; & magis efflorescat! Hæc bona, hæc munera Inclytæ huic Academiæ solida ac perpetua precari, studio & ardore, quô poterimus, semper contendemus.



ORA-





## ORATIO V

De

## PHILOSOPHIS ALTDORFINIS.

## PROGRAMMA.

**P** Riscis temporibus, cum adhuc moribus censerentur, non titulis, res humanae, cum studia ad usum, non ad pompam, referrentur, longè majore in pretio ac laude ponebatur Philosophia, quam hac nostra aetate, quâ Diva hæc tam multis despiciatui est ac sordet, sordidis tamen ipsis & ignorantibus. Plato Philosophiam donum & inventum Deorum vocat, Cicero matrem bonarum artium, animi medicinam, vitæ ducem, virtutis indagatricem, expultricem vitiorum, in ventricem legum, magistram morum ac disciplinæ. Hæc dissipatos homines in societatem vitæ convocavit, hæc familias instituit, urbes peperit, Respublicas formavit, formatasq; moderari docet. Docet, quæ Magistratus deceant imperia, quæ cives subiectio, quæ sagum illustret fortitudo, quæ togam prudentia; quomodo justitia jungenda sit cum pietate, clementia cum rigore, majestas cum humanitate, potentia cum moderatione. Hæc hominum etiam privatorum mores emendat, actiones regit, affectus moderatur, curas & cogitationes ab incertis fortunæ bonis, ad tranquillitatem mentis & officia vivendi revocat, felicitatem & supremum illud quod ab homine expectari potest bonum, in virtute ac ratione, in animo ponendum ac quærendum esse monstrat. Ac ne quis de Practica solum loqui se putet, sanè Contemplatrix etiam Philosophia digna est summa admiratione ac prædicatione. Hujus enim adminiculo, velut alis, sublevati nos in cælum evolamus, astrorum molem & distantiam



tiam metimur, vires percontamur, vias inuestigamus; mox in sublunarem mundum placide remissi, causas sublimium incendiorum, fulminum, fulgurum, tonitruorum, pluviarum, niuium, grandinum, ventorumque perscrutamur. Inde in terræ globum delati, vallium ima, montium ardua, camporum plana peragramus, & innumeras plantarum, herbarum, florum, frugumque formas, & in his, præter hominem, sanctius illud animal mentisque capacius altæ, oberrantem cæterarum gressilium, volatiliū, reptiliū animantium varietatem oculis animisque versamus. Quin etiam terrarum profunda penetrantes, magnæ matris viscera & sinus excutimus, inque iis mineralium cunabula lustramus, & quicquid tellus in intimis suis abscondi voluit thesauris ac voraginibus, in lucem protrahimus. Mox in fluminum mariumque abyssos nos immergimus, & innumerabiles natatiliū greges intuemur; ut mortaliū oculos effugere nihil videatur amplius. Tandem sensus externi ubi deficiunt, animum pæne supra naturam attollimus, atque ens illud primum ac purissimum, mentesque illas diviniores & a mortalitatis lege procul semotas, ac totum istum scientiarum ambitum contemplamur, quas mortalibus ipse Deus invideret, si in Deum (ut agebat quondam Philosophus) invidia cadere posset. O terram felicem, felicem Academiam, in qua hæc Theologiæ manus, fons Jurisprudentiæ, soror Medicinæ, hæc, inquam, disciplinarum omniumATRIX, fideliter & accuratè docetur; sine qua, tanquam non jacto ritè fundamento, frustra quis altioribus in scientiis tentabit quidquam. Et verò si ulla Universitas, nostra certè Altdorfina vel eo nomine felix ac beata maxime censenda est, quod inde usque à suis incunabulis Philosophiæ pariter ac artium, quæ ad humanitatem spectant, Doctoribus ac Magistris affluerit excellentissimis. Quorum doctrinæ virtutisque magnitudinem etiam si nulla exprimere possit oratio; tot tamen tantorumque virorum laudes propè



propè jam senescentes ab oblivione hominum & silentio vindicare conabitur Oratione, quam de PHILOSOPHIS ALT-DORFINIS lotis, quod ajunt, manibus conscripsit, crastinè pomeridiana prima, remoto commentario, memoriter recitabit Vir-Juvenis subactò ingenio, doctrinàq; & virtute nobili oppidò Conspicius, DN. JOHANNES JACOBVS STYRMIVS, Oettingâ-Rhetus, Philosophiæ pariter ac Jurisprudentiæ, si quisquam, studiosissimus. Ad eam benevolè audiendam Vos, Magnifice DN. RECTOR, Perillustres & Generosissimi DNN. BARONES, Excellentissimi Celeberrimiq; PATRES ACADEMICI, Nobilissimi Eruditissimiq; DNN. STUDIOSI, ea qua par est observantia & humanitate invito. Dabitis, spero, tantillum temporis cum egregio amplissimog; huic argumento, tum optimo civi & commilitoni vestro, qui modestia, studio, probitate jam ab aliquot annis Academiæ fuit ornamento, quiq; Vobis omnibus, in loco, vicissim gratificari mecum nullus defugiet.

MAGNVS DANIEL OMEIS, P. P.

## ORATIO.

(Titt.)

**S**I quid apud priscos virtutis & sapientiæ magistros unquam ratum firmumq; fuit, ejusmodi vel maximè id mihi fuisse videtur, quòd omnè humanarum artium doctrinam uno quodam societatis vinculo contineri existimarunt; quò inter se adeò sint connexæ, implicatæ, colligatæ, ut mutuis auxiliis unam constituent disciplinam, quam primò Σ.φ.ία, mox vocabulo modestiore Philosophiam appellaverunt. Scilicet

M quem



quemadmodum Stoicæ pariter atq; Peripateticæ Philosophiæ sectatores propè conjunctis sententiis docuerunt, omnes virtutes uno vinculo contineri, neminemq; virtutem unam possidere, quin possideat simul omnes: simili planè complexu disciplinas constrictas esse, veteres illi rectissimè crediderunt, & quisquis illarum vel unam ignoraverit, hunc nullam verè didicisse arbitrati sunt. Singulæ quidem disciplinæ suis circumscribuntur limitibus; sed si usum spectemus & exercitationem, omnes inter se communicationem habere, nemo sapientum ibit, opinor, inficias. Vnde & quendam doctrinæ orbem antiqui constituerunt, ex diversis aptum & temperatum scientiis, quem græcè *ἐγκυκλοπαίδειαν*, ipsas verò quas continet disciplinas, *ἐγκύκλια μαθήματα* & *παιδείας ἐγκυκλίης* vocârunt. Hæc est nimirum illa *polymathia*, quam permulti vel ingenio vel industria destituti, ut inutile planè imò impossibilem improbârunt; cumq; receptam ac severam doctrinæ legem evertissent, velut effracto ostio, sordidi & impoliti ad regias disciplinas irruperunt. Neq; verò inania sine facto nomina sapientes illi nobis obtruserunt; sic namq; de Oratoribus Romanæ eloquentiæ princeps, Tullius, *Veteres*, inquit, *illi, usq; ad Isocratem, omnem omnium rerum, quæ ad mores hominum, quæ ad vitam, quæ ad Rempublicam pertinent, cognitionem & scientiam, cum dicendi ratione jungebant.* Philosophorum quoq; coryphæus, Plato, in Protagora de Sophistis scribit, illos *Arithmeticen, Astronomiam, Geometriam, Musicam, Civilem quoq; scientiam & Oeconomiam docere consuevisse; Simonidis deniq; & aliorum Poëtarum versus, summa diligentia ab illis explicatos esse, idem testis est.* Sed quid vetera & externa exempla conquirimus, cum recentium & domesticorum copia suppetat? Nostra enim Germania, quid verò Germania? hæc nostra Altdorfina, ex quo primùm singulari *Illustri REIP. NORIMB. Procerum* consilio fuit instituta, alios assiduè ex aliis Viros multiplici eruditionis & scientiæ laude Clarissimos perpetua quadam serie propagavit, cum in Facultatibus, uti vocant, aliis, tum vel maximè Philosophica; Viros, inquam, *πολυμαθεύς*, de quorum laudibus constitui hodierno die differere, non ut eas quidem singulatim percensere omnes ac flore orationis convestire conarer,



rer, (quod imperare iniquum esset & suscipere temerarium) sed ut ex earum innumerabili copia pauca quædam seligerem, atq; hoc ex amplissimo loco *Vobis* audientibus explicarem. Adeste igitur animis, DD. & AA. mihiq; res pulcherrimas brevi oratione comprehendere meditati, exigui temporis attentionem ne denegate!

**Q**uemadmodum autem, qui in bivium aliquod incurrunt viatores, subsistunt, animiq; ut Plautino verbo utar, incertantur, quæ potissimum sit insistenda via, tandem ubi diu multumq; dubitarunt, quod Hermes non esset, qui, quæ compendio irent, monstraret, regiâ pergunt, & rectâ progrediuntur; ita hic mihi faciendum video. Cum enim in uberrima hac amplissimaq; materia variæ mihi pateant semitæ, adeò, ut unde incipiam, ubi desinam, quid in primis dicam, facillè non inveniam; isthac placet procedere via, ut de Habituum, quos vocant, Instrumentalium primum, post de Principalium Doctoribus Philosophis in hac Vniversitate quondam Clarissimis, verba faciam. Atq; ut ab *Oratoria* exordiar, inter illos, qui heic Altdorfii studia juvenum Eloquentiæ doctrinâ foverunt, primi fuerunt VALENTINVS ERYTHRÆVS & GEORGIVS GLACIANVS. Quorum ille hanc in lucem editus est Lindavii, ad lacum Bodamicum, A. C. 1521; ubi in Parentum pariter ac Mularum sinu educatus, cum didicisset pietatis artiumq; bonarum rudimenta, missus est Argentoratum. Hic postquam solidius esset institutus, Wittebergam se contulit, ususq; Præceptoribus Luthero, Philippo, aliisq; Viris Excellentibus, reversus est Argentoratum, factusq; primum Præceptor Classicus, deinde Joh. Sturmio adjunctus est, & locum Professoris præcipui obtinuit. Ista ex schola ab Inclyto Senatu Norimb. huc A. 1575, ad regimen Lycei Altdorfini vocatus est, cui paulum supra dimidii anni spatium præfuit. Cœpit namq; gravi cum morbo conflictari, quem cum multi putarent jam desævuisse, tandem accedente plevrifi, & acutis circa diaphragma compunctionibus, pie expiravit, anno seculi superioris sexto & septuagesimo, ætatis autem quinquagesimo quarto, climacterico videlicet novenario sexto, quem sibi ominosum esse perpetuo dixerat. Oratio ab eodem habita, cum

*Oratoria  
Professo-  
res.*

M 2

sol-



sollemni ritu novum hoc aperiretur Lyceum III. Kalend. Jul.  
cio 15 LXXV, inserta est Libro, Norimbergæ A. 1576 publicè ty-  
pis exscripto, cui titulus: *Introductio novæ Scholæ Altdorfianæ No-  
rimbergensium*. De eruditione Viri testantur edita ac relicta ab eo-  
dem scripta, qualia sunt: Partitiones Orationum Ciceronis, Libri  
quatuor de Grammaticorum figuris tam singulorum quàm con-  
structorum verborum, ac de Periodis, unus de Vitiis Orationis,  
ac tres de Ratione legendi, explicandi & scribendi Epistolas.  
Quibus hisce posterioribus præfationem Joh. Sturmii, Orator  
celebratissimus, præfixit, inter alia hæc continentem verba: *Lau-  
de dignus est Erythraeus, qui, quæ præceptis traduntur breviter atq;  
obscurè, ea ipse solvendo demonstrat explicatè atq; apertè, doctus & in-  
structus Aristotelis, Ciceronis, & Hermogenis, Græcorumq; doctrinis.*  
GEORGIVS autem GLACIANVS, patriâ Vilseccensis, munus  
heic docendi suscepit & auspicatus est prid. Non. Jul. 1575, Ora-  
tione tersa, quam legere pariter licet in modò dicto *Introductio-  
nis* libro. Successit Erythraeo in honorifica tradendi artem  
Oratoriam provincia; & Philosophiæ Magister renunciatus  
est hac ipsa in Academia A. 1581, die Apostolis Petro & Paulo  
sacra. Qua prima in panegyri Philosophica Promotor id tem-  
poris ac Decanus, Vir Nobilissimus, Joh. Busereut, Jctus, his ver-  
bis publicè suum alloquebatur Candidatum: *Et tu, Dn. M. Georg.  
Glaciane, Oratoriæ facultatis Professor eloquentissime, qui eloquen-  
tissimos Oratores nostro seculo, ut audivisti, ita eos imitaris; Stur-  
mii præsertim nostrum, quem ambo præceptorem & colimus & ob-  
servamus: nihil dico de summo illo Matthæo Dressero, nihil de Ery-  
thraeo pie defuncto, nihil de aliis, quos alibi habuisti præceptores &c.*  
Obiit Vir de juventute insigniter meritis A. C. 1607, ætatis  
octavo & quinquagesimo. Præter Par hoc nobile, inter Rhe-  
tores primos Clarissimosq; Academia nostra habuit M. GEOR-  
GIVM MAVRICIVM, Wittebergensem. Natus is est A. C.  
1570, d. 20 Maji. Adolescens adhuc, Patre, tum temporis Scho-  
læ Stirensis in Austria superiore Rectore, usus est Præceptore;  
ab eodemq; (quod rara contigit felicitate) bene vivendi ratio-  
nem hausit, à quo & vitam acceperat. Crescente cum ætate  
judicio, in Academiam hanc se contulit, anno prioris seculi  
octavo & octogesimo, Rectore M. *Matthia Bergio*, cui privatim  
à Pa-



à Patre commendatus fuerat, publicisq; Doctoribus sedulam  
dedit operam, & per omnes liberalium disciplinarum campos  
transiens, ea sibi decerpenda & colligenda putavit, quæ ad  
usum adminiculo sibi fore prospiciebat. Post illa, cum virtus  
nunquam sui cultorem in occulto latere & situm contrahere  
sinat, anno nonagesimo secundo, Decano Viro Excellentis-  
simo, *D. Philippo Scherbio*, Magisterii insignibus fuit decoratus;  
tandemq; missione e classibus, in quibus per septem ac vigin-  
ti, & quod excedit, annos, summa dexteritate, pari fide, de-  
fudaverat, impetratâ, ad publicam professionem anno hujus  
seculi vigesimo tertio sibi demandatam, maximo cum Acade-  
miæ applausu accessit. Rector denique Vniversitatis concor-  
dibus omnium suffragiis d. 29 Jun. anni trigesimi primî ele-  
ctus, provinciam illam in mediis bellorum turbis non forti-  
ter minus quam prudenter administravit, donec oneri suc-  
cumbens, die 5 Decembr. in febrem incidit continuam, quæ  
illi tandem vitæ finem attulit. Ex Oratoribus porro nostra  
fovit Palæocomæ *MICHAELEM VIRDVNGVM*, Virum  
cum cæteris omnibus, tum eruditionis & scientiæ laude cla-  
rissimum; quem prima gremio & sinu suo excepit Kittinga  
Franconiæ, anno superioris seculi quinto & septuagesimo, ho-  
nestissima gente editum. Vt taceamus Propatruum ejus *Joh.  
Virdungum*, Mathematicum Clarissimum, & à Divo *CAROLO V*  
Imp. iis insignibus, quibus & *noster* usus est, donatum; Patrem ha-  
buit *Matthæum Virdungum*, Senatorem Kittingensem, Fratres  
*Wilhelmum* Prætorem ibidem, & *Paulum* Medicum ac Mathe-  
maticum *Berneggero* laudatum. Noster verò *Michael* jactis  
in patria pietatis ac bonarum artium fundamentis, Argentinam  
primò studiorum causa migravit, in quo Musarum domicilio,  
juris civilis disciplinæ, politiorum literaturam, antiquitatis &  
recentioris historiæ thesaurum, eloquentiæ potentiam, amœ-  
nitates deniq; Poëtarum, summa junxit felicitate. Inde Jenam  
concessit, ubi sub finem seculi, anno nonagesimo septimo, ni-  
hil tale ambiens, ab amplissimæ dignitatis Viro, *Nicolao Reusne-  
ro*, velut ingenii & poëseos palmam meritis, more majorum,  
laureâ coronatus est. Jenâ discedens in Bohemiam & Mora-  
viam abiit, datus Ephorus magnæ indolis Filio, Illustris Dn. Si-



gismundi L.B. à Smerfiz, quem variis negotiis districtum, curâ ac diligente filii informatione admodum sublevavit. Elapso ferè biennio, honestissimè dimissus, Norimbergam venit, Inclytæ Reipublicæ studia sua modestè obtulit, & commendatione Dnn. Professorum, anno seculi nostri quinto, mense Januario, Eloquentiæ P. P. nuncupatus est. O quam erat Virdungus noster eloquens! in dicendo qui vigor? qui stimuli? quæ majestas gravitasq;? Tam enim apertè, quæ prima virtus est eloquentiæ, sensa mentis explicabat, tam distinctè, tam aptè, tam ornatè cuncta eloquebatur, ut in ejus facie faciem eloquentiæ, vim in pectore, suavitatem in ore, totoq; in corpore totam integramq; eloquentiam habitare, eum audientibus fuerit visum. Atq; uti melleus Orator, ita excellens erat Historicus pariter ac Politicus: prout infra, loco suo, pluribus sum dicturus. Nunc enim ad PHILIPPVM CAROLVM, Neoburgicum, mea sese convertit oratio; qui, licet in Pontificiorum castra tandem transierit, laude tamen sua minimè est defraudandus, ob præclaram in Philologicis eruditionem atq; doctrinam, quam satis superq; comprobant egregia ingenii ejus monumenta. Reliquit enim Varias lectiones, Novarum Lectionum Prodromum, Trigam Solœcismorum Politicorum, Sceptum Judæ seu Dissertationem de Rep. Ebraeorum, Gustum Philologiæ sacræ, quo sacratissima Passionis Dominicæ Historia ex Ritibus antiquis illustratur, Orationem de Criticis, Animadversiones in A. Gellium & Curtium, ac plura alia; diemq; suum in Austria obiit A. 1639. Sed nec longiore silentio præterire possum M. JACOBVM TYDÆVM, Virum græcè & latinè doctissimum, qui editus in lucem Pyrizii Pomeraniæ, anno à Nato Christo 1572, d. 25 Julii, parentibus honestis illis quidem at pauperculis, cum adversaria studiorum, paupertate, ab ipso ineuntis ætatis principio est conflictatus; quam tamen patronorum beneficentia sublevatus vicit, adeoq; superior evasit illò Alciati:

*Ingenio poteram superas evadere ad arces;  
me nisi paupertas invida deprimeret.*

Tubingensem inprimis Vniversitatem studiorum! causâ tribus adiit vicibus, in qua tandem supremos in Philosophia honores



res est adeptus. In Austriam inde digressus varias in illa regione obiit functiones scholasticas, usque dum anno seculi quarto & vigesimo, edictō Cæsareō per omnem Austriam promulgatō, cuncti ecclesiarum & scholarum orthodoxarum Doctores & Magistri, domo, patria, fortunisq; omnibus carere, & post diem inde octavum, solum vertere iussi sunt. Norimbergam igitur anno sequente delatus, Nobilissimis ac Prudentissimis *Dm. Scholaribus* operam suam obtulit, præstitoq; Senatui Academico juramento, *M. Jacobo Brunoni* in classe secunda Gymnasii cum Universitate tunc conjuncti, successit; aŕo autē seculi vigesimo octavo primæ classi præfectus, & aŕo 33 ad Professionē Oratorię & Poëtices admotus est; quam non sine singulari industria, *Φιλοπνία* & *Φιλανθρωπία* ad finem usque vitæ, quem nactus est A. C. 1655, administravit. In cujus piē defuncti locum anno sequente subrogatus est JOH. CONRADVS HEDENVVS, Vir insigni eloquentia & orationis sŕavitare singulari ornatus; de quo cum ex hoc splendidissimo ad dicendum loco haud ita pridem plura laude digna enarrata fuisse recorder, prolixius nunc ea repetere animus non est; præsertim cum nos jam ad se vocare videatur dignationis, dum viveret, amplissimæ, magnæq; Vir eruditionis, *M. CHRISTOPHORVS MOLITOR*, qui natales accepit in Incluta Noriberga, die XI Junii, anno 1627; ibidemq; postea singulari felicitate nactus est optimos studiorum moderatores, *Georg. Schröderum*, *Job. Riednerum*, & *Job. Gravium*; ac porrō hic Altdorfii Viros Excellentissimos, *Job. Paulum Felwingerum*, *Christ. Adam. Rupertum*, *Theodoricum Hackspanium*; in cujus postremi ædes, impetrata prius præclara Magisterii dignitate, receptus, per triennium & amplius, ab optimi hospitis viva voce & familiari consortio pependit; tandem verō *Johannis Buxtorfii*, Ebraicē-doctorum illo tempore facilē principis, salutandi gratia, Basileam contendere decrevit; in itinere autem Tubingæ, Viri eruditionis & meritorum splendore eminentissimi, *Dn. Thomæ Lansii*, blandis alloquiis & monitis detentus, in formandis studiis Ethicis, Politicis, Historicis, Juvenum quorundam summo loco natorum adprimeq; nobilium, quos inter extitere Illustrissimi Comites ab Oettingen, Comites à Castell, Barones à Regal, aliiq; , fidelem præstitit operam.

Post

Vid. sup. in  
Orat. de  
Theol.  
Altdorf.  
pag. 36.



Græcæ Lin-  
guæ Pro-  
fessores.

Post exactum ibi sexennium & quod excurrit, ad patrios Lares famam singularis eruditionis & acris diligentiae attulit; quâ permoti PROCERES NORIMB. præter Orientalium lingvarum, tandem etiam Eloquentiae Professionem benignissimè ei demandarunt: quam spartam honorificam ita ornavit, ut auditores in sui admirationem rapuerit, ac B. Dilberri, magni amici sui, parentatione doctissima laudator extiterit eloquentissimus. Sed jam tempus est, ut ad Græcam linguam, quæ omnium artium & doctrinarum vehiculum non immeritò appellatur, mea dilabatur oratio; quam hoc in Athenæo optima & facillima ratione primus omnium interpretatus est M. GEORGIUS GLACIANVS jam antè à nobis laudatus; cuius Epitaphium heic modò liceat inserere: *Sub hoc tumulo pie defunctus vitam beatiorē expectat olim insigni eruditione & rerum usu clarus, Dn. M. Georgius Glacianus, Vilsseccensis, & Academiæ hujus Altdorfinae Græcæ Linguae quondam Professor publicus. Obiit in vera Filii Dei invocatione I. Aug. hora XII meridiana, Anno Christi 1607, ætatis verò 58; cuius memoria jam est in benedictione. Hoc monumentum, in amoris & honoris testimonium & orbitatis solatium, relicta vidua, Catharina Heldmennin, poni & imprimi curavit Anno — Mense — Die &c. Glacianum secutus est HEINRICVS RISIVS, Wertheimio-Francus, natus Anno 1531. Hic artium optimarum fundamentis in patria schola jactis, præclaram in omni humaniore literatura eruditionem, quam ex institutione summorum virorum, cum primis verò Clarissimorum duorum Germaniæ luminum, Philippi Melanchthonis, & Joh. Sturmii, consecutus erat, superstruxit. Quorum illius quidem scholas in Wittebergeni Academia, per quadriennium, hujus verò in Argentineni, per triennium, sectatus est. Equibus postquam exiverat, insignis, quam ex tantorum virorum ore acceperat, eruditionis copiam, vicissim cum juventute artibus liberalibus dedita, diversis in locis, Norimbergæ cum primis, summa fide ac diligentia, incredibiliq; scholasticorum laborum tolerantia, communicavit. Postea verò ab Inclyto Senatu Norimb. in Academiam hanc missus, ac primum quidem Viri longè doctissimi Hieronymi Wolffii exemplo, regendis Alumnorum Noricorum studiis præpositus, deinde verò, pluribus in officio illo exactis annis, publicorum Lycei*



Lycei hujus Professorum ordini adscitus, Homeri potissimum publicè interpretandi provinciam sortitus est. Qua in muneris functione quanta dexteritate ac fide versatus sit, non solum ex Clarissimorum Virorum testimonio constat, è quibus celebris quidam Theologus, *Risium*, scribit, *olim præceptorem habui, Homeri Iliada privatim interpretantem: audivisses captum oculis omnia Homeri recitare ad unguem* &c. sed ex eo etiam, quod A. 1585 Amplissimi Ordinis Philosophici jussu & voluntate, Magisterii honor, sine omni sumtu & expensa, Examinis etiam tam publici quàm privati necessitate ipsi remissa, in testimonium eruditionis haud quaquam proletariæ, laborumq; & studiorum, quibus juventutem jam tum sibi demeruerat, compensationem, ultrò ipsi delatus, & inter novem doctissimos competitores, primus illi locus tributus fuerit. Mortuus est anno ætatis octavo & septuagesimo, seculi hujus nono. Hujus vicem supplavit M. GEORGIUS QUECCIUS, Norimbergensis, qui anno salutis 1561, hoc in vitæ theatrum prodiit, ex eoq; anno hujus seculi vigesimo octavo ad æterna beatorum gaudia læto exiit animo, postquam ultra quatuor annorum decades partim classico, partim publicè profitendi munere, summo cum studiosorum fructu summaq; cum ingenii sui celebritate, perfunctus esset. Ordinis me jam ducit linea ad excellentis doctrinæ Virum, M. JACOBVM BRVNONEM, cui professio publica Græcæ Linguae in locum *Queccii* piè defuncti à Nobilissimis Vniversitatis nostræ Patronis fuit concredita. Celebrem huncce virum ducatur Megaloburgico acceptum ferimus, in quo non modò vitalem spiritum A. 1594 hausit, sed & postea literarum amorem imbibit; quò impulsus ad præclarissimarum rerum cognitionem adipiscendam, omnem sibi diligentiam suscipiendam, omnem laborem perferendum, omnem deniq; aliarum rerum curam ex animo ejiciendam existimavit, studiorumq; suorum cursum Rostochii, Coburgi, & hîc locorum, eò perduxit, ut anno seculi vigesimo primo gradum Magisterii, Decano Viro Clarissimo, *Georg. Queccio*, nullo impetrârit negotio, ac tanta quidem cum existimatione, ut anno vix dum elapso Inspectio Alumnorum Noricorum, & anno proximè insequente, Vicariatus in Gymnasii classe ipsi demandatus fuerit; quem anno quarto post excepit Professio publica, cui

N

per



per omnem deinceps vitam ita præfuit, uti non modò sibi multum gloriæ & nominis per orbem literarium paraverit, sed & academiæ ipsi ingens ornamentum ac decus conciliârit. Pro quo mortuo loquantur Notæ in Agapetum de Officio boni Principis accuratissimæ, quas post obitum ejus edi curavit Filius Excellentissimus *Jacobus Pancratius*; in cujus manibus etiam nunc hærent Exempla Virtutum & Vitiæ in Illustribus hominibus Diisq; quorum meminit *Homerus*; *Dodecas Epistolarum SS. Græco-Latinarum*, cum totidem Epigrammatibus super Locos Theologicos, *Analysis & Loci Communes in Epistolam Pauli ad Titum*; aliæq; plura scripta à Viro Eruditissimo relicta, quorum infra pariter fiet mentio. Porro cum tanta sit *Linguarum Orientalium*, imprimis *Ebrææ*, non solum jucunditas, verum etiam necessitas, majestas & utilitas, ut qui *Biblia Ebræa* legere, is *DEVM* ipsum, *Patriarchas & Prophetas* audire videatur docentes; jure meritoq; *Patres patriæ Prudentissimi*, ad eam ritè excolendam & propagandam, alios ex aliis adsciverunt *Viros Ebraicis literis pulchrè eruditos*; quorum agmen duxit *M. GEORGIVS PFALERVS*, *Norimbergenfis*, *Diaconus Ecclesiæ hujus & Professor Theologiæ ac Linguae Sanctæ*; quem *Decanus D. Job. Busereut* in Actu Promotionis Philosophicæ his compellavit verbis: *Quia tu, Reverende Dn. M. Georgi Pfalere, professione Theologus es; natus patre Theologo, Reverendo Dn. M. Leonhardo Pfalero*, (quem honoris & observantiæ causa nomino) viro bono, honesto, moderato, publicæ tranquillitatis studiosissimo, literarumq; elegantia & doctrina rara prædito, præclarè etiam de Rep. & Ecclesiâ *Norimb. merito*: quem ob hæc ipsa animi & ingenii bona, singulari cura, lumen illud *Germaniæ, Philippus Melanchthon sanctæ memoriæ, Nobili Viro Dn. Christophoro à Knobelsdorf*, locum tenenti in regimine *Onoldino*, diligenter anno 1545 commendavit: quoniam, inquam, professione *Theologus es*, sanctæq; Linguae in hac *Academia nostra* interpret peritissimus; dic nobis, quantum fieri potest, breviter & perspicuè, quomodo dictum *Propheta Esaiæ Cap. 1.* ubi dicit: *Convertimini, si peccata vestra fuerint ut coccinum, & ut vermiculus, eritis candidi sicuti nix & lana; intelligendum sit!* Sc. Pfalerum excepit Vir maxime Reverendus & Nobilissimus, *Edo HILDERICVS de Varel*, Nobilis *Jeverensis*, *S. Theol. & Linguarum Orient. Doctor*; nec non

M. DA.

*Lingv.*  
*Orient.*  
*Professo-*  
*res.*

*Vid. supr.*  
*Orat. de*  
*Theolog.*  
*Alsdorf.*  
*pag. 23.*

*De Hilde-*  
*rico vid.*  
*supr. in*



M. DANIEL TALIVS, Erfurtenſis, Extraordinarius S. Linguae *Orat. de*  
 Profeſſor; de quibus prolixius verba facerem ac lubens, niſi oratio- *Theol.*  
 nem meam ad ſe raperet & quaſi abſorberet Vir admiranda re- *Allied. pag.*  
 rum artiumq; ſcientia ad invidiam uſque ornatus, M. DANIEL *23, 24.*  
 SCHWENTER VS. Cui anno redempti mundi 1685, menſe Fe-  
 bruario, vivendi exordium dedit Norimberga, omnium Imperii  
 civitatum ſplendidiffima; ubi à pædagogis intra privatos lares  
 primis inſtitutus elementis, cum vix pueritiam evaſiſſet, publi-  
 cæ commiſſus inſtitutioni, & Solisbacum, nobile tum temporis  
 bonarum artium emporium, ab optimis parentibus fuit ablega-  
 tus; quo in loco, non Latina ſolum ſed Græca etiam lingua ſibi  
 jam conciliata, ipſius Spiritus S. idiomatis miro teneri cœpit a-  
 more: qua quidem in re virum conſecutus eſt celeberrimum, &  
 immenſa multifariarum linguarum ſcientia præclariffimum,  
*Eliam Hutterum*, à quo ad pleniorẽ linguæ ſanctiſſimæ cog-  
 nitionem eſt perductus. Inde diſcedens Altdorſium conceſſit, &  
 linguæ ſacræ alias inſuper, Chaldaicam, Syriacam, Arabicam,  
 cæterasq; artes liberaliores addidit, in quibus brevi temporis ſpa-  
 tio tantos effecit proceſſus, ut honoribus magnis dignus ab om-  
 nibus judicaretur. Anno igitur 1608, in locum fugitivi *De hoc*  
*Conradi Ottonis* ſuſſectus, ſumma non tantum reverentia ſuſce- *Ottone vid.*  
 pit publicam S. Linguae profeſſionem, ſed & tanta cura & indu- *ſupr. p. 12.*  
 ſtria elaboratam dedit & ornatam, ut elapſis aliquot annis, lin-  
 guas alias, easq; Orientales præcipuas, profiteri ab Incluto REIP.  
 NORIMB. Senatu juberetur. Minimè tamen hoc ſatis erat;  
 majores tanta virtus honores ſibi poſcebat, & qui Ebraicam,  
 Chaldaicam, Syriacam publicè docebat linguas, publico etiam  
 decorandus erat præmio; jubente igitur eodem Senatu Ampliſſi-  
 mo, trium dictarum linguarum Poëta, à Magnifico tum Vniver-  
 ſitatis Pro-Cancellario, DN. JOH. CHRISTOPHORO OELHA-  
 FIO publicè proclamatus & renunciatus eſt anno 1629. Neque  
 verò ſine præclariffimis hoc in ſtudiorum genere literarum mo-  
 numentis deceſſit Schwenterus noſter: reliquit enim Manipu-  
 lum linguæ ſanctæ, de Talmud Judæorum orationem, de Pro-  
 nunciatione Conſonantium Ebraicarum tractatum ſingularem,  
 aliaq; plura ſubacti ingenii ſui documenta, quæ inferius à me re-  
 cenſebuntur. Nunc enim THEODORICVM HACKSPA-  
 N 2 NIVM



Supr. pag.  
34. 35.

Historia-  
rum Pro-  
fessores.

Vid. supr.  
pag. 42. 43.

NIVM commendandum existimo: qui maximo animo & indefesso studio Ebræam Linguasq; alias Orientales ita ab ipsa adolescentia tractavit usque, ut eam cognitionem doctrinamq; sibi paraverit, quæ quàm paucissimos æquales, vix quenquam superiorem habere videretur. Sed cum laudes Viri omni laude majoris, in Oratione de *Theologis*, fuerint decantatæ, nolo hic apponere cramben bis coctam. Neque CHRISTOPHORI etiam MOLITORIS, qui beatè defuncto *Hackspanio*, Præceptori quondam & Hospiti suo successor fuit datus, summam in hoc literarum genere eruditionem satis cum laudare valeam, hoc solum, quod superius omiseram, addere nunc liceat, isthunc suis charum, academiæ desiderandum, omnibus lugendum, fufis ardentissimis ad Servatorem suum precibus, d. 12 Junii, anno seculi septuagesimo quarto, placidè obdormivisse. Verùm ne abutar patientia vestra, Domini & Auditores, qua me attentissimis animis summa benevolentia adhuc attendistis, veniam ad *Historiarum* Professores longè Clarissimos, quos inter primus occurrit JOHANNES THOMAS FREIGIVS, Vir & Juris & historiarum & antiquitatis peritissimus; cujus laudes quoniam ab amico quondam studiorumq; socio singulariter dilecto, ex hoc ipso jam loco, cum Altdorfina Jurisprudentiæ Lumina prædicarentur, sunt recensitæ, verbum non amplius addam; video enim orationem meam in longum nimis excrecere. Proximus ab eo locus debetur CHRISTOPHORO COLERO, Franco, itidem Jcto, qui tamen Musis Noricis maturè vale dixit, annoq; ævi nostri quarto in Austria decessit, relictis Parergis, & Epistola de Studio Politico adornando, scripta ad Generosum Juvenem Stanislaum Zelenium Vitellium, de Zelanka &c Anno 1601. Edidit hanc Epistolam emendatiorem H. Conringius, unâ cum Gaspar. Scioppii Pædia Politices, & Gabr. Naudæi Bibliographia Politica, illamq; in Præfatione *elegantem ac nitidam* appellat. Coleri in locum suffectus est ARNOLDVS CLAPMARIUS, Bremen-sis, qui cum literis supra omnium expectationem vacasset, cum Germaniam, Angliam, Belgium, aliasq; regiones perlustrasset, cum res militares miles ipse didicisset, & jam maturos fructus ostenderet, ac operam suam florentissimæ Reipubl. & Academiæ Norimbergensi per quadriennium devovisset; cum denique erudi-



eruditionem suam, publicis ingenii monumentis, ad invidiam usque testatam fecisset, in ipso ætatis rerumq; suarum flore, anno videlicet ætatis trigesimo primo, hujus verò seculi quarto, exstinctus, omnibus eruditis dolorem, Parenti luctum, fratribus desolatis æternum desiderium, conditionis humanæ & omnium virtutum luculentissimum reliquit exemplum. Quæ de ipso pæne omnia deprompta sunt ex Epitaphio ejus, libro de Arcanis Rerump. præfixo; quod præstantissimum ingenii ipsius monumentum, juxta cum aliis, mox à me commendabitur prolixius. Jam verò in reprehensionem incurrerem justissimam, si B. Clapmarii successorem silentio diutius transmitterem; is est MICHAEL VIRDVNGVS, jam supra inter Rhetores laudatus, Pag. 93.  
94.  
 Vir in politiore literatura peritissimus, Historiarum per complures annos Professor maximè industrius; qui quoties historiæ docendæ gratiâ cathedram adscendit, auditores suos, ad venustissimos scriptores & politissimos, ut bellicas ex iis & togatas artes, vitæ humanæ varias mutationes, imperiorum ortus, progressus & occasus, prudentiam deniq; civilem, ipso usu atque experientia addiscerent, consilio semper profuturo deduxit. Nunc de Te reliquum est ut dicam, CHRISTOPHORE ADAME RVPORTE, Poëta felicissime, Orator disertissime, Historice planè insignis! Vtinam verò incredibili inusitatæque virtuti tuæ, utinam, inquam, par à me adferri posset orationis genus! Luce potitus es anno recuperatæ salutis 1612, mense Decembri, in nobilissima hac Altdorfina: Majores ac Parentes habuisti & genere & meritis commendabiles, à quibus optimè, quod ajunt, à serperastris educatus, in schola Wertheimensi solida literarum fundamenta posuisti, & progressus in studiis fecisti non contemnendos. Præmatura autem morte erepto Parente, Musas tuas ad tumultum suum pleno gradu festinare volentes, ab interitu vindicavit benignior fortuna, operâ potissimum Excellentissimi *Cass. Hoffmanni*, P. P. Celebratissimi, victum non minùs quàm amictum suppeditantis, &, quod palmarium est, optimos quosq; Præceptorum tibi præficientis. Cum verò nihil aliud studio haberes, nihil aliud dies noctesque curares ac cogitares, quàm quo pacto Parentis Avorumque in Juris Civilis intelligentia, simillimus posses evadere; aliò tamen deflexere animum volu-

N 3

ptates



ptates Historiæ; & humanioris literaturæ deliciæ. In iis igitur summa animi contentione es versatus, consilio atq; opera Cl. *Virungi* magis magisque inflammatus; qui lætus occasionem demerendi rem literariam sibi dari, singulari te affectu complexus, literisq; ad Magnificum hujus Universitatis Procancellarium, Dn. D. GEORG. RICHTERVM, te inscio, exaratis, ingenuè professus est, si optio sibi daretur, neminem se alium successorē nominaturum, nisi *Rupertum*. Nec verò spes hæc decollavit. Cum enim decurso vitæ spatio *Virungus* mortem obiisset, adspirante DEO, Cl. Præceptoris, Patris & Amici consensu cathedra, Professionis spartam ab Inclyto DNN. SCHOLARCHA RVM Ordine sollenniter in te collatam, per novennium ita exornasti, ut non studiosorum modò oculos animosq; in te converteres, verum etiam summos per Germaniam atque Italiam viros tibi conciliares, qui honestissimos conatus tuos fide singulari adjuverunt. Hos inter fuere præcipui *Thomas Reinesius*, (cujus exstant Epistolæ ad D. Casp. Hoffmannum & te Christ. Ad. Rupertum perscriptæ, atque ab his vicissim acceptæ) *Petrus Servius*, *Marcus Aurelius Severinus*, *Joh. Baptista Dominus*, *Casp. Facius*, *Joh. Freinsbemi*, & alii. Verum, ut est fallax hominum spes fragilisque fortuna, quæ cum maxime splendet, frangitur, maligna quædam & omnem fallens Medicorum industriam febris, vires tuas, Vir immortalitate dignissime, ita paulatim attrivit & labefactavit, ut ad postremum inevitabilem tibi attulerit ex hac vita migrandi necessitatem: mortem ergo cum vita commutasti, completo anno ætatis quinto & trigésimo, mensibus duobus. Vivis tamen vivesq; semper in tot tantisq; ingenii tui foetibus elegantissimis. Tuis enim vigiliis, tuis nocturnis & immodicis lucubrationibus, Nobilitatis Romanæ ruinam detectam, Tacitum quoque & Pomponium de Origine Juris præclare explicatum, acceptum ferimus. Tua sedula cura Besoldianam Synopsin perspicue enucleavit, quam Dn. *Christ. Arnoldus*, Polyhistor & Philologus Clarissimus, cum supplemento edidit Noribergæ. A te Crispum Sallustium Observationibus Civilibus, Moralibus & Grammatico-philologicis illustratum accepimus; sed varia antiquorum Numismatum familiarumq; Romanarum monumenta, præpropera tua morte,

imper.



imperfecta prohdolor! atq; inchoata manserunt: ut de Observationibus tuis ad Florum politicis, de Dissertationibus ad Val. Maximum & Vellejum Paterculum, de Mercurio denique Epistolari & Oratore Historico, hac vice taceam. Tua interim memoria & nomen nobiscum semper versabitur, atque in literarum aternitate perpetuo durabit! Sed ego captus dulcedine quadam de hoc tanto viro verba faciendi non sentio tempus effluere. Progredior ergo ad divinam *Poëticen*, *Poëticae Professores.* quam publicè hîc interpretati sunt Viri in intelligendis penfitandisque Poëtarum scriptis præcellentes, M. MICHAEL PICCARTVS, qui reliquit nobis Carminum Latinorum Promulsidem; ejusq; successor, M. GEORGIUS MAVRICIVS; quorum & in docendo dexteritatem, & in pangendis carminibus ivavitatem si non superavit, at certè æquavit supra quoq; laudatus M. JAC. TYDÆVS, quem vel ex tempore mira facilitate struxisse poëmata Græca & Latina; multis adhuc est notissimum. Post hujus excessum, explicandorum Poëtarum provincia, anno ævi nostri 55, fuit commissâ Viro Excellentissimo M. JO. CONRADO DÛRRIO, qui functionem hanc summa fide, cura & felicitate sustinuit, donec anno 57, contra spem omnè atq; opinionem, misso Poëticen docendi munere, in cathedram Theologicam legitimè à Lycei hujus Patronis vocatus & translatus est. Sed jam ad *Logicen* festinat animus; *Logice Professores.* cujus disciplinæ præceptis studiosorum juvenum ingenia ut imbuerent, nullis unquam laboribus, nullis vigiliis, nulli deniq; rei pepercerunt, Viri itidem Clarissimi; è quibus primo loco comemorandus est PHILIPPVS SCHERBIVS, Episcopo Cellensis Helvetius, Phil. *De Scherbio vid. supr. pag. 66. 67.* & Med. D. dum vixit, Excellentissimus, qui anno salutis 1586, mense Septembri, ad Vniversitatem nostram accedens, non Medicinæ tantum, sed & Logices & Metaphysices Professioni, consentientissimis Nutritiorum almæ hujus benignissimorum suffragiis, fuit admotus; cui per plurimorum annorum decursum, tanta solertia præfuit, ut præter ordinarios labores, varii generis disputationibus philosophicis, thesibusq; Logicis, auditores suos reddiderit beatiores. Excellentem quoq; imò singularem, quâ Scherbivus noster claruit, rerum politicarum notitiam, factis luculenter demonstrant Discursus illius politici in Aristotelis



lis de Rep. libros, quibus, inde usque ab Aristotelis temporibus, nihil unquam nec brevitate concinnius, nec perspicuitate dilucidius, nec claritate illustrius, nec ad rem, quæ tractatur, aptius & congruentius in hosce libros dictum vel scriptum fuisse, non mea quidem, sed viro- rum summo judicio summaque doctrina prædicatorum est sententia. Ingratissimis autem ingratiore effemus, si nobilem illum Phi- losophum MICH. PICCARTVM, superius *ὡς ἐν πρόδω* inter Poëtas nominatum tantum, hic silentio sepeliremus; qui lucis hac usura primum uti cœpit in præcellentissima & præpoten- ti Norimbergensium urbe, A. C. 1574, die 29 Septembris, edi- tus piis & honestis parentibus, à quibus indolem ad optima quæque factam feliciter adeptus est; quam ita postmodum de- monstravit, ut anno ætatis decimo quinto gradum Baccalau- reatus obtinuerit, post biennium verò summis in Philosophia honoribus condecoratus fuerit. Anno superioris seculi ultimo, ob ingenii acumen, & admirandam in docendo dexteritatem, publicæ Logices Professioni præfectus, demandato sibi mune- ri tanto labore & ardore satisfecit, ut nullus quisquam, nisi qui apertissimæ veritati in os contradicere voluerit, de ejus vel negligentia conqueri, vel acumine pariter & perspicuitate du- bitare potuerit. Excellentissimo huic Philosopho, in profes- sione Logica cum Metaphysica conjungenda, successit JOH. KOBIVS, Hilperhusâ-Francus; qui ne honori isti competen- tia deessent insignia, secundò professionis annò, qui erat seculi hujus primus & vigesimus, Philosophiæ Magistri titulo con- decoratus, testimoniò non tam eruditionis (hac enim nisi prius fuisset conspicuus, in Professorum ordinem haud fuisset cooptatus) quàm modestiæ; ne ea ornamenta, quibus alii eum ad locum, in quem prius ascenderat, aditum sibi parant, minoris, quàm reverà essent, facere videretur. Locum autem adeptus inter competitores novendecim primum, di- gnus splendidiore, si altior illis in carceribus datus tunc fuis- set. Postea verò, quàm celebrem tum se tum totam Vniversita- tem pulcherrima philosophandi methodo summaque docendi dex- teritate reddiderit, amplius est, quàm ut orationis hujusce an- gustiis includi possit. Loquantur pro me egregiæ illius Dispu- tationes Philosophicæ sparsim foras editæ, illudque majus hono- rum, quod successu temporis conscendit, incrementum. Anno enim

*Vid. infr.  
de Piccar-  
to pl.*



enim 1637 in Doctorem Juris promotus, ipsique professio Regularum Juris extra ordinem cum Logica ac Metaphysica conjungenda concedita est; quâ usque in annum eum perfunctus, quem vacuum in Juridica, ut vocant, Facultate fecerat obitus Beati D. *Ægidii Agricole*, Antecessoris Primarii. Proinde à professione Philosophica & Juridica illa extraordinaria liberatus Kobius noster, in Jctorum Ordinem planè ac plenè adscitus, Institutionum Impp Professor factus est A. C. 1645. Quo in munere si documenta nulla dedisset alia, (dedit autem plurima) quanti esset in Philosophia sapere, & Artes humaniores sublimioribus Facultatibus præmittere, vel unicum hoc hujus Viri exemplum posset demonstrare

*De Kobio vid. etiam sup. pag. 57. & de Felvyngero successore infr. in Parentat.*

Ad alteram orationis meæ partem jam accedo, in qua disciplinarum realium philosophicarum Professores in hoc sapientiae sacrario etiam nunc post fata celeberrimos me in adpectum lucemque prolaturum à principio promisi; quapropter vos oro atque obsecro, Auditores ordinum omnium Honoratissimi, ut quales vos adhuc præbuisstis, tales & deinceps mihi impertiatis. Illud autem omnino certum est, inter disciplinas practicas primum locum obtinere *Ethices*, quâ nihil ab illo rerum Parente vel uberius, vel florentius, vel præstabilius vitæ nostræ datum est. Dies autem me deficeret, si eruditissimorum virorum, qui tradendis *Ethices* præceptis hoc in virtutis & literarum domicilio operam impenderunt sedulam, laudes enumerare instituerem. E quibus primus occurrit M. MATTHIAS BERGIVS, Brunsvicensis, cujus fidei anno superioris seculi octogesimo secundo, publica philosophiæ moralis professio fuit commissa; quam docendi spartam ad annum usque secundum & nonagesimum, qui ultimus illi & professionis & vitæ fuit, summo ornavit ardore & fidelitate; relictis aliquot de Religione libris, quibus, si edantur, plurimos hac ætate *Theologorum errores correctum iri*, Casp. Scioppius lib. IV. Spect. Lect. judicavit; & Opere Stagiritæ Nicomachio, adjecta ad contextum Græcum interpretatione Latina Dionysii Lambini, sed innumeris locis interpolata, ac parte Libri noni cum decimo toto, proprio Marte versa, nitidè curateq; edito. OBER-TVM porrò GIPHANIVM, Jctum eloquentissimum, de quo

O

fatius



*De Giph-*  
*nio vid.*  
*supr. pag.*  
*44. & in.*  
*Additam.*  
*infr.*

fatius est silere, quàm pauca dicere, præter ordinariam Pandectarum, Ethices quoq; professionem hac in Vniversitate gessisse, publica testantur monumenta. Viris hisce laudatis accensendus omnino est M. GEORGIUS QUECCIUS, qui totam, quam apud nos exegit ætatem, auditorum suorum commodis ita dedicavit, ut mentes eorum pietate rerumq; pulcherrimarum cognitione imbueret, poliret mores, efficeret deniq;, ut secum ipsi honestè viventes, essent ornamento ac voluptati suis, emolumento Reipublicæ. Nec verò docuit solum, sed & scripsit egregiè Vir Clarissimus; cujus rei fidem nobis faciunt multis lucubrationibus commentatæ Disputationes ejus, atq; Orationes quæ uno continentur volumine. Hujus, in hoc etiam professionis genere, vestigia anxio pressit pede, antè magna cum laude commemoratus M. JACOBVS BRVNO, vir plurimis in nostram Academiam meritis insignis, quorum præstantiam, non dicam exæquare dicendo, sed assequi cogitando difficile atq; arduum sit. Quàm speciatim curæ cordiq; ipsi fuerit propagandum philosophiæ moralis studium, præter innumeras, quas habuit, Disputationes Ethicas, ostendere faciliè possunt scripta alia, quæ reliquit, eruditissima, ut Speculum prudentiæ moralis Aristotelicæ, & quæ adhuc velut thesauri absconditi in Bibliotheca Filii Excellentissimi latent, Commentarius in Aristotelis libros Nicomachios cum Dubiis, Notæ in Officia Ciceronis cum usu morali, Comparatio denique Ethices Christianæ & Aristotelicæ. Post viri hujus optimi mortem ad professionem Ethicam, anno ævi nostri quarto & quinquagesimo, admotus est

*Vid. supr.*  
*pag. 36.*  
*37.*

*Politices*  
*Professo-*  
*ris.*

Beatus DÛRRIVS, cujus jacturâ quantam plagam Academia nostra, quantam Resp. literaria acceperit, audivimus haud ita pridem, cum hoc ipso ex loco Theologorum Altdorfinorum laudes prædicarentur. Missa tandem Philosophiæ Moralis professione, ad *Politicen*, cujus pars est ac principium tractatio de moribus, gradum proferam. In hac Philosophiæ practicæ parte tractanda tradendaq;, quàm feliciter & dextrè apud nos versatus fuerit ARNOLDVS CLAPMARIVS, vel ex ejus de Arcanis Rerump. libris satis abunde constare poterit; præter quos pluribus ejusmodi scriptis Remp. ornâisset literariam, nisi fata ipsi tantam gloriam, & ipsum unâ, eripuissent.

Erant



Erant enim, præter opus laudatum, alia quædam præ manibus, atq; , ut ita dicam, sub incude, & jam ferè exasciata, veluti Tractatus de Jure Sacro, Commentarius de Publicis Judiciis, Libellus de Vectigalibus, Libri quatuor de Jure Publico, Libri tres de Foederibus, Liber de Magistratu, Notæ in Politicam Aristotelis, Commentarius in Corn. Tacitum, & id genus alia summi ingenii & indefessi studii certissima documenta. Hujus & in cathedram & virtutes successit magnus noster VIRDVNGVS, qui cum per annos novendecim & Eloquentiæ & Historiarum professione perfunctus esset, anno seculi vigesimo quarto, jussu Amplissimi Senatus Norici, Politicen ipsam, cujus arcana quam plurima jam antè in Historicis prælectionibus exhibuerat, seorsum proponendam suscepit, in eaq; functione impigro perstitit animo, donec tandem curis variis & ferè continuo labore confectus, molestam hujus vitæ mortalis miseriam cum æterno & sincero cœlestis consuetudinis gaudio commutavit A. 1637, relictis aliquot pretiosis ingenii monumentis, Commentario in Taciti Agricolam, Speculo idololatriæ novantiquæ, sive de Fructu ex veteri historia capiendoadversus idololatriam. Proderunt etiam ejus Carmina, Orationes & Programmata varii generis. Concinnavit præterea Notas in Plutarchi πολιτικά & ἡθικά, item in Florum, Tacitum, Eutropium, aliosq;, quæ tamen lucem nondum adspexerunt. Neq; prætereundus hic est M. JOH. PAVLVVS FELWINGERVS, qui ad hanc ipsam Politices professionem A. 1648 accessit, eandemq; A. 1671 Filio suo paternæ virtutis & eruditionis æmulo, JOH. JODOCO FELWINGERO, consentiente Magnifico DNN. Scholarcharum Ordine haud gravatim cessit; cujus viri memoria cum alibi jam satis sit commendata, nihil hic præterea dicam, nisi quod provinciam sibi concreditam, per unius duntaxat anni decursum, fideliter & diligenter, magna auditorum cinctus corona, atque ô utinam diutius licuisset, exornaverit, eamque Parenti iterum exornandam reliquerit. Atque hinc tandem aliquando faciamus gradum ad disciplinas Theoreticas, quarum laudes omitto, ne plus justo excrescat oratio; illud tamen prætermittere non possum, Metaphysicen cæterarum

De Fel-  
wingeris,  
Patre &  
Filio, vid.  
infr. pl.  
in Paren-  
sat.



*Metaphy-  
sics Pro-  
fessores.*

Scientiarum principem ac reginam merito vocari. Eam verò summa cum laude in Athenæo hoc docuisse novimus, præter PHILIPPVM SCHERBIVM jam laudatum, magnum illum & incomparabilem Philosophum MICH. PICCARTVM, quem professione Logices laudabiliter omniumque auditorum cum fructu prius ornatâ solutum, professioni tum Poëtices tum Metaphysices admoverunt *Scholarchæ* Perstrenui; qua in statione sanè quàm honorifica permansit usq; ad annum hujus sæculi vigesimum, quo incredibili cum Musarum luctu desit vitalem hunc trahere spiritum, cœlestemq; repetiit patriam. Logicum autem & Metaphysicum nostrum fuisse Piccartum, præter Disputationes acutè non tantum ab eo conscriptas, sed & acutissimè defensâs, aurea illa Philosophiæ Aristotelicæ Delineatio testis esse potest. Politicus insuper qualis fuerit & Historicus, verbis exprimere vix possum; prodeant & testentur id specimina: prodeat excellens illud opus, quod in Aristotelis Politicam scripsit, prodeant Observationum Historico-Politicarum Decades novendecim; prodeant denique Orationes ejus tersæ omnibusq; numeris ab absolutæ, quæ continentur sub finem Philosophiæ Altdorfinæ. Quantam verò linguarum, inprimis Græcæ & Latinæ, cognitionem habuerit, exactissima illa Oppiani, Græci Poëtæ, in Latinam versio, nec non singularis Periculorum Criticorum liber, fidem faciunt non exiguam: cujus in postremò nominati libri præfatione ad Lectorem quoq; promisit, si Deus vitam protraxerit, Valerii Flacci novam editionem, & justos ad illum commentarios. Vidit porro nostrum Lyceum, Metaphysices Doctorem JOH. KOBIVM, virum juris non minùs scientificum quàm à philosophia instructissimum; per cujus, ut & successoris JOH. PAVLI FELWINGERI, laudes si decurrere nunc instituerem, vererem, ne cum dicendi principium vel facillimè reperero, exitum invenire non possem. Sed ne de Professoribus *Physices* nihil planè dicam, en sagacissimos Naturæ mystas, NICOLAVM TAVRELLVM, ERNESTVM SONE-RVM, & GEORGIVM NÖSSLERVM; qui in hac Vniversitate Medicinam ita docuerunt & exercuerunt, ut nullum de Philosophia locum, sive de naturæ primordiis quæras, sive de re-

*Physices  
Professo-  
res.*



rum cœlestium caussis, & iis quæ fiunt in aëre, five de anima-  
 lium ortu, victu, figuris, five de natura animorum, ac perturba-  
 tionibus, prætermiserint; ac proinde uti summam, quâ non ita  
 pridem hoc ex loco ad dicendum ornatissimo, inter Medicos  
 commemorati sunt, laudem promerentur optimè, sic nunc inter  
 Philosophos insigniores omni jure prædicantur. Celeber-  
 rimo autem Nolslero vita defuncto, anno 1650, d. 6 Au-  
 gusti, professio Physica Viro Clarissimo M. ABDIÆ TREW,  
 fuit demandata, de quo paulo post commodior erit dicendi  
 locus. Ad scientiam enim & professionem *Matheseos* jam fe-  
 stinat animus; in cujus expolitione & cultu, quis non vi-  
 det, nostram Altdorfinam tantum non omnibus Christiani or-  
 bis Academiis, gloriam si non præripere, saltem facere dubiam  
 atque ancipitem, ob insignes illos, quos fovit, Mathemati-  
 cos, qui per admirandam & invidendam suam doctrinam ac eru-  
 ditionem immortalitate donati, in omnium aducore vivunt, per-  
 petuâq; vigent memoria. Nemo enim Virorû Præclarissimorum,  
 rei; literariæ Antistitem, ita prorsus est ignarus, ut ne M. JOH.  
 PRÆTORIVM, Joachimico-Vallensem, vel ex auditu solum  
 noverit. Natus est is A. 1537; ad nostram accessit academiam  
 anno seculi ejusdem septuagesimo sexto, mense Decembri; in  
 qua summa fide atq; diligentia munus suum privatim publiceq;  
 obiit, nihil omnino sibi indulgens, ut prodesset omnibus. Quan-  
 tum verò honoris & gloriæ apud externos, profunda eruditione  
 sua, & probitate insigni cum experientia incredibili conjun-  
 cta, fuerit consecutus, inter omnes constat. *Θαυμασιώτατος*  
*Thuanus* tanti eum fecit, ut quendam Historiarum suarum li-  
 brum luci credere prius noluerit, quàm censuræ illius subjice-  
 ret. *Sethus Calvisius* in opere suo Chronologico multa habet,  
 quæ à Prætorio didicisse se fatetur ingenuè. *Isaacus Casaubonus*,  
*Andreas Dudithius*, *Marcus Welserus*, *Henningus Arniseus*, (qui  
 Viri plurimi eundem æstimârunt, & consilium illius in maxi-  
 mi momenti rebus non semel petierunt. Noverant enim mul-  
 ta quotidie nova eum invenisse, multa veterum errata depre-  
 hendisse, correxisse, multa aptius & commodius monstrasse,  
 aliisq; post tradenda tradidisse. Non dicam in præsentia de  
 instrumentis ipsius Mathematicis, quæ Norimbergæ in publi-

De hî tri-  
 bus vid.  
 supr. Orat.  
 de Medi-  
 cis Altdor-  
 f.  
 Mathe-  
 matici.



cam Bibliothecā sunt translata; præmittam summi pretii MSSa, quæ hic in Academia nostræ Bibliotheca asservantur; Mensulam tamen ejus Geometricam non filebo, quam quatuor libris fusè descripsit B. noster Schwenterus in tractatu III Geometriæ suæ Practicæ; cum quibus omnino jungi merentur, quæ *Georg. Andreas Boeclerus* in nova Geometriæ illius editione, Mensulæ illi Prætorianæ superaddidit. Tandem verò lumen illud Matheseos splendidissimum, quod per quadraginta fermè annos non academiam tantum nostram, sed & exteras oras splendoris sui magnitudine complevit, A. 1616 occidit; nunc verò inter astra collocatum fulgebit in perpetuas æternitates. Quis porro est omnium tam ignarus rerum, tam rudis in re literaria, quin PETRUM SAXONIVM, Huls-Holsatum, & JOH. CASP. ODONTIVM, M. *Casp. Odontii*, qui in Gymnasio Altdorfino humaniores docuit literas, filium, Viros Mathematicum peritissimos, cognitos habeat? Quorum ille in *Joh. Prætorii* locum, anno ævi nostri septimo & decimo, mense Octobri, suffectus, Mathematica superiora accuratè docuit, tandemque mense Septembri, anni vigesimi quinti, fato concessit: hic verò anno 1580 hanc in lucem editus, voluntate eorum, penes quos arbitrium eligendi & vocandi jus erat, postquam sapientiæ præcepta in Gymnasio antea tradiderat, publicus Mathematicum Professor factus, exquisitam Matheseos scientiam, qua pollebat, exeruit feliciter, sed non diu; diem namq; heic obiit A. 1626, scriptumq; de Cometis reliquit. Talibus tantisque viris hoc in docendi genere A. 1628 successit DAN. SCHWENTERVS, & ab horum studiorum veluti fontibus, ad perennem non inferioris solum ordinis fortisq; privatæ hominum famam profluxit, sed & eminentioris conditionis viris, Principibus, Comitibus, Baronibus, ita sese probavit, ut in quorundam familiaritatem etiam admissus fuerit & amicitiam; quorum catalogum facili texere possem negotio, nisi verendum mihi esset, ne tempore magis & sermone, quam illorum numero nominibusq; destituerer. Minimè verò virtus, eruditio & honor, æternæ illi, & omnibus mundanis, imò ipsi mundo dictæ legi, *Moriendum cunctis*, Schwenterum nostrum eximere valuerunt; hanc enim & ipse anno seculi 36 subiit, in præaltam illam atq; divinam academiam receptus, ubi



ubi astra, in quorum magnitudines, intervalla, cursus, studio-  
se his in terris inquisivit, infra se nunc conspicit ac contempla-  
tur. Miramur tamen & nos, & mirabuntur posterius, monu-  
menta, quæ in hoc ipso studiorum genere reliquit, eruditione  
multiplici refertissima, qualia sunt Geometria Practica, Stega-  
nologia, Deliciæ deniq; Physico-Mathematicæ. Defuncto *J. Jac.  
Pömer*, Patricius Norimb. parentavit. Et nunc deniq; ad M.  
ABDIAM TREW, Mathesos & Physices Professore Claris-  
simum, mea revertitur oratio, qui anno redemptionis nostræ  
1597, d. 29 Julii, Onoldi lucem hanc primum adspexit; anniq;  
seculi hujus 36 mense Januario, publicus Mathes. Prof. heic loci  
est constitutus; quam spartam anno seculi quinquagesimo ex-  
cepit professio Physica cum priore Mathematica conjungenda.  
In quibus functionibus quantam adhibuerit diligentiam & cu-  
ram, vel è scriptis Viri Celebratissimi erudito orbi notissimis  
manifestum est: potissimum autem ex ejus Manuali Geometriæ  
Practicæ, Astronomiæ parte spherica, Discursu de Correctio-  
ne Astrologiæ, Nucleo Astrologiæ correctæ, Specimine concilia-  
tionis Calendariorum veteris ac novi, Directorio Mathemati-  
co, Physica Aristotelica, aliisque pluribus. Sentio equidem  
res tantas multò brevius multoq; exilius à me tractari, quàm di-  
gnitati atque amplitudini ipsarum conveniat. Enimverò mul-  
ta consulto prætereo, quòd mihi non tam ut copiam & varieta-  
tem confectè laborandum est, quàm ut effugiam satietatem.  
Quis enim unquam tanta vi præditus ingenii, tanta eloquentiæ  
copia instructus reperietur, qui in tali materia ita versari se pos-  
se confidat, ut non semper cum plurima dixerit, plura tamen  
omisisse videatur? Ecquid igitur? finemne statim faciam (id  
enim à me dudum expectari video) an priusquam desinam, de  
Philosophiæ, cæterarumq; artium quæ ad humanitatem perti-  
nent, *Dnn. Professorum* in Incluta Altdorfina hodieq; Celeberri-  
morum laudibus nonnulla proferam? Ego verò id facerem ac lu-  
bens, nisi eum aliqua eorum molestia fieri hoc debere intellige-  
rem, propterea, quòd, ut quisq; laude dignissimus est, ita mini-  
mè libenter laudes suas audire consuevit. Ne igitur me velle quid  
auribus ipsorum dare videar, reticebo laudes quanquam verissi-  
mas, omniumq; ore celebratissimas, solvens tamen animum in  
pia vota affectum & observantiam meam demonstratura.

Faxit



Faxit igitur DEVS OPT. MAX. auctor & conservator rei literariæ, ut Viri vos Amplissimi, bono publico nati, in otio & tranquillitate pulcherrima porro consentiatis & conspiretis in bonum literarium, ruituris virtutibus & literis supponatis salutare manus, & seculum impleatis facinoribus illis, quæ boni & literati omnes in ore, in oculis, in animo ferunt! Sic vivite, sapientiæ atque humanitatis Doctores Excellentissimi, unâ cum reliquis Patribus Academiæ Conscriptis! Vivite saluti patriæ, gentium omnium decori, orbis bono! Vivite vetusti longævam Nestoris senectam! Vivite dum feri, annisq; & honoribus languidi, ad cognata Vobis evoletis sidera!



Pre-



*Præcedenti de PHILOSOPHIS ALTDORFINIS  
Orationi accedat hic, mantissæ locò,*

**O R A T I O**  
*De*  
**VITA ET OBITU**  
**M. JOH. PAVLI FELWINGERI,**  
*Philosophi Altdorfini perquam celebris.*

**P R O G R A M M A.**

**E**Xtulimus ante quatuor penè menses venerandas  
exuvias JOH. PAVLI FELWINGERI,  
Academici hujus Senioris longè meritissimi, atq; in-  
signis Philosophi; qui, quàm vir pius ac doctus,  
quàm in officio ad miraculum industrius, quàm candidus ac  
sincerus, quàm ab omni fastu & vana ostentatione alienus,  
insuper & in conversatione comis benignusq; fuerit, nunquam  
non testati sunt, & ubi opus, præter Collegas, tot Viros Ex-  
cellentes, testabuntur auditores ejus ac discipuli, quos jam in-  
de ab octavo & trigesimo seculi hujus anno, quò publicè do-  
cere cœpit, habuit innumeros, Reipublicæ, Ecclesiæ, Acade-  
miarum Scholarumq; præclaris muneribus vel perfunctos, vel  
hodieq; perfungentes. Et si fortè fuit unquam, aut esse possit,  
qui amisso pudore omni, de commemoratis Senis Beati ac post  
fata quoq; perpetim Venerabilis, virtutibus inscriptum in ani-  
mo testimonium ferre non voluerit, aut etiam nunc velit; mul-  
tijugam Viri eruditionem & incredibilem diligentiam plus sa-  
tis demonstrant tot in publicum emissæ Dissertationes ac volu-  
mina

P

mina



*mina, quæ si recensere aut comprehendere hîc ausim, Icaria  
numerum dicere coner aquæ. Alexis, Poëta Comicus,  
propter ingra-vescentem ætatem interrogatus, Quid ageret?  
respondit: Καλὰ χρόλὴν ἀποθνήσκω, Per otium morior! Non  
hoc de se ὁ μακαρότης noster, non nos de ipso dicere possumus;  
quin perinde potiùs ac Diogenes olim, cùm quis moneret ipsum,  
ut jam senex quiesceret à laboribus, Quid, respondit, si in sta-  
dio currem, utrum oporteret me jam metæ vicinum,  
cursum remittere, an magis intendere? Ecquis igitur cum  
Horatio in hæc meritò non erumpat verba:*

Paulum sepultæ distat inertiae  
celata virtus; non ego te meis  
chartis inornatum sileri  
totvetuos patiar labores  
Impune, Lolli, carpere lividas  
obliviones!

*Similis animi impetus incescit Eximium atq; eleganter Doctum  
DN. JOH. JUSTINVM ARNSCHWANGERVM, Norimb. Phi-  
losophiæ Candidatum, Admodum Re-verendi ac Præclarissimi  
Genitoris, de Ecclesia patria insigniter tum meriti tum hodieq;  
merentis, filium haud degenerem, Celeberrimi Felwingeri no-  
stri auditorem oppidò sædulum; qui tanti Præceptoris sui la-  
bores & memoriam, quantum in se est, ab obli-vione cupit  
vindicare, eaq; mente elegantem panxit Orationem de Vita &  
Laudibus Ejusdem, quam prima crastini pomeridiana in Theo-  
logico recitabit auditorio. Cui recitationi ut haud gravatè  
interesse velint Magnificus DN. RECTOR, Perillustres  
& Generosissimi DNN. BARONES, Excellentissimi  
ACADEMIÆ PROCERES, & Cives Nobilitate Ge-  
neris pariter ac Bonis Artibus Florentissimi, observan-  
tissimè amantissimeq; rogo. Quamvis equidem non sine mor-  
su atq; acerbitate vulnus hoc, interim ferè cicatricem passum,  
retra-*



*retractari queat: attamen ipse morsus sua quoq; non carebit voluptate; secundum illud Attali Philosophi effatum apud Senecam: Sic amicorum defunctorum memoria nobis jucunda est, quemadmodum in vino nimis veteri ipsa nos amaritudo delectat; & quomodo poma quædam sunt suaviter aspera. Quæ cum ita sint, speramus ac spondemus in hac quoq; Oratione non defuturum, quod iuvare & delectare possit audientes.*

MAGNVS DANIEL OMEIS, P. P.

## ORATIO.

(Titt.)

**M**ulta sanè debemus antiquæ Romanorum & Græcorum prudentiæ, quibus illa, partim ad eruditam voluptatem, partim ad laudabilem imitationem, se nobis non sine magna gloria commendavit. Enim verò (ut silentio omnia involvam, quibus uterq; aliàs populus ceteris gentibus palmam præripuit) me tantum occupo in allegandis ritibus eorum ac moribus, quibus funera ornare amabant, quorumq; unum & alterum ab his mutuatum merito adhuc tenemus atq; colimus. Plurimas autem ceremonias defuncto olim corpori adhibebant, idem ungendo, pollinciendo, lavando; procurabant præficas, libitinarios, ac vespillones; suppeditabant vestes, ornamenta atq; coronas; funus erat usitato ritu collocandum, publicè efferendum, ac sepeliendum, mox in cinerem, cum fragrantissimis odoribus, unguentis ac liquoribus redigendum, quod inferiæ, epulæ, luctus, postremo celebrandi, excipiebant. Sicut tamen multi horum rituum, & præter hos alii plurimi, non parum gentilis superstitionis replebant, debentes incunabula populis nostræ veritatis sacramentum ignorantibus; à Romanis etiam & Atheniensibus, in

P 2

quan-



quantum iis communibus usi sunt, non uno servabantur modo; ita nullus tam sapienter excogitatus, nullus tam sano omnium iudicio approbatus & exercitus occurrit, quam qui orationibus in laudem defunctorum habitis, Valerio Poplicola auctore, Romæ vel cœpit, vel invaluit. De hoc Plutarchus cum Dionysio affirmat, quod Brutum, posito in foro ejus corpore super lectum splendidum, & populo ad concionem convocato, atratus ibi laudaverit. Inde postea, quicquid funebris hujus moris erat, Romani statuerunt, Græci suis addiderunt, utriq; cum discrimine propagarunt. Illi enim omnibus Viris Claris, Remp. armis, arte & consiliis juvantibus, honorem hunc decreverunt, opinati laudabiliter, ob totius actæ vitæ virtutes, elogia tandem deberi; hi vero bellicam solum mortem commendasse videntur, & quidem extra Athenas, in loco Ceramico dicto, quod ex una virtute, quæ in ipsa morte apparuerit, viros bonos judicabant. Nos diversitatis ratione nihil commoti, ad rectum potius institutum respiciamus, quod sapientia, pulchritudine, & quidni etiam necessitate sua? in hunc usq; diem duravit ac perititit, cum vix ac ne vix quidem, præclaro aliquo Reipublicæ decore e terris emigrante, illud ullo magis quam hoc vinculo, ad vitæ & morum exempla contineri queat. Dignissimum itaq; est, quod posteritas sciat, quam blandum ad æternitatem invitamentum fuerit tota vita magni *Felwingeri*, cui lacrymas nostras cum Musis præficis non ita pridem impendimus. Ejusdem Venerandi Senis nunc ego sepulchrum dicere jussus, non video, quomodo supra laudatos Romanorum mores imitando, iisdem non potius obstrepam. Requirebant nempe illi Oratorem, qui defunctos vel sanguine accedebat; sic Tiberius de Patre, Fabius de Filio, orationem habuit: vel eloquentissimum ejus ætatis Virum; ita Cornelius Tacitus Syllam, Cicero Crassum, Hortensium & Sulpitium laudavit: horum verò neutram conditionem apud me invenio, nisi ut pro sanguine beneficiis, quibus omnes literarum cultores *Beatus* obligavit, cum ipso me conjunctum arbitremini. Quare accurretis una cum me ultimum hoc officium, vel saltem attentione vestra & favore meum ne deferatis, qui immortalitatem, quam possum mœrens merenti breviter contribuam.

Inuti-



**I**nutilis & supervacanei laboris negotium, non pauci sunt, qui existimant, funebres panegyricos à Patria inchoare, cum hac vanè superbiant ferè, quibus natale solum nihil, quàm mater eaq; sæpe infelix existit; sicut vicissim egregiè inculpati ii, quibus nihil præter hoc potest exprobari. Non enim tam refert, illustris urbis civem esse, quàm eàdem se dignum exhibere; non unde natus aliquis sit, quàm qui sit, adeò meretur laudem, ut vel Themistocles, si Seriphius fuisset, ignobilis non sit habendus. Obscurè itaq; splendescere videntur, qui nativitatis loco gloriantes ipsi degenerant, plus sibi tribuendo, quàm reddunt: quamquam etiam pondus habent, quæ Simonides, referente Ammiano Marcellino, judicabar: *Benè perfectâ ratione victuro debere ante alia patriam esse gloriosam.* Et quidni robur trahant à cultiore loco & regione, quæ inde proveniunt hominum ingenia? Sunt hæc certè agri instar, qui in Favonium spectans ventum, & Soli ostentus, suapte natura melior evadit & foecundior. Hinc in prælio cæfos Pericles laudavit, quòd patriam Athenas nacti fuissent, cujus idem Reipublicæ formæ summa non minus præconia detulit. Nos quò piaculò Noribergam nostram dissimulabimus? cujus laudes non ego, sed qui grande epos molitur, expediat, cuiq; totus vixit Beatus noster, nullus sibi. Dixerit quis non immeritò, hanc illi ideò natales impertivisse, ut sibi in eò mille commoda nascerentur. Dixerit item, illum sibi minimam sui partem vindicasse, ut eò majorem Patria vindicaret. Vno verbo: Soli beneficium in illud ipsum impendit. Felices ergo Parentes, à quibus in hanc lucem editus A. 1606, d. 16 Aprilis, Patrem sortitus Johannem Felwingerum, Marchionatu superiore innatum, & tabernarium; Matrem Catharinam Schwarziam, ambos ex honestissimis familiis oriundos, utut non majoribus adeò, ac in eo posteris clarescentes. Hinc licet familiarum nomina, ceu Romanum morem Seneca exprimit, non longò ordine; & multis stemmatum illigata flexuris appareant; non tamen hæc nascendi conditio Nostro fuit minori decori & honori, ac sua olim Agathocli, Socrati, Euripidi, & aliis, quorum omnium genus ab ipsis incipiebat, in aliis sæpe definit. Aliena laudat, qui genus jactat, nisi simul generoso intus spiritu agitetur, & cum animisui dotibus sibi



hoc usurpet. Jam aliena, quantò minùs propriis præstant, tantò dignior admiratione cunctos tenet, qui in suam ipsè gloriam vivit, etiamsi vel pauperior cum Demosthene pater, vel vilior cum Æschine mater eidem contigerit. Nec vice versâ filius sublimioris conditionis parentes humiles obscurat, sed potius æquè lucem illis præbet, ac artificiosa umbra picturæ alicui decus, æquè decus, ac umbrosus ramus arbori suæ gratiam conciliat & pulchritudinem. Id ipsum verò Celeberrimus Senex beneficio ante omnia piæ & prosperæ educationis, quâ fructus est, in parentes transmisit, quæ cum multum faciat ad struendum sibi felicitatis fastigium, ita cessit hîc etiam feliciùs eò, quò faciliùs ex ligno Mercurius erat sculpendus. Rapuit magnetica hac virtute inter alios animum Avunculi sui Honoratissimi, Dn. Pauli Schwarzii, Reipublicæ Noribergensis id temporis, (ut vocant) Secundicerii, qui bonæ indolis indigentia allectus sese cognato mirò studiò fruendum præbuit, ut verè laudabilis facilitas fuerit, dum consiliis & obsequio hinc inde certatum. Justum enim movebatur dubium, an cura in Patrono conspicua favorem, favor beneficium, beneficium promittitudinem excederet, sicut ambigebatur in cliente, an amor cultus, cultui placendi cupiditas, huic studium demerendi prævaleret. Suasû igitur laudati Viri, cui Noster, ceu dixi, multum debuit & debere voluit, mitti cœpit in publica virtutis & doctrinæ seminaria, & primos eosq; uberes profectus fecit sub felici ungue Dn. M. Johannis Schirmeri, tertiæ classis Sebaldinæ Præceptoris, pòst Laurentiani Rectoris, qui scholis suis tam fideliter præcepit fundamenta artium, ut eo inter cœlites recepto, & successore denominato Dn. M. Georgio Schrödero, hunc discipuli bonæ frugis proventus adeo illexerint ad amoris mutui coagulum, quò non solum de optimo ingenio spem conciperet opimam, verum & eximium in eo fidei & industriæ suæ solitæ monumentum constitueret. Atqui probè tinctus hac ratione Græcæ & Latinæ Linguae elegantiss, (cujus utriusq; studio, ex mente Caselli, potissimum continentur, quibus animus, oratio, mores, vita deniq; hominum egregiè politur, & divinitus perficitur; imo ut idem ille habet, Musarum arculæ sunt, quibus thesauros sapientiæ ipsæ reconditos custodiunt) doc-



docilitate suâ invitavit quâ Parentes quâ Cognatos , ut de ca-  
 pessendis solidioris scientiæ augmentis illi imposterum prospici-  
 erent. Invitati verò hacratione , ut quibus nihil antiquius erat  
 pueri utilitate , morem gesserunt amoris & religioni , eumq; , de-  
 lecto huic fini Altdorfiò , tunc Gymnasiò & Academiâ perinde  
 clarò , A. 1623, d. 1 Maji , adeoq; ante Vniversitatis privilegia  
 publicata , Dn. Christophoro Speccio concediderunt , cujus mo-  
 deramine secunda classis eo tempore fruebatur. Hic tam pul-  
 chros profectus fecit , ut A. 1628 ad publicas Lectiones extra-  
 ordinariè admitteretur , pollens ingenii tanta celeritate , quâ a-  
 lios in studiis excitare potuerit , ut animos suos per hunc tan-  
 quam mollissimâ cotelævigarent ; addo quod nihil ferè præpo-  
 steri fuerit , exigere ab eo jam tum maturum fructum , cum ar-  
 boris instar germinare primò vere inciperet. Neque dubitaret  
 de hoc alius , nisi qui segregem eum ab ingenti laude velit facere ;  
 quâ fretus ad Argentoratenle iter tunc post Petro-Paulinum  
 festum se accinxit , & provectiora sua ac Helicone non indigna  
 studia doctis comprobans , simul audacium in hoc negotio teme-  
 ritatem rejecit. Præterquam enim , quòd rectè arbitratus est ,  
 Juvenem debere cum flumine congruere , quod ubi intra sta-  
 gnantis alvei angustias coercetur , putredine corrumpitur , ubi  
 brachia variis ripis allidit , limpidius fluit & dulcius : noluit ta-  
 men etiam amore virtutis extra patriam trahi , nisi in ea semen-  
 tem priùs , rerum optimarum intelligentiâ , fecerit , unde fru-  
 ctus virtutis felicius ita metere posset. Præstolatus ergo fau-  
 ctum successum instituti sui , pro hoc cladis nonnihil sensit à tri-  
 sti illa Homeri Ate , orbem hunc , nescio quomodo magis celeri  
 pede , quàm candidæ Litæ , perambulante , ut in vicem , quod de  
 colendis Musis satageret. Æsculapio litare necesse habuerit , dum  
 brevi ab adventu suo , modò malignâ febris implicitus , modò alii  
 ægritudini obnoxius , à fine intercludebatur , quem pari vel fidu-  
 ciâ vel laude sibi tenuit præfixum. Interim fama adversæ hu-  
 jus valetudinis in patriam pervolante , immoderata Parentum  
 anxietas non potuit in ipsis acriorem sitim accendere , ferendi  
 ægroto suppetias , quàm penetrantiorem ex eo dolore accepe-  
 runt , quòd loci intervallo ab effectu prohiberentur. Quare  
 nullum campum , sumtibus præsertim oppidò deficientibus , ad  
 opem



opem quantulamcunq; videntes, consilium inire coacti sunt de filio domum revocando, ne vel solatiō remotioris eorum vigilantiaē planē posset destitui. Obtemperavit is etiam retrahentibus fatis, atque avidis suorum amplexibus obversus, mox dein eam recuperavit sanitatem, ut veluti Antæus aliquis, qui

*ab ipso*

*sumit opes animumq; casu,*

ē fugiente malo emergeret. Tūm verō, obtentā pristinā quiete, primū de Musarum castris cogitavit, & cū ad ea denuo sectanda nullus commodior Altdorfinā locus appareret, haut secus electioni ejus, ceu benignæ antehac nutricis suæ, pronus ipse fuit, ac Patronorum monitis similiter adjuvabatur. Exceptavit hæc quoq; antiquum hospitem summo cum gaudio, quemadmodum maximo cum ardore is telam suam retexit; habuit nullam eruditionem venalem, quam non scopo suo utilem hic mercaretur; potuit nullis utilibus præceptis scaturire, quæ non avidus animo suo imbiberet; protulit nullum virtutis alumnū in medium, cujus vestigiis consignatæ viæ non infisteret; nihil magnum, nihil exaggeratum in sinu est complexa, semper in eo cum excelsis ingeniis defudavit. Nec aliter hic totum penē biennium emensus est, ubi cum nova studiorum sede hanc iterum commutare duxit. Non poterat non audire subinde de immortalī gloria, quæ super æthera notam exaltavit illustrem illam Jenensem Vniversitatem, cujus tanta celebritas ipsum stimulabat, ut interiora ejus adyta intrare concupiverit. Respondit desiderio eventus A. 1627, quando destinatum eō iter licuit illi svasu omnium & applausu suscipere. Et non opus erat tunc, ut Toxaris aliquis Anacharsim moneret in itinere, quod hic per Græciam instituit, ut Solonis rationem haberet, qui solus sibi esset satisfactorius, quod Græciam totam complectebatur. Sponte enim Felwingerus & quasi naturali inclinatione cum doctis est versatus; quid? quod Anacharsin etiam fortuna sua anteivit, incidendo ibidem non in unum Professorem, in quo Solonem vel plus eō, poterat admirari, verū in aliquot certē, & quidem in Daniele Stahlum, à quo in Lares pariter & convictum est receptus, Hieronymum Prætorium, Paulum Schleevogt, Johannem Majorem, Johannem Gerhardum,

Johan-



Johannem Himmelium, aliosq; qui omnes & nomen sibi excitârunt è seculo æternaturum, & illi mella sua, tanquam Divinâ virgulâ Doctores designati, omni cura suggererunt. At etiam serviebat ille tam opportunæ pro se occasione, quippe præter debitam observantiam, quam auctoratus his totus, ad aram humanitatis eorum sacravit, nullam patiebatur sationem abire, cui non agellum animum offerret, nullam messem, unde non in horreum colligeret, nullos labores, quibus non optatum fructum consequeretur. Imò verò nondum divelli potuisset à meritissimorum Præceptorum latere, nisi post exactum Jenæ triennium illic affectare voluisset Bellona divisum cum Musis imperium; quamobrem ut pedem reflecteret maturius, patroni & agnati illi auctores fuerunt. Obsecundavit hortatibus ipsorum, præsertim cum eam gloriam manticâ conditam afferret, quam è tergo in pectus rejicere, atq; lætis etiam Parentum & Patronorum amplexibus posset offerre, quamq; ipsam aliquis non parùm temeraret, cui svaviter adhuc in Philosophiæ adytis ille quievisset, cum in ea jam sedes domicilii fixit, metendæq; laureæ ferè fuit proximus. Scilicet in patriam reversus, quasi apud variorum florum succo gravida undiq; delibato, quin viæ sibi à servato veteri amore ad pristinum Hymettum, Altdorfium, expeditæ inhæreret, non poterat non fieri facile; ubi etiam paulò post optimâ virium fiduciâ nixus concinna diligentia præmia quæsit, quæsitâ obtinuit, & velut unio tandem ex matrice concha prodivit. Sanè non mediocriter eruditionem ejus, quâ erat jam tum singulari, commendavit, quòd juxta cum aliis duodecim Candidatis, aditu ad Honoris, uti appellant, Magisterialis templum sibi factò, primum locum ritè exornabat; si tamen hoc mirum videri debuit, dum antè semper in studiis secundi gradus impatiens fuerat. Vnum hoc infauftum atrò notandum lapillò est, Panegyrim, quam vocamus Petro-Paulinam, tunc sollenni Magistrorum creandorum actui destinata, præpeditam fuisse classicò à Furiarum maxima innocentò, ut hinc eodem momentò clauderetur Musarum palatium, quò Jani fanum pandebatur. Sed successit mox intercalata sollennitas, ipsa adhuc bellorum turbine correpta, quando Apollo (cujus alias totò cœlò distat ratio & Martis) subsecuto anno

Q

seculi



seculi tertio & trigesimo, mense Januario, ea indixit halcyonia Parnasso, quæ palmam in medio positam novis Magistris concesserunt, literatorum justam tristitiam sublevârunt, & excusam pacem velut è fuga consistentem ad commune solatium repræsentârunt. Atque decoratus hóc titulô Felwingerus totus postea in eo fuit, ut dignitatem factis æquipararet, ne virtutum & diligentia suæ torrens honore, ut obice, videretur repressus. Ea propter ad altiora enixurus se juvare imprimis censuit, si ingenium vel explicaret, vel excoleret in Helnestadiensi Vniversitate, quam sub istud tempus perfundebant clarissimâ luce Celeberrimi Theologi, Georgius Calixtus, Conradus Hornejus, & Paulus Müllerus, à quibus & aliis ingentium animarum fide-ribus, tantum luminis auditor mutuavit, quo de non uni deinde ipse accendit. Nam Theologia inter philosophandum eam operam dedit, ut, qui profectus eius animo complecteretur, vix fieri potuisse crederet, ut aliquod unquam tempus alii studio impenderit; quemadmodum qui de civili sapientia differentem ipsum audi verit, sibi facile persuaderet, eum nihil aliud totâ vitâ, quàm Philosophiam tractâsse. Ex utriusque igitur doctrinæ genere ad literati orbis decus contendens, magnos illos Præceptores suos in altissima specula pari animi ardore ad culturam & amorem sui reddidit intentos, ut cum è patria Cæsareo exercitu circumfusa solitis adjuvari subsidiis nequiret, tristem ejus fortunam consiliis & operâ promiscuè temperaverint, nec prius à cura sua destiterint, quàm eum commendâssent Viro Nobilissimo & Perstrenuo. Dn. Julio Augusto de Streithorst, à quo Rottendorffii liberis suis præfectus est bonis artibus imbuendis, atque primum peritiæ suæ cum aliis communicandæ prospero successu periculum fecit. Abdicavit verò paulò post se ea conditione, & Halæ-Saxonum juxta cum affectibus Dn. Samuelis Ritteri, Provinciæ Magdeburgensis Syndici & Scabinatûs Assessoris, duos quoque nobilissimos adolescentes, Wolfgangum à Brandenstein, & Carolum à Diskau, in fidem ac informationem suam conferri passus est; quos, ut bonis moribus, sic & elegantiorum literarum interiore cognitione instituit, ut laudem suarum materiam, decora ingenia, procuderet. Impeditus solum metu belli fuit, quò minus & hac sede diu se reficeret. Cum enim



enim non unus exercitus, Cæsarianus, Suecicus & Saxonicus castris insiderent oras illas, & multa, Halensi imprimis civitati, adjacentia loca non sinerent esse secura, inde se tempestivè proripere, tutioremq; domum viam per Helmeftadium inire jam in animo habuit. At videte Divini Numinis providentiam, quod commodis rei literariæ in patria augendis priùs destinaverat ipsum, quàm ex inquietatis bello terris eò refugium meditaretur. Vacabat Inspectionis Alumnorum Noricorum functio, eamq; curæ ejus ideo voluerunt demandare Patres Conscripti, quod ex cultæ indolis fama clarebat, quæ circumlata hæcenus dudum meruit in eo centro quiescere. Et certè nihil fugit eum, quod perceptione dignum fuisset; nihil inexpertum reliquit, in quo statuisset sibi esse elaborandum; admirabilesq; scientias instar rupis proruptæ superavit, & quod magis fuit, ea junctim universa possedit, quæ in sublimibus naturis singula solemus mirari. Ipsâ hæc inexpugnabili eruditionis illecebrâ totum cepit animum Generosi & Magnifici Dn. VL. RICI GRVNDHERRI, tunc Septemviri & Proto-Scholarchæ; cujus benigniore indultu cunctatus nonnihil ab exteris reditum est, donec locis à se illustratis etiam Hamburgum adjecerat, ipsâ experientia auctus, quæ cum multiplici in eo scientia contendit. Exorsus deinde spartam suam, omne quod in expectatione fuit, adimplevit: à magisterio ejus literæ ac disciplinæ, velut redditâ juventute, efflorescebant, Musasq; olim in contubernium admittas nunc in splendorem is asseruit; doctum se monstravit, sed & in explanandi facultate dextrum, ne juxta secum aliis faceret injuriam, ubi contemplationis sibi succo vivens ingenii thesaurum infidelis sivisset delitescere. Annus secundus agebatur, ex quo adscitus in hanc provinciam affulsit, ecce oblatâ aliâ debebat frui, quæ eum ab Academia advocatum Ecclesiæ inædificandæ vindicaret. Superintendens opus erat Illustrissimis & Generosissimis Dnn. Baronibus, hodiè Comitibus, in Obern Sulzburg; cumq; viciniore Felwingeri nomen tantò pleniore rubâ accepissent, simul præconia admirati exarserunt ad æquam cupidinem, eâ ipsum dignatione circundandi, quæ curâ & auctoritate illorum aliud novum caput expectabat. Huc ita desideratus, noluit, nec temere debuit, fortunæ incre-

Q 2



scientis suæ ductui repugnare ; solum, ne ingratus ullo modo peccaret, rei etiam successum in consensu Incluti Senatus Noribergensis posuit, tunc ex sola hac providente moderatione noscendus, quod ad alta, vitæque genus aliud, natus esset. Id quod felicibus mox astris erupit, quando recens oblatum munus deprecatus, priorem stationem indefesso continuavit studio, donec brevi post Publici Professoris titulò merito ornabatur suo. Vbi enim Clarissimo & Excellentissimo Dn. M. *Johanni Kobio*, Logices & Metaphysices Professori P. summo cum Doctoris honore juris factorum interpretatio decernebatur, isq; dicatus jam Imperialibus Institutionibus, professione altera Metaphysica sponte exhibat, Nostro rariore sorte usu sic venit, ut Superiorum nutu ei succederet in officio, sub cujus ægide olim sollemnem disputationem defendit. Nec nisi tantum antecessorem habere debuit, quò, sicut per Genium hujus docti jurârunt, æque eum digitis monstrarent omnium virtutum ex assè heredem, quas ille tam insigni celebritate exercuit, ut in eo uno literarum procures quæsiuerint, quod in toto pæne orbe erudito passim venerabantur. Respuat verò laudes suas, si potest, etiam invitatus accipiet ob merita, quæ cum laborum honorumq; incrementis æqualiter crevisse oportet. Nuncium vix miserat Alumnorum Inspectioni, cui inter adjectas occupationes integrum adhuc annum satisfecit, insuper in humeros suos aptata est, ut quibus optime sederet, cura tantum non Divinæ artis, Logices, cujus magna vis & utilitas nisi jam per omnes scientiarum partes fusa manasset, hic eam manare fecisse videri potuisset. Sed & præter usum, quem egregiè docuit, unâ discipulorum vota aliò paucis communi donò æquavit, videlicet, cum illis subtiliorem hanc doctrinam, & ob id austeram nonnullis, blandâ quadam methodò, tanquam suavissimum nectar, propinavit, ut & impressum ei perspicuitatis characterem apprimè intelligerent, & ipsi hoc lumine ducti non incerti vagarentur, aut more cæcorum andabatarum pugnarent. Imò quantus Logices Magister fuerit, illi sciunt, quos contra usus est in scriptis acutâ suâ, quâ poluit, solertiâ ad veritatis indagacionem, eaq; bona fide ab ipsis hostibus celebrata, qui dum clades suas occultare nesciebant, simul eruditum ejus ac fortem ratiocinandi modum commendârunt. At non ingratiore operas Metaphysicæ dumetis vepribusque locasse



locasse censendus est, quod vel sola hæcce plenâ urnâ laureas ei  
statuisset, si non utriusq; ipsum individua manerent. Scitô  
eas & plane fororiô nexu administravit, unde facile & jucun-  
dum fuerit videre, quàm posceret alterius altera opem, a-  
micè conspirando; prout etiam, perinde ac fascis illius se-  
nis, non in singulis bacillis, sed in omnibus vinculo con-  
iunctis, unita in vi scientiarum robur solet consistere. Hoc  
amplius, quod iungenda benè jungeret, simili curâ separanda  
separavit. Non verborum quæstionumve minutis gravissi-  
mum Metaphysices pondus fregit: non illorum; quod exce-  
ssum huius rei adeo justè devitavit, ut, quemadmodum Hercules,  
cùm observaret in templo statuam Adonidis, Veneris deliciarum,  
indignabundus dixit, *Nil sacri es*; ita Hercules hic literarum  
pugil, in rebus potiùs attentus, huiusmodi lautitias nihil dubita-  
vit commodiori loco relinquere: non quæstionum; quod pla-  
nè insipidum duxit eorum morem, qui omissis perspicuis argu-  
mentis, comparisonibus & exemplis, minutos quosq; scrupulos  
eximunt, captiunculas expediunt, dubitationes solvunt, & vix  
generalia non perperam tradentes, ubi ad distinctiones deci-  
sionesq; venit, Scyllæ fabulam hoc in Philosophiæ genere ex-  
primunt, quæ ore tantum & pectore formosam virginem pro-  
ferens, pro fecundo utero ad vitæ humanæ commoda, in por-  
tentosas & latrantes quæstiones desinat. Gignitur inde accu-  
ratori huic disciplinæ id quoque detrimenti, quò tanta veritas,  
ceum illius est, propter motas circa eam controversias multorum  
ferè contemptui fit obnoxia, non ita absurde existimantium, eos  
errare omnes, qui nunquam inter se convenire possunt. Longè  
in aliud Noster incumbere, cui præsertim non fuit difficile du-  
cere viâ facili & jucundâ ad cuiusvis rei, quæ scientiâ compre-  
hendi potest, notitiâ, quâ sibi fixam in Musarum regno sedem  
conciliaverat. Hoc unum deerat felicitati ejus & literarum,  
ut operaretur illi pariter Philosophiæ, quæ vitæ dux, veritatis  
indagatrix, Ciceroni dicitur, sine qua non modò nos, sed omnino  
vita hominum esse non potuisset: quæ urbes peperit, quæ dissi-  
patos homines in societatem vitæ convocavit, quæ eos primo  
inter se domiciliis, deinde conjugis, tum literarum & vocum  
iunxit communione. Huic igitur disciplinarum Reginæ, Po-  
liticæ,

Q 2



liticæ, Procerum voluntate, commodavit prudentiam & dexteritatem suam. quovis doctorum ordine, totaq; Republica admirante, quæ talium adſuetudine, & quadam confluentis eruditionis ſatietate nihil didicit admirari. Maximum autem ſtudium eò circa iſtam provinciam detulit, ut generoſam patriæ ſpem ſubolemq; regnaturam iis præceptis intimiùs imbueret, quibus non uni atque alteri, ſed plurimis, imò Reipubl. omni, inſervire, hanc inſtitutis, legibus, bonis moribus, fundare, fundatam conſervare, conſervatam augere atque amplificare, felicem denique reddere & florentiſſimam valeret. De Optima Rep. ac Civitate ſeptem Græciæ Sapientes diverſas aluerunt opiniones, adeo ut illam Solon cenſuerit Optimam, in qua injuriarum auctores, tam illæſi quàm læſi, in jus rapiant ac puniant; Bias, in qua Legem, tanquam aliquem tyrannum, univerſi formident: Thales, in qua nec divites nec pauperes cives reperiantur: Cleobulus, in qua reprehentionem magis, quàm legem, metuant ſubditi: Anachariſis, in qua non opes ſed virtutes ſpectentur: Pittacus, in qua boni tantum magiſtratum gerant: Chilo deniq; in qua Legibus maximè, minimè Oratoribus, præbeatur audientia. Hæcce talia Prudentiæ Politicæ placita, & longè plura, tam altâ mente depromſit Felwingerus, ut ea vel docendo vel ſcribendo in utroq; excellens fuerit, ubiq; admirandus, nuſquam ſui diſſimilis. Sanè quod de Themiftocle inſlatum valdè ſonuit, cum rogatus in convivio, ut citharam pulſaret, reſpondit: *Fidibus canere ſe nescire; ceterum poſſe oppidum parvum in magnam civitatem evehere*; id modeſtiore veritate Noſtro liceat applicare, qui etſi gravioris huius momenti nihil ſibi ſumeret, tamen non facile ignorabat. Quare ſolò Politici nomine plura merita, quàm dies numerans, æternum de hoc ſtudio merere dignus fuiſſet. Sed verò affectavit majorem in modum, ut qui eſſet non æquior in Muſas quàm liberos amore, videre etiamnum vegetus Filium ſuum chariſſimum, JOANNEM JODOCVM, V. J. Doctorandum, ſtrenuum in hoc munere ſucceſſorem, quòd imprimis illas nullam mutatione hac jaçturam pati arbitrabatur. Sciuit, quid Filii viribus confiſendum, ſat eas non ipſe modo, ſed cum toto Lyceo exploratas habens; ſciuit, quid provinciam poſſet ornandam juvare, ſi ad frugales ſuas curas, quas nunquam



quam pro eodem negotio plenè remitteret, vivus assuefaceret  
 filium, quò terras aliquando destituere coactus, in eo tantò ma-  
 jore vivacitate, feliciorisq; Parentis exemplò, superesset. In-  
 terim verò poterat accidere quid magis inopinatum? It in va-  
 num vix exortum gaudium, luctusq; obicitur gravissimus, qui  
 læta professionis auspicia feralibus mœstis funestaret, nec vul-  
 garem paternæ expectationi dolorem circumponeret, quem-  
 vis etiam peregrinum, nedum nos, in copio'as lachrymas tristi  
 suâ attrectatione soluturum. Eheu! dulcioris gratulationis  
 locò, quam à posteritate, filium miratura, optimus Parens in  
 antecessum cupiebat lucrari, offensus in hoc solo est à filio, quòd  
 susceptam semel spartam turbato mortalitatis ordine reddebat;  
 quanquam & cordolium istud æquè moderato cum Anaxagora  
 animo tulerit, qui audita morte filii, *Nibil*, inquiens, *mibi in ex-*  
*pertum aut novum nuncias*, ego enim illum ex me natum sciebam esse  
*mortalem*; veri & imperterriti Philosophi encomiò retinetur.  
 Atq; notari hic debet mira utiq; vicissitudo, quâ aliquot ante an-  
 nos Metaphysicâ, Logicâ brevi ante obitum, abscedens, è cun-  
 ctis Politicam, postquam denuò in eam rediit, semper fama  
 comite profecutus est, donec labefactatus hic unitatis contex-  
 tus fatali divisione rotus dissolveretur. Id unum cum dispen-  
 dio viri hujus conjunctum esse rei literariæ conducit, quòd ta-  
 men duabus hisce veluti consecratum caput donatus sit Excel-  
 lentissimus *Rötenbeccius*, Gener *Beati* non magis quondam ex-  
 optatus, quàm tantorum studiorum felicissimus propagator;  
 qui cum iis non quidem novò foedere initò, jam jam præclare  
 excogitat, quomodo non Socerum tantum referat, sed ingenti-  
 um meritorum fulgorem adæquet, memoriam *Felwingeri* in ul-  
 timas usque terras porrecturus, ut quò celebritatis illius pondus  
 non pervenisset, virtus sua æmula penetraret; cujus etiam a-  
 mabili vi ab iniqua oblivione vindicaretur, si quando ulli ejus  
 monumento suprema dies immineret. Neque metus est mihi,  
 ne à me quicquam auribus suis dari credatur, recepto jam more  
 Patronis assentandi, si publicè hic agnosco, me non unum apud  
 eum nomen dispungendum habere, quorum magnitudo vel in-  
 de appareat quòd sola beneficii professione possit exsolvi, utut  
 pro modestia sua & eandem neget celebrari. Atenim verè amens  
 ego,



ego, qui rem attingere audeo, cui vix ex instituto par tractando esse possem. Abducendus est animus à legitimo hoc obsequio ad ipsum Defunctum, de reliquo nuncio liberiori vitæ remisso, successu maritali contemplandum. Subiit conjugii leges cum Virgine Gratiis suis incomparabili, *Anna Catharina*, Nobilissimi, Consultissimi, Excellentissimiq; Dn. *Christophori Heldii*, Jcti & Reip. Norib. Consiliarii primarii, filia; cujus decoram bellissimi corporis faciem hinc animi forma, centum hinc aliæ pulchritudines honestabant, ob quas, biennio abhinc, & quod excurrit, fato functa, lachrymosum sui desiderium reliquerat. Ex ista, sine jurgio, sine offensa, sororis instar à Felwingero amata, octonâ prole felix pater factus est, & quidem ternâ masculinâ, quinâ foemininâ; quibus deinceps floribus immissi Austri eam, partim ipso vere, partim altiore ætate stragem dedere, ut solum duos periculum amiserit, *Annam Mariam*, Perquam Reverendo & Clarissimo Dn. M. *Joanni Guilielmo Reinsbergero*, Happurgensium Pastori Vigilantissimo, & *Catharinam Sibyllam*, modò laudato *Rötenbeccio* nuptiarum pacto vinctas; quarumq; ex illa varios nepotes & neptes deosculabatur, sicut non minus ex altera nepte, quâ eum filia natu maxima *Clara Catharina* augebat, proavus proneptem conspexit. Gratulanda esset hæc ei felicitas, suis quoque acerbis permixta, nisi potius mors ejus, quò tandem delabor, junctis simul totius eruditi orbis suspiriis conquerenda. *Extremum hunc Arethusa mihi concede laborem*, etsi nullus difficilior possit injungi! Jactatus in juventute Felwingerus crebris morbis, ab iis in senectute, quæ ipsa est morbus, multò minus erat liber, sed nunc catarrho valido, linguæ usum sufflaminante, nunc recidivo, modò erysipelate, modò alio conflictatus malo, singulis peculiarem valetudini cladem afferentibus, ac semper iterata cum vice invalescentibus, illam tantum non subiit afflictionem, ut planè à tuendo suo officio impediretur, cui etiâ inter salutis discrimen sæpè vacabat. Nihil quippe adversi patientiam ejus læsit, cum, turbinibus fortuitorum calcatis, adversus ea constante duravit proposito, quò pro molesto aut gravi quicquam non habebat. Certè calamitates miraculum faciunt aliquem, naturam superando; tale in eo meritò comploramus ereptum, qui, quod in acupictis est, lucidio-




cidioris coloris imago, iis, velut ex opaco magis flamine, totā  
 Vitā præfulsit. Itaq; nullis angustis, soli fato succubuit, cujus  
 necessitatem exponere sensit novum ægorem tenaciore alvi  
 Profluvio vires ejus brevi depopulantes, ut de quantulacunq;  
 colligendi eas spe conclamatum sit. Tristi conjecturæ tristior  
 supervenit eventus anni expirati (1681) die 23 Octobris, quan-  
 do in mortis potestatem omni, quod mortale acceperat, datō,  
 vitales auras, pias inter preces Dn. Generi, Filiarum, Neptis, &  
 quorundam studiosorum, mediā tertiā pomeridianā liquit, at-  
 que hinc in communem locum placidè commigravit. Lessus ei,  
 nœniæ & mortualia fiebant, neque sepulchrum ejus ulli adhuc  
 indefletum videmus. Lugent Musæ ac Virtutes utriusq; chori  
 Coryphæum, quas, ipsis earum sacris tanquam Jupiter Scator, la-  
 bentes jam jamq; casuras hactenus sustinuit, ut famam ejus iis-  
 dem ferè ac Solis terminis circumscripserint, dolentes illud sibi  
 obstare, ne plenum & solidum consequantur solatium, quod,  
 dum luce fruebatur, hanc non omnes magni ingenii sui fœtus  
 aspexerunt. Lugent omnes, qui literis censentur decus & or-  
 namentum, siquidem non tantum intelligunt scriptorum ejus  
 præcellentiam, quā multitudinem exquisitam mirantur, cu-  
 jus nervo, licet in ea secula incidat, in quibus vix ullum, quod non  
 dictum sit, dicatur, tamen existimatio sua, quousque honos stu-  
 diis, constat. Luget Academia splendidissimum membrum,  
 quæ quasi theatrum illius ingenii fuit, nullā pro eo curā defati-  
 gati, nullō unquam labore fracti, quin vigilanter attendentis  
 subinde, rectō ut omnia talō starent, seq; eā rerum copiā & the-  
 saurō instrueret, ad quem, quoties usus exigebat, tanquam ad  
 dives aliquod penarium iretur. Lugent honores dexterrimum  
 custodem, quorum stadium ritè decurrit, &, siue Philosophi-  
 cum Decanatum gereret, (gessit verò hunc nonum) nunquam  
 fere Candidati defuerunt, ope & auspiciis ejus in interius Sapi-  
 entiz delubrum introducti; siue Rectoratus insignibus distin-  
 gveretur, (id quod ei bis contigit) non tristi supercilio, non voce  
 asperiore, sed gratiā & placidō quodam rigore effrenem sustulit  
 licentiam, ut intra unum aut alterum exemplum stante omni  
 delicto felix maneret Respublica, quam Philosophus gubernabat.  
 Lugent pauperes liberalem Eleemosynarium, dum quotidianis

R

spartim



sparsim largitionibus cœlestes divitias fœneratò consecutus, divites docuit suas augere opes inopibus dispergendo. Lugetis deniq; orbata Domus Columnen, Boni candidam Mentem, Vos Dnn. Professores & Studiosi Collegam & Patronum æstumatissimum, qui etiam ad leniendum vestrum desiderium, non caduco lapide & mortalibus materiis templum decernitis, sed in fidissimis pectoribus Virtutis suæ simulacrum duraturum ponitis. Modò non lugent invidi, quorum antiquum & vetus est promeritæ laudi obfistere, & ubi semina intra glebas elidere non potuerunt, eam adultam quomodocunq; præfocare. Quid ego ereptum redditurus, si lacrumis emereri Manes possent? Gratulor Tibi, Beatissime *Felwingere*, æterna juba, sed non minus gravem Tui jacturam doleo; sicq; verbis parco, quò dolores leves loqvuntur, ingentes stupent.



STVDIVM ET LABOR  
M. JOH. PAVLI FELWINGERI,  
Professoris Norici, Vniversitatis Altdorfinæ  
Senioris, & Stipendiariorum ac Beneficiariorum  
Inspectoris, piè denati d. 23 Octobr. 1681.

*In Theologicis.*

**C**ollatio Religionis Evangelicorum, seu Lutheranorum, cum Religione Vnitariorum, sive Photinianorum, contra M. Valentinum Baumgart.

Immodesta Modestia, quâ immodestus Photinianus è Transylvania M. Valentinus Baumgart, cœtùs Claudiopolitani Minister, & Gymnasii ibidem Rector, Joh. Paul. Felwingerum, Profess. Altdorfinum excepit.

Concussio primæ Normæ Religionis Photiniano - Zwickeria-næ, de Disparatis.

Incarnatio Jesu Christi, contra M. Valentinum Baumgart.

Solida & in Scripturis fundata Demonstratio veræ & ab æterno Jesu Christi cum Patre suo coëssentialis Divinitatis.

Jonæ



Jonæ Schlichtingii à Bukowiek, Photiniani magni nominis,  
centum argumentorum, à Nicolao Cichovio, pro vera &  
æterna Jesu Christi Deitate, Excisio.

Examen Methodi Augustinianæ, contra Walenburgios.

Vindiciæ Incarnationis Jesu Christi, æterni Patris æterni Filii,  
pro Alberto Grawero, contra Valentinum Smalcium.

Speculum Veritatis, contra Wilhelmum Christianum Mar-  
chionem Brandenburgensem, de Sacra Scriptura.

Aucupium pecuniæ, i. e. de Missis Solitariis, contra Joh. Theo-  
philum Klibniz.

Disceptatio Theologica Anti-Photiniana, de Ratione in Theo-  
logia, contra Florianum Crusium, vel contra Crellium.

*Avéndon.*

Democritus relegatus. i. e. Refutatio libelli Papistici, cujus ti-  
tulus: *Lacht überlaut/ die Aetholischen wollen einmahl Rö-  
misch-Catholisch werden.*

*In Logicis.*

Explicatio Prioritatis Naturæ.

De Prædicamentis, X Disputationibus expositis.

De Propositionibus & Syllogismis Modalibus.

De Syllogismis Imperfectis, & aliis similibus. (putatione.

Methodus Disputandi Kesleri, cui addita est Appendix de Dis-

De Demonstratione. (bilibus.

Palæstra Rationis de Propositionibus & Syllogismis Exponi-

De Doctrina Suppositionis, Ampliationis & Status.

De Sophisticis Elenchis, contra Faustum Socinum.

De Syllogismo Expositorio, A. Joh. Henrico Priester.

*Avéndon.*

Commentarius in septem libros Topicos.

Commentarius in librum primum Analyticorum priorum.

Commentarius in librum secundum Analyticorum priorum.

Commentarius in librum primum Posteriorum Analyticorum.

Commentarius in librum *ὑπὸ ἐκείνου*.

*In Metaphysicis.*

Commentarius in sex libros Metaphysicos Aristotelis.

De Bono. De Malo. De Vero. 1. 2. De Falso.

R 2

De



De Distinctione, ejusq; generibus.  
 De Causa Sine qua Non.  
 De Potentia Dei Absoluta.  
 De Concursu Dei, sive Causæ primæ cum secundis.  
 De Causa Formali Mali.  
 De Habitibus in genere.  
 De Essentia ac Existentia.  
 De Principio individuationis.  
 De Simplici & Composito.  
 De Causa per Emanationem.  
 De Necessario & Contingenti.  
 De Natura & Essentia Luminis Naturæ sive Rectæ Rationis, & Lumine Revela-  
 De Existentia DEI naturâ cognoscibili. (tionis.  
 De Potentia & Potestate DEI in homines.  
 De Potentia DEI Absoluta & Ordinata.  
 De Æternitate.

'Avēdōta.

Institutiones Metaphysicæ, libri Tres.  
 De Causis Tractatus.  
 Institutiones Metaphysicæ breviores.

*In Politicis.*

Dissertationum Politicarum Tom. 1.  
 Dissertationum Politicarum Tom. 2.  
 Dissertationum Politicarum Tom. 3.  
 Tractatus de Arte *ἡγεμονικῆς*.  
 Tractatus de Jdice. Tractatus de Magistratu.  
 Tractatus de Consiliariis, Senatoribus, & Legibus.  
 Observationes in Ideam Franconis Burgersdicij.  
 Disputatio de Dictatore.  
 Disputatio de Servo Naturali.  
 Disputatio de Præda Militari.  
 De Præda Militari, pars altera.  
 Disputatio de Dominio Eminente.  
 Disputatio de Novitatibus in Republ. vitandis.  
 Disputatio de Temeraria Provinciarum invasione & occupatione. (Officio.  
 Disputatio de Mediatoris Officio, ejusque requisitis, de Vniversali Mediatoris  
 Velitatio Quæstionis, An in Tractatione Pacis, Belli causæ à Pacis conciliatori-  
 Disputatio de Armatura Epistolari. (bus examinandæ?  
 De Origine, Progressu & Fatali Rerumpubl. periodo.  
 Decades duæ Quæstionum Nomico-Policarum.  
 De Principiis sive Fundamentis Civilis Prudentiæ.  
 De Genuina Rerumpubl. Origine.  
 De Spoliis belligerantium.  
 De Bello R. Preiseggero.

Jam



Am verò, postquam venerati sumus Sacros Professorum Altdorfinorum piè defunctorum Manes, reliquum est, ut hodie per DEI gratiam superstitem, ac publicè in Vniuersitate Norica docentium Nomina commemoremus, eo quidem, quo in anniversario, ac novissimè etiam edito, Prælectionum Catalogo, consignati spectantur, ordine.

*Professores Theologia:*

Johannes Saubertus, D.  
M. Lucas Friedericus Reinhart.  
Johannes Fabricius.

*Professores Juris:*

Georgius Reichardus Hammer, D.  
Henricus Linck, D.  
Johannes Antonius Geiger, D.  
Johannes Christophorus Wagenfeilius, D.

*Professores Medicina:*

Mauricius Hoffmann, D.  
Jacobus Pancratius Bruno, D.  
Johannes Mauricius Hoffmann, D.

*Professores Philosophia:*

Georgius Matthias König.  
M. Johannes Leonhardus Schwäger.  
M. Johannes Christophorus Sturmius.  
M. Daniel Gvil. Mollerus.  
M. Magnus Daniel Omeis.  
M. Georgius Paulus Rötenbeccius.

R 3

ADDI



## ADDITAMENTA.

Quemadmodum venatoris est, omnes quidem feras in sylva indagare; nulli verò vitio datur, non omnes cepisse: ita nobis abunde sit, quædam ex tam vastæ materiæ argumento captasse, inq; præcedentibus Orationibus proposuisse; reliqua verò, partim secundâ curâ, partim ne, multa allegando, orationis contextus, ac typographi labor, interrumpere, ad Tractatus hujus calcem conjecisse.

**P**ag. 5. lin. 9 & 10: *An. 1526. in cœnobio inprimis Egidiano semina futurorum in universam rem literariam incrementorum jecit*] De Gymnasii Egidiani primordiis legi potest *Historica Enarratio* Plur. Rev. Dn. M. Joh. Heldii, de *Gymnasii illius Origine, Incremento, Decremento &c.* Quæ typis impressa est Norimbergæ A. 1673. Cui accessit Philippi Melanchthonis Oratio A. 1526 in laudem Scholæ Egidianæ, Norimbergæ in corona doctissimorum virorum, & totius ferme SENATUS, habita; ut & Eobani Hessi Carmen de eadem Schola A. 1532 scriptum.

Pag. ead. 5. lin. 13, 14: *Laudati jam Senatus id temporis principibus* **CASPARO NÜTZELIO & HIERONYMO EBNERO.**] De his Reip. Norimb. Duumviris Joach. Camerarius in Vita Phil. Melanchthonis, *Norimbergæ* ait, tum *Principes Senatus* erant DN. CASPAR NÜTZELIVS, & DN. HIERONYMVS EBNERVS. In NÜTZELIO vigeat animus altus atq; magnus, & ita prudens, ut neminem audiverim (cum sermonibus interfuerim de eo plurimorum) qui in isto genere civilis rationis ac facultatis quemquam præstantiorem illo cognovisse diceret. Quæ secum ipse deliberando e Republica esse statuisset, ab iis nullius odio aut amore abduci se patiebatur. -- In EBNERO ingenii major erat mansuetudo, & placidior quietiorq; mentis habitus.



bitus. Innocentia cura summa, & bona conscientia custodia. Ut horum  
duum quasi copulationem civitati illi ad felicem statum Deus largitus esse  
videri possit, temperamento quodam optimarum quidem naturarum, sed  
quarum tamen utraq; aliquid haberet alterius dissimile & suum, admini-  
strationem Reipublice fortunans.

Pag. ead. §. lin. 21: *Tandem Altdorfium selegerunt* ] Est hoc  
Oppidum ditionis Noricæ, milliaribus tribus Norimbergâ distans,  
Palatinatui superiori, atque in eo, Cœnobio, cui nomen Mons Gra-  
tiæ, vicinum. De quo cœnobio Gasp. Bruschi in Chronolog.  
Monast. Germ. illustr. Edit. noviss. p. 235: *Gratiæ mons*, vulgò  
*Gnadenberg* / antiquitus à *Quercubus der Eichelberg* / cœnobium  
utriusq; sexus in Aichstetensi diœcesi, ordinis S. Salvatoris vel S. Brigittæ  
ad Schvartzachium amnem in Palatinatu superiori, medio inter Noriber-  
gam ac Neumarcam civitates, vel Altdorffum, oppidum Noribergense &  
Heimburgum castrum, itinere, in amœnissimò monte situm &c. Joh. Buno  
ad verba illa Phil. Cluverii Lib. III. Introd. Geogr. Cap. XI. §. 1: No-  
rimberga, in confiniis Franconiæ, Sveciæ ac Baviaræ posita, nullius  
soli esse cupit. Vrbs est magnifica, splendida, potens, ac totius Ger-  
maniæ superbissima; hæc commentatur: *Norimberga*, ad utramq;  
*Pegnesh*, qui urbem interluit, ripam sita, ad Circulum pertinet Franconi-  
cum. Habet territorium sat amplum, & oppida aliquot; in quibus Alt-  
dorffum, Academia anno 1575 (rectius 1578) ornatum. De Etymo-  
logia voc. *Altdorff* Leonh. Wurffbain, J. Ctus, Reip. Norimb. Con-  
siliarius & Historicus perquam celebris, in MSto, quod in Acade-  
mica nostra servatur Bibliotheca: Gewiß ist / daß das Amt Altdorff  
seinen Namen nicht von dem A. C. 1291 bis 1298 gewesenem Rö-  
mischen Kaiser / Herrn Adolpho Nassovio, als *Adolphs-Dorf* /  
sondern von einem Alten Dorf / dahero erlangt hat / wie die inn-  
und bey einem Alten Dorf gelegene Gebäu zusammen gezogen / und  
endlich eine Stadt daraus gemachet worden ist / daß es den Namen  
eines Dorfs / und zwar eines Alten Dorfs einen weg als den an-  
dern behalten. Auf welche Meinung in unserm Teutschland auch  
andere Ort / als Jägerndorf / Schorndorf &c. und insonderheit das  
indem Altau (das ist der Alemannorum Gen oder Landschaft) nicht  
weit von Ravensburg / und vor ohngefehr 600 Jahren angerichteten  
Frauen-Kloster / Weingarten / ihren anfänglichen Namen eines  
Alten.



Alten Dorfs erhalten haben. Conferatur cum postremis hisce  
B. Wuffbainii verbis laudatus antè Bruschi in ead. Chronol. p. 568:  
*Vinearum, Germanicè Weingarten / potentissimum amplissimumq;  
Institutum Benedictini cœnobarum in Constantiensi diœcesi domicilium, non  
procul à Ravenspurgo, Imperiali Suevis civitate, in per-veteri pago  
Altdorff ad Schußum amnem eo ipso sed paulatim editiore loco situm, in  
quo antiquitus patria, natale solum & avita sedes Principum Altdorffen-  
sium fuit, ac ex eorundem semine natorum Guelphorum, potentissimorum  
olim Suevia Regulorum &c. Sed de nostro Noricorum Altdorfio au-  
diamus pariter B. Joh. Gundermannum, in Præconio Civitatis Alt-  
dorfinae (quod Carmine comprehendit A. 1628) ita canentem:*

*Non autem Villam, piceis quæ sordida sumis  
atq; simi, circum validis & cincta molossis,  
textaq; viminibus, lento congestaq; limo,  
nec domibus pagos dispersis, atq; lacunis  
colluvie terræ,  
versibus amplectar; validi sed moenia saxi,  
turribus & crebris, portisq; inclusa duabus,  
quæ ALTDORFINA suo, vel ADOLPHSDORFINA vocârunt  
nomine, quod nunquam satis extollenda Vetustas  
aut dedit, aut forsâ primævus conditor illis.  
Urbs hæc terribili Mavortis turbine quondam  
Multiberisq; fuit flammis agitata coruscis,  
nec potuit presso præscindi vomere terra,  
pristina læsæ nec haberi cura peculæ.  
Aurea sed postquam sperabant sædera pacis,  
aquas atq; locum circumvolitare coloni  
auras cernebant, - - - salubri  
& pecudes vincti securis gramine sylvis;  
instabant bello lapsas reparare ruinas,  
moliriq; domos, manibusq; revolvere ligna &c.*

Selegerunt autem Proceres Norimbergenses, præ Vallè Angelica &  
Hersbrucco, Altdorfium, ad transferendum huc Gymnasium, alias  
inter causas, auch darum / daß dieses Amt nicht zu weit und nicht zu  
nahe bey der Stadt Nürnberg gelegen: Item/daß es wegen der Land-  
strassen



straßen etwas müßiger / dann andre Ziemer / ist ; uti habent verba  
Cl. Wurffbainii d. l.

Pag. 6. lin. 10: *Ab altera parte*] Nummi hujus argentei . qui  
fundamentali Lapidı Collegii Altdorfini, ad posteritatis memoriam,  
de more veterum, insertus fuit, ab altera parte Typus conspicitur in  
Emblematibus Altdorfinis f. 4. proximâ post Titulum Libri genera-  
liorem paginâ.

Pag. ead. 6. lin. 14: *Sollennis subsecuta est Introductio*] Vide-  
tur hic Introductio Novæ Scholæ Altdorfianæ Noribergensium, quæ  
typis exsculpta prodit f. 8. Norimb. 1576.

Pag. ead. lin. 15, 16: *Vt videre est ex Πνευματι, quam Collegii  
porticus nobis etiamnum exhibet*] Ea verò sic habet :

B. F.

Hoc Pietatis & Doctrinarum omnium laudandarum  
Domicilium

Inclutus SENATVS NORIB. liberaliter  
exstrui curavit,

die , quæ BB. Petro & Paulo sacra , inauguravit,

& publicavit Anno Christ. Salutis MDLXXV,

Imperante Divo MAXIMILIANO II

Cæs. Aug. P. P.

Curatoribus Eccles. & Scholarum

GEORGIO VOLCAMERO, PHILIPPO GEVDERO

& HIERONYMO PAVMGARTNERO.

Ades, ô DEVS, & piis conatibus volens propitiusq;  
fave!



Vt certè favor exinde Numinis eluxit,

dum annus quidem M D LXXVIII

subscríbente votis Laudatissimi SENATVS

Auctoritate & Clementia

Augustissimi & Inviçtiss. Imp. RVDOLPHI II,

S

Cura-



Curatoribus

HIERONYMO PAVMGARTNERO,  
WILIBALDO SCHLVSSELFELDERO,  
BARTHOLOMÆO POEMERO,  
& JULIO GEVDERO,  
In culmen Academiæ Gymnasium evexit.  
Tandemq; Annus Æ. Chr. M D CXXIII  
Ejusdem SENATVS desiderium sanctissimum  
prosperante divinitus plenissima indulgentia  
Sacratissimi Cæsaris Aug. D. FERDINANDI II,

Scholarchis

CHRISTOPHORO FÜRERO,  
GEORGIO CHRISTOPHORO VOLCAMERO,  
VDALRICO GRVNDHERRO,  
& CAROLO SCHLVSSELFELDERO,  
Vniuersitatis titulo Privilegiisq; perbeavit.  
Fac proprium hoc nobis bonum, o Fons Æterne Boni!

Pag. ead. 6. lin. 21 & seqq. *Academica dignitatis cepit primordia*  
- *Et is ipse nimirum Academiæ hujus fuit natalis.*] Lyceum  
igitur Altdorfinum per triennium, & plus eo, solo Gymnasii claruit  
titulo; anno autem 1578; d. 26 Nov. illud Divus RVDOLPHVS II  
ad dignitatis Academicæ fastigium extulit, concessitq; facultatem in  
eo creandi Baccalaureos & Magistros Artium ac Philosophiæ. Publi-  
cata sunt Academicæ illa quidem Privilegia A. 1580; non autem festo  
Petro-Paulino, prout Invitationes geminæ in Emblematis Altdorf.  
pag. 47 & 49 tradunt, verum die Jacobo sacra: sicut non tantum Pa-  
negyris Quarta, Altdorff f. 8 A. 1581 impressa, (quæ hic omnino  
videatur) sed ipsum etiam Senatusconsultum Norimb. id confirmat.  
Licet hic inferere *Carmen*, quod panxit eadem circa tempora P.  
Melissus Schedius, Comes Palatinus, Eques Auratus & Civis Ro-  
manus:.



AD SENATVM NORIB.  
DE INSTAVRATIONE ACADEMIÆ  
ALTDORFIANÆ.

*S*iquid, ut magnum, bene condidistis  
SO PATRES; amplum studiis Lyceum  
quàm sub ALTDORFI bene condidistis  
manibus altis!

Oppidum parvo licet inter hortos  
ambitu clausum similet Sareptam;  
artium seges tamen heic bonarum  
florete abunde.

Famq; per novem genialis annos,  
Palladis nutu, Cerere auspicata,  
protulit, feretq; dehinc aprica  
messis honores.

Huic ERYTHRÆVS prior excolenda  
Rector arcessitus: eoq; mīssō  
sub colum Clothūs aciemq; ferri,  
FREIGIVS arua

Jure consecvit locitata Musis.  
Ceteri tradunt operas coloni  
mutuas, nullius onus laboris,  
terga quod urget,

quamlibet vastum, tolerare segnes.  
Hic agrum proscindit, agitq; sulcos;  
alter offringit sola dura glebis:  
lirat & occat

ille: tum runcant alii frutetum,  
germinans cum luxuriem superbam  
pingue abutentis mala pullulavit  
seminis herba.



*Ah quibus secli meruere culpis  
morte ab humanis citiore tolli*

**VOLCAMER** præclarus, itemq; **LÖFFEL-  
HOLZIVS** ille,

*Quò minus vesçi diuturnitate  
lucis, aut saltem locupletiores  
quirit usurpare oculis uterq;*

*frugis acervos?*

*Hos tamen certè geminos Scholarchas  
nulla post atas veniens silebit,*

*Luna dum nocti præerit, diemq;  
ducet Eous.*

*Dissipent aras Academiæq;  
verrium dentes, & aprugna rostra:  
misceant cælo mare factiosæ*

*ardeliones,*

*Turba sublestaq; fide & profanis  
moribus, Colcho gravidæ veneno;  
luce queis cassos volupe est, & ipsos  
ladere vivos:*

*In Professores furiale vestros  
non cadet, multò minus in Dynastas  
Ordinis vestri, pietatis antes,*

*virus Echidna;*

*Invicem sed concilium scholamq;  
legibus sanctis bene constitutam  
comis edulcabit amor, boniq;*

*gustus & æqui.*

*Nam quid heu griphi tot opinionum  
commodi præstant? quid habent decori  
exacerbatis animis tot hirtæ*

*verbera lingua?*

*Crescit*



*Crescit augmentumq; minuta sumit  
res, ubi concors habitat voluntas:  
maximas contrà dedit & dabit dis-  
cordia pessum.*

Hoc P. Melissi Elogium, quò nostram exornavit Altdorfinam, quia in paucorum versatur manibus, huc in medium ut proferretur, omnino merebat. Continetur autem in Carminum Fasciculo, qui inscribitur: MELISSI *Mele*, sive *Oda ad Noribergam & Septem viros Reip. Norib.* f. 4. *Noribergæ*, in *Officina heredum Montani*, A. CIO IO XXC.

Pag. 7. lin. 2, 3: *Publicata sunt Privilegia hæc*] Consulatur hic liber, cui titulus: *Actus Publicationis Privilegiorum Doctoralium Universit. Altorph. Norimb. in anniversaria Panegyri DD. Petri & Pauli Apostolor. quæ incidit in XXIX Junii diem, A. C. 1623 celebratus.* f. 4. *Altdorf*, 1624. Discere hinc poterit Lector, quanta sollemnitate spectabilis illa Panegyris, in præsentia Legati Cæsarei, Perillustris & Generosissimi DN. DN. HENRICI HERMANNI, Baronis ac Dynastæ in Burchmilchling & Wilhermsdorf &c. ac Serenissimi Principis & Domini, DN. GEORGII OTTONIS, Comitis Palatini ad Rhenum, Ducis Bavarix, & Comitis Veldentii & Spanheimensis &c. Duumvirorum insuper, Scholarcharum, aliorumq; Primariorum REIP. NORIMB. Senatorum, Consiliariorum, plurimorumq; Hospitum Splendidissimorum, celebrata fuerit. Poterit ibidem (ut & ap. *Limnæum* Lib. VII. de *Jur. Publ. Cap. 35. num. 31 & 32.*) reperire Diplomata Cæsarea Divorum RVDOLPHI II & FERDINANDI II Imp. Quorum hic pristina privilegia non solum clementissimè confirmavit, sed præterea, in vim motus proprii, ad Jurisprudentiæ ac Medicinæ Facultates, nec non potestatem & licentiam creandi Poëtas Laureatos, extendit, atq; adeo Academiâ, uti tunc vocabatur, in Universitatem erexit; (prout hoc quoque singulari indicat omine elegans Anni MD CXXIII Eteostichon: E X A C A D E M I A U N I V E R S I T A S) ita ut in Universitate Altdorfina profitentes, studentes, titulumq; seu gradum aliquem assumentes (uti verba habent Cæsarei Diplomatis) gaudeant & potiantur, utiq; frui gaudere & potiri possint ac debeant, omnibus & quibuscunq; gratiis, honoribus, dignitatibus, præmiis, immunitatibus, privilegiis, franchisiis, concessionibus, favoribus

S 3

& in-



*Et indultis, ac aliis quibuslibet, quibus Universitas Colonienfis, Viennensis, Tubingenfis, Friburgensis, Ingolstadiensis, Argentinensis, ac alia studia privilegiata, nec non Doctores, Licentiat, Magistri, Baccalarii & Scholastici, in supra dictarum facultatum una vel altera, isthic promori, aut aliqua dignitate seu gradu insigniri, gaudent, utuntur, fruuntur & potiuntur, quomodo libet, consuetudine vel de Jure, &c. Id tantum addere hic liceat, quod peractis tam in Templo quam Collegio sollennibus sacris, in Arce Altdorfinæ Convivium magnifice splendideq; apparatus fuerit, quò juxta cum Legato Cæsareo, Principe Palatino, ac Perillustri Dñ. Barone, Dn. Georgio Alberto à Wolfstein, Dynasta in Obersulzbürg & Pyrbaum &c. circiter ducenti tum extranei Nobiles, tum Senatores Patriciiq; & Consilarii Reip. Norimb., nec non ejusdem Civitatis Theologi, Advocati, Medici, aliiq; cives primarii, ac pari splendore Hospites; humilioris verò conditionis plures quadringentis, de publico fuerunt excepti. Eodem in epulo, nomine Incl. SENATVS NORIMB. Poculum argenteum inauratum, magni ponderis, atq; affabrè factum, à Magnifico DN. GEORGIO VOLCAMERO, Duumviro primario, Dn. Rectori cæterisq; Professoribus tunc præsentibus ac futuris, in memoriam alterius hujus Natalis Academiae, dono datum fuit. In cujus Poculi (quod hodieq; POCVLVM ACADEMICVM appellatur) operculo hæc incisa sunt verba:*

# UNIVERSITATIS ALTDORFINÆ

*Bonæ fundatæ publicæ*

RECTORI MAGNIFICO, DOCTORIBVS,  
PROFESSORIBVS, *Viris Clarissimis,*

*ac eorundem successoribus,*  
*in perennaturam rei memoriam,*  
*Inaugurale hoc Poculum*

CONSS. ET SENATVS R. P. NORIMB.  
cum voto destinârunt

A. S. MDCCXXIII, Anniversario  
Petro-Paulino.



In fundo autem sive pede hæc insculpta leguntur:

*Curatoribus Vniuers. Altorph.*

CHRISTOPH. FÜRER,  
GEORG. CHRIST. VOLCAMER,  
VLTRICO GRVNDHERR,  
CAROLO SCHLVSSELFELDER.

*Pro-Cancellario*

PHILIP. CAMERARIO IC.

*Opidi Altorph. Præfecto*

GEORGIO POEMERO.

Festi hujus Panegyrici mentionem quoque facit Martin. Zeillerus, in Germania sua Nov-antiqua, oder in der Reis-Beschreibung durch Hoch- und Nieder-Deutschland / Cap. XIV, pag. 326, dum scribit: A. 1578 ist allda (zu Altdorf) etne Academia introduciert worden / welche izige Keiserl. Maj. Ferdinandus II. A. 1622 zu einer Vniuersität gemacht: Und ist die Einführung solcher neuen Vniuersität den 29 Jun. Anno 1623 ganz prächtig angestellt und verrichtet worden. Confer cum hoc Zeilleri loco, Topographiam Franconia: Math. Merians edit. Francof. 1648: pag. 13 & seqq.

Pag. ead. 7. lin. 21: **WELSERI, aliq. plures]** Quos inter & GROLANDI, HOLZSCHVERI, MVFFELII, RIETERI, STARCKII, TVCHERI &c. Recensita sunt Nobilissima hæcce Nomina habito ad literas initiales respectu. Præterea Musarum Altdorfinarum Patronis, cum primis ratione Bibliothecæ publ. & muscorum in Collegio, annumerandi sunt ÖLHAFII, SCHEVRELII &c.

Pag. ead. 7. lin. 26: *In designandis semper* **SCHOLARCHIS QVATVOR]** Hic non abre fuerit debita cum veneratione referre Nomina DNN. Scholarcharum Curatorumq; ex Ampliss. SENATORIO ORDINE Academia huic à prima ejus fundatione præfectorum, eâ quidem, quam Collegii porticus nobis exhibet, serie:

JOACHIMVS HALLER.  
GEORGIVS VOLCAMER.  
THOMAS LÖFFELHOLZ.

HIE-



HIERONYMVS PAVMGARTNER.  
 PHILIPPVS GEVDER.  
 WILIBALDVS SCHLVSSELFELDER.  
 BARTHOLOMÆVS POEMER.  
 ANTONIVS GEVDER.  
 PAVLVS KOHLER.  
 IVLIVS GEVDER.  
 MARTINVS HALLER.  
 GEORGIVS VOLCAMER.  
 JACOBVS POEMER.  
 LEONHARDVS GRVNDHERR.  
 MARTINVS PFINZING.  
 CHRISTOPHORVS LÖFFELHOLZ.  
 WOLFGANGVS HARSDÖRFER.  
 CHRISTOPHORVS FÜRER.  
 GEORG. CHRISTOPH. VOLCAMER.  
 VLRICVS GRVNDHERR.  
 CAROLVS SCHLVSSELFELDER.  
 JOH. FRIDERICVS LÖFFELHOLZ.  
 GEORG. PAVLVS NÜTZEL.  
 LVCAS FRIDERICVS BEHAIM.  
 GEORGIVS IM HOF.  
 ALBERTVS POEMER.  
 JODOCVS CHRISTOPH. KRESS.  
 LEONHARDVS GRVNDHERR.  
 VITVS GEORG. HOLZSCHVER.  
 JOH. JACOBVS STARCK.  
 GEORG. SIGISMVNDVS FÜRER.  
 SEBALDVS WELSER.  
 GABRIEL NÜTZEL.  
 GEORG. FRIDERICVS BEHAIM.  
 HIERON. WILHELM. SCHLVSSELFELDER.  
 WILHELMVS IM HOF.  
 JOH. PAVLVS PAVMGARTNER.  
 CAROLVS WELSER.

Pag.



Pag. ead. 7. lin. 27: *Ac Procancellario*] Nomina DNN. Procancellariorum Acad. Altdorfinae sunt:

PHILIPPVS CAMERARIVS.  
GEORGIVS REMVS.  
JOH. CHRISTOPH. ÖLHAFEN.  
GEORGIVS RICHTER.  
TOBIAS ÖLHAFEN.  
MAGNVS FETZER.

Pag. 8. lin. 2: *Eodem, quo ipsum hoc sollemniter accidit, natus anno*] Natus est FERDINANDVS II d. 9 Jul. A. C. 1578.

Pag. ead. 8. lin. 6, 7: *De coeli salubritate lociq; & consiniorum multijuga amœnitate*] Elevationem poli sive Latitudinem loci ad gradum 49, cum dimidio, statuunt communiter. Cæterum è rebus naturalibus haud parum corpus afficiat cœli aërisq; dispositio, quæ habitum animi sua pro varietate mirum in modum sæpe mutare valet. Talis verò est in tractu nostro Altdorfino, quæ mollia ut plurimum literatorum corpora, repentinâ h. e. naturæ inimicâ mutatione nec adstringat, nec resolvat, sed per intermedium sensim ad oppositum deducat, satis utiliter regimini sanitatis. Tradit Plinius, Locris & Crotone, amplissimis ac famosissimis olim locis, pestilentiam nunquam fuisse; id quod de Crotone etiam vetus confirmat proverbium, cuius Strabo meminit: *Τριέσπερον Κρότωνος*, quò utebantur loci salubritatem & aëris bonitatem commendare volentes. Pari felicitate Oppidum hoc & Lyceum, singulari DEI benignitate, publicas sæpe calamitates sunt eluctata; & confirmant quidam è civibus natu grandioribus, cum in bello superiore Germanico infesta lues vicinos circumcirca perculisset, eam locum hunc vix ac ne vix quidem attigisse. Adhæc laudari meretur suburbani soli & vicinæ amœnitas. Si varietas delectat, & *μεγαλολὴ πάντων γλυκὺ*, ecce agros, pagos, prata, vireta, hortos florum, frugum, lupuliq; feraces. Egressus urbe, utcumq; in orbem circumagas oculos, mirè varians Naturæ facies se pandit, alibi in planitiem extensa proximis ad oppidum ambulacris, alibi colliculis assurgens ad montium usque juga, hic herbescens sativis, ibi virescens sponte natis, commen-

T

data



data non ab incolis tantum & accolis, sed à peregrinis etiam; adeoque  
justioribus rerum æstimatoribus. Ambulacra inter, jucundiora sunt  
*via Philosophica, via Scipionii, via ad Ruperti fonticulum*; quarum po-  
stremam Rupertus ipse sub Præfationis sive Dialogismi Mercurio  
Epistolari præmissi initium, Apellis aut Polygnotti instar, graphicè  
depinxit.

*Nec minus interea sæta nemus omne gravescit,  
muros Altdorfi quod partes cingit in omnes,  
aribus humanis & commoda ligna ministrat,  
sponte sua quæ contendunt ad sidera cæli,  
extensis late ramisq; injussa virescunt:  
pini alta, atq; habitæ Graji oracula quercus,  
& tædæ piceæ, Phæbo splendente, fluentes  
succis, sic rilia, sic alni gloria &c.*

Uti habent versus laudati supr. Gundermanni, Senioris quondam  
Norimbergæ ad Divum Egidii Venerabilis, multosq; per annos me-  
ritissimi.

Pag. ead. 8. lin. 9, 10: *Aptissimo ornatu exstructum Collegium]*  
De Collegii fundatione nonnihil jam pag. 5. & 6. dictum. Audiatur  
hæc iterum Encomiaſtes ille noſter:

*E mundo solem tollat, qui tollere tener  
doctas Musarum sedes, sacrasq; paleſtras.  
Idcirco Procereſ insignes Noridos urbi,  
funtibus haud parvis, haud exiguoq; labore,  
Structuræ Altdorfi fundamina ponere saxi  
cœperunt, & eam veteri de more vocarunt  
nomine COLLEGI, Phæbo Maſisq; dicati.  
Diverſis opus hoc domibus conſurgit in auras  
quatuor, ad patuli regiones quatuor orbis,  
quæ ſunt porticibus longis, crebrisq; ſenſtris  
egregiæ, nec non hypocausti ordine multæ:  
quarum exire unâ turris quadrata videtur,  
campanæ tinnitus ubi dat quamlibet horæ &c.  
Excelsæ etiam Collegi nobilis ædes  
Nobilis ornavit Sapientia Norica Fonte,  
in medio qui ſtat cancellis undiq; cinctus,  
dives aqua, longæ quam nocte dieq; miniſtrant  
ſiſtula arenoſo concluda corpore terra.*

Col-



Collegium hoc ædificari cœptum est Anno 1571, consummatum  
A. 1574.

Pag. ead. 8. lin. 16: *Acroateria quatuor*] (1) Theologicum, idq;  
amplissimum, cui junctum (2) Philosophicum, (3) Welferianum,  
(4) Mathematicum. Welferianum, idemq; nitidissimum, Jurispru-  
dentia studio imprimis, cunctisq; Actibus publicis, destinatum, con-  
dendum, exædificandum, præterea iconibus quatuor Ecclesiæ Lu-  
minum, *Augustini, Chrysostomi, Hieronymi, & Gregorii Magni*, exor-  
nandum curavit, *Sebastiani Welferi, & Maria Halleræ*, Filius, SE-  
BALDVS WELSER, Patricius Augustanus & Noribergensis, Reip.  
nostræ Senator, A. C. 1557. d. 10 Septembr. bono publico natus,  
ac A. 1589, mense Augusto, Vlmæ (cum Dn. ANTONIO GEV-  
DERO, Reip. Norib. causâ eò ad Circularem conventum ablega-  
tus) immaturo fato defunctus, ibidemq; sepultus Monumentum  
in perennem Fundatoris memoriam, supra Acroaterii hujus Altdor-  
fini cathedram, marmorea in tabula erectum, tale exstat:

DEO VNI ET TRINO SACRVM.

SEBALDVS WELSER, PATRICIVS AVGVSTANVS ET NO-  
RIBERGENSIS, LOCVM HVNC, PVBLICIS ALTDORFIA-  
NÆ SCHOLÆ VSIBVS DESTINATVM, SVA IMPENSA  
EXORNARI FECIT, CAL. JVNII ANNO A NATO CHRIS-  
TO M D XXCII.

Pag. ead. 8. lin. 19: *Anatomes theatrum*] De hoc vid. pag. 82,  
& Additam.

Pag. ead. 8. lin. 21: *Sacrata ad publicos usus Bibliothecæ quot-  
annis accrescens museum*] Primordia Bibliothecæ Academicæ,  
ratione Loci, quem nunc habitat, colligere quodammodo licet ex In-  
scriptione sequente, quæ in eadem supra MSSorum scrinia con-  
spicitur:

BIBLIOTHECA

huc translata

auspiciis

*Nobiliss. Ampliss. Dnn. Scholarum*

LVCÆ FRIDERICI BEHAIM,  
ALBERTI POEMERI,

T 2

GEOR-



146. (146)

GEORGII IM HOF,  
JODOCI CHRISTOPH. KRESS,

Septemviri & Senatorum  
optimè merentium,

*Rectore Magnifico*

THEODORICO HACKSPAN,  
SS. Linguae Profess. Pub.  
*Bibliothecario*

GEORGIO KÖNIG, SS. Theol. D.

Anno

M DC XLIV.

Hunc anni 1644 numerum exprimit distichon itidem intus Biblio-  
thecæ foribus inscriptum:

*Norica quas Capiat CVras Vrbs InCLVta Phabi,  
his Monet expensis Bibliotheca novis.*

Initia verò sumsit hæc libraria nostra à Bibliotheca *Georgii Sigelii*  
S. Theol. Prof. & Amistius Ecclesiæ Aldorfinae, quæ jam inde  
ab anno 1598 in superiore quodam ambulacri servabatur conclavi.  
Incrementa cepit liberalitate *Georgii Vogelii*, cujus honori in eodem  
literarum sacrario hæc consecrata est Epigraphe:

MEMORIÆ ÆTERNÆ SACRVM

GEORGI VOGELI,

QVI HONESTO LOCO NATVS NORIBERGÆ,

HONESTATI ETIAM PIETATIQUE,

DVM VIXIT, LITAVIT,

HANC ACADEMIAM STUDIORVM

SVORVM NVTRICEM

VITÆQVE ET MORVM RECTRICEM

LEGATO CCC. FLORENORVM

IN VSV BIBLIOTHECÆ

GRATE PIEQVE PROSECVTVS.

OBIIT LVGDVNI BATAVORVM

AN. clc lxxvi. PRID. NON. JANVAR.

FOR.



FORMA, GENVS, SPLENDORQVE ET OPES,  
POST FATA VALETE:  
HOC HABEO, QVODCVNQVE DEDI PIETATE  
MAGISTRA.

Præ cæteris verò sempiternæ commendari meretur gloriæ Strenuus ac Nobilissimus Vir JOHANNES JODOCVS SCHMIDTMAIER, ab & in Schwarzenbruck, Patre cognomine *Joh. Jodoco Schmidmaier*, & *Maria Magdalena Nützelin*, prognatus A. C. 1611, d. 4 April. ac denatus d. 24 Decembr. A. 1647. Hic namque vivus adhuc donativo florenorum mille ad conservandam & augendam singulis annis Bibliothecam, plurimum sibi nostras obstrinxit Musas. Sacra Parentalia Diis Manibus ejusdem publica pietate persolvit B. *Joh. Paulus Feirvingerus*; cujus in Orat. Funeb. hæc sunt verba: *Nonne satis magnificum, quod non diuturna ac morosa deliberatione prævia, (quæ munus hoc reddidisset quodammodo tardum) sed hilariter, admonitus solùm à Viro Magnifico, Nobilissimo Ampliss. atq. Prudentissimo DN. LVCA FRIDERICO BEHAIMO, Incluta Reip. Norimb. Septemviro Gravissimo, Universitatis hujus Proto-Scholarcha Meritissimo, literarum ac literatorum Patre Optimo, in Bibliotheca Altdorphina utilitatem & augmentum, vivus Universitati donavit mille florenos, ut ex eorum usu fructu singulis annis accessione novorum librorum augetetur, & locupletior redderetur.* De cætero effigiem Insignis hujus literatorum Mæcenatis veneramus etiam nunc in eodem nostro magnorum animorum & æternitatis Capitolio. Suum quoq; præconium meritò deferendum est Perillustri ac Generosissimo DN. DN. JOH. DIETERICO S. R. I. Nobili Bandophoro, & L. B. à Taube, Toparchæ in Neukirchen, Hartha, Franckenthal, Höckericht &c. qui Athenis hisce Noticiis studiorum causa commoratus, & acerbo funeremersus, legato trecentorum florenorum, nostram quoq; ornare & adaugere voluit librariam supellectilem. Imaginem ejus ac simulacrum pariter spectare licet in mundo satis ac nitido Bibliothecæ nostræ conclavi. Monumentum verò vexillo insertum, & ad memoriam æternitatis in Templi Oppidani choro (ubi amplissimè funeratus est) juxta cum insignibus suspensum, annos Nativitatis ac Mortis ita eloquitur: *Der Wolgeborne Herr / Herr Johann Dieterich*



rich / des H. Röm. Reichs Edel Panner und Freyherr von Taub/  
 uf Meutirch / Hartha / Frankenthal und Höckerich. Ist geböhren  
 Anno 1626, den 23 Augusti, in der Churfürstlichen Haupt-Beistung  
 Dresden: gestorben 1647/ den 18 Febr. zu Altdorf / und folgenden  
 Monat Martii / als den 31/zu der Erden bestattet worden. Lauda-  
 tione posthuma ipsi parentavit *Nicolaus Rittershusius*, in qua, inter  
 alia, sic loquitur: *Immane nefas contraherem, si reticerem laudissima &  
 amplissima Ecclesia, Universitati & Bibliotheca nostrae relicta legata ul-  
 timo elogio suo, ob quae meritissimo jure inter Patronos hujus Altdorfinae Mi-  
 nervae referetur, ejusq. illustre nomen tanquam in peplo quodam, ut olim  
 Homericus Heroës, intextum fulgebit, nec unquam grate memoria nostra  
 elabatur.* Accessit deinde publico nostro penori librario, Bibliotheca  
 SEBALDI SNELLII, Alumnorum Noricorum Inspectoris, Viri  
 Clarissimi, inque literis Ebraicis ac Rabbiniis exercitatissimi, & ex  
 doctissimo Tractatu adversus Abarbenelem scripto, in quo argu-  
 menta hujus contra fidem Christianam allata, eruditè examinat, refu-  
 tatq; item ex non paucorum è Lipmaño in latinum translatione, haud  
 incelebris; qui obiit Anno 1651. Accesserunt insuper Bibliotheca  
 B. LVDOVICI JUNGERMANNI, Medici & Botanici nostra-  
 ris celeberrimi; (vid. supr. Orat. de Medicis Altdorf. pag. 82) nec  
 non è libraria supellectile DN. PAVLI PÜHLERI LL. Candidati,  
 heic mortui A. 1647, complura volumina. Magna quoq; (mille vi-  
 delicet & quadraginta voluminum) accessio facta est ex Viri Summi,  
 DN. JOH. CHRISTOPHORI ÖLHAFII ab & in Schöllnbach,  
 Patr. Nor. Juri Celeberrimi, Comitum Pal. Cæs. Ejusdemq; Maje-  
 statis, Ordinis Teutonici, Ducum Saxoniae, Reip. Norimb. alio-  
 rumq; S. Imperii Ordinum, Consilarii, Universitatis nostrae Procan-  
 cellarii &c. Bibliotheca selectissima. Quae quidem ut materiam cre-  
 scendi suppeditaret Publicae nostrae, curavit partim Amplissimorum  
 DNN. SCHOLARCHARVM munificentia, partim ipsius Filii HIE-  
 RONYMI ÖLHAFII propensa in Lyceum nostrum liberalitas;  
 prout id ex sequente, quae pariter in nostra isthac Musarum æde legi-  
 tur, dispalescit Inscriptione:

IN



IN HAC BIBLIOTHECÆ PARTE,  
 (EX ALTERA EMTIONIS TITVLO A FRATRE  
 ACQVISITA HVICQVE ADDITA  
 MAGNIFICO NOBILISSIMO PERSTRENVO AC  
 PRVDENTISSIMO  
 CVRATORVM ACADEMIÆ HVJVS COLLEGIO,  
 SINGVLARIS MVNIFICENTIÆ GLORIAM SIBI  
 VINDICANTE)  
 OLIM SVA,  
 NVNC LEGATI JVRÉ NOSTRA  
 VIVERE VOLVIT ET NOMINIS FAMAM PER-  
 PETVARE  
 CÆTERA MORTALIS  
 VIR NOBILISSIMVS  
 DN. HIERONYMVS ÖLHAFEN A SCHÖLLENBACH,  
 PATRIC. NORICVS,  
 QVI COLLATIS AMPLISSIMIS BENEFICIIS  
 A MAGNIFICO ET NOBILISSIMO PARENTE  
 DN. JOH. CHRISTOPHORO ÖLHAFIO  
 AB ET IN SCHÖLLENBACH  
 JCTO CELEBERRIMO  
 IN HANC VNIVERSITATEM, CVJVS ERAT  
 PROCANCELLARIVS  
 HANC ETIAM PATERNÆ HEREDITATIS PARTEM  
 TESTAMENTO ADJECIT.  
 CVI GRATITVDINIS TEST. ERGO H. M. L. M. P.  
 ACADEMIA ALTDORFINA  
 clō lōc LIX.

Atque ita ab exiguis profecta initiis, haud contemnendas in opes cre-  
 vit Bibliotheca nostra Academica; nec pœnitendis crescit crescetq;  
 auctibus, destinatis ad hos quotannis florenis octoginta. Neque de-  
 stituitur MSSis omnino Codicibus; quos inter commemorari me-  
 rentur Codex partem maximam membranaceus, Evangelia quatuor,  
 Matthæi, Marci, Lucæ & Johannis, antiquâ Syriacâ lingvâ & literâ  
 conscripta exhibens; libellus antiquus Orationum, lingvâ Abyssi-  
 nensium descriptus, P. Orosius cum Ravennate MStus, Codex R.  
 Lip-



Lipmanni *Nizachon*, quem B. Hackspanius primus luci publicæ exposuit; (de quo vid. Celeberr. Wagenseilius in *Sora*, & Append. quidem pag. 3. & seqq.) ac plura alia, cum primis Joh. Prætorii, insignis illius Mathematici (de quo vid. supr. pag. 109, 110) MSSa quamplurima. Bibliothecæ hujus publicæ Præfectus primus fuit maximè Rev. Dn. D. GEORGIUS KÖNIGIVS, S. Theol. D. Prof. Primarius & Ecclesiæ Antistes; secundus isque etiam nunc (utinam diu!) superstes, Ejusdem *πατρις* Filius GEORGIUS MATTHIAS KÖNIGIVS, Græc. Lingv. & Poët. Prof. P. Bibliothecæ Veteris Novæq; Auctor longè Clarissimus, atque ipse *ἐπισκοπὸς βιβλιοθήκης*.

Pag. ead. 8. lin. 29: *Præside Inspectore, viro semper doctissimo*  
Nomina Dnn. Inspectorum Alumnor. Noricor. ab Anno Chr. 1575.  
sunt:

- M. Caspar Odontius.
- M. Henricus Rifius.
- M. Johannes Weidner.
- M. Johannes Stamler.
- M. Johannes Ingolstetter.
- M. Johannes Breu.
- M. Martinus Geislinger.
- M. Johannes Hagendorn.
- M. Johannes Zunner.
- M. Abraham Boxbarter.
- M. Christophorus Leibnitz.
- M. Leonhardus Lemmermann.
- M. Jeremias Hölzlin.
- M. Johannes Albinus.
- M. Johannes Saubertus.
- M. Johannes Schäfer.
- M. Cornelius Marci.
- M. Jacobus Bruno.
- M. Johannes Weimann.
- M. Marcus Kräer.
- M. Joh. Paulus Felwinger.
- M. Joh. Henricus Blendinger.

M. Mat-



M. Martinus Beer.  
 M. Sebaldu Schnell.  
 M. Joh. Conradus Düra.  
 M. Johannes Held.  
 M. Johannes Ehe.  
 M. Joh. Elias Rew.  
 M. Justus Jacobus Müller.  
 M. Georgius Paulus Röttenbeck.  
 M. Georgius Albertus Hagendorn.

Fuit Alumneum hoc eruditorum virorum semper ferax, & est hodie appa-  
 rata bonorum librorum, Alumnorum usibus inservientium,  
 copia instructum.

Pag. 8. lin. ult. & pag. 9: lin. 1. ac seqq. *Ambulacra, superius al-  
 terum, alterum inferius -- septem nitida, nec sine multis  
 singularibus commoditatibus, præbet receptacula* Infer-  
 rioris ambulacri musea & cubicula, ad dextram, FVRERI, PAVM-  
 GARTNERI, TETZELII, LÖFFELHOLZII, ad sinistram,  
 NVTZELII, VOLCAMERI, SCHEVRELII, splendide exstrui  
 curarunt; Ambulacri verò sive pavimenti superioris conclavia, ad  
 dextram, POEMERI, TVCHERI, DERRERI, HOLZSCHV-  
 ERI, ad lævam, rursus TVCHERI, PFINZINGII, ÖLHAFII.

Pag. 9, lin. 16, 17: *Ad publicos Dnn. Professorum conventus,  
 aliosq; congressus sollemniore destina verit.*] Maximè Reve-  
 rendus Dn. D. SAVBERTVS in Orat. Domin. III Trinit. 1677, in  
 Inauguratione novi Rectoris habita, postquam amissum deplorave-  
 rat FVRERVM, ita pergit: *Audiri pariter tamen, (hesterna panegy-  
 ris) sensitq; jamdum, ac sentiet amplius profectò, omnem, quam questi me-  
 ritò sumus, jacturam generoso spiritu resarcire nobis Diuinum Heroa,  
 (sic prænomen ejus interpretari liceat) successorem perinde illustrem, &  
 quod cognomen, & totus ipse, quantus est, spondet, nil à Semone nisi utilia,  
 commoda, & quæ Ecclesia ac literaria rei emolumento sint, omnino  
 expectabimus. Et spectate insignia nec reticenda auspicia. Ejusdem scilicet  
 munificentie debemus egregium publicis Senatus conventibus, administran-  
 da justitiæ, cognoscendis causis, cogendis consiliis, ex animibus quoq; candi-  
 datorum, ante hos quasi sex menses destinatum conclave &c.*



Pag. 10. lin. 15 : *Nostri Universitatis horti*] De Horto nostro Medico vid. pag. 81. 82. 83. & Additam.

Pag. 12. lin. 4 : *Julius Conradus Otto*] Prius *Naphtali Margolith* dictus. Gali Rasia, *Occultorum detectio*, prodiit Norimbergæ 1605, f. 4. Exstat & Grammatica ejusdem Ebræa f. 8. edita Norimb. 1605. De hominis nequitia & fraude vid. Clariss. Wagenfeilius in Sota pag. 704 & 705. Tradit Andr. Calagius in Natalibus Virorum Illustr. pag. 287, Ottonem hunc, patre Martino Philippo, matre Maria Magdalena, Viennæ Austr. natum esse. A. 1562.

Pag. 15. lin. 4, 5 : *tredecim millia*] Matth. Merian in Topograph. Franconiæ loc. supr. p. 141. cit. de Lyceo nostro : Es sind nicht allein von allen Orten des Hoch- und Nieder-Deutschlandes / sondern / auch Engelländer / Dennemärker / Franzosen / Irländer / Schotten / Italiäner / Liffländer / Lothringer / Pohlen / Neussen / Savoyer / Schweden / Siebenbürger / Ungarn &c. Studirens halber / und darunter auch viel hohen und mittelmässigen Standes / hieher kommen ; weils die Herren Professores fleissig und fundamentaliter docirrt &c.

Pag. 15. lin. 5. *Principes tres*] Horum primus erat JANVSSIVS RADZIWIŁ, Birlarum & Dubinkorum Dux, S. R. I. Princeps, Jagellonica propaginis furculus, atavis editus Regibus, & in Poloniæ solio toties collocatus & coronatus sanguis. Contulit se huc studiorum excolendorum causâ. V Idus Decembr. A. C. 1630. Nomen dedit matriculæ d. 20 Jan. A. 1631, juxta cum Aulæ Mareschallo, Aulæ Magistro, & qui pariter à sacris consiliis erat, Studiorum Moderatore, ephēbis insuper ac ministris duodecim. Ipse Princeps albis Studioforum plerumq; inscripsit: *Invidiam spero, Misericordiam sperno*. Factus postea Palatinus Vilnensis, & exercituum magni Ducatus Lithuanicæ Supremus Generalis. Deinde verò A. 1676, Serenissimus Princeps ac Dominus, Dn. ADOLPHVS JOHANNES, Comes Palatinus Rheni, ac Dux Bipontinus &c CAROLI GVSTAVI, Inviçtissimi Sueconum Regis, gloriosissimæ memoriæ, Frater, pretiosa duo pignora, Filios Principes, ADOLPHVM JOHANNEM, & GVSTAVVM SAMVELEM, Comites Palatinos Rheni &c in Musarū nostrarum sinum deposuit, ac speciatim curæ & institutioni concedidit Celeberr. nostri *Wagenfeili*. Per cujus etiam manus mox post *Aedai* hujus *Paris* adventum, Nummus argenteus, sive uti nunc barbare



barè vocant, metallo, Patribus Academiae hujus Nutritiis, ejusdemq;  
Professoribus, velut favoris ac propensae voluntatis arrhabo, jussu PA-  
RENTIS Serenissimi, oblatus est, ut illi vicissim dulcissimos liberos,  
honorarios Universitatis Cives, tuerentur, ac bona haec sua sanctè cu-  
stodirent. In altera Nummi illius parte blandi Filiorum duorum Prin-  
cipum exhibentur vultus, circum quos haec leguntur verba: ADOL-  
PHVS JOHANNES ET GVSTAVVS SAMVEL. DEI GRATIA:  
in altera, reliqua leguntur illa: COMITES PALAT. RHENI.  
BAV. JVL. CLIV. ET MONT. DVCES. ac versus hic ferto inser-  
tus: NOS PATER AENEAS ET AVVNCVLVS EXCITAT  
HECTOR. Neque verò id indignum mentione, quod com-  
plures summo loco Principes, Principumq; Legati Splendidissimi,  
& aliae Personae Illustres, Noricam hanc Universitatem subinde invi-  
serint, & ut magni Hospites salutaverint. E quibus non possumus  
non praedicare Reverendissimum Principem ac Dominum, DN.  
JOH. SWEIGHARDVM, Archiepiscopum Moguntiaum, S. Rom.  
Imp. Electorem, & per Germaniam Archicancellarium &c qui  
Aldorfium nostrum anno seculi hujus sexto decimo ingressus, &  
publico Academiae nomine, à Michaelè Piccarto, Philosopho, se-  
quente exceptus est Oratione:

Reverendissime atque Serenissime S. Rom. Imp. Prin-  
ceps Elector, Archicancellarie per Germaniam,  
& Archiepiscopo Moguntine dignissime,

DOMINE CLEMENTISSIME!

**V**etus est verbum & communi jam hominum consensu ra-  
tum: Neq; ingentem dolorem, neq; ingentem latitiam, posse  
animo contineri nimium diu: Vterq; videlicet affectus prodit  
nobis saepe imprudentibus, quandoq; invitis etiam & reluctanti-  
bus. Ut enim praegnantès faeminae, cum fetus jam maturuit;  
cum hora pariendo appetit, gliscentes utero dolores ferre non pos-  
sunt, & necesse habent aut nitendo erumpere, aut renitendo dis-  
rumpi: Ita fetus animi, maxime autem illi, qui sua sponte gi-  
gnuntur, quorum neque conceptus neq; ortus in nostra potestate  
sunt,

V 2



sunt, suâ vi nos in modum torrentis rapiunt; si tenes effluunt, si premis opprimunt; si cogis erumpunt. Hoc adeo sensi hodie, Reverendissime & Serenissime Princeps, in faustissimo illustrissimoq; tuo in hoc oppidum ingressu. Tantam enim tamq; raram & inusitatam benignitatem, tam promptam atq; apertam mansuetudinem silentio premere & coercere non est profectò mearum virium: plus ista valent ad vim & necessitatem dicendi afferendam, quàm ego ad propulsandam. Quod si facilius est, ut ajunt, viro sapienti flammam ardentem ore clausam tenere, quàm lepidum verbum, si opportunè dici videatur, non proferre; vos cogitate, qui circumstitis, Viri Præstantissimi, quantò mihi sit laboriosius homini juveni in tanta tum publica Amplissima Reipub. Noricæ, tum privata hujus Academia gratulandi occasione, frenare ac sistere linguam, atq; exitu suo prohibere totos, ut sic dicam, gaudiorum exercitus. Ita sumus homines, ut delectemur honoribus atq; amoris ac benevolentia indicis, suntq; tantò gratiora ea nobis, quantò à majoribus & eminentioribus ostenduntur. Quis verò major honor obtingere nobis potuit? qua illustriora Clementissimi affectus testimonia? quàm cum tu, Reverendissime & Serenissime Princeps, Domine Clementissime, hoc oppidum ingressus es, & hospitium tibi hic parari voluisti, tu inquam, qui es Augustissimi nostri Caesaris MATTHIÆ oculus, Imperii Germanici dextra, Patria communis, ut atate, sic affectu pater: qui rebus afflictis solatio, nutantibus firmamento, collabentibus subsidio es: qui pacem auream spargis super terras, bella verò bellorumq; clades, consilio, auctoritate, omni deniq; ope procul ad barbaros relegas, qui deniq; urbem nostram ejusq; prudentissimum Senatum, clementissimè complecteris, ejusq; incolumitatem & dignitatem cura cordiq; habes. Quæ se hic aperit latitia seges? qui montes gaudiorum? qua maria voluptatum? Mihi tamen accidit nunc, quod ventriosis vasis, qua angustosunt orificio, evenire videmus, ea siliquorem conceptum uno velint



velint effundere impetu, nihil agunt, luctantes enim ad orificium unda invicem impellunt se repellantq., ut sic vix guttatim humor emittatur: ita prorsus hic gaudiorum cumulus, dicere conantem obruit, & dum multa festinant dici, impediuntur omnia, gestit solum animus, & huius abundantia signa ipsa impotentia profitetur. E plurimis unum hoc licet, nullum huic Academia aut Oppido, diem illuxisse sereniorum, festiviorum, latiorum, nullum honoratiorum, nullum deniq. augustiorum, cuius inclita immortalisq. tui beneficii memoria sanctissime etiam hic conservabitur, neque eam statua aut postes loquentur, sed cordibus nostris inscribetur, & animis posteritatiq. servastudiosè commendabitur, non illa vetustate oblitterabitur, non sepelietur oblivione, non celabitur invidia, id quod Reverendissima & Serenissima Celsitudini tuae, nomine publico, spondeo & promitto. Quod reliquum est, Reverendissimam & Serenissimam Celsitudinem tuam, Amplissimi Senatus Norici Domini Legati, & Academia nostra, reverenter & demissè rogant, ut illa pro Heroica sua virtute, tenuitatem hospitii, benignè accipere boniq. consulere, affectum verò hunc Reipub. & Academia nostra in posterum quoq. servare clementissime velit: persuasissimum contra volunt Reverendissima & Serenissima tua Celsitudini esse: etiamsi virtutum suarum divinarum admiratores & pracones tota Europa habeat plurimos, qui tamen demissius insuper eam veneretur, colat & observet, fore pra se paucos, aut etiam neminem.

Porro dum Serenissimum Celsissimumque Principem ac Dominum, DN. CHRISTIANVM AVGVSTVM, Comitem Palatinum Rheni &c Domus Sulzbacensis, qui Actui Philosophico d. 30 Jun. A. 1650 celebrato, clementissime interfuit, aliaq. plura maxima maximorum Hospitum nomina religioso veneramur silentio, illud reticere non possumus, quod ante sexennium, intra anni unius spatium, praesentia sua Principes sex Serenissimi Universitatem hanc reddiderint illustriorem: nimirum laudati antè summa cum animi sub-



missione ADOLFVS JOHANNES, Pater, Filiq; duo Principes, ADOLFVS JOHANNES & GVSTAVVS SAMVEL, Comites Palatini Rheni &c atq; insuper Fratres Principes PHILIPPVS atq; HENRICVS, Duces Saxoniae &c nec non JVLIVS SIGISMVNDVS, Dux Wirtembergensis, Teccensis & Ölsensis in Silesia &c. Oribus omnibus Principibus Optimis Max. Academia nostra, tantæ Illorum clementiæ nondum oblita, vitam precatur, & principalibus singulorum virtutibus dignissimam felicitatem.

Pag. ead. 15. lin. 8, 9: *Eorum octo Magistratus sceptris communibus suffragiis fuere collata* Primus ex personis Illustribus Rector Academiae renunciatus est A. 1582, DN. JOH. CHRISTOPHORVS à Tischenembl, Baro Austriacus. Hujus Prorektor erat Joh. Busereut, J.V.D. (2) DN. NICOLAVS, Comes AB OSTRO-ROG, Polonus, A. 1583. Hujus Prorektor fuit Nicolaus Taurellus, Med. D. (3) DN. ABRAHAMVS, Burggravius & Baro ADHONA, A. 1598. Prorektor Scipio Gentilis, V.J.D. (4) DN. RADISLAVS Baro A WCHYNIZ & TETAV, A. 1600. Prorektor M. Georgius Glacianus. (5) DN. CHRISTOPHORVS GANS, L.B. in Putliz, A. 1606. Prorektor Conradus Rittershusius, V.J.D. (6) DN. ADAMVS A SIENNE SIENIENSKY, Palatinus Podoliae, A. 1609. Prorektor Andreas Dinnerus J.Ctus. (7) DN. GOTHOFREDVS HENRICVS S. Rom. Imp. Mareschallus Hereditarius, Baro IN PAPPENHEIM, & Dominus in Treichtlingen A. 1610. Prorektor Scipio Gentilis, V.J.D. (8) DN. ACHATIVS Junior, Burggravius & Baro ADHONA, A. 1619. Prorektor Michael Virdungus. Rectoris hujus postremi Curriculum annuum typis impressum cernitur, hoc sub titulo: ACHATII JUNIORIS BVRGGRAVII ET BARONIS ADHONA, RECTORIS ACADEMICI in Inchyta & florentissima Praepotentis Reip. Norica Academia Altdorfina Annuum Curriculum, coeptum feriis Academiae sollemnibus, mense Jun. clo lxxix, terminatum iisdem feriis clo lxxx. Altdorf. Noric. 1620. Ad Rectorem Illustrem tertium, ABRAHAMVM Burggraviu ADHONA, notare obiter liceat, quod Ejus Dn. Frater HENRICVS, sub Rectoratu Illius, heic Altdorfii tumultatus fuerit. Monumentum sepulchrale, Ipsi statutum in choro templi, tale conspicitur:

HEN-



**HENRICVS** Burggravius & Baro à Dhona, cum ad nobilitatem generis, eximiam animi indolem natura ei tribuisset ab ineunte adolescentia, concessu ac missu Illustris Parentis sui **ACHATII**, domo profectus, varias provincias adivit, præcipuisq; in Academiis Germaniæ diu magna cum laude versatus est; inde in Italiam transgressus, per triennium & amplius ei perlustrandæ & cognoscendæ operam dedit, singulariq; studio linguam, leges atq; instituta populorum, ad hoc artes eas omnes, quæ quidem homine libero ac nobili dignæ sunt, percepit; tandem domum reversus florentissimus Juvenis, dux Fratribus suis ad eundem gloriæ cursum tenendum extitit; quorum etiam unum in hanc Academiam cum deduceret, ad alterum fratrem **ABRAHAMVM**, Magnifici eo tempore Rectoris dignitate ornatum, Noribergæ (proh dolor) morbo extinctus subito est An. Chr. MDIIC, mense Septembri; ætatis annorum XXV. Funus Altdorffii ei factum summo Academiæ totius & luctu & honore. **ABRAHAMVS**, **ACHATIVS** & **CHRISTOPHORVS** BB. A. D. Fratri Opt. & Chariff. multis cum lachrimis maximoq; animi mœrore præsentēs H. M. P. P.

Ad Rectorem Illustrē septimum notetur, quod ex **PAPPENHE-**  
MII illius pectore, cum apud nos degeret, præter humanitatem vir-  
tutesq; alias, insignis eluxerit pietas, adeo ut raro exemplo ipsemet à  
magistro aulæ postulaverit, ut singulis diebus, certis horis, in funda-  
mentis veræ fidei ac religionis, operâ Dn. Herrnschmidtii, præce-  
ptoris ipsius, informaretur. *Sed quid non vincit Iberus, quid non Roma  
potens?*



158. (158)

*potens? Hic ipse est Pappenhemius, qui, postea factus Supremus  
castrorum Cesareanorum Praefectus, qualem se erga veritatis Evan-  
gelicæ amatores gesserit, notius est, quam ut dici debeat.*

Pag. 16. lin. 8: *Quin maculam famæ nostræ inussisset indelebi-  
lem]* Vid. hinc *Fama Altdorphina*, auctore Andr. Dinnero J.C. Anno  
Domini 1616 edita.

Pag. 23. lin. 6: **M. JOHANNES PICCARTVS]** Epita-  
phium ejus, in choro templi oppidani, hoc est: Herr M. Joan. Pic-  
cardus / Pfarrherr und Professor allhier / in Gdt verschieden /  
28 Octobr. 1584. dem Gdt G.

Pag. ead. 23. lin. 27: *Quadriennio post vivendi finem fecit]*  
Epitaphium in cœmeterio extra urbem ipsi erectum tale reperitur:  
A. 1598. den 16. Jul. Starb der Ehrwürdig und Wolgelehrt Herr  
M. Georgius Sigelius / Pfarrherr und Professor der Kirchen und  
hohen Schul zu Altdorf. Deme Gdt eine fröliche Auferstehung  
verleihen wolle.

Pag. ead. 23. lin. 28: **M. GEORGIUS PFALERVS]**  
De hoc vid. quoque pag. 98. Hic monumentum, quod in templi  
choro conspicitur, subjungere liceat:

M. Georgius Pfalerus, Norimbergensis, Diaconus hujus Ec-  
clesiæ & Professor S. Hebrææ linguæ in hac celeberrima Aca-  
demia Altdorfiana, fidelis & diligens, moritur in Christo pla-  
cidè xxx Sept. Anno clō Io LXXXIV. Ætatis suæ xxxv.

*Religio queritur: mea spes cadis ergò Pfalere?*

*Spes ait: hunc reddet mox tibi summa dies.*

Pag. 25. lin. 7: *Epitaphium ejus]* En ipsum Epitaphium, prout in  
cœmeterio æri incisum legitur:

¶ ¶ ¶

SI DEVS EST PRO ME,  
QVIS MEVS HOSTIS  
ERIT!

ANNO M. D. IC. XII DIE MAI IN CHRISTO PIE ET  
PLACIDE OBIT REVERENDVS ET NOB. D. EDO  
HIL-



HILDERICVS DE VAREL, FRISIVS OR. SS. TH. AC  
LINGVARVM DOCTOR ET PROFESSOR ALTDORFI.

Pag. ead. 25. lin. 19 : *M. GEORGIVM VOLKARTVM*

Natus hic est Norimbergæ A.C. 1558, d. 22 Apr. Mortuus A. 1628  
d. 13. Martii.

Pag. ead. lin. 21 : *Ambergam abiit*] Defuncta ibidem est uxor ejus  
A. 1606; prout hoc indicat Eteostuchon *Mich. Piccarti*, in Pro-  
mulside Carminum :

*Honestiss. Matrona, Helena Hellinga, Reu. D. M. Georgi*  
*Volkarti Vxor, moritur Ambergæ 20. Febr. Anni 1606.*

Bls Dena en febrVI nltet eos æthere Labla,  
ô InfeLICI syDere nata bonls,  
præClpVè fVneſta tibl, VoLkarte, tVlsqVe,  
ConIVgls ob ſoClæ fata Inoplna tVæ.

Pag. 26. lin. 9 : *Historia Nationis Germanicæ*] His Schopperi

ſcriptis adde Orationes, de Origine, Antiquitate, Præſtantia, Vtilita-  
te, Jucunditate, & Methodo S. Scripturæ, recit. Altdorfii d. 15 Jan.  
1611. De Discrimine Religionis Chriſtianorum & Ethnicorum, recit.  
A. 1612. De Vita & Obitu Dn. D. Joh. Hochmanni V. J. D. & in Acad.  
Tubing. Prof. Celeberrimi, hab. hic Altdorfii d. 26. Octobr. 1603.  
Cui acceſſit *Historica Narratio de Vita & Obitu* Parentis ſui D. Ja-  
cobi Schopperi, Theol. & Concionatoris Biberacenſis; qui Epitomen  
in Officia Ambroſii edidit, ac D. Luthero valde fuit familiaris.

Pag. ead. 26. lin. 10 : *Ex Epitaphio hoc*] Deſcripſit Declamator  
*Epitaphium Schopperianum* ex libro nescio quo. Legitur verò iſtud in  
choro Templi oppidani, prope altare minus, hoc modo :

DOMINI JACOBI SCHOPPERI PIÆ M. SS. THEOLO-  
GIÆ DOCTORIS ET IN ACADEMIA ALTDORFINA  
PRIMARI PROFESSORIS, IBIDEMQVE p. t. MAGNI-  
FICI RECTORIS, CORPVS HOC IN LOCO SEPVLT.  
EST. QVI ANNO CHRISTI M D XLV I NOVEMBRIS  
BIBRACI EST NATVS: ANNO VERO MDC XVI XII  
SEPTEMBRIS, ÆTATIS LXXI, ALTDORFI PIÆ IN  
CHRISTO DENATVS SPE LÆTISSIMÆ RESVRRE-  
CTIONIS.



In Programmate Funebr. hæc, inter alia, leguntur: *Eripit nunc (Devs) caput nobis nostrum, virum ut per omnem Europam celeberrimum, ita omnibus de causis venerandum, perpetuam & non interruptam Pietatis ideam, atq; omnium Virtutum Christianarum domicilium, Magnificum, Reverendum, Clarissimum Virum, Dn. D. Jacobum Schopperum, Theologica Facultatis Antesignanum, & Ecclesia hujus oppidi præconem indefessum &c.*

Pag. 27. lin. 23: *Beatissimè tandem exspiravit*] Königio mortuo parentavit Joh. Conradus Dürrius.

Pag. 28. lin. 33: *Ungerrecht dictus*] Hic postea ad Divum Jacobi Pastor diem obiit Norimbergæ A. 1632.

Pag. 29. lin. 5: *Præter cæteras*] Exstat quoque Rütteri Hebda prior morientis Christi Apophthegmatum. f. 4. A. 1623. Et Hebda posterior Dispp. Theol. de VII Miraculis circa mortem Christi factis, anno eod. impressa.

Pag. ead. 29. lin. 32: *Inter cœlites vivere cœpit*] Saubertum mortuum laudavit Joh. Valentinus Andrea scripto, cui titulus: JOHANNIS SAVBERTI THEOLOGI VMBRA, delineata à Joh. Valentino Andrea, Sturgardiæ, A. 1647. Exstat etiam Joh. Stephani Deckeri Lamentatio super obitu JOH. SAVBERTI, sub finem Oratoris Historici Christ. Ad. Ruperti, pag. 1112 seqq.

Pag. 32. lin. 5: *Adultimum quidem vitæ spiritum*] Obiit Althoferus Culmbaci A. C. 1660.

Pag. 34. lin. 17, 18: *Se non pauca didicisse*] Meruit hæc quoq; Dissertatio ex inæstimabili lectione sacrorum pariter ac profanorum Scriptorum concinnata, applausum Octavii Ferrarii, Italorum Eloquentissimi, quando de eadem, in Epist. ad Filium Joannem Fabricium V. C. Patavio A. 1673 missa, ita scribit: *Novo me munere provocasti, docto, Jupiter, & laborioso, ut aureis ærea permutares &c.* Commendandæ iidem hæc sunt Dispp. illæ geminæ, quarum altera sub præsidio B. Dn. Fabricii habita est de *Imagine Dei & Statu primi homin.*, Resp. Joh. Conr. Dürrio A. 1647; altera de *Lapsu humani generis & Statu peccati*, Resp. Sam. Spörello A. 1648.

Pag. ead. 34. lin. 20: *Qui inscribitur Raphael - dicatus est*] Post beatam Optimi Viri mortem lucem viderunt publicam, die Gedults Schulroder CIV Predigten über den Job; auch ein geistliches A B C, oder



oder XXIII Predigten / in welchen vierwörtige Sprüche der H. Schrifft / nach Ordnung der Buchstaben des Alphabets / erkläret worden. Memoria JOH. FABRICII servata à Joh. Conrado Dürrio, præfixa est Prælectionibus Theologicis à Plur. Rever. Emanuelis Filio editis.

Pag. 35. lin. 18: *Typographiam orientalibus literis instructam*

Ita B. Felwingerus in Parentat. de Schmidmajero: *Quo animo erga eos, qui bonas literas, vel aliquam Philosophia partem explicarent, affectus fuerit, inde quoq. clarissime colligimus, quod maximè itidem sumtibus typographiam nostram literis Arabicis, Syriacis, Rabbinitis, Hebraicis, beatiorum, instructiorem & splendidiorem fecerit &c.*

Pag. 37, lin. 25: *Obiit ante quadriennium* Itatunc Orator. Obiit verò B. Dürrius d. 4 Jul. 1677, cum vixisset annos unum quinquaginta, & menses septem.

Pag. 43, lin. 8: *Rektor Lycei hujus publicè renunciatus est à Philippo Camerario*

Legitur hæc Oratio Camerarii, & ipsius patenter Freigii Oratio, habita, cum ipsi Rectoratus Scholæ hujus demanderetur, sub initium libelli f. 8. cui titulus: *Orationes in Gymnasio Altorfiano partim à Rectore JOAN. THOMA FREIGIO J. V. D. recitata, partim Adolescentibus recitanda tradita &c.* Norib. 1578.

Pag. ead. 43, lin. 34: *JOHANNEM BVSEREIT*

Rectus BVSENREVT, vel BVSEREVT. Ita enim habet titulus Carminis à Buserentio nostro relict: *Historia Divi Nicolai, Carmine Elegiaco conscripta à JOANNE BVSEREVTIO, Augustano.* August. Vindel. f. 4. A. C. 1570. Alius fuit Jctus I. B. BVSEREIT, qui scripsit de Societate. Tumulatus est noster in cœmeterio Norimb. ad Divum Johannis; ubi Inscriptio sepulcralis hæc viatorum oculis obijcitur:

JOH. BVSENREVT J. V. D. REIP. NORIB. CONSILIARIVS ET ADVOCATVS, SIBI, CONJVGI, LIBERIS, POSTERISQ. EORVM POS. A. M D C III. QVI OMNES HIC EXPECTANT CARNIS RESVRRECTIONEM ET VITAM ÆTERNAM.

Pag. 44. lin. 23: *Collectanea & Indivem in Lucretium*

Accusatur Giphanius à nonnullis plagii in Lucretio præsertim, & aliis scriptis



à se editis, commissi. Vid. Jac. Thomafius in Plagio Liter. §. 445, 446, 447.

Pag. ead. 44. lin. 30, 31: **HVGO DONELLE]** De Donello vid. nonnulla in *Vossii Præfat. Tractat. de Historicis Latim.* Mortuum laudârunt Scipio Gentili, & Casp. Paumgartner.

Pag. 49, ad marginem: *Epitaphium Descriptum vid. in Cl. Königii Biblioth. Ver. & Nov.]* Placet Epitaphium Scip. Gentili huc apponere, prout spectatur in choro templi, prope sacrarium, æri incisum:

D. O. M. S.

SCIPIONI GENTILI ICTO, MATTHIÆ MEDICI FILIO, ALBERICI JCTI FRATRI, CLARA NOBILIQUE FAMILIA IN MARCHIA ANCONITANA NATO: PATREM ET FRATREM, SOLA PIETATE IMPELLENTE, EX ITALIA PATRIA IN GERMANIAM SECVTO, INQVE EA PROPTER SVMMAM VIRTVTVM ADMIRABLEMQVE DOCTRINAM, INPRIMIS AVTEM JURIS EXACTAM PERITIAM, AD EAM NOMINIS FAMÆQVE DIGNITATEM EVECTO, VT CVM SVMMIS GERMANIÆ JCTIS COMPONERETVR: OB EAMQVE REM AB INCLVTO SENATV NORIMB. ACADEMIÆ SVÆ LAVDATISSIMÆ JCTIS CELEBERR. PIE DENATIS SVFPECTO, ATQVE VNA IN NVMERVM CONSILIARIVM COOPTATO, INQVE ISTIS MVNERIBVS SVMMA FIDE, LAVDE, DIGNITATE VERSATO: TANDEM, CVM ET CONSILIIS REMP. ET DOCTRINA JVENTVTVM PLVRIMVM JUVISSET, EDITISQVE PRÆCLARISSIMIS DIVINI INGENII MONVMENTIS VNIVERSAM REM LITERARIAM EGREGIE DEMERVISSET: DEO OPT. MAX. ITA VOLENTE, VIVIS CVM DAMNO ET LVCTV PVBLICO EXEMTO, ET HOC IN LOCO, JVXTA OSSA MAGNI ILLIVS ET PER OMNEM ORBEM CELEBERRIMI HVG. DONELLI, CVI VIVO VIVVS OMNI AFFECTV CONJUNCTISSIMVS, INGENIO ETIAM PROXIMVS FVERAT, IN CHRISTO JESV REQVIESCENTI HOC MON. POS. CVM LACRVM.

MAG-



MAGDALENA GENTILIS DOMO CALAN-  
DRINA CÆS. CALANDRINI PATR. LVCENS.  
F. MARITO KARISS. HONORATISS. ÆGI-  
DIVS ITEM ALBERICVS F. VNICVS ET ES-  
THERA MAGDALENA F. VNICA PATRI OPT.  
NEC NON DESIDERATISS. ☉ VII EIDVS SEX-  
TIL. clb lbc XVI. ÆTAT. LIII. S. T. T. L.

Pag. 52. lin. 7. 8: *Aliag, insigniora incomparabilis ingenii sui pignora*] Inter quæ non reuicendæ sunt *Notæ in Epistolam Amphilo-  
chu, Episcopi Iconii ad Seleucum; & Carmina ejus, quæ collegit Auctor  
Tomii III. Delit. Germ. pag. 843. seqq.* Mortuo Generof. Dn. Chri-  
stoph. Adamus Wenzelk à Sarabiz in Trisib, & Cass. Pansa, Philos. ac  
V. J. D. Reip. Norimb. Advocatus, parentârunt.

Pag. ead. 52. lin. 12: **JACOBO TETENSIO**] Fuit hic apud  
nos Juriscivilis ac Edices Professor. Decessit hinc in patriam (erat  
verò Eiderstatiensis) A. 1594.

Pag. 53. lin. 16: *Animam Creatori suo reddidit*] De vita & morte  
*Dinneri* peroravit *Fridericus Tucherus*, Patric. Norimb.

Pag. ead. 53. lin. 33: *Signa immortalia*] Oratio ejus de Milite Ve-  
spertilionereperitur in Thesauro Politico Besoldi pag. 508.

Pag. 54. lin. 3: *Assessor meritissimus extitit*] Vid. plura de *Unge-  
pauero* in: *Adr. Beieri Nomenclat. Prof. Jenens.* pag. 527, seqq. Sym-  
bolum Viri notum est: *Jova iuvat: iuuu Jova: idem Jova iuvabit!*  
Obiit An. 1659.

Pag. ead. 54. lin. 21: *Consilia tutissima quotidie germinabant*]   
Elaboravit quoque *Varia Consilia*. Obiit A. 1646.

Pag. ead. lin. 28: *Denatus est*] *Frauenburgio Hector Pömer* paren-  
tauit.

Pag. 55. lin. 6, 7: *Ante hos viginti annos: - terræ est traditus*]   
Obiit namq; *Ludwellus* A. 1663. Dis Manibus ejusdem *Sacra Paren-  
talia* persolvit *Ernestus Cregelius*. Epitaphium *Ludwellianum* in se-  
pulchreto nostro isthoc est:



NE NEGLIGENTER PRÆTERI VIATOR,  
WILHELMVM LVDWELLVM PATRIA ELBINGEN-  
SEM, GENERE NOBILEM ANGLVM, JCTVM SVM-  
MVM ET IN HAC ALTDORFINA VNIVERSITATE PER  
XXXII ANNOS ANTECESSOREM LONGE CELEBER-  
RIMVM, NORIBERGÆ DELICIVM, PRINCIPVM ORA-  
CVLVM, INGENTEM GERMANIÆ THESAVRVM,  
MORTE PIE OBITA PRID. ID. SEPTEMBR. ANNO  
SVÆ ÆTATIS QVASI LXXIV, CHRISTI clō 16c LXIII,  
HVC CONDI CVRAVIT, SPATIO SIBI DILIGENTER  
SERVATO, VIDVA MOESTISSIMA, ANNA MARIA,  
PATRICIA SITZINGERIANA.

DIA. LATENT. TVMVLO. VIRTVTVM. MVNERA.  
CLAVSA.

QVÆ. SOLA. ERVPIT. FAMA. PERENNIS. ERIT.

Pag. 57. lin. 10: *Vt plenus aeternæ vitæ conviva - decessit*  
Hæc & præcedentia verba ex Epitaphio Kobiano desumpta sunt, quod  
totum nunc suppeditabo :

JOHANNES KOB FRANCVS V. J. ET PHIL. D. REIP.  
NORIB. CONSILIAR. AD IVSTITIAM, HVMANITA-  
TEM, CONCORDIAM, IN DOCENDO ASSIDVITA-  
TEM D. PALMAR. AN. ER. C. M. D. XC NATVS, IN  
NOBILI ALTDORFINA SENIOR, MVLTSQVE PRO-  
FESSIONIBVS PER XL ANNOS EXERCITATVS, IN  
COELESTEM TANDEM LÆTITIAM EXCITATVS PIE  
CANTANDO, VT PLENVS VITÆ CONVIVA RECES-  
SIT XXX JANVAR. MDC LXI. ANNO ÆTATIS LXXI.

De Kobio plur. vid. in Orat. de Philos. Altdorf. p. 104. 105.

Pag. ead. 57. lin. 19: *Magnæ matri concreditus* Epitaphium Vi-  
ri, supra *Matth. Bergii* monumentum sepulcræ, eodem in saxo,  
(quò etiam *Conradus Rittershusius*, Pater, tegitur) tale nostro subji-  
tur conspectui :

NICO.



NICOLAUS RITTERSHVSIVS JCTVS, CONRADI FILIVS, PATERNÆ GLORIÆ ET ERVDITIONIS HERES, PER ANNOS XXXVI ET AMPLIVS IN ACAD. HAC PATRIA ALTDORFINA PROF. PVBL. REGIBVS, PRINCIPIBVS, COMITIBVS, DYNASTIS, NOBILIBVS, EX LONGINQVIS ITINERIBVS ET COGNITIONIS PRÆSERTIM HISTORICÆ AC GENEALOGICÆ FAMA NOTVS, EXUVIAS SVB HOC MONVMENTO DEPONI VOLVIT, CVM ESSET NATVS D. XVII. M. FEBR. ANN. cō- lō XCVII, PIEQVE IN SERVATORIS SVI BRACHIIS OBDORMIISSET D. XXIV. M. AVGVST. A. M. DC LXX.

TANTVM EST IN HAC VITA, SED INFINITE AMPLIVS IN ALTERA.

Pag. 58. lin. 14: *Vti Stellæ in omnes æternitates*] In his annumerandus est quoq; DN. GEORGIUS CHRISTOPH. SCHÆFER, in nobili Imperiali Rotenburga ad Tubarim A. C. 1629 d. 7 Febr. natus; A. 1665 Jurium hac in Vniversitate Prof. Publ. Extraordinarius constitutus, annoq; statim sequente immaturo fato extinctus.

Pag. ead. 58. lin. 17: *Vel alibi*] Honorifica omninò hic mentio facienda est JOH. WOLFG. TEXTORIS, Jcti h. t. Celeberrimi; qui Altdorfii per annos septem Jura magno cum auditorum applausu professus est; anno autem 1673 Heidelbergam sese contulit, ubi hodieq; rei literariæ præceptis, Aulæ verò Electorali consiliis suis saluberrimis, mirabiles præbet utilitates.

Pag. 65. lin. 32, 33: *Diem suum obiit Medicus & Philosophus insignis &c*] Ita Mich. Piccartus in Promulsæ Carm.

Cl. & Excellentissimus Philosophus ac Medicus, Nicolaus Taurellus, Professor Altdorpinus moritur 28 Sept. 1606.

Septembris septena qVater tetro æthere nata.  
VVLnere prosternit nostra LyCea noVo:  
qVippe eâ Aristoteles noster nosterqVe GalenVs  
raVrellVs ponit CorpVs Inane soLo.

Pag.



Pag. 66. lin. 9: PHILIPPVS SCHERBIVS] De hoc vid.  
etiam pag. 103. 108. Hic verò iterum audiatur *Mich. Piccarti* Eteo-  
stichon d. l.

*Philippus Scherbivus, Medicus & Philosophus*  
*Excellentissimus moritur XI Julii 1605.*

Vt seX aC qVINas orbi fert IVLIVs ortVs,  
Ingentl afflCltVr norlCa CLaDe sChoLa.  
præses obIt Sophlæ præLVstrls SCHerbIVs, VnVs  
VIXIt Vbl prInCeps ræonlIqVe Chorl.

Pag. 69. lin. 25: *Præfatus est*] Professioni Medicæ ac Physicæ si-  
mul. Hinc & pag. 108 inter Professores Physices numeratur.

Pag. 74. lin. 21, 22: *Mortalitatis terminos adimplevit &c]*  
Tumulo Viri CL. hæc inscripta leguntur in cœmeterio:

CASP. HOFMANN, MEDICINÆ DOCTOR ET PRO-  
FESSOR ORDINARIUS IN ACADEMIA ALTORFINA:  
MARIA MAGDALENA BVSEREV TIN, SIBI SVISQVE  
LIBERIS VIVI H. M. F. F. ANNO CHRISTI M DC XVI.

Pag. 80 lin. 12, 13: *Mortuum laudavit Nicolatus Rittershu-*  
*fius]* Addatur *Memoria Dn. Georgii Næßleri à Georgio Richtero*, Pro-  
cancellario, in Orat. d. 28 Jan. 1651, publicè Altdorfi habita, celebrata.

Pag. ead. 80 lin. 13, 14: *Epitaphium ejus tale heic loci inveni-*  
*mus]* Ego verò tale inveni haud procul à *B. Casp. Hofmanni* tumba:

GEORGIUS NOESSLERVS BEROLIN. MARCH.  
CVM CHARITATIBVS SVIS H. S. E.  
NATVS D. X. MAI clb Is XCI. DENATVS ALTDORFI  
D. IX. JVL. clb Isc L.  
VITÆ SANCTIMONIAM, ERVDITIONIS COPIAM,  
INSIGNIA MERITA,  
QVIBVS ARTEM MED. ET PHILOSOPH. PER  
ANNOS XXXII  
SVMME SIBI DEVINXIT VIR OPTIMVS,  
IN FAMÆ TEMPLO, QVAM HOC CIPPO, LEGI  
MALVIT.

Pag.



Pag. 81. lin. 1, 2 : *Catalogum Plantarum*] Titulus scripti in f. 4. editi iste est: *Ludovici Jungermanni D. Catalogus Plantarum, quæ circa Altdorfum Noricum, & vicinis quibusdam locis: recensitus à Cassp. Hoffmanno D. Altorfi, 1615. Edidit deinde ipse Jungermannus A. 1635 Catalogum Plantarum, quæ in horto Medico Altdorphino reperiuntur. Cæterum Jungermannus Poëta fuit non infelix, in fingendis præsertim & applicandis Epigrammatibus & Anagrammatibus; prout id testantur Xæp. 15. & 16. Anagrammatum A. 1636 ab eo edita.*

Pag. ead. 81. lin. 22: *Hortus noster Medicus*] Postquam B. Jungermannus A. 1625 professionem Medicam Botanicam aggressus, plura semina rariora ac bulbos secum attulerat, & acceperat indies, Hortus noster Medicus, generosa Magnificorum Dnn. *Scholarcharum* munificentia ac favore, felicia cepit primordia A. 1626. Ejus igitur primas origines & proxima originibus, debemus curæ Jungermannianæ; incrementa verò & expletam Horti formam, arti ac felicitati Hoffmannianæ, quam supr. jam pag. 10. itemq; pag. 83. meritò laudavimus. Et laudari summopere nunc insuper merentur *Floræ Altdorfinae Delicie Hortenses ac Sylvestres*, ab eodem Dn. D. *Mauricio Hoffmanno*, Medico & Botanico Consummatissimo, primum A. C. 1660 & 1662, dein verò longè auctiores, additoq; Florilegio. A. 1677, heic Altdorfi editæ. Deliciis Floræ Altdorfinae Hortensibus præfixa est *Icon Horti nostri Medici*; Deliciis Sylvestribus præmissa cernitur *Topographia Altdorfina & Viciniae*, accurato expressa schemate; cujus supr. pag. 133, aut in Additam. tertio pag. 143, debemus jam meminisse. Sequantur nunc *Inscriptiones*, quæ in Horto Medico leguntur:

*Supra portam Horti superiorem:*

**Hic Natura parens, toto quos parturit orbe  
Flores fert OCVLIS, quæis lege, NON MANIBVS.**

*Supra portam Hibernaculi apricam*

*Ordinem Exoticarum Plantarum*

*hec verba respiciunt:*

**Hic Argus esto, non Briareus!**

Y

In



*In Hibernaculū  
Sive hibernæ ejusq; commodæ oppidū Plantarum  
mansionis  
medio inter fornaces pariete ::*

B. F.

VITÆ ET VALETVDINIS HVMANÆ PRÆSIDIA  
MIRA VARIETATE ET COPIA SESE OSTENTANTIA  
CVRAM MINIMAM COLLIGENDI DISCERNENDI  
MAXVAM

ÆQVALEM FACILEMQVE REDDI

HORTO IN HOC MEDICO

PAVLO POST VNIV. COND. ADORNATO

QVICVNQVE CERNIS

GRATVS INCL. REIP. NORIMB. BENEFICIVM

AGNOSCE

NATVRÆ MVNIFICENTIAM SVPERANS

CVIVS PERPETVITATI IUVVANDÆ

NOBILISS. ET PRVDENTISSIMI

DNN.

GEORGIVS IM HOFF IIIVIR

LEONHARDVS GRVNDHERR VIIIVIR

JOD. CHRISTOPH. KRESS A KRESSENSTEIN

JOHANN. JACOBVS STARCK A RECKENHOFF

SENATORES ET SCHOLARCHÆ BENE MERITISSIMI

MAGNO SALVTIS PVBLICÆ COMMODO

REIQVE MEDICÆ INCREMENTO

HIBERNACVLVM HOC PLANTARVM

A FVNDAM. EXTR. CVRAR.

PRÆFECTO OPPIDI

CHRISTOPH. ANDREA IM HOFF

BOTANICO

MAVRITIO HOFFMANNO DOCT.

A. C.

clb lbc LVI.

Ad



*Ad diatam in centro Horti:*

CIVIS. AMICE. ADVENA.  
QVI. HORTI. AMOENITATE.  
CVPI. OBLECTARJER.  
MODESTIAM. ET. CONTINENTIAM.  
COMITES. HABEAS.  
FLORÆ. CVSTODES.

Pag. 82. lin. 26. 27: *Theatrum Anatomicum apertum* ] Laudatum est jam pag. 8, commodum hoc Anatomies theatrum, variis ac rarioribus sceletorum figuris refertum, & spectatorum sedibus veteris amphitheatri simulacrum referens. Supra januam intus ad sempiternam memoriam monumentum sequens erectum cernitur:

QVISQVIS ES QVI TE IPSVM NOSSE AMAS  
INTVS QVI ET IN CVTE SIS  
HVC ADES ET STVDIIS PRÆDITVS FORTIBVS  
DISSECTIONES SPECTA HVMANI CORPORIS  
SIMVLQVE GRATO ANIMO  
INCLITÆ REIP. NORIMB. BENEFICIVM AGNOSCE  
NON HIC MOMI FENESTRA  
SED PARVVM THEATRVM EST  
NOBILISS. ET AMPLISSIMI DNN. SCHOLARCHÆ  
GEORGIVS IM HOFF SEPTEMVIR  
ALBERTVS POEMER  
JODOC. CHRISTOPH. KRESS A KRESSENSTEIN  
LEONHARDVS GRVNDHERR  
SENATORES BENE MERENTISSIMI  
MAGNO ACAD. INCREMENTO F. F.  
RECTORE MAGNIFICO  
WILHELMO LVDWELL JCTO  
ANATOMICO  
MAVRITIO HOFFMANNO DECANO MEDICO,  
A. clb. Inc L.

Eodem etiam anno ( 1650 ) primordia cepit *Societas Medica*, legibus maximè salutaribus instructa, quibus Artis Machaoniae studiosi



studiosi non solum circa ea, quæ ad studium Medicum felici cum successu tractandum faciunt, instruuntur; verum etiam quomodo in Exercitiis Anatomicis & Herbationibus, quas vocant, publicis, in Pharmacopoli visitatione, & Disputationibus, quæ Circulares nuncupantur, modeste, decorè & convenienter sese gerere debeant, informantur.

Pag. 85, lin. 23: *Chymiam dico, in ea publicè doceri cœpit*] Est hoc rursus insigne admodum Noricæ Magnificentiæ specimen, quod anno superiore, in Rei Medicæ emolumentum incredibile, Patriæ Patres & Curatores Academiæ exstrui curarint *Chemicum*, quod vocant, *Laboratorium*, pone Collegii acroateria, ad fossam oppidanam, plagam Australem prospectans. Est camera hæc ampla satis ac nitida, quadrario elata lapide, intus sex & triginta pedes longa, lata quindecim, alta quatuordecim. Habet præterea à parte superiore & inferiore caminos duos majores, & est jam aliquot instructa furnis; quorum

- 1 est Furnus *Ἀκνῆς* Piger Henricus; cui à latere utroq; associati cernuntur
- 2 Furnus continens catinum arenæ.
- 3 - - - Balneum Mariæ & Balneum vaporis.
- 4 Furnus *Ἀνέμι* ventosus.
- 5 Furnus Glauberi Philosophicus secundus.
- 6 - - - Reverberatorius.
- 7 - - - Destillatorius  $\Delta$  aperto.
- 8 - - - Digestionis.
- 9 - - - Recipiens vesicam, vasa  $\Omega$  toria, retortas tubulatas &c prout usus postulaverit.
- 10 - - - Portatilis ferreus.
- 11 - - - Docimasticus.
- 12 - - - Lampadis Philosophicus.

Hæ sunt fornaces præcipuæ, quibus temporis successu plures adjunguntur.

Camæræ medio, januam versus, ad immortalem posteritatis memoriam sequens infixum est monumentum:

B. F.



171. (:

B. F.

CHEMIÆ

ARTIVM. ANTIQVISSIMÆ

ADMIRANDORVM. NATVRÆ. OPERVM. ÆMVLÆ

SOLVENDO. ET. COAGVLANDO

VNIUS. REI. INTERITVM

ET. ALTERIVS. PRINCIPIVM. SIMVL. AFFECTANTIS  
EXERCITIO

DOMICILIVM. HOC. PVBLICVM

EX. SINGVLARI. ET. POSTERIS. DEPRÆDICANDA

INCLVTÆ. REIP. NORIMB.

MVNIFICENTIA

PRO. FVTVRO. ACADEMIÆ. ORNAMENTO

MEDICINÆ. INCREMENTO

SALVTIS. CIVIVM. EMOLVMENTO

A. R. S. clb Ibc LXXXII

FVNDITVS. EXSTRVI. CVRARVNT

MAX. STRENV. GENEROSI. ET. PRVDENTISSIMI  
DOMINI

GABRIEL. NÜTZEL. AB. ET. IN. SINDERSPVHL  
IIIVIR

WILHELMVS. IM. HOF

JOH. PAVLV. PAVMGARTNER. AB. HOLEN-

STEIN. ET. LOHNERSTADT. IN. GRÜNSPERG

CAROLVS. WELSER. A. NEVNHOF

SENATORES. ET. SCHOLARCHÆ. SVMME. MERITI

RECTORE. VNIVERSITATIS

JACOBO. PANCRATIO. BRVNONE

PHIL. ET. MED. D. HVJVSQ. P. P.

FACVLT. MED. DECANO

MAVRICIO. HOFFMANNO

MED. D. ET PROF. PRIMARIO

PRIMO. CHEMIÆ. PROFESS.

JOH. MAVRICIO. HOFFMANNO

MAVR. F. PHIL. ET. MED. D.

Y 3

TV.



TV. VERO  
 QVICVNQVE. LOCVM. HVNC. ACCESSERIS  
 LABORIOSAS. EVM. DELICIAS. ALERE. NON  
 DESIDIAS  
 ET. VVLCANI. PALLADISQVE. IN. JVCVNDIA  
 SOLICITVDINE  
 NEGOCIOSVM. OCIVM. FOVERE. SCITO  
 NEVE. TVRBES  
 CAVETO.

Pag. 94. lin. 16: *In Pontificiorum castra tandem transferit*

A. C. 1629, desertis hic uxore ac liberis. Quæ quidem hominis à fide nostra defectio, & ad Pontificiam accessio, mira tunc nemini aut inopinata accidit; cum crebræ ipsius ad PP. Jesuitas itiones, emissiones diutinæ, virulentæ Doctorum nostrorum, maximè D. M. Lutheri, reprehensiones, & acerrima Romanensium defensio, nihil portendere aliud viderentur. Ægrius ipsi nunquam fuit, quàm cum canticum in templo audiret: *Serva, Deus, verbum tuum!* Vocem cum psallentium choro nunquam copulavit; sed vel Senecam suam, vel Lipsium, vel auctorem evoluit alium, quem prurientes ipsius auriculæ mallet audire. Vid. B. Dn. *Dilherri* Disput. III. Tom. I. pag. 37. & seqq. Accessit *Philippus* huc Altdorfium d. 3. Maji A. 1626.

Pag. 96. lin. 12: *Cujus Epitaphium* Glaciani Epitaphium hoc modo scriptum deprehendi:

SVB HOC TVMVLO PIE DEFVNCTVS VITAM BEATIOREM EXPECTAT OLIM INSIGNI ERVDITIONE ET RERVM VSV CLARVS D. M. GEORGIUS GLACIANVS VILSECCENSIS, ET ACADEMIÆ HVJVS ALTDORFINÆ ET GRÆCÆ LINGVÆ QVONDAM PROFESSOR PVBLICVS. OBIIT IN VERA FILII DEI INVOCATIONE I AVGVSTI HORA XII MERIDIANA ANNO CHRISTI MDCVII ÆTATIS VERO LVIII CVJVS MEMORIA JAM EST IN BENEDICTIONE.

HOC MONVMENTVM IN HONORIS ET AMORIS TESTIMONIVM ET ORBITATIS SOLATIVM RELICTA VIDVA CATHARINA HÆLTMEININ PONI ET INPRIMI CVRAVIT ANNO - MENSE - DIE -

Pag.



Pag. 97, lin. 3, 4: *Ex Clarissimorum Virorum testimonio*] Casp.  
Hofmanno Lib. I. cap. 21. Var. Lect. vocatur Rilius *Vir doctissimus*  
*multarumq. linguarum peritissimus.*

Pag. 102, lin. 26, 27: *Anno etatis quinto & trigesimo &c*] Epi-  
taphium ipsi tale positum:

D. O. M. S.

HEIC JACET CHRISTOPHORVS ADAMVS RVPER-  
TVS, HISTORiarVM PROFESSOR PVBLICVS, MVL-  
TIS MORBIS EXAGITATVS: SED ANIMA IN OMNIVM,  
SANCTISSIMARVM ANIMARVM RECEPTACVLVM,  
COELVM, RECEPTA EST. OBIT ANNO MDCXLVII,  
DIE XXVII FEBRVARII, NATVS ANNOS XXXV,  
MENSEM ET DIES XXVIII.

Laudatorejus post funera extitit *Mart. Brendelius.*

Pag. 103 lin. 15, 16: *Quem vel ex tempore mira facilitate stru-  
xisse poemata - notissimum.*] Etiam ad decrepitam usq; senectu-  
tem; in qua tale sibi finxit Epitaphium:

*ME POMERIS genuit, docuit Charitina TVBINGA,*

*& capiti imposuitserta Magistra meo.*

*Austriacis pulsum terris ob dogma LVTHERI.*

*suscepit placido Pallas amica sinu*

*Atq; Professoris titulo decoravit honesto*

*clara PALÆCOMES qua juga NORIS alit.*

*Explicui interpres clarorum carmina Vatum,*

*& linguae Ausoniae scripta diserta patris.*

*Porrexere meis aequas sermonibus aures*

*queis placuit Latii pura medulla salis.*

*Bis septem fractis post lustra ago viribus ævum;*

*Bis sexto placide des mihi. Christe mori!*

Fecit carmen hoc anno ante obitum tertio, ut & ipse annotavit, &  
è versiculo ultimo id colligere licet, ubi ad *annum bisextilem*, qualis  
tunc erat, videtur allusisse.

Pag.



Pag. 105. lin. 26: MATTHIAS BERGIVS] Annos ætatis & mortis Viri Beati, ex sequente Illius Epitaphio noscere poteris, Lector!

D. O. M. S.

BERGIVS HIC SITVS EST, VOCEMQVE IN PVL-  
VERE CHRISTI

EXPECTAT, VIVVM QVI SIBI RESTITVET.  
SVMMA BONI, VIVO CHRISTO SE CREDERE,  
VVLTVMO.

ILLIVS ÆTERNVM CERNERE FVNCTVS AVET.

M. MATTHIAS BERGIVS BRVNSVV. IN ALTDORF.  
NORIB. ACAD. ETHIC. PROFESSOR HOC EPITAPH.  
SIBI IPSE FECIT.

ESTHER, JOAN: HILTEBRANDI IC. F. VIDVA MOEST.  
CONRAD. RITTERSHVSIVS JC. ET COHEREDES MA-  
RITO, AVVNCVLO ET PATRVO B. M. HOC MON.  
POS.

OBIIT DIE XXII AVGVSTI AN. CHRISTI MDXCH,  
CVM VIXISSET ANNOS LVI, MARITVS SINE QVE-  
RELA ANN. XXV. MENS. VII.

Pag. 107, lin. 16: *Gaudio commutavit*] Defuncto piè *Virdungo*  
parentavit *Rupertus*.

Pag. 108, lin. 10, 11: *Cœlestemq, repetiit patriam*] Epitaphium  
Piccartinum, in sepulchreto nostro, ita habet:

MICHAELIS PICCARTI FRANCI, PROFESSORIS NO-  
RICI: ANNÆ MATRIS, BARBARÆ VXORIS, ET LI-  
BERORVM AC POSTERORVM SEPVLCRVM  
FAMILIARE.

CORPORIS EXSVVIAS GENS HEIC PICCARTA  
REPONIT,

REMIGIO VT COELVM LIBERIORE PETAT.  
ANNO clb lbc XIV.

Vin-



Vindicavit memoriam Viri ab oblivione *Fridericus Rochsius*, Prutenus, Oratione parentali, quæ inscribitur *Piccartomnema*.

Pag. 108. infr. ad marginem: *Physices Professores*] Hos inter silendus non est M. WOLFGANGVS WALDVNGVS, natus Norimbergæ 1554. Suscepit heic loci Physicarum Quæstionum professionem A. 1592: obiit A. 1621. Exstant Disputationum Ipsius Physicarum aliquot Decades, & Orationes de Hominis perfectione, de Anima hominis. Reliquit etiam Encomium Veris, Lagographiam, Charicleam, ac fortasse plura.

Pag. 110 lin. 2: *asseruntur*] Typis verò impressum est Scriptum ejus de Cometis, Latine & Germanicè editum A. 1578.

Pag. ead. 110. lin. 13: **PETRV M SAXONIV M**] Erat hic ex perantiqua Holsata Ditmarsorum gente oriundus, A. 1591 d. 16 Aug. natus. Professioni Matheseos admotus est A. 1617; eamque spartam, quam nactus est, per annos octo ornavit egregie; extinctus d. 16. Sept. A. 1625. Decreverat secum edere Græcos aliquot Tractatus Mathematicos, unà cum Commentationibus suis, si diuturnior lucis usuram concessisset Deus. Fuit *συνχρονος* ac Collega M. JOH. CASP. ODONTII; quorum hic docuit Mathemata Inferiora, Saxonijs Superiora. Tumulus hujus his signatus est verbis:  
Anno 1625 den 16 Septemb. verschied der Ehrenvest und Hochgelehrte Herz Peter Sar von Holstein / bey hiesiger Vniversitet Super. Mathemat. Profess. Ordinarius.

Atque hîc, SUPREMO NVMINI vota solvens, gratiq; animi tabulam suspendens, ADDITAMENTIS meis addo


F I N E M.



Z

IN





# INDEX

## PERSONARVM RERVMQVE PRÆ- CIPVARVM.

### A.

**A** Croateria *Altdorfina*. pag. 8. 145  
Agricola Egid. 54. 163  
*Altdorfii Nomen sive Etymologia.* 133. 134. *Situs amœnus ac salubris.* 8. 133. 143. 144. *Topographia.* 167  
*Altdorfinae Academiae ortus & incrementa.* 6. 7  
Althoferus Christoph. 31. 32. 160  
Alumneum Noric. 8. 151  
Alumnorum Noric. Inspectores. 150. 151  
*Ambulationes circa Altdorfium jucundiores.* 144  
*Anatomicum theatrum.* 8. 82. 169  
*Auditoria Altdorf. vid. supr. Acroateria.*

### B.

Bergius Matth. 105. 174  
Bibliotheca Academica. 8. 145  
    *& seqq.*  
Bruno Jacob. 97. 98. 106  
Bruno Jacob. Pancrat. 74. 98. 131  
Busenreut Joh. 43. 161.

### C.

Cæsares, quorum clementia Lyceum *Altdorf.* incrementa sumfit. 6. 7. 52.  
Caroli Philip. 11. 94. 172  
Chymia docetur *Altdorfii.* 85  
Chymicum Laboratorium *Altdorf.* 170. 171  
Circulares Dispp. & Oratt. 15  
Clapmarius Arnold. 100. 101. 106. 107  
Colerus Christoph. 100  
Collegium *Altdorfinum.* 8. 9. 144  
Colloquium *Altdorfii institutum, tractans negotium de Peccato Originali Austriacum.* 24  
Cregelius Ern. 57  
Crinesius Christoph. 11. 30. 31


### D.

Deubelius Joh. 25  
Dinnerus Andr. 52. 53. 158. 163  
Donellus Hugo. 11. 44 *& seqq.* 162  
Dürrius Joh. Conr. 11. 36. 37. 103. 106. 161

### E.


Epulum post Inaugurationem Vni-





<i>Vniversitatis, magnifice</i>	Alt-	Hofmannus Casp. 11. 70. & seqq.	166
<i>dorsii apparatus.</i>	140		
Erythræus Valent.	11. 91. 92	Hoffmannus Mauric. 10. 66. 69.	167
		82. 83. 131. 167	
F.		Hoffmannus Joh. Mauric. 85.	131
Fabricius Joh. Pater.	33. 34. 160.		
	161	Hortus Academiae Medicus. 10.	
Fabricius Joh. Fil.	33. 131. 160. 161	81. 82. 83. 167 & seqq.	
Felwingerus Joh. Paul.	107. 108.	Hübnerus Matth.	52
	114 & seqq. Ejusdem Scripta.		
	128 & seqq.	I.	
Felwingerus Joh. Jodoc.	107.	Illustres personæ, quæ literis de-	
	124. 125	derunt operam Altdorsii.	15
Frauenburgius Joh. Gerh.	54.	Indenius Matth.	43
	163	Inspectores Alumnorum Noric.	150. 151
Freigius Joh. Thom.	42. 43. 100	Introductio Lycæi Altdorsini.	6.
	161		135
G.		Jordanus Jacob.	25
Geiger Joh. Anton.	131	Joseph Bar Zadok.	12
Gentilis Scipio. 11. 47 & seqq.		Judæorum nequissimorum, facto-	
Giphanius Obert. 11. 44. 105. 106.		rum apud nos proselytorum, tri-	
	161	ga.	12. 13
Glacianus Georg.	92. 96. 172	Jungermannus Ludov. 10. 11. 80	
Gundermannus Joh. Oppidi Alt-		& seqq.	
dorsii encomiastes.	134. 144	K.	
Gymnasii Norimb. ortus. 5. 132.		Kobius Joh. 57. 104. 105. 108. 164	
Ejusdem Translatio Altdor-		Königius Georg. 11. 26. 27. 150.	
fium.	5. 134. 135		160
H.		Königius Georg. Matth. 131.	150
Hackspanius Theodor. 11. 34.		L.	
	35. 36. 99. 100	Laboratorium Chymicum. 170.	
Hammer Georg. Reichard. 131			171
Hedenus Joh. Conr.	36. 95	Linck Henric.	131
Held Joh.	132. 151	Ludwellus Wilh. 11. 54 & seqq.	
Hildericus Edo. 11. 23 & seqq. 98.			163. 164
	158	M. Mar-	
		Z 2	





## M.

Marci Cornelius. 30  
Matthias Christian. 11. 27. 28  
Mauricius Georg. 92. 93. 103  
Melissi Paul. *Carmen de Instau-  
ratione Academiae Altdorf.* 137  
Molitor Christoph. 95. 96. 100.  
Mollerus Dan. Guil. 131

## N.

Natalis primus *Academiae Alt-  
dorf.* 6. 136  
Natalis secundus, *quò ex Aca-  
demia facta Vniversitas.* 7. 139  
Nicolai Christoph. 83 & seqq.  
Nölslerus Georg. 74 & seqq. 108.  
166  
Nummus *fundamentali Collegii  
Altdorf. lapidi insertus* 5. 6.  
135  
Nützelianum museum *Conven-  
tibus publ. alijsq. sollemnioribus  
congressibus destinatum.* 9. in  
eodem erectum Monumentum.  
9. 10

## O.

Odontius Casp. 110  
Odontius Joh. Casp. 110. 175  
Oratio Mich. Piccarti, *quà ex-  
cepit hic Altdorfii Electorem  
Moguntinum.* 153 & seqq.  
Ordinatio Candidatorum Mini-  
sterii Norimb. celebratur Alt-  
dorfii. 15  
Otto Jul. Conr. 12. 152

## P.

Patriciorum Norimb. *Familia  
præcipue.* 7. 141  
Paulus Pragenfis, *dictus antea  
Elchanon.* 13  
Pfalerus Georg. 23. 98. 158  
Photinianorum obreptitio à ve-  
neno purgata *Academia.* 16. 158  
Piccartus Joh. 23. 158  
Piccartus Mich. 11. 23. 103. 104.  
108. 174. *Ejusdem Oratio, quã  
excepit Altdorfii Electorem  
Mogunt.* 153 & seqq.  
Poculum Academicum, *quidq.  
eidem inscriptum.* 140. 141  
De Pomis Christian. 13  
In Porticu Collegii *quæ Inscri-  
ptio.* 135. 136  
Prætorius Joh. 11. 109. 110. 175  
Principes, *qui Altdorfii studiis na-  
vârunt operam.* 15. 152. 153  
Principes *Altdorfii hospites.* 153.  
155. 156. 139  
Privilegia *Academiae Altdorf. ab  
Impp. concessa.* 139. 140  
Procancellarii *Academiae Alt-  
dorf.* 7. 143.  
Puccius Francisc. *Altdorfio mox  
cedere coactus.* 17


## Q.

Queccius Georg. 97. 106

## R.

Rectores *Academiae Illustres.*  
15. 156 & seqq.  
Reinhart Luc. Fried. 131  
Risius





Risius Henr. 96. 97. 173.

Rittershusius Conr. 11. 49 & seqq. 163

Rittershusius Nicol. 57. 164. 165

Ritterus Georg. 28. 29. 160

Rötenbeccius Georg. Paul. 125. 131.

Rupertus Christoph. Adam. 11. 101 & seqq. 173

S.

Saubertus Joh. Pater. 29. 30. 160.

Saubertus Joh. Fil. 29. 131. 151.

Saxonius Petr. 110. 175.

Schæfer Georg. Christoph. 164.

Scherbius Philip. 11. 66. 67. 103. 108. 166

Schmidtmajeri J. Jod. sumtibus

Typographia Altdorffii literis Orientt. instructa. 34. 161. Biblio-

theca Academica aucta. 147

Scholarchæ sive Curatores Academiae Altdorffinae. 7. 141. 142

Schopperus Jacob. 25. 26. 159. 160

Schwäger Joh. Leonh. 131

Schwenterus Dan. 11. 99. 110. 111

Sigelius Georg. 23. 158

Societas Medica Altdorff. 169. 170

Sonerus Ernest. 11. 67. & seqq. 108. 166

Sprengergerus Joh. Kilian. 25

Studioforum, civium Academiae Altdorffinae, numerus. 15. 152

Sturmius Joh. Christoph. 131

T.

Talius Dan. 99

Taurellus Nicol. 11. 64 & seqq. 108. 165

Tetenius Jacob. 52. 163

Textor Joh. Wolfg. 165

Theatrum Anatomicum. 8. 82. 169

Topographia Altdorffina & Vinciniae. 167

Trew Abd. 109. 111

Tydæus Jacob. 94. 95. 103. 173

Typographia Hackspaniana literis Orientt. instructa. 35. 161

V.

Virdungus Mich. 11. 93. 94. 101. 107. 174

Vngepauerus Erasim. 53. 54. 163

Vngertus Joh. 28. 160

Vniversitatis Altdorffinae solennis Inauguratio. 139 & seqq.

Volkartus Georg. 25. 159

W.

Wagenfeilius Joh. Christoph. 131. 150. 152

Waldungus Wolfg. 175


Weinmannus Joh. 32. 33

Welferianum Auditorium. 145

Wesenbecius Petr. 21. 44

Z.

Zarfossi Ern. Christian. 14





*Menda serius observata:*

Pag. 4. lin. 6. lege: *parentū* imò Alexandri Severi. p. 6. l. 16: *patula*.  
p. 8. l. 13: *elegantissimam*. p. 21. l. 22: *illa novū*. p. 25. l. 9:  
*duodecimo die Maji*. p. 46. l. 21: quòd. p. ead. l. ult. EIDEL-  
BERGÆ. p. 47. l. 8: REP. p. 49. ad marg. *Cl. Königii*. p. 90.  
l. 12: *ἐγκυκλοπαιδείαν*. p. 95. l. 33: *alloquiis*. p. 99. l. 5:  
1585. p. 111. l. 8: *Matheseos*. Numerus pagg. 111 & 112  
perperam bis positus. p. 127. l. 29: *stadium*. p. 140: *Bono*.  
p. 143. l. 31: *Post Egressus urbe dele comma*. p. 152. l. 3: *Naph-*  
*thali*. p. 160. l. 12 & 13: *Heptas*. p. 165. l. 17: *Roten-*  
*burgo*. p. 173. l. 29: *Bis sexto*.

*Hac & plura fortè quæ irrepsērunt menda, plurimū typographica, Benevolus Lēctor corrīgat, ac benignè (quod à me sæpe pręstitum aliis) interpretetur.*


1. 6. 226



atula.  
19:  
DEL.  
p. 90.  
L. f:  
X 112  
Bom.  
Naph.  
Loren.

typo-  
quod























005643777

16